

國學叢本基書

諸子平議

俞樾著

夢陶

商務印書館發行

上海图书馆藏书



A541 212 0006 0766B

書叢本基學國

議平子諸

著 楊 倘



行發館書印務局

1654376

序目

諸子平議三十五卷德清俞樾譏樾有羣經平議三十五卷已自爲序錄矣及諸子平議成又序其端曰聖人之道具在於經而周秦兩漢諸子之書亦各有所得雖以申韓之刻薄莊列之怪誕要各本其心之所獨得者而著之書非如後人剽竊陳言一倡百和者也且其書往往可以考證經義不必稱引其文而古言古義居然可見故讀莊子人閒世篇曰大枝折小枝泄泄卽挫之段字謂牽引也而詩七月篇以伐遠揚猗彼女桑之義見矣讀賈子君道篇曰文王有志爲臺令匠規之而詩靈臺篇經始靈臺經之營之義見矣讀管子大匡篇曰臣祿齊國之政而知尚書今文家說大麓古有此說讀董子春秋繁露王道篇曰恩衛葆而知春秋左氏傳齊人來歸衛俘字固不誤讀商子禁使篇曰驕虞以相監而知韓魯詩說管仲以仁爲掌鳥獸官亦古義也讀楊子吾子篇曰如其智如其智而知論語如其仁如其仁非孔子之許以驕虞爲掌鳥獸官亦古義也讀楊子五百篇曰月未望則載魄于西而知僞孔傳解哉生魄之誤讀商子賞刑篇曰昔湯管仲以仁矣讀楊子五百篇曰月未望則載魄于西而知僞孔傳解哉生魄之誤讀商子賞刑篇曰昔湯封於贊茅而知皇甫謐謂湯居穀熟之非讀呂氏春秋音律篇曰固天閉地陽氣且泄而知月令以固而閉地氣沮泄之文有奪誤也讀淮南子時則篇曰大禱祭于公社而知月令大割祠于公社割乃周之誤字周乃禡之假字禡祠卽禱祭也凡此之類皆秦火以前六經舊說孤文隻字尋繹無窮烏呼西漢經師

之緒論已可寶貴。況又在其前歟。然諸子之書文詞奧衍。且多古文假借字。注家不能盡通。而儒者又屏置弗道。傳寫苟且。莫或訂正。顛到錯亂。讀者難之。樾治經之暇。旁及諸子。不揣鄙陋。用羣經平議之例。爲諸子平議。亦三十五卷。今錄其目於左方。

管子平議六卷

晏子春秋平議一卷

老子平議一卷

墨子平議三卷

荀子平議四卷

列子平議一卷

莊子平議三卷

商子平議一卷

韓非子平議一卷

呂氏春秋平議三卷

董子春秋繁露平議二卷

賈子平議二卷

淮南內經平議四卷

楊子太元經平議一卷

楊子法言平議二卷

是書也成與羣經平議同置函中未出也及羣經平議刻成而此書亦遂不自祕稍稍聞於人諸君子聞有此書乃謀醵錢而刻之經始於強圉單閼之歲至上章敦牂而始觀厥成蓋非一日之功亦非一人之力也詩不云乎無德不醻輒仿漢人碑陰之例書其名字焉曰潘君爵字偉如曰李君鴻裔字眉生曰吳君煦字曉帆曰吳君雲字平齋曰郭君德炎字日長曰劉君佐禹字治卿曰沈君璋寶字書森曰陳君其元字子莊曰馮君渭字少渠烏呼成書難傳書不易諸君子之刻此書將謂此書足以傳乎抑愛樾而姑以徇其意乎樾固不足以知之

諸子平議卷一

管子一

守國之度在飾四維牧民

樾謹按禮義廉恥非由修飾飾當讀爲飭詩六月篇戎車旣飭毛傳曰飭正也飭四維者正四維也飭與飾古通用易雜卦傳蠱則飭也釋文曰王肅本作飾禮記樂記篇復亂以飭歸史記樂書作復亂以飾歸並其證矣

順民之經

樾謹按順當讀爲訓訓民之經言教訓其民之道也古順訓通用尙書洪範篇于帝其訓是訓是行史記宋微子世家訓並作順是其證

不璋兩原則刑乃繁

樾謹按尹注云璋當爲章章明也兩原謂妄之原上無量也淫之原不禁文巧也尹氏據上文以說兩原是矣讀璋爲章未得其字璋乃璋字之誤說文士部璋擁也經典多以障爲之呂氏春秋貴直篇是障其原而欲其水也高誘注曰障塞也障塞卽璋擁也此云不璋兩原正與呂氏春秋所云障其原者

同義若非誤作璋亦必改而爲障矣。

毋曰不同生。

樾謹按生與姓古字通。哀四年春秋經公孫姓釋文曰姓本又作生。然則同生猶同姓也。詩杕杜篇不如我同姓毛傳曰同姓同祖也。尹注謂不與汝同家而生未達古義。

無私者可置以爲政。

樾謹按政當作正。詩節南山篇不自爲政。禮記緇衣篇作不自爲正。史記秦始皇紀始皇名政。徐廣曰政一作正是政正古通用爾雅釋詁正長也可置以爲正者可置以爲長也。與上文可立以爲長下文可奉以爲君文義一律。

山高而不崩則祈羊至矣形勢。

樾謹按祈當讀爲鑿說文血部鑿以血有所匱涂祭也。周官或以幾爲之。大士職凡幾珥沈辜是也。或以匱爲之。士師職凡匱珥是也。或以祈爲之。肆師職及其祈珥。小子職掌珥于社稷祈于五祀是也。肆師之祈故書作幾。小子之祈鄭云或爲匱是知祈爲匱字矣。依說文正當作鑿。凡作幾者鑿之省。凡作匱者音同也。陸德明云匱音機也。鄭注於士師職云匱卽釁禮之事用牲毛者曰匱羽者曰卽此云祈羊正毛者曰匱也。尹注烹羊以祭故曰祈羊。北宋本作耳羊以祭耳卽卽之壞字蓋以卽釋匱也。匱卽

雖有毛羽之別.然散文亦通.山海經中山經云.祠毛用一雄雞一牝豚刲.郭璞注曰.刲亦割刺之名.夫雞豚並言刲.是刲卽通稱之證.尹注以卽羊釋祈羊.未乖古義.因卽壞作耳.後人遂臆改爲烹.并祈字之義而亦晦矣.

衡命者君之尊也.

樾謹按衡命形勢解作衡令.其解曰.令出而民衡之.此作衡命.雖於義亦通.然非管子原文矣.當據解訂正.

抱蜀不言而廟堂旣修.

樾謹按形勢解曰.所謂抱蜀者.祠器也.宋氏于庭據公羊祠兵左穀作治兵.謂祠器卽治器.又據方言蜀一也.謂抱蜀卽老子所謂抱一.其說祠字是矣.至抱一之說.終有未安.抱一可謂之治道.不可謂之治器.一也.影宋本第一卷音釋曰.蜀音猶.宋謂猶乃獨字之誤.是固然矣.然蜀不當音獨.二也.竊疑管子原文當作抱欶.欶卽櫝字也.詩葛生篇傳.韞而藏之.釋文曰.韞本作欶.又作櫝.是韞欶櫝三字通用.古者國之寶器.皆櫝而藏之.故論語曰.龜玉毀於櫝中.而陳國所分肅慎氏之貢.亦藏於金櫝.事見魯語.抱欶不言而廟堂旣修者.言有德之君.但謹守宗器.恭默不言.而廟堂之上.已無所不治也.欶字經典罕見.故須音釋.宋本音獨.正爲欶字作音.自字壞作蜀.遂不可曉矣.

飛蓬之間不在所賓。

樾謹按尹注曰。蓬飛因風動搖不定。喻二三之聲問。明主所不賓敬。此未達問字之義也。問猶言也。廣雅釋詁言問也。言爲問。故問亦爲言。飛蓬之間。猶飛蓬之言也。形勢解曰。無儀法程式。蜚搖而無所定。謂之蜚蓬之間。蜚蓬之間明主不聽也。無度之言。明主不許也。然則蜚蓬之間。卽無度之言。問字之義。於此可見矣。

裁大者衆之所比也。

樾謹按尹注曰。裁斷也。能斷大事。衆必比之。此未達裁字之義也。裁讀爲材。文選長笛賦。裁已當適便易持。李善注曰。裁或爲材。是裁材古通用。國語鄭注曰。材兆物。韋昭注曰。材裁也。材可爲裁。故裁亦可爲材。裁大者衆之所比。謂材質大者容物必多也。形勢解曰。天之裁大。故能兼覆萬物。地之裁大。故能兼載萬物。人主之裁大。故容物多而衆人得比焉。裁字並當讀爲材。謂天之材大。地之材大。人主之材大也。若從尹注訓裁爲斷。不可通矣。

美人之懷定服而勿厭也。

樾謹按此句之義。爲不可曉。據形勢解曰。貴富尊顯民歸樂之人。主莫不欲也。故欲民之懷樂己者。必服道德而勿厭也。而民懷樂之。然則管子原文本作欲人之懷。必服而勿厭也。故其解如此。若作美人。

之懷定服而勿厭則解何以不及美字定字之義乎尹注曰欲令人貴美而懷歸者須安定服行道德勿有疲厭則其所據本已誤夫令人貴美而懷歸不得云美人之懷卽尹注之迂回難通知管子原文必不如是當據後解訂正

曙戒勿怠後櫛逢殃

樾謹按既勿怠矣又何逢殃之有勿疑夕字之誤曙戒夕怠言朝戒之而夕怠之也下文云朝忘其事夕失其功此以夕對曙言猶彼以夕對朝言矣

衣冠不正則賓者不肅

樾謹按賓讀爲擯古字通用尙書堯典賓于四門鄭注以賓爲擯是也主君衣冠不正則擯者亦不肅若上文云上失其位則下踰其節矣

生棟覆屋

樾謹按生當讀爲笙方言曰笙細也自關而西秦晉之間凡細貌謂之笙見其可也喜之有徵見其不可也惡之有刑權修

樾謹按刑當作形孝經形于四海釋文曰形又作刑荀子疆國篇刑范正注曰刑與形同成相篇讒夫弃之形是詰注曰形當爲刑是形刑古通用也惡之有形與喜之有徵文義正同尹氏解喜之有徵曰

徵驗也必有恩賜以驗見喜無空然矣則惡之有形義亦然也韓非子難三篇引管子曰見其可說之有證見其不可惡之有形是其明證

賞罰不信於其所見而求其所不見之爲之化

樾謹按化當作外字之誤也爲之二字衍文此本作賞罰不信於其所見而求其所不見之外因外字隸書或作外見魯峻碑化字隸書或作冰見夏承碑兩形相似故外誤爲化後人又加爲之二字使成義耳韓非子引此正作賞罰不信於所見而求所不見之外

上好詐謀閒欺

樾謹按尹注曰閒隔也有所隔礙而欺誑也然隔礙與欺誑判然兩義恐非閒欺並言之本旨閒當讀爲姦昭二十二年經文大蒐於昌閒左穀並同而公羊作昌姦是其例矣

道塗無行禽立政

樾謹按尹注曰無禽獸之行此曲說也禽獸之行謂之禽行已於文義未安況倒其文曰行禽乎此承上文便辟無威於國而言禽猶囚也襄二十四年左傳收禽挾囚是禽與囚同蓋以拘囚而言則謂之囚以禽獲而言則謂之禽也便辟左右之人擅作威福則赭衣滿路矣今也不然是以道塗無行禽也下文疏遠無蔽獄孤寡無隱治皆以獄訟言可證此文禽字之義

疏遠無蔽獄孤寡無隱治

樾謹按無隱治與無蔽獄同義周官小宰職曰聽其治訟司市職曰聽其大治大訟小治小訟胥師職曰聽其小治小訟而斷之皆治訟並言治亦訟也公羊僖二十八年傳叔武爲踐士之會治反衛侯何休解詁曰叔武訟治於晉文公令白王者反衛侯使還國也是古人以治爲訟之證然則隱治與蔽獄一也

大德不至仁不可以授國柄

樾謹按尹注曰德雖大而仁不至或包藏禍心故不可授國柄此注於義未安大德之人何至包藏禍心乎羣書治要引此作大位疑亦後人以意改之未足據也大德不至仁仁乃人之段字謂雖有大德而獨善其身不能及人也下文曰卿相不得衆國之危也卽承此文而言惟不至人故不得衆人卽衆也

草木不植成

樾謹按植本作惠古德字也德與得通易升象傳君子以順德釋文曰德姚本作得詩碩鼠篇莫我有德呂氏春秋舉難篇作莫我有得並其證也此云草木不惠成卽草木不得成以惠爲得猶以得爲德耳字壞作直因誤爲植失其義矣宋本竟改作得則又非管子之原文也

五鄉之師出朝遂于鄉官致于鄉屬及于游宗皆受憲

樾謹按王氏引之曰致于鄉屬于字衍文然此文實非止衍一于字也遂于鄉官句衍鄉字及于游宗句亦衍于字管子原文當云遂于官致鄉屬及游宗皆受憲官古館字周易隨初九官有渝釋文曰官蜀才本作館蓋官館古今字也官字从宀从巠宀交覆深屋也自猶衆也以屋覆衆是官之本義爲館舍字也官司者其引申之義本義爲引申義所奪乃別製从食之館字說文自部有官食部有館歧而二之殆非矣故古書每以官爲館禮記曲禮篇在官言官鄭注曰官謂版圖文書之處玉藻篇在官不俟屢注曰官謂朝廷治事處皆卽館字也此文官字亦然遂于官致鄉屬及游宗皆受憲言五鄉之師出朝遂于館舍之中致鄉屬及游宗而受憲焉下文曰憲既布乃致令焉尹注曰致令于君夫受憲之後卽致令于君則未反其鄉可知所謂官者卽在國中不得有鄉字明矣後人不達官字之義疑遂于官三字未足妄增鄉字又疑鄉官鄉屬爲對文鄉官上有于字鄉屬上亦不得無于字兩句旣皆有于字則及游宗三字文不成義亦不得無于字轉展相加遂成此誤矣又按戒篇曰進二子於里官尹注曰里官謂里尉也齊國之法舉賢必自里尉始故令里官進二子將旌別而用之夫管仲隰朋皆國之大臣乃令里官進之不亦夔乎且果如此當云令里官進二子不當云進二子於里官尹注非也官亦卽館字里字亦後人不得其義而妄加也此所謂官正鄭君注玉藻所謂朝廷治事處者桓公進二子

於官再拜頓首誠重之也後人不達古訓率意增益或爲鄉官或爲里官大可笑矣使民於宮室之用薪蒸之所積虞師之事也

樾謹按當作使足於宮室之用薪蒸之積足字與民字相似而誤所字衍文

正地者其實必正長亦正短亦正小亦正大亦正長短大小盡正正不正則官不理

乘馬

樾謹按正不正句上正字乃衍文也此承正地者而言不正則官不理卽謂地不正也今作正不正不可通矣蓋涉上句長短大小盡正而誤疊正字耳下爵位章云是故爵位正而民不怨民不怨則不亂然後義可理理不正則不可以治理不正句亦衍理字此承爵位正而言不正則不可以治卽謂爵位不正也今作理不正蓋亦涉上句然後義可理而誤疊理字耳兩文一例其誤亦同皆宜訂正是故百貨賤則百利不得百利不得則百事治

樾謹按太平御覽資產部引此文作百利得乃後人不得其義而臆改也管子之意本謂百貨賤則百利不得於是人人竭其智力以求利而百事反因之治下文云是故事者生於慮成於務失於傲不慮則不生不務則不成不傲則不失正申說此文之義百利不得則謀慮從此出事之所以生也又不得不盡力於所當務事之所以成也若百利皆得則轉以輕傲而失之矣後人不達此旨疑百利不得何以百事能治遂妄刪不字然貨賤何以得利其說殊不可通孫氏星衍王氏念孫反以爲是由未詳繹

下文故耳。

季絹三十三制當一鑑。

樾謹按尹氏於三十三下出注曰。三等其下者曰季。是誤以季絹三十三爲句。失其讀也。此當以九字連讀。謂季絹三十三制。而當黃金一鑑也。儀禮旣夕篇。贈用制幣。鄭注曰。丈八尺曰制。

秋日大稽。與民數得亡。

樾謹按與讀爲舉。周官師氏王舉則從。故書舉爲與。是古字通也。舉民數得亡。謂記錄民數之得失也。襄二十七年左傳仲尼使舉是禮也。釋文引沈注曰。舉謂記錄之也。是其義。

十仞見水不大潦。五尺見水不大旱。

樾謹按十仞當爲一仞。一切見水。其地較高。故不大潦。五尺見水。其地較卑。故不大旱。若作十仞則太縣絕矣。其說更詳見下條。

十一仞見水輕征。十分去二三。二則去三四。四則去四五。則去半。比之於山。

樾謹按王氏引之曰。以五則去半推之。則當爲一仞見水。輕征。十分去一二。則去二三。則去三四。四則去四五。則去半。此說是也。上文云。一切見水不大潦。五尺見水不大旱。此卽承上而言。益知上文之誤。王氏但知此文十字之衍。而不知上文十字之誤。故其說猶未盡得也。

五尺見水.十分去一.四則去三.三則去二.二則去一.三尺而見水.比之於澤.

樾謹按尹注以五尺見水屬上比之於山爲義解曰.言平地五仞見水.不知五尺見水與上文一切見水相對爲文.尹注誠非也.劉氏續曰.當澇之時.若高亢地十一仞見水.則常征十分中免二三分.十二仞見水.則免三四分.十四仞見水.則免四分.十五仞見水.則免五分.以其極高難灌漑.可以比於山也.當旱之時.若汙下地五尺見水.則常征十分免四分.四尺見水.則免三分.三分見水.則免二分.二尺見水.則免一分.以其極低易灌漑.可以比於澤也.十分去一.當作十分去四.乃字之誤.今按劉氏所說亦未得也.十一仞見水數句.王氏引之已訂正矣.至此文亦有錯誤.當作五尺見水.十分去一.四則去二.三則去三.二則去四.一尺而見水.比之於澤.此王氏所未及訂正也.請合上文而具論之.上文曰.一切見水不大潦.然則一切見水之地.所患非潦也.其輕征之故.以旱不以潦.故一切見水.十分去一.至二仞見水.地更高矣.故十分去二.至三仞見水.地更高矣.故十分去三.推而至於五仞見水.則比之於山地.愈高旱愈甚也.上文曰.五尺見水不大旱.然則五尺見水之地.所患非旱也.其輕征之故.以潦不以旱.故五尺見水.十分去一.至四尺見水.地更卑矣.故十分去二.三尺見水.地更卑矣.故十分去三.推而至於一尺見水.則比之於澤地.愈卑潦愈甚也.一尺見水之地.當去十分之五.此不言者.以上文五則去半推之可見.蓋比於山與比於澤同也.古書遇數目字.往往錯誤.春秋繁露爵國

篇所說諸數無一不誤。辯見本書，然則此文之誤亦無怪矣。劉氏以旱爲潦，以潦爲旱，兩義顛倒，故不得其解。且此文惟五尺見水，十分去一兩句不誤。劉氏反以爲誤，信古書之難讀也。

民之生也，辟則愚，閉則類。

樾謹按尹注曰：縱其淫辟，則昏愚類善也；閉其淫辟，則自爲善。此注非也。辟卽闢之假借字，闢與閉正相對。此兩句之誼，卽所謂民可使由不可使知者。老子曰：其政悶悶，其民醇醇；其政察察，其民缺缺。亦此意也。管子書與老子大指每相近。

若是安治矣。七法

樾謹按上文云：若是而能治民者未之有也。下文云：形勢器械未具，猶之不治也。上下文均無安字，則此安字乃語辭也。古書每以安爲語辭。王氏引之釋詞，引管子書凡九事，而不及此，蓋亦誤以爲實字矣。

猶左書而右息之。

樾謹按息猶滅也。古人文字皆先書於竹。風俗通曰：劉向校書皆先書竹，改易刪定可繕寫者以上素。是也。書竹故可滅去，以左手書之之難，而右手滅之之易，其不成也必矣。尹注曰：息止也。未得其義。世主所貴者實也，所親者戚也，所愛者民也，所重者爵祿也。亡主則不然。

樾謹按實乃寶字之誤。王氏念孫已訂正矣。下文曰不爲重寶虧其命。不爲愛親危其社稷。不爲愛人枉其法。不爲重祿爵分其威。皆非世主所及。乃以爲亡主。殊不可曉。亡疑當作良。良字古作萇。闕其上半。則爲亡矣。襄十四年左傳。良君將賞善而刑淫。此稱良主。猶彼稱良君。

立少而觀多。則天下懷之矣。

樾謹按尹注曰。或曰觀當爲勸。然大戴記四代篇曰。臣願君之立知而以觀聞也。亦以立與觀對。則觀字不誤。立知觀聞者。知聞卽見聞也。謂立乎近以觀乎遠也。說詳大戴記。此云立少觀多。義正與彼相近。

凡將立事。正彼天植。版法。

樾謹按尹注曰。謂順天道以種植。此義非也。植乃惠字之誤。古德字也。惠字壞作直。因誤作植矣。管子原文本作凡將立事。正彼天惠。故版法解曰。天惠者天心也。周官師氏職。鄭注曰。在心爲德。觀天心之解。知其字必作惠。若作天植。於義難通矣。

遠近高下。各得其嗣。

樾謹按嗣讀爲司。尚書高宗彤日篇。王司敬民。史記殷本紀。作王嗣敬民。是古字通也。各得其嗣。卽各得其司。尹注曰。嗣續也。失之。

行歐養幼官、

樾謹按歐之與養二義不倫。尹注曰。謂禽獸之屬能爲苗害者。時歐逐之所以養嘉穀也。斯亦曲說矣。歐當讀爲嘔。莊子人間世篇以下。僕拊人之民。釋文引崔注曰。僕拊猶嘔。謂養也。字亦作嫗。禮記樂記篇。煦嫗覆育萬物。此云嘔養。彼云煦嫗覆育。其義正同。嘔即嫗也。養即育也。

秋行夏政葉行春政華

樾謹按葉字無義。淮南子時則篇。作秋行夏令華。行春令榮。疑此葉字是榮字之誤。蓋榮華二字義本相近。故管子言秋行夏政榮行春政華。而淮南子言秋行夏令華行春令榮。文雖互易。義實不殊也。

器成於僇

樾謹按尹注曰。冬行刑之時。故成僇器。此妄說也。僇者僇之𠂇字。說文彑部。𠂇細文也。器成於僇。與下句教行於鈔同義。鈔猶眇也。皆謂始於微眇也。僇聲與眇聲相近。故穆字從僇得聲。而昭穆或爲昭繆。穆公或爲繆公。然則以僇爲僇。猶以繆爲繆矣。

動靜不記行止無量戒

樾謹按戒一字爲句。承止爲義。言動靜不記。行止無量。所當戒也。修春秋冬夏之常祭。倉天壤山川之故祀。必以時。

樾謹按食者飭之壞字修與飭義相近修春秋冬夏之常祭飭天壞山川之故祀二句相對成文尹注以常祭食三字連讀解爲常所祭常所食失其義矣

官處四體而無禮者

樾謹按處四體而無禮者與下文立四義而毋議者相對爲文尹注以官處二字連讀解曰官處謂處官也失之

立四義而毋議者

樾謹按議讀爲俄說文人部俄行頃也廣雅釋詁俄袤也是俄有傾邪之意管子書或以義爲之明法解曰雖有大義主無從知之大義卽大姦也是以義爲俄也此文又以議爲之立四義而毋議卽立四義而毋俄謂不傾邪也尹注以無異議說之未達假借之旨

二千里之外三千里之內諸侯五年而會至習命三年名卿請事二年大夫通吉凶十年重適入正禮義五年大夫請受變

樾謹按三年二年之下又云十年五年於義難曉諸侯旣五年而會至習命矣安得又使大夫請受變再及五年卽爲十年亦是五年而會之期安得又使重適入至幼官圖十年作七年亦不可通合十年計之則爲七年就五年計之則卽二年耳今以上下文求之此皆傳寫誤也蓋三千里內之諸侯二年

而使大夫通吉凶三年而使名卿請事至五年則自來會矣計五年之中止空閒二年適當未會之前一年及旣會之後一年立法周密不容更有五年十年之事此二句當在下文三千里之外諸侯世一至之下蓋世一至則太疏闊故五年必使大夫請受變十年必使重適入正禮義也傳寫之誤所宜訂正

幾行義勝之

樾謹按說文人部機精謹也幾卽機之段字謂精謹行義也行義二字平列賈子俗激篇此其無行義之尤至者已尹注謂庶幾行義者非是

交物因方

樾謹按交讀爲校謂考校其物必因其方也尹注謂交質之物因方之有非是

由守不慎

樾謹按由疑申字之誤哀二十六年左傳申閼守陴

死亡不食

樾謹按食乃飭之壞字上文飭天壞山川之故祀今亦誤作食是其證也死亡不食當作死亡不飭禮記月令篇曰飭死事卽此飭字之義

不可數則爲詐不敢鄉。

樾謹按爲詐當作僞詐爲乃僞之假字兵法篇作不可數則僞詐不敢響是其證。

箸於取與之分則得地而不執

樾謹按執讀爲慄漢書陳萬年傳豪疆執服注曰執讀曰慄是其例也說文心部慄怖也怖卽今怖字箸於取與之分則得地而無後患故不慄與上文審於動靜之務則功得而無患義正相同尹注謂不慄執失之

慎將宿五輔

樾謹按尹注曰傳送貨財必慎止宿其義甚爲迂曲且上文修道途便關市皆二字平列則將宿二字亦當平列廣雅釋詁將行也宿止也然則將宿猶言行止耳

貧富無度則失

樾謹按失當讀爲軼廣雅釋詁軼過也言貧富無度則相過軼也尹注曰失其節制非是

士修身功材

樾謹按功讀爲攻謂攻治其材蘡也尹注謂士旣修身必於蘡能有功非是

修飢餓

樾謹按飢餓不當言修。修乃備字之誤。備俗作脩。脩誤作脩。又誤作修耳。版法篇修長在乎任賢。據後解則作備長。此本書二字相亂之證也。

今工以巧矣。而民不足於備用者。其悅在玩好。

樾謹按尹注曰。君悅玩好。則民務末作。故備用不足。然本文無君字。注義非也。悅乃說字之誤。其說在玩好。言求其所以然之說。則在玩好也。韓子內儲說外儲說篇。並有其說在某某之文。墨子經下篇。言說在某某者七十八句。蓋古人自有此文法。下文其悅在珍怪。其悅在文繡。義並同此。

毋監于讒。宙合。

樾謹按毋監于讒。義不可通。監當讀爲噲。監本從鵠省聲。與噲聲同。故得通用也。字又作噲。淮南子齊俗篇。荆吳芬馨。以噲其口。噲卽啗字。蓋古或以監爲啗。因卽監字而加口旁耳。管子作監者。啗之假字。淮南子作噲者。啗之俗字矣。

不用其區區。

樾謹按區字不當疊。下文云不用其區。句區者虛也。可知此文不疊區字。蓋卽涉下文兩區字相連而誤衍耳。

故君出令正其國。而無齊其欲。

樾謹按齊讀爲濟。荀子王霸篇以國齊義。楊倞注曰。齊當爲濟。是其例也。此言君但求正其國。而無自濟其私欲也。尹注非。

夫繩扶撥以爲正。

樾謹按說文艸部艸足刺艸也。讀若撥。此文撥字卽艸之假字。刺艸則有不正之意。故與正爲對文也。苟子正論篇不能以撥弓曲矢中亦是以撥爲艸。又或以發爲之。考工記弓人曰。蓄栗不迤。則弓不發。不依其樂。

樾謹按依讀爲殷。禮記中庸篇壹戎衣。鄭注曰。衣讀如殷。聲之誤也。齊人言殷聲如衣。然則管子書以依爲殷。正齊言耳。不殷其樂。謂不盛其樂也。說文舟部曰。作樂之盛稱殷業明而不矜。

樾謹按業明而不矜。謂業盛而不矜也。淮南說林篇長而愈明。高誘注曰。明猶盛也。雖廣其威可損也。爲威遂臆改可須爲可損矣。

樾謹按北宋本損作須。然則威疑威字之誤。其威可須。言其滅亡可待也。涉下文是以威盡焉而誤。威失植之正而不謬。不可賢也。植而無能。不可善也。

樾謹按此本作夫植之正而不謬。涉上文兩失字而誤作失耳。植而無能句文義未足。疑有闕文。所賢美於聖人者。以其與變化隨也。

樾謹按美乃善字之誤。上文云夫植之正而不謬。不可賢也。植而無能。不可善也。此云所賢善於聖人者。卽承上而言。不容有異文。

薄承瀼而不滿。

樾謹按說文水部。澗淺水也。字亦作泊。此文薄字。卽泊之假字。廣韻博字注曰。古有博勞。善相馬。博勞卽伯勞也。然則薄之通作泊。猶博之通作伯矣。上句泉踰瀼而不盡。與此相對成文。泉是水之深者。泊是水之淺者。因以薄爲之。尹注遂失其義矣。

十日不食無儔類盡死矣。樞言。

樾謹按無字衍文。旣云盡死矣。不必言無涉。上句七日不食無國土而衍。能而稷乎。能而麥乎。

樾謹按而字並當作爲。古爲字作𦥑。故與而字相似而誤。襄十四年左傳。射爲禮乎。太平御覽工藝部引作射而禮乎。孟子滕文公篇。方里而井。論語顏淵篇正義。引作方里爲井。並其證矣。

諸子平議卷二

管子二

教訓習俗者衆則君民化變而不自知也。八觀

樾謹按化變而不自知當以民言不當以君言此君字涉下文明君在上位句而衍萬家以下則就山澤可矣萬家以上則去山澤可矣

樾謹按下上二字疑傳寫互易上云萬家之衆可食之地方五十里可以爲足矣是方五十里之地可食萬家之衆然萬家或有盈有絀此復分別言之若在萬家以上者則宜兼就山澤之地若在萬家以下者則山澤之地可去也如今本義不可通所宜訂正

論賢不鄉舉則士不及行

樾謹按及當爲服服從及聲古或止作及與及相似往往致誤僖二十四年左傳子臧之服不稱也夫釋文作子臧之及曰一本作之服是其證也尚書呂刑篇何敬非刑何度非及及當爲服刑謂五刑服謂五服卽堯典之五刑五服也大戴記王言篇及其明德也及亦當爲服謂天下皆服其明德也說詳羣經平議此文士不及行當作士不服行謂士不服行道蘡也字誤作及失其義矣

則豪傑材臣不務竭能。

樾謹按臣當依下文作人。

良田不在戰士三年而兵弱。

樾謹按兵字衍文也。三年而弱。與下五年而破。十年而亡。十年而滅。句法一律。故申說之曰。戰不勝。弱也。地四削入諸侯。破也。離本國徙都邑。亡也。有者異姓滅也。可證此文無兵字。則國居而自毀矣。

樾謹按古謂坐爲居。如所稱居吾語汝之類是也。居而自毀者。坐而自毀也。猶云坐而待亡也。尹注曰。居然自致毀滅。以居爲居然。文不成義矣。

法制不議。則民不相私。法禁。

樾謹按議當讀爲俄。說詳幼官篇立四義而無議者。下俄者傾也邪也。言法制平正而不傾喪。則民不相私也。尹注曰。君出法制下。不敢議。未達假借之旨。

故下與官列法。而上與君分威。

樾謹按列讀爲裂。裂亦分也。列裂古通用。五輔篇曰。大袂列。卽其證矣。

毋事治職。但力事屬私王官私君事。去非其人。而人私行者。聖王之禁也。

樾謹按但力事屬四字爲句。毋事治職但力事屬。言不以治職爲事。而其所竭力從事者。惟在互爲連屬也。私王官爲句。私君事爲句。言以王官爲私。以君事爲私也。去非其人而人私行者爲句。去乃法字之誤。言法本非其人所宜行。而其人私行之也。尹失其讀。故所解皆非。

交於利通。而獲於貧富。

樾謹按利通猶利達也。言以賄賂結交利達之人。而所從得者。皆出於貧窮之民也。尹注非絕而定。

樾謹按絕猶截也。釋名釋言語曰。絕截也。如割截也。穆天子傳。乃絕漳水。郭注曰。絕猶截也。是絕截義通。絕而定。猶截而定。謂整齊而定也。詩長發篇。海外有截。鄭箋云。截整齊也。是其義矣。

凡君國之重器。重令。

樾謹按宋本作右國。當從之。右讀爲有。後人不知右之通作有。而疑爲君之壞字。因臆改之耳。天道之數。

樾謹按爾雅釋詁。數疾也。禮記曾子問篇。不知其已之遲數。鄭注曰。數讀爲速。此云天道之數。猶云天道之速。與下句人心之變。相對爲文。下云至則反盛則衰。正是言天道之速也。尹注謂天道數終是讀爲數。且幾終之數失之。

國無怪嚴法法

樾謹按說文心部怪異也禮記大傳篇收族故宗廟嚴鄭注曰嚴猶尊也國無怪嚴謂國無異尊與下文無雜俗無異禮一律尹注曰國不作奇怪則嚴肅是無怪爲一義嚴爲一義失其旨矣況主倨傲易令

樾謹按主乃其字之誤尹注云況其倨傲易風俗是其所據本未誤

財無砥滯

樾謹按砥讀爲底昭元年左傳勿使有所壅蔽湫底杜注曰底滯也故以底滯連文故善用民者軒冕不下儗而斧鉞不上因

樾謹按軒冕不下儗謂其人有善卽從而軒冕之不以其人在下位而有所儗議也斧鉞不上因謂其人有罪卽從而斧鉞之不以其人在上位而有所依違也心術篇曰因也者舍己而以物爲法者也此因字之義也尹注曰不以下有私寵妄以軒冕有所許擬不因上有私憾妄以斧鉞有所誅戮此說殊不可通豈上有私寵卽可以軒冕許儗之下有私憾卽可以斧鉞誅戮之乎

君臣之會六者謂之謀

樾謹按六者謂之謀當作六者爲之媒言君臣會合皆此六者爲之媒也說文女部媒謀也廣雅釋詁

文同是謀與媒聲近義通禮記禮器篇誰謂由也而不知禮乎家語公西赤問篇作孰爲宣二年穀梁傳孰爲盾而忍弑其君者乎公羊傳作誰謂是爲與謂古亦通用也令入而不至謂之瑕。

樾謹按瑕當讀爲格古字通也儀禮少牢饋食禮以嘏于主人鄭注曰古文嘏爲格瑕之爲格猶嘏之爲格也說文人部引書曰假于上下今書作格瑕之爲格猶假之爲格也令入而不至謂之格謂有所扞格而不得達也尹注曰君臣相閒故曰瑕未合入而不至之義

德行成於身而遠古卑人也

樾謹按尹注以遠古卑人連讀非也上文云凡論人而遠古者無高人焉則此文當以德行成於身而遠古爲句句末亦當有者字今奪之耳卑人也三字爲句與無高人焉義正相應猶下文愚士也與上文無智士焉義亦相應也

世無公國之君則無直進之士無論能之主則無成功之臣

樾謹按無論能之主當作無論能之士上文云忠臣直進以論其能然則直進論能皆以人臣言不以人主言論能之士卽直進之士也雖分爲二句其實一耳後人不察疑下言臣上當言君妄改爲主非管子之舊矣

此四者用兵之禍也。四禍其國而無不危矣。

兵法

樾謹按此當作四禍具而國無不危矣。具其形譌國而文倒耳。

官無常則下怨上。器械不巧則朝無定。賞罰不明則民輕其產。

樾謹按巧乃功字之誤。王氏念孫已據七法篇訂正矣。定乃正字之誤。正讀爲政。七法篇曰：朝無政是也。王氏未訂。又以七法篇參考。則此文尙有錯誤。當作官無常下怨上。則器械不功。朝無正則賞罰不明。賞罰不明則民輕其產。方與七法篇官無常下怨上而器械不功。朝無政則賞罰不明。賞罰不明則民幸生文義相合。

故曰早知敵則獨行。

樾謹按宋本作而獨行。當從之。而獨行者如獨行也。七法篇曰：故蚤知敵人如獨行。縱強以制。

樾謹按尹注曰：有制則強可縱。縱字殊爲無義。當讀爲從。襄十年左傳從之將退。杜注曰：從猶服也。從強以制。謂有制則強可服也。古字縱與從通。論語八佾篇從之何晏集解曰：從讀曰縱。人知從之可讀縱。而不知縱之可讀從。斯莫得其解矣。

一氣專定則旁通而不疑。

樾謹按疑當讀爲礙，廣雅釋言曰：礙，閼也。旁通而不礙，言無隔礙也。尹注曰：精一其氣，專而且定，故不疑。以本字讀之，則與旁通之義不貫矣。

盡而不意，故不能疑神。

樾謹按此本作故，能疑神。疑神猶言如神也。形勢篇曰：無廣者，疑神是其證也。盡而不意，故能疑神。與下文和合，故能諧。諧故能輯，一律。後人不達疑神之義，而妄增不字。尹注曰：皆非彼所意，故不能疑。度謂之爲神，則神字與不能疑不相連屬，其不辭甚矣。

利適器之至也。用敵教之盡也。不能致器者，不能利適。不能盡教者，不能用敵。不能用敵者窮。不能致器者困。

樾謹按諸敵字並當作適。利適器之至也。用適教之盡也。尹注曰：兵刃利而適者，其器得宜之至。士卒用命而適者，則教練之盡是其所據本作用適，不作用敵也。不能致器者，不能利適。不能盡教者，不能用適。卽承上二句爲文，乃用適誤作用敵。尹注遂曰：器既不利，教又不盡，敵則不服，豈能用之哉。望文爲說，而不一檢上文何也？今本因下作用敵，遂并用適教之盡也。亦改作用敵，則又非尹氏所據之舊矣。宋本尙不誤。

出入異塗，則傷其敵。

樾謹按出入異塗卽所謂多方以誤之也故足以傷敵尹注反云爲敵所傷誤矣不廣閒大匡

樾謹按廣者曠之假字荀子王霸篇人主胡不廣焉楊倞注曰廣或讀爲曠列子湯問篇不思高林廣澤釋文曰廣一本作曠是其證也不廣閒者不曠閒也詩何草不黃篇毛傳曰曠空也空與閒義正相近尹注曰廣求閒安則增出求字矣

夫所以定齊國者非此二公子者將無已也

樾謹按尹注曰二公子謂諸兒子糺然上文曰夫國人憎惡糺之母以及糺之身而憐小白之無母也諸兒長而賤事未可知也旣云事未可知安知齊國之必屬諸兒子糺哉二疑三字之誤齊僖公止此三子更無異人故曰非此三公子將無已也

受君令而不改奉所立而不濟是吾義也

樾謹按奉所立而不濟安得云是吾義也尹注曰更有所立不濟而死則增出死字矣疑管子原文本作奉所立而不廢上文云犯吾君命而廢吾所立奪吾糺也雖得天下吾不生也此卽所謂奉所立而不廢涉上文事將不濟句而誤作不濟則不可通矣夷吾之爲君臣也將承君命奉社稷以持宗廟

樾謹按兩君字並指僖公言，夷吾爲君之臣，則將承君之命爲社稷宗廟之計，不爲子糲一人歿也。尹注曰：言已立君臣之義，誤以君臣連讀失之。

賢者死忠以振疑。

樾謹按振通作揔。儀禮士喪禮揔用巾。古文揔作振。是也。爾雅釋詁。揔拭刷清也。是揔與拭刷同義。此云揔疑。謂拭刷其疑也。作振者段字。尹注曰：振救也。未得其旨。

今彭生二於君。

樾謹按二當爲貳。禮記坊記篇。唯卜之日稱二君。鄭注曰：二當爲貳。唯卜之時辭得曰君之貳某爾。然則彭生貳於君。謂彭生爲君之貳也。彭生爲公子。故云然。尹注曰：不以正道輔君。而從之於昏。故曰二夫。從君於昏。非有二心之故。安得云二於君乎。

公若先反。恐注怨焉。必不殺也。

樾謹按反乃彼之壞字。當以公若先爲句。彼恐注怨焉爲句。彼謂施伯也。尹注云：若先反管仲。是其所據本已誤。

夫雖不得行其智。豈且不有焉乎。

樾謹按且乃語詞。豈且不有焉乎。猶云豈不有焉乎。故尹注云：直是智不行。不得言無智也。莊子齊物

論篇誰獨且無師乎又曰果且有彼是乎哉果且無彼是乎哉呂氏春秋無義篇豈且忍相與戰哉並用且字爲句中語助說見王氏引之經傳釋詞而未引此文故爲說之

召忽雖不得衆其及豈不足以圖我哉

樾謹按及乃友字之誤言召忽雖不得衆然其一二死友亦足以圖我矣故下文管仲之言曰朋友不能相合摉正釋桓公此疑耳

臣祿齊國之政而不死糺也

樾謹按祿讀爲錄謂領錄其政也尙書堯典篇納于大麓今文家讀麓爲錄故劉昭注後漢書百官志引新論曰昔堯試于大麓者領錄天子事如今尙書官矣鄭君注尙書大傳亦云堯聚諸侯命舜陟位居攝致天下之事使大錄之與史記堯使舜入山林川澤之說不合然管子書已云祿齊國之政則其義古矣尹注不知祿爲錄之假字而云空食齊政之祿夫食齊政之祿不可言祿齊國之政足知其非也

請修兵革吾士不練吾兵不實諸侯故敢救吾讐內修兵革

樾謹按內修兵革亦宜作請修兵革蓋卽上語而申言之也涉下文內奪民用而誤又因下文云乃令四封之內修兵適與相合故讀者莫知訂正耳

管仲對曰以臣則不而令人以重幣使之。

穀謹按尹注讀不字絕句解曰以臣之意則不與君同此說非也蓋此文十二字當作一句讀古而如通用不而卽不如也言以臣之意則不如令人以重幣使之也。

問病臣願賞而無罰

穀謹按尹注於臣字絕句解曰臣有病者君當慰問之夫慰問病臣雖亦盛德事然何與霸業乎且病臣又何罰之有此文問字疑國字之誤山權數篇君不高仁則國不相被宋本國誤作問卽其例也當讀國病爲句臣願賞而無罰爲句言國家罷病臣願有賞無罰以寬之也下文管仲又請賞於國以及諸侯君曰諾行之管仲賞於國君賞於諸侯按賞於國者承此文而言也賞於諸侯者承下文諸侯之禮而言也蓋此兩節國與諸侯分言下又合併而言之耳

衛國之教危

穀謹按危當讀爲詭漢書天文志司詭星出正西史記天官書詭作危淮南說林篇尺寸雖齊必有詭文子上德篇詭作危是古字通也衛國之教危謂其政教詭譎尹注以高危釋之非是

魯邑之教好邇而訓於禮

穀謹按邇當讀爲爾說文效部爾麗爾猶靡麗也然則魯國好爾謂麗爾也正靡麗之意尹注曰邇近

也未得其義。

齊車千乘卒先致緣陵。

樾謹按卒下有闕文據上文大侯車二百乘卒二千人小侯車百人卒千人則齊車千乘當言卒萬人矣先致者先至也致與至通。

戰於後故敗狄。

樾謹按戰上闕諸侯二字上文齊請救於諸侯而齊車卒先致緣陵故諸侯之師戰於後也後字正對上先字而言尹注誤以後故連讀解爲地名非是。

斬孤竹。

樾謹按斬讀爲撕文選長楊賦麤城撕邑李善引蒼頡篇曰撕拍取也撕孤竹猶取孤竹尹注謂斬其君則當云斬孤竹之君矣。

二歲而稅一上年什取三中年什取二下年什取一。

樾謹按此卽什一之法而變通之仍是什而取一也蓋雖有取三取二取一之不同然二歲一稅假令六年之中上年二中年二下年二則通三二一之數而適得六是卽歲取其一也。

桓公使鮑叔識君臣之有善者。

欽謹按王氏念孫讀書雜志曰君當爲羣其說非也乘馬篇曰士聞見博學意察而不爲君臣者又云賈知賈之貴賤日至於市而不爲官賈者工治容貌功能日至於市而不爲官工者君臣與官賈官工竝稱則君臣猶言公臣耳襄二十九年傳公臣不足取於家臣古君公通稱則公臣君臣亦得通稱又問篇曰君臣有位而未有田者幾何人義亦同此古蓋自有君臣之稱未可臆改也

令一人爲負以車

欽謹按尹注曰當令一人以車爲負載其行裝然正文明言人爲負注乃云車爲負義不可通尹氏特疑車非人所能負故曲爲是說耳今按車乃連字之誤海王篇行服連注曰輦名所以載作器人挽者然則此云負連猶云服連負服古通用淮南子人閒篇負輦載粟而至御覽治道部負輦作服撻是其證也連本人挽者故可以一人負之下文云若宿者令人養其馬然則彼從諸侯來者固自有車馬必令一人負以連者當是分載其囊橐耳

費義數而不當有罪

欽謹按尹注曰義謂供客之禮徒費義數而於事不當者罪之夫旣爲供客之禮又何不當之有且義數連文亦不可通義疑羨字之誤七臣七主篇歲有敗凶故民有義不足王氏念孫謂義當爲羨正與此同有所溢於正數之外是謂羨數費羨數而不當是妄費也故有罪矣

又多不發起訟不驕。

樾謹按尹注曰。又教之和通。不相告發。雖有起而訟者。莫不恭恪。不爲驕傲。此於句讀未審也。當以起字絕句。多字衍文。涉下文。又多發起句而衍。七臣七主篇曰。然疆敵發而起。雖善者不能存。即可證此文發起之義。上云野爲原。謂能辟草萊也。此云又不發起。謂能治盜賊也。又云訟不驕。謂能聽獄訟也。驕讀爲矯。國語周語曰。其刑矯誣。韋注曰。以詐用法曰矯。是其義也。下文云。又多發起訟。驕亦當以起字絕句。其下又云。又多而發訟。驕則誤衍而字奪起字。

桓公謂管仲曰。請致仲父中匡。

樾謹按請致仲父者。欲仲父就己飲酒也。仲父猶仲甫。夷吾之字耳。尹注曰。仲父者尊老有德之稱。桓公欲尊事管仲。故以仲父之號致之。此說非是。蓋自毛公解尙父爲可尙可父。鄭君亦以尙父爲尊稱。後人因疑仲父之稱。猶尙父之比。故有此說。不知尙父亦字也。初非尊稱。說詳羣經平議。

公與管仲父而將飲之。

樾謹按與讀爲預。一切經音義卷六曰。預古文作與。是也。公預管仲父而將飲之。猶襄十四年左傳曰。衛獻公戒孫文子寧惠子食也。戒與預其義相近。三王失之也。非一朝之革。

樾謹按萃當讀爲猝.言由來者漸.非起於一朝之猝然也.尹注讀如本字.而訓爲萃集.非是.夫鮑叔之忍不僇賢人.其智稱賢.以自成也.小匡.

樾謹按釋名釋言語曰.仁忍也.好生惡殺.善含忍也.然則鮑叔之忍.猶云鮑叔之仁.下云其智.正以仁智並言也.左傳正義引作鮑叔之不忍戮賢人.蓋後人不達忍字之義.而妄改之.不足爲據.與魯以戰.能使魯敗.

樾謹按與以二字.傳寫互誤.當作以魯與戰.言以魯國之師與齊戰也.能字義不可通.管仲以魯師與齊戰.豈反使魯敗乎.能當讀爲乃.以魯與戰.乃使魯敗.明是天意.非人力所爲也.能與乃聲近.故得通用.淮南人間篇此何遽不能爲福乎.藝文類聚禮部能作乃.漢書匈奴傳東援海岱.南取江淮.然後乃備.漢紀乃作能.並真證也.

功足以德天與失天.其人事一也.

樾謹按足乃定字之誤.言鮑叔相小白而得國.管仲奉公子糾.以魯與齊戰而敗.此非人事有優劣.乃由小白得天.而公子糾失天也.功之成不成.定以得天與失天.若以人事論.則一而已矣.定與足字形相似而誤.君臣上篇.朝有足度衡儀.足亦定字之誤.宋本正作定.可證也.若依尹注說此文.違戾甚矣.糞除其顛旄.

樾謹按尹注解顛施之義殊不可通據國語作班序顛毛韋昭注曰顛頂也毛髮也言次列頂髮之白黑使長幼有等然則此文糞字疑篆字之誤糞篆文作糞與鑾字相似故誤也鑾卽今所用頒賜字亦或以班爲之是故管子書以鑾爲班亦猶他書之以班爲鑾也除乃敍字之誤敍與序通鑾敍卽班序也糞誤作糞後人乃改敍爲除以求合其義而不知其不可通矣以待時乃耕

樾謹按時字絕句乃當作及字之誤也及耕二字屬下爲義齊語作及耕深耕而疾耰之是其證惟齊語時下有耕字似爲衍文當據此刪

奇怪時來珍異物聚

樾謹按物當爲總言珍異總聚也若作物聚則不詞矣因俗書總字作𠀤其上半與物相似而誤無坐抑而訟獄者

樾謹按坐當爲挫言人有挫折屈抑則宜訟若無是而訟是好訟也故必有以禁之尹注謂其人自無所坐而被抑爲訟者非是擇其沈亂者而先政之

樾謹按政乃征之假字齊語作擇其淫亂者而先征之是其證也尹注非

存魯蔡陵

樾謹按地無名蔡陵者據下文云築蔡郿陵疑此文蔡上奪築字陵上奪郿字存魯爲一事築蔡郿陵又爲一事

割樾地南據宋鄭征伐楚

樾謹按南字當在鄭字下管子原文文本作割越地據宋鄭南征伐楚今本南字誤移在上則征伐楚句不成義矣齊語作遂南征伐楚其明證也

制冷支

樾謹按制乃剗字之誤齊語作剗令支韋注曰剗擊也

握粟而筮者屢中

樾謹按筮卽筮字古書從巫從筮之字往往相亂呂氏春秋察傳篇沈尹筮贊能篇作沈尹筮是其證也顏氏家訓書證篇曰巫混經旁正謂此類

而蓬蒿藜蘆並興

樾謹按蘿乃蘿字之誤卽蘆字也莊子徐无鬼篇藜蘆柱乎鼈軀之徑釋文曰蘆本或作蘿

櫬載而歸

樾謹按櫓字當從禾卽稈字也說文禾部稈叅束也從禾困聲此作櫓者又變從虧聲虧字亦從困得聲者故其聲同也傳寫誤從木非是

培夏

樾謹按齊語作負夏古字通也尙書禹貢篇至于陪尾史記夏本紀作至于負尾卽其例矣其相曰夷吾大夫曰寧戚隰朋賓胥無鮑叔牙用此五子者何功

樾謹按尹注曰言何功而不成然正文止有何功二字乃增益其文曰何功而不成殆失之矣據下文管仲請立隰朋爲大行寧戚爲大司田王子城父爲大司馬賓胥無爲大司理東郭牙爲大諫而繼之曰君若欲治國彊兵則五子者在矣若欲霸王夷吾在此然則此文疑當作寧戚隰朋王子城父賓胥無東郭牙所謂五子者指此五人不數夷吾明桓公所以霸者皆由其相夷吾之力若止用此五人者則何功之有故下文曰則唯有明君在上察相在下也正見齊桓明君夷吾察相兩相得而成霸功非由此五大夫矣傳寫奪王子城父又誤東郭牙爲鮑叔牙與後文五子不合遂并數夷吾爲五子而何功之義不可解矣管子此篇多與齊語同蓋本齊國史之文齊語末云惟能用管夷吾寧戚隰朋賓胥無鮑叔牙之屬而伯功立此自是當時公論爲管氏之徒者取其文入管子書則獨歸功於管仲而他人不與焉以其書固管氏之書也今本錯誤大非其旨矣

晦夜而至禽側田暮不見禽而後反

樾謹按尹注解田暮不見禽爲其田必見禽此非也田乃日字之誤暮古暮字言日暮不見禽而後反也

則五子者在矣

樾謹按呂氏春秋勿躬篇作則五子者足矣當從之此作在者涉下夷吾在此而誤

此页空白

諸子平議卷三

管子三

桓公不救裸體紉智稱疾霸形

樾謹按尹注曰紉猶摩也此訓未知所本楚辭離世篇情素潔於紉帛王逸注曰紉結束也紉智疑卽結束之義亦若僖二十八年左傳魏犨束晳歟

於是令之縣鍾磬之棖

樾謹按尹注曰棖所以嚴飾之此未得其義也玉篇木部棖禹煩切絡絲繫也或作簷說文無棖簷二字蓋卽纓字說文系部纓落也落與絡通廣雅釋器曰纓絡也此文棖字當訓爲絡又下文兩言鍾磬之縣疑此文本作於是令之棖鍾磬之縣陳歌舞竽瑟之樂故下文曰於是伐鍾磬之縣併歌舞之樂卽承此文而言也所謂棖鍾磬之縣者鍾磬本在縣更從而繫絡之使牢固也尹注飾字雖非而嚴字則是觀尹注以嚴飾爲解疑其所據本正作棖鍾磬之縣故解爲嚴飾若如今本則爲縣鍾磬之嚴飾矣於義豈可通乎

楚取宋鄭而不知禁是失宋鄭也

諸子平議 管子三

樾謹按此本作楚取宋鄭而不止。止卽禁也。故下文曰：禁之。則是又不信於楚也。後人因下文是禁字，遂改不止爲不禁。而傳寫者又或誤合之。故宋本作楚取宋鄭而不止禁也。今本作不知禁。則又因止禁連文於義重複。故易止爲知耳。夫楚取宋鄭而不止者。非不知也。乃不能也。不曰不能禁。而曰不知。禁是可見其文之誤矣。下文曰：知失於內。兵困於外。知失於內。猶云計失於內。此知字乃智慮之智。非知識之知。不得因此而疑本文之非誤也。

東存晉公於南

樾謹按此承上西伐秦北伐狄爲文。自秦而言。則晉在東矣。自狄而言。則晉在南矣。故曰東存晉公於南。尹注曰：自伐楚而遂存晉於晉之南。故曰東存。此得東字之義。而未得南字之義。

兼正之國之謂王。霸言。

樾謹按上之字疑它字之誤。它卽他字也。故尹注曰：兼能正他國者王。

故貴爲天子。富有天下。而伐不謂貪者。其大計存也。

樾謹按伐乃代字之誤。上文化人易代。宋本代誤作伐。卽其例也。管子原文本作世。不謂貪。言一世之人。不以爲貪也。唐人避諱改世爲代。因又誤爲伐耳。

國在危亡而能壽者。

樾謹按國語楚語臣能自壽也韋注曰壽保也然則能壽猶能保也晏子春秋雜下篇賴君之賜得以壽三族壽三族亦猶保三族也說文土部壩保也古壽字作薺與壩字並從鬻聲故義亦得通矣繼最一世

樾謹按繼乃彊字之誤草書系旁與弓旁相似又涉上文繼絕世而誤耳下文云彊最一伐而天下共之國必弱矣宋本作彊最一代代卽世也然則此云彊最一世彼云彊最一代兩文正同此彊字誤爲繼彼代字誤爲伐而兩不可通矣

因其大國之重

樾謹按其字衍文下文因彊國之權因重國之形並無其字

霸王不在成曲

樾謹按尹注曰在於全大體然成曲之義殊有未安曲疑典字之譌霸王不在成典言圖霸王者不必拘守成法也曲與典形近而誤國語周語瞽獻曲注曰曲樂曲也宋明道二年槧本如此今本曲皆作典是其例矣

精於權則天下之兵可齊

樾謹按齊讀爲濟詩載駢篇不能旋濟毛傳曰濟止也周易雜卦傳旣濟定也定亦止也天下之兵可

濟謂天下之兵可止也。上文云：彊國之兵可圍也。圍亦有止義。

舉知人急則衆不亂行此道也。問：

樾謹按行此道也乃總承上文以起下文。尹注以則衆不亂行此道也作一句讀大謬。王氏讀書雜志已辨正矣。尹解舉知人急爲舉困難之事以示人則亦不然。牧民篇地辟舉則民留處尹彼注曰：舉也。此舉字義與彼同。舉知人急者盡知人急難之事也。

餘子父母存不養而出離者幾何人。

樾謹按離讀爲儺。禮記月令篇宿離不貸。鄭注曰：離讀如儺偶之儺是也不養而出離謂出而儺偶於他族若後世贅婿矣。

官賤行書身士以家臣自代者幾何人。

樾謹按尹注曰：其人居官乃賤自行文書身任士職輒以家臣自代亦須知其數也。然身任士職以家臣自代疑無是理。卽有之亦私事無從核其數也。士蓋出字之譌言身出而以家臣自代也。隸書出字或似士如賣之爲賣。敷之爲敷皆是故古書士出二字往往相亂。王氏引之經義述聞詳言之。

國子弟之無上事衣食不節率子弟不田弋獵者幾何人。

樾謹按尹注曰：旣無上事乃率子弟不田農但弋獵此釋率字未得其義。小匡篇曰：十邑爲率十率爲

鄉然則率子弟者率之子弟也下文曰男女不整齊亂鄉子弟者有乎鄉子弟率子弟蓋當時有此名尹氏不達以謂由國子弟率之使然非其義矣國子弟與率子弟文正相對

冗國所開口而食者幾何人

樾謹按冗乃問字之誤與上下文一律尹注不釋冗字則所見本未誤也

是其事

樾謹按是猶視也苟子解蔽篇是其庭可以搏鼠楊倞注曰是蓋當爲視卽其證也上云視其色此云是其事文異而義同尹注謂是正其事失之

邊信傷德

樾謹按尹注曰邊人失信故傷德也然邊人失信不得謂之邊信於義殊不可通邊當讀爲篲卽今篾字也玉篇竹部篾篾也然說文無篾字篾卽篾也篾信者小信也小信傷德正與上文小利害信小怨傷義一律尚書君奭篇文王蔑德正義引鄭注曰蔑小也然則小信謂之篾信猶小德謂之蔑德矣顧命篇敷重蔑席孫氏星衍疏曰蔑俗從竹當爲蔑卽篾段音字據此知篾爲正字蔑爲段字篾爲俗字管子之篾信與尚書之篾德文異而義同矣故天不動四時云下而萬物化君不動政令陳下而萬功成戒

樾謹按云字陳字皆絕句下而萬物化言天氣下行而萬物自化也下而萬功成言君道下行而萬功自成也王氏引之謂云卽運字得之謂上句下字涉下句而衍則非也兩句一律不得參差由失其句讀故耳

妾人聞之君外舍而不鼎饋非有內憂必有外患

樾謹按妾人聞之當作妾聞之先人侈靡篇作吾聞之先人是其證

管仲對曰君請矍已乎

樾謹按尹注曰矍已謂有所驚懼而問未止也此注於義未安矍疑獲字之誤隸書獲字或作攘見祝睦碑又或作攘見靈臺碑其左旁皆與矍相似缺其右旁因誤爲矍矣請者問也儀禮士昏禮聘禮鄭注並曰請猶問也君請者君問也君請獲已乎言君有所問不得已而爲此對也下文將歷言鮑叔牙諸人之短故以此發之

東郭有狗囁囁旦暮欲齧我狫而不使也

樾謹按王氏引之據宋本朱本注中狫字作柂訂正文狫字爲柂字之誤又云柂者迦之假字引說文迦瓦令不得行以說其義並勝舊解惟讀我字絕句則猶未爲得也此當以旦暮欲齧爲句我柂而不使也爲句我者管仲自我也

用日維夢參患

樾謹按尹注曰。用吉日襲吉夢。此不然也。雖武王伐商。有筮襲於夢之說。然亦偶然之事。豈用兵者。必以夢爲主乎。今按夢覺字。依說文本作寤。非此夢字。夢隸夕部。與夜篆相次。其說解曰。不明也。然則夢之本義爲夜不明。故此以夢與日對。用日維夢。謂將於其日有事。必先於其夜預爲之計。是以用日者在夢。故曰用日維夢也。因經傳夢字皆寤之假借。而無用其本義者。故於此文。莫得其解耳。而足以修義從令者。忠臣也。君臣上。

樾謹按修與從二義不倫。修乃循字之誤。下文云。下之事上也不虛。則循義從令者審也。正作循義從令。可證此文修字之誤。

上下相希

樾謹按希讀爲睎。說文目部。睎望也。上下相睎。謂上下相望也。故下句曰。若望參表。

其誠也以守戰

樾謹按誠當爲成。言人嗇夫教成之後。可用以守戰也。涉上文賞在信誠句。而誤爲誠耳。然誠與成古亦通用。

法制有常。則民不散而上合

樾謹按不字衍文也上云治國無法則民朋黨而下比此云法制有常則民散而上合兩文正相對散者散其朋黨也昔文王厲政於臧丈人而列士散植壞羣見莊子田子方篇此所謂民散卽散植壞羣之義後人不達其旨而妄增不字非管子原文也

奔走而奉其敗事不可勝救也

樾謹按奉乃救字之誤上云坐而收其福不可勝收也此云奔走而救其敗事不可勝救也兩文相對今誤作奉其敗事不特義不可通且與不可勝救句亦不合矣

主身者正德之本也

樾謹按主當作立涉上文兩主字而誤下文曰身立而民化德正而官治身立德正卽承此文立身正德而言

主德不立則婦人能食其意

樾謹按尹注曰君意委曲隨於女謁若食之充口其說甚迂且如此則君食婦人之意非婦人食君之意矣食當讀爲餉周易豐彖詞月盈則食釋文曰食或作餉是古字食與餉通說文虫部餉敗創也人能餉其意者婦人能敗其意也正與下文國無常法則大臣敢侵其勢文義一律下篇云便辟不能食其意義亦同此

是故歲一言者君也

樾謹按周官冢人及葬言鸞車象人司農注曰言言問其不如灋度者此言字與彼同義歲一言者謂每歲一言問其不如灋度者也下文云時省者相也月稽者官也言問亦有省察稽考之意尹注曰謂正歲之朝布之縣象是未解問字也

是以明君之舉其下也盡知其短長知其所不能益若任之以事賢人之臣其主也盡知短長與身力之所不至若量能而授官

樾謹按兩若字並當訓乃小爾雅廣言曰若乃也國語周語引書曰必有忍也若能有濟也韋注曰若猶乃也此文言君必知其臣乃任之以事臣必知己乃量能而授官授當作受周官典婦功職曰凡授嬪婦功司儀職曰登再拜授幣鄭注並云授當爲受是古授受得通言也陳力就列不能者止是謂量能而受官矣

布法出憲而賢人列士盡功能於上矣君臣下

樾謹按功當作貢說文貝部貢獻功也貢能於上猶上文言歸親於上也周易繫辭傳六爻之義易以貢釋文曰貢苟作功是功貢相通之證

治斧鉞者不敢讓刑治軒冕者不敢讓賞

樾謹按尹注曰讓猶距也然此以治斧鉞治軒冕者言非以受之者言尹解讓字殆非其義讓當讀爲攘禮記曲禮篇左右攘辟鄭注曰攘古讓字是攘讓古字通也此文兩讓字並當爲攘竊之攘不敢讓刑不敢讓賞謂不敢攘竊刑賞之權也

穆君之色

樾謹按續漢祭祀志注引決疑要注曰穆順也穆君之色卽順君之色下句曰從其欲從亦順也尹訓穆爲悅未得

雖有偏卒之大夫不敢有幸心

樾謹按偏者車數卒者人數成七年左傳杜注引司馬法曰百人爲卒車九乘爲小偏十五乘爲大偏是也有偏卒之大夫蓋謂大夫之家有車徒者耳尹注未得

此先王所以明德圉姦昭公威私也

樾謹按威乃威字之誤威者滅也劉氏續謂是戒字之誤非是

若稽之以衆風若任以社稷之任

樾謹按兩若字並當訓乃說詳上篇此承上文而言旣稱德功勸其所能乃稽之以衆風乃任以社稷之任也衆風者衆人之風謠尹解非是

去惡充以求美名.又可得乎.小稱.

樾謹按尹注斷去惡充三字爲一句解曰所往去於人者皆以惡事充此說殊未安去惡充以求美名七字爲句惡充美名相對成文詩山有扶蘇篇毛傳子充良人也正義曰充者實也呂氏春秋正名篇不肖者之充淮南子主術篇此皆有充於內高誘注並訓充爲實然則惡充者惡實也正與美名相對求乃來字之誤上文我託可惡以來美名字正作來可證也去來亦相對成文去惡充以來美名謂自我而去者爲惡實自人而來者爲美名此必不可得之數也故曰又可得乎上文怨氣見於而惡言出於口此皆惡之實也尹氏不知充有實義故失其解

故之身者使之愛惡名者使之榮辱

樾謹按身上衍之字蓋涉上文澤之身去之身審行之身審去之身四句而衍身者使之愛惡名者使之榮辱兩文相對今作之身者於義難通尹注曲爲之說非是

酒食則慈四稱

樾謹按酒食則慈謂有酒食必分以予人以見慈惠之意也或疑其當作辭非是

見賢若貨

樾謹按此本作見貴若貨與下句見賤若過相對成義謂見貴者則趨之若貨財然見賤者則若行者

之相過不相顧也。因涉上句以攻賢者句而誤貴爲賢。尹注曲爲之說非是。

不友善士讒賊與鬪不彌人爭唯趣人詔。

樾謹按鬪一作通詔一作訟並當從之。不友善士故讒賊與通不彌人爭故唯趣人訟四句之義皆上下相承而通與訟又韵也。今作鬪詔則失其韵矣。訟之與詔以形似而誤。鬪字則因注文而羼入者。尹注云其見人爭則恣令鬪無彌縫之心此自解不彌人爭之意。鬪卽爭也豈正文有鬪字乎。

遷損善士。

樾謹按尹注曰善士則遷改而損棄之。疑正文及注文損字均捐字之誤。惟是捐字故尹氏以棄字足成其義耳宜訂正。

耕以自養以其餘應良天子故平侈靡。

樾謹按應良天子義不可通良疑卽養之壞字應之言承也爾雅釋樂小者謂之應。釋文引李巡注曰小者聲音相承故曰應。應承也說文手部承奉也然則應養猶奉養也言耕以自養而以其餘奉養天子也。養字闕其上半而誤爲良。尹氏曲爲之說曰有時有賦曰良謬矣。

今周公斷指滿稽斷首滿稽斷足滿稽。

樾謹按尹注曰今周公謂時所用法也。如注義則當云今周公之法於文方足不得但云今周公也。疑

周公二字乃用法二字之誤。法字奪水旁，止存本字與公相伯。因誤爲公，後人因用公二字無誼，妄加口於用下而爲周字耳。尹氏作注時，文尙未誤，故曰今用法，謂時所用法也。後人據已誤之正文，而改注文，遂并注義而不可通矣。

而死民不服。

樾謹按此本作而民死不服。言民至死不服也。民死二字傳寫誤倒。尹注遂斷而死二字爲句，失之矣。若夫教者，標然若秋雲之遠。動人心之悲，藹然若夏之靜雲，乃及人之體。鴻然若鶴之靜，動人意以怨，蕩蕩若流水，使人思之。

樾謹按動人心之悲，當作動人心以悲。與下文動人意以怨一律。古以而字通用，說見王氏引之經傳釋詞。動人心以悲，猶云動人心而悲也。動人意以怨，猶云動人意而怨也。今作之悲，則不詞矣。蓋涉上句有之字而誤耳。藹然若夏之靜雲，當作藹然若夏雲之靜。與上秋雲句一律。惟雲不能及人之體。尹注增成其義曰：油然含潤，將降其澤，及人之體。此曲說也。疑管子原文，本作藹然若夏雲之靜，動人意以怨。與上文標然若秋雲之遠，動人心以悲，相對成文，乃及人之體。當在鴻然若鶴之靜下。鴻然句不可解，疑當作鶯然。若高山與下蕩蕩若流水，相對成文。山字與篆文之字相似而誤，又涉上文夏雲之靜句，而衍靜字。後人因若鶯之靜，義不可通，乃加言旁作鴻耳。鴻字字書所無，乃鶯字之誤。因其字從

穴從鳥篆文穴字與隸書肉字相似傳寫者誤從肉後人因從肉之字皆在左旁作月因變而爲鴻矣墨子備城門篇有牘字卽竇字之誤正與此同說詳墨子可以爲證乃及人之體乃字衍文卽及字之誤而複者也及讀爲峩文選羽獵賦天動地峩注引韋昭曰峩動貌竄然若高山峩人之體言如登高山動人之體也管子此文最舛譌難讀今考正之如此

薄德之君之府囊也

樾謹按尹注但云德薄之君皆囊而藏之不釋府字之義疑府乃所字之誤隸書所字作所與府相似而誤管子原文本云薄德之君之所囊也故尹注止解囊字也

鄰國之君俱不賢然後得王俱賢若何曰忽然易卿而移忽然易事而化

樾謹按尹注解易卿句曰黜不肖立仁賢解易事句曰去故而取新皆非管子之意也管子蓋謂鄰國之君俱賢則不得王故必待其有變忽然而易卿忽然而易事皆就鄰國言之易卿而移易事而化皆謂變而不善使我有可乘之機也故下文曰變而足以成名尹注失之

故日月之明

尹注所謂與日月齊其明者若作故字則文義未足矣

吾君長來獵君長虎豹之皮

樾謹按上長字衍文下長字當訓爲上呂氏春秋貴公篇用管子而爲五伯長勿躬篇雖不知可以爲長高注並曰長上也此文當以吾君來獵爲句君長虎豹之皮者君上虎豹之皮也與下文上金玉幣上甲兵文異而義同尹注曰君好虎豹皮故來獵則其所據本尙未衍上長字若如今本則君長二字連文君長虎豹之皮文義未明尹何以云君好虎豹皮乎注文好字正釋長字之義長卽上也上之是好之也後人不達誤以君長連讀遂於上句亦增長字而文義失矣

百振而食非獨自爲也

樾謹按百乃自字之誤言自振作而食非獨自爲也兩自字正相應因涉上句百姓字而誤自爲百文不可通

有雜禮我而居之

樾謹按有當爲肴我當爲義並壞字也肴讀爲殼說文殳部殼相雜錯也漢書食貨志殼雜爲巧亦以殼雜連文

強而可使服事辯以辯辭智以招請廉以標人堅強以築六廣其德以輕上位不能使之而流徙此謂國亡之鄰

樾謹按國亡之郊當依注作亡國之郊與下文成國之法正相對成文然則此七句者非美事也而尹注皆失之今爲釋其義曰強而可使服事者言下不順從上令強之而後可使服事也辯以辯辭者下辯字當讀爲變禮記禮運篇大夫从宗廟謂之變鄭注曰變當爲辯是其例也謂以辯給變亂人之辭也智以招請者請讀爲情荀子成相篇聽之經明其請楊注曰請當爲情是其例也國語周語曰而好盡言以招人過此招字義與彼同言恃其智以招人之情實也廉以標人者標讀爲剽後漢書崔寔傳剽賣田宅李賢注曰剽一作標是其例也說文刀部剽砭刺也廉而剽人言恃其廉而傷人也堅強以乘六者尹注曰君能堅意強力以乘上之六者然上文並無六者注說非也六乃下字之誤草書相似故也國語周語曰乘人不義韋注曰乘陵也堅強以乘下言堅強以陵下也廣其德以輕上位者位字當屬下讀廣其德以輕上與堅強以乘下正相對成文言廣樹其德以分上之權若齊之陳氏也位不能使之而流徙者位字據尹注作任故云可以分其上之任是位乃任之誤也此文當作任不能而使之流徙言不能之人任之以事而使之得罪流徙所謂賊夫人之子也今而字在使之下乃傳寫誤倒又誤任爲位而屬之上句遂不可曉矣

好緣而好驅

樾謹按上好字乃惡字之誤尹注曰緣卽捐也怯惡者必亂故棄之是其所據本正作惡緣惟尹解此

句未得其義.緣之言循也.廣雅釋詁曰.緣循也.莊子列禦寇篇注曰.緣循仗物而行者也.然則緣與駢義正相反.惡緣而好駢.謂惡因循而好壯健也.

開國閉辱.知其緣地之利者.

樾謹按以下文證之.其字當在開字之下.閉字乃門字之誤.辱知下有神次二字.而今奪之.管子原文本作開其國門.辱知神次.下云開其國門者.玩之以善言.辱知神次者.操犧牲與其珪璧.以執其罪.皆舉此文而釋之也.因傳寫奪誤.遂不可讀.尹注以知其二字屬下緣地之利者爲句.不知緣地之利者.亦是舉上文而釋之.不當有知其二字也.

奈其罪辱.

樾謹按辱字常屬下知神次者爲一句.乃覆舉上文而釋之也.奈其罪三字.並衍文.卽下文執其罪之誤而衍者.執字闕壞.止存左旁之柰.因誤爲奈矣.尹曲爲之說.非是.

若是者必從是齧亡乎.

樾謹按尹注曰.齧卽奐字也.洪氏筠軒曰.齧疑退字之譌.王氏讀書雜志從之.謂尹注亦似作奐字解.其實非也.此字實讎之古文.說文讎相敗也.從人讎省聲.管子疑本作齧.亦從人從讎省.而止省去中閒一回.猶囂字從鳥.囂省聲.與讎字同.而籀文作讎.止省去中閒一回也.讎之義爲相敗.故以讎亡連

文猶言敗亡也。字誤作驪。於是其字義俱失矣。

大王不恃衆而自恃。

樾謹按尹注以大王亶父爲說非也。古之賢王多矣。何獨舉一亶父乎。大王蓋泛言古之王者。曰大者。尊之之辭。猶言盛王也。說詳羣經平議禮記。

賤寡而好大。

樾謹按法法篇。故仁者知者有道者。不與大。慮始。尹彼注曰。大猶衆也。然則賤寡而好大。猶賤寡而好衆。謂不問是非曲直。但以衆寡爲斷也。尹此注非。

先後功器事之治。

樾謹按事字衍文也。尹注曰。功有大小。器有精麤。各定其先後之差也。是其所據本無事字。祭之時上賢者也。故君臣掌。君臣掌則上下均。

樾謹按掌當爲黨。字之誤也。祭禮有賓主。故有賓黨主黨。天子諸侯之祭亦然。故曰君臣黨。無使其內使其外。與下句使其小毋使其大一律。

樾謹按此當作使其內無使其外。與下句使其小毋使其大一律。如以予人財者。不如無奪時。如以予人食者。不如毋奪其事。

樾謹按如以予人財者如以予人食者當作如以財予人者如以食予人者不如無奪時當作不如無奪其時。

親戚之愛性也。

樾謹按古人稱父母亦曰親戚韓詩外傳曾子曰親戚既沒雖欲孝誰爲孝是也親戚之愛句性也正見人子之於父母其愛出於天性與君臣之以義相屬者不同也尹注非

人死則易云生則難合也。

樾謹按說文雨部雲山川氣也從雨云象雲回轉形是云字本象回轉之形故有旋繞之義詩正月篇昏姻孔云毛傳曰云旋也鄭箋曰云猶友也蓋旋繞卽有相親之義故得訓友廣雅釋詁曰云有也有與友通古者謂相親曰有昭二十年左傳是不有寡君也杜注曰有相親有也云訓有卽相親有也襄二十九年傳晉不鄰矣其誰云之猶言其誰親之也此以易云難合相對爲文易云者易親也古人族葬故有死則易云之說下文多賢可云亦言可親也故下曰則士云矣言士親之也尹注以爲可言非是

其亟而反其重陔動毀之進退。

樾謹按之字衍文也尹注曰或遲重滯凝久而不去者或發動而有所毀傷者或乍進乍退者是三者

並列不當有之字

視之亦變

樾謹按亦乃天字之誤亦古作夾與天字相似又涉上句應國之稱號亦更矣因而致誤視之天變與下句觀之風氣兩句一律尹注非

古之祭者有時而星有時而星燁有時而燭有時而胸

樾謹按此四句皆以天象言謂方祭之時天象不同如此卽上文所謂視之天變觀之風氣也星者詩定之方中篇星言夙駕釋文引韓詩曰星晴也次句星字涉上句而衍當作有時而燁燁者禮記樂記篇天地訴合鄭注曰訴讀爲烹烹猶蒸也正義曰言天地氣之蒸動猶若人之喜也燁烹一字耳燭字他無所見疑亦以氣言胸者昫字之誤說文日部昫日出溫也

鼠應廣之實陰陽之數也華若落之名祭之號也

樾謹按應字若字皆衍文也尹解上句曰鼠憂也凡此皆君之憂人故廣爲祈福祥而祭之不釋應字之義則上句無應字也應卽廣字之誤而複者耳尹解下句曰言祭時爲物作美號若花落也以花落連文卽正文華落字也然則華落兩字之間不當有若字因注言若花落遂誤羼入正文耳管子原文本作鼠廣之實句陰陽之數也華落之名句祭之號也雖其義不盡可通而其文猶可考也華落對文

鼠廣疑亦對文漢書五行志曰鼠盜竊小蟲意者以鼠喻小故與廣對歟。

此页空白

諸子平議卷四

管子四

故曰上離其道下失其事心術上

樾謹按此不當有故曰二字涉下解而衍

掃除不潔神乃留處

樾謹按宋本作神不留處當從之下解曰不潔則神不處是其證

求之者不得處之者

衍
樾謹按下之者二字衍文也求之者不得處謂不得其處也尹注謂不知其處而得之是其所據本末

天曰虛地曰靜乃不伐

樾謹按伐乃貸字之誤貸字闕壞止存上半之代因誤爲伐矣據下解曰天之道虛地之道靜虛則不屈靜則不變不變則無過故曰不伐以無過釋不伐則不伐是不貸之誤明矣禮記月令篇宿離不貸鄭注曰不得過差也是貸之義爲過差周易豫象傳曰天地以順動故日月不過而四時不忒忒與貸

同日月曰不過。四時曰不忒。文異而義不殊。然則此文言不貸。而後解言無過。正合古義。且言天地者。當美其不差貸。不當言不伐天地之大。誰能伐之乎。於義求之。既不可通。貸字與上文色字。則字爲韻。今誤作伐。則於韻求之。又不合矣。是不可不正也。

以無爲之謂道。

樾謹按以衍字。尹注曰。無爲自然者道也。是無以字。

法者所以同出。

樾謹按尹注曰。有禮則有法。故曰同出也。如其說。當曰與禮同出。乃曰所以同出。義不可通矣。出疑世字之誤。世隸書或作世。故與出相似而誤也。所以同世。謂所以齊同一世之人。下文曰。故殺僇禁誅。以一之也。卽所以同世之義。

莫人言至也。

樾謹按此云莫人。句言至也。下云不宜。句言應也。又云不顧。句言因也。皆釋上文直人之言。不義不顧之義。不宜卽不義也。然則莫人乃直人之誤。疑管子原文本作直人言正也。蓋以正釋直。禮記曲禮篇。直而勿有。郊特性篇。直祭祝於主。鄭注並曰。直正也。以正釋直。乃古義也。直與莫正與至。皆以形近而誤。

因也者非吾所願故無顧也

樾謹按非吾所願當作非吾所取此與上文應也者非吾所設相對成文據下文云其應非所設也其動非所取也又云感而後應非所設也緣理而動非所取也並以所設所取對言故知此文亦當作所取也廣雅釋詁取爲也尹氏作注時文尙未誤故釋其義曰非吾所爲故無顧以爲訓取正本廣雅義或據尹注謂正文亦當作爲則是尹氏空舉正文無所訓詁無爲貴注矣

闕其門

樾謹按據上文是開其門此誤開爲闕

變化則爲生爲生則亂矣

樾謹按古爲僞字通禮記月令篇毋或作爲淫巧鄭注曰今月令作爲爲詐僞成九年左傳爲將改立君者定十二年傳子爲不知釋文並云爲本作僞是其證也此言變化則僞生僞生則亂而尹氏以本字讀之曰謂有爲於營生失之

慕選者所以等事也心術下

樾謹按慕乃纂字之誤詩猗嗟篇舞則選兮毛傳訓選爲齊仲尼弟子傳任不齊字子選是選有齊義韓詩作舞則纂兮蓋選與纂聲近而義通此云纂選者所以等事也正以纂選之義並爲齊也賈子等

齊篇曰。撰然齊等是其義也。纂與慕字形相似。因而致誤。尹注曰。或占慕之。或選擇之。失其義矣。

金心在中不可匿。

樾謹按尹注曰。金之爲物彌精。心之爲用彌明。故比心於金。此說迂曲。誠不可從。劉氏續謂當依內業篇作全。今按內業篇全心在中不可蔽匿。此劉所據也。又曰。心全於中形全於外。則所謂全心者。或卽心全之說。然心全於中。文義俱安。全心在中。則有未安矣。內業篇又曰。正心在中。萬物得度。疑金心全心皆正心之誤。正誤爲全。全又誤爲金耳。正心者誠心也。論語述而篇正唯弟子不能學也。鄭注曰。魯讀正爲誠。是正與誠古得通用。誠心在中。則自不可得匿矣。所謂有諸內必形諸外也。下文金心之形。明於日月。察於父母。義亦同此。

昔者明王之愛天下。故天下可附。暴王之惡天下。故天下可離。

樾謹按兩之字皆心字之誤。此承上文正心之形。明於日月。察於父母而言。正心者誠心也。言明王誠心以愛天下。故天下可附。暴王誠心以惡天下。故天下可離也。下云故貨之不足以爲愛。刑之不足以爲惡。貨者愛之末也。刑者惡之末也。正見愛惡之在於心耳。若但云明王之愛天下。暴王之惡天下。安見其愛不以貨。惡不以刑乎。又按貨字乃賞字之誤。賞與刑相對爲文。今作貨則不倫矣。內業篇云。賞不足以勸善。刑不足以懲過。彼篇文義多與此同。可據以訂正。

出者而不傷人入者自傷也。自心。

樾謹按此本作出者而不傷人傷人者自傷也。今本奪傷字入卽人字之誤。尹注曰。出者既主生則不當傷人。違而傷人是還自傷也。注中有兩傷人字。知正文必有兩傷人字。注中無入字。知正文亦無入字矣。

故曰有中有中。

樾謹按此本作不中有中。故尹注曰。舉事雖得其中而不爲中。乃是有中也。今誤作有中。有中義不可通。

孰能已無己乎。

樾謹按已無己猶云我喪我也。尹注曰。能效天地者其唯忘己乎。此乃說其義如此。王氏念孫謂已無己當作忘己。非是。

事有適而無適若有適觿解不可解而後解。

樾謹按王氏讀書雜志曰。此當作事有適句無適而后適句觿有解句不可解而后解句言事之有適也必無適而后適觿之有解也必不可解而后解。其說誠是。然必改參差之文法以爲整齊轉非古書之舊矣。小爾雅廣言曰。若乃也。管子書君臣上篇若任之以事若量能而授官下篇若稽之以衆風若

任以社稷之臣。諸若字並猶乃也。此文若有適亦當訓爲乃有適。言事有適而無適。乃爲有適。觴必解其不可解。而後能解也。如此則從舊讀。義自可通。無庸增改。

爲善乎。毋提提。

樾謹按提當讀爲湜。說文水部。湜。水清底見也。從水是聲。詩曰。湜湜其止。爲善毋湜湜者。卽老子知其白守其黑之意。水至清則無魚。人至察則無徒。故以湜湜爲戒。湜與提並從是聲。古音相同得相通用。尹注曰。提提謂有所揚舉也。是誤以本字讀之。淮南子說林篇。的者獲。提提者射。提提與的竝言。其義可見。高注曰。提提安也。亦失之矣。

愕愕者不以天下爲憂。刺刺者不以萬物爲筭。

樾謹按筭字義不可通。當讀爲懸。說文心部。懸快也。廣雅釋詁。懸可也。不以萬物爲懸。正與不以天下爲憂相對。言萬物不足以快其心也。筭懸並從夾得聲。故假用之耳。

知苟適。可爲天下周。

樾謹按周字無義。疑君字之誤。可爲天下君。猶下文言可以爲天下王也。君古文與周相似而誤。君親六合。以考內身。

樾謹按此君字乃周字之誤。與上文可互證。尹注曰。遍六合之種。一一考之於身。蓋以遍釋周。是其所

據本末誤也。惟親字無義。尹亦無注。或視字之誤。周視六合。其義甚明。故尹注不及耳。

無遷無衍

樾謹按尹注曰。無遷移。無寬衍。然遷移與寬衍。兩意不倫。恐非也。衍當讀爲延。周官大祝二曰衍祭。鄭注曰。衍字當爲延。又男巫掌望祀。望衍授號。注曰。衍讀爲延。詩椒聊篇。蕃衍盈升。一切經音義十九。引作蕃延盈升。是衍延古通用也。遷延乃疊韻字。古有此語。襄十四年左傳。晉人謂之遷延之役。是也。無遷無延。猶曰無遷延耳。不當分爲二義。

是以水者萬物之準也。諸生之淡也。水地。

樾謹按淡字義不可通。尹注曰。能濟諸生以適中。故曰淡。亦未知淡字作何解也。淡疑本作澹。淮南子原道篇。富澹天下而不既。齊俗篇。智伯有三晉而欲不澹。高注並曰。澹足也。又主術篇。求寡而易澹。注曰。澹給也。蓋澹足之贍。說文無之。古人書贍字。每作澹。漢書食貨志。司馬遷傳。東方朔傳。趙充國傳。字皆作澹。師古注並云。澹古贍字。是其證也。水兼利萬物。諸有生之物。皆于水取給。故云諸生之澹。正合古人澹字從水之義。而後人又以澹淡爲一字。文選潘安仁金谷集詩。綠池泛淡淡。注引東京賦。淥水澹澹云。澹與淡同。於是諸生之澹。改爲諸生之淡。而其義始晦矣。

違非得失之質也。

樾謹按違當讀作隕。隱十一年左傳犯五不隕。杜注曰：隕是也。隕非猶曰是非。正與得失一律。

萬物莫不盡其幾。

樾謹按詩楚茨篇如幾如式毛傳曰：幾期也。萬物莫不盡其幾。言無不盡其期也。猶云終其天年耳。尹注非。

耳之所聽非特雷鼓之聞也察於漱漱。

樾謹按漱當作呶。漱當作啾並以聲言說文口部。呶嘆也。啾小兒聲也。

或世見或世不見者牛媯與慶忌。

樾謹按生字衍文也據下文云或世見或不見者媯與慶忌無生字可證。

涸川之精者生於媯。

樾謹按於字衍文王氏讀書雜志已訂正矣。惟此文尚有可疑上文云涸澤數百歲谷之不徙水之不絕者生慶忌是則當有生字者也。若此文言涸川之精者則卽是媯矣何得更言生乎據太平御覽妖異部法苑珠林六道篇引此文川下並有水字疑管子原文本作涸川之水生媯因涉上文此涸澤之精也而誤若此文已云涸川之精者生媯而下文又云此涸川水之精也則於文義複矣知非管子原文也。

秦之水泔取而稽滯而雜。

樾謹按尹注曰最絕也稽停留也謂秦之水絕甘而味停留蓋尹所據本作甘最而稽故其說如此然義實未安當以今本爲長說文水部周謂潘曰泔潘淅米汁也冂部取積也徐鍇曰古以聚物之聚爲取此二句之義蓋謂泔汁會聚而停留淤泥沉滯而混雜也尹據誤本爲說非是宋本取作最則依尹注爲文耳未足據也。

齊晉之水枯旱而渾

樾謹按齊與晉聲相近周易釋文曰晉孟本作齊是也管子原文本作晉之水聲誤爲齊校者旁注晉字傳寫并入正文遂作齊晉之水矣尹注謂是齊之西而晉之東此曲說也王氏雜志謂涉上文而誤夫上文有齊之水楚之水越之水秦之水何獨誤作齊乎是猶未明其致誤之由也又按渾字無義乃渾之假字惟其枯旱是以渾濁故曰枯旱而渾也。

使不能爲惛惛而忘也者皆受天禍四時

樾謹按使不能爲惛下有闕文據上文使能之謂明聽信之爲聖則此文當有聽不信爲忘六字忘讀爲芒莊子齊物論篇人之生也固若是芒乎釋文曰芒昧也蓋與惛同義七臣七主篇有芒主上見功而賤則爲人下者直爲人上者驕

樾謹按直當爲惠。乃壞字也。惠古德字。言爲下者自以爲德也。九變篇曰。凡民之所以守戰。至外而不
德其上者。蓋有數焉。注曰。雖復至外。不敢恃之。以德於上。此文惠字義與彼同。因字誤爲直。尹氏卽以
肆直釋之。誤矣。

星者掌發爲風。

樾謹按此本作星掌發。發爲風。與下文日掌賞。賞爲暑。歲掌和。和爲雨。辰掌收。收爲陰。月掌罰。罰爲寒。
文法一律。今衍者字奪發字。

除急漏田廬。

樾謹按除急二字衍文也。尹注曰。田中之廬欲漏之。不欲人惡盛陽之氣也。不及除急之義。是尹所據
本無此二字。

所惡其察。所欲必得。

樾謹按當作所惡必察。兩句一律。下文云。所求必得。所惡必伏。亦兩句一律。是其證。

鬪譯跔。

樾謹按此三字之義。爲不可曉。據尹注曰。譯傳言語相疾。忌爲鬪訟者。是其所據本作譯忌鬪。因傳寫
奪鬪字。誤補之譯字之上。而忌字又從足作跔。此是所傳之異。非尹本之舊也。然尹說亦不可通。上文

曰禁博塞圉小辯上一字皆禁止之意下二字皆實指其事此文疑亦當同忌鬪連文雖未詳其義然譯必署之假字說文牽部署司視也從橫目從牽令吏將目捕罪人也然則署有捕治之義禁圉之不止從而捕治之亦事之相因者矣

是故人有六多六多所以街天地也五行

樾謹按六多之義未詳尹氏曲爲之說殆非也街字義亦難明劉氏續曰街猶通也然則街當作術字之誤也說文行部術通街也術之訓通正得其義而其誤爲街亦有由矣字亦作迴玉篇迴通達也淮南子要略篇通迴造化之母上德篇德迴乎天地王氏念孫讀書雜志謂迴字並迴字之誤是也即可以說術天地之義矣

修概水上以待乎天董

樾謹按王氏念孫謂上當作土然此與下文治祀之下以觀地位相對爲文則上字不誤也其義未詳奢龍辨乎東方故使爲土師

樾謹按土師當作工師此官在唐虞爲共工在周官爲司空司空卽司工空者工之假字也故小宰職曰冬官掌邦事不曰冬官掌邦土漢世說經者有司空主空土之說僞古文遂曰司空掌邦土矣說詳羣經平議此文工師作土師蓋以形近而誤然與經義違矣故不可不辨

賜甲子木行御。

樾謹按賜字義不可通。疑當爲都。都古字作都。因誤爲覩。後人遂書作賜耳。爾雅釋詁曰。都於也。都甲子木行御。言於甲子之日。木行御也。下文賜丙子火行御。賜戊子土行御。賜庚子金行御。賜壬子水行御。諸賜字並當作都。

不誅不貞。

樾謹按貞乃賞字之誤。上文於春曰。賦祕賈賞於四境之內。於夏曰。發臧任君賈賞。是皆有賞也。下文於秋曰。命左右司馬衍組甲厲兵合什爲伍。以修於四境之內。訣然告民有事。所以待天地之殺歛也。於冬曰。令民出獵禽獸。不釋巨少而殺之。所以貴天地之所閉藏也。是皆有誅也。蓋賞以春夏刑以秋冬。古制如此。至戊子土行御。則不誅不賞。但務農事而已。故不誅不賞。農事爲敬。賞字闕壞。遂誤爲貞。尹注從而爲之辭。斯曲說矣。

其氣不足。則發擗瀆盜賊。

樾謹按發字涉上句而衍。據尹注無。

不釋巨少而殺之。

樾謹按釋乃擇字之誤。

君危不殺太子危

樾謹按殺當爲發聲之誤也。釋名釋用器曰：鑛，殺也。釋名一書皆以聲取義，鑛從發聲而訓爲殺。是殺與發聲近。詩噫嘻篇駿發爾私毛傳曰：發，伐也。廣雅釋詁曰：伐，殺也。發訓伐而伐訓殺，然則殺之與發義亦得通矣。君危自爲句，不發又自爲句。上文曰：賜甲子木行御。天子出令，命左右士師內御，總別列爵，論賢不肖士吏賦祿，賜賞於四境之內。發故粟以田數出國衡，順山林，禁民斬木，所以順草木也。此文承上而言，故曰天子不賦不賜賞，而大斬伐傷君危不發。太子危，家人夫人死，所云不賦不賜賞而大斬伐傷與上文賦祿賜賞於四境之內及禁民斬木相應。所云不發與上文發故粟相應，蓋當發故粟而不發，故其災禍如此也。不發正與不賦不賜賞一律。因字誤作殺。尹注遂誤以君危不殺四字爲句解。曰：若君雖危而不見殺，則又太子危。而家人夫人有死禍也。此曲說不可從。下文曰：賜戊子土行御。天子修宮室，築臺榭。君危外築城郭，臣死君危爲一事。臣死爲一事，然則此文亦當以君危爲一事。太子危爲一事，非君危不見殺而後太子乃危也。

動靜者比於臥，動作者比於醜，動信者比於距，動訔者比於避勢。

樾謹按四動字皆當作重。與任法篇重愛曰失德，重惡曰失威，兩重字義同。蓋靜作信訔，各有所宜，偏重之則非矣。尹注皆迂曲未合。

未得天極則隱於德。

樾謹按古依隱同聲故釋名釋衣服曰衣依也廣雅釋器曰衣隱也是依隱義同也此云隱於德猶云依於德禮記少儀篇曰士依於德是其義矣尹注謂隱而修德失之形於女色。

樾謹按此女字讀如爾女之女形於女色猶言形於其色耳蓋既裕德無求則其安徐正靜必有見於顏色者故云然尹注讀如本字以爲女之容色失之。

秉時養人。

樾謹按周書諡法篇曰秉順也秉時養人者順時養人也尹注曰持四時之政以順養其人訓秉爲持未得其義。

萬物崇一正。

樾謹按崇讀爲宗尙書牧誓篇是崇是長漢書谷永傳崇作宗是古字通也廣雅釋詁宗本也萬物宗一言萬物本乎一也老子曰一生二二生三三生萬物。

刑以弊之毋失民命。

樾謹按刑以弊之當作弊之以□其□方與下文令之以終其欲遏之以絕其志意養之以化其惡明刑以弊之毋失民命。

之以察其生文法一律因弊之下奪四字遂據上文於弊之上加刑以二字非其舊矣致刑其民庸心以蔽致政其民服信以聽致德其民和平以靜致道其民付而不爭

樾謹按致刑致政致德致道皆二字爲句其民屬下讀言上能致其刑政德道故其民如此也蔽字與聽靜爭不協韻蔽蓋敬字之誤爾雅釋詁庸勞也釋訓庸庸勞也是庸之義爲勞上能致其刑則其民勞心而敬矣尹據誤本作注又誤讀致刑其民爲句遂以庸心以蔽爲就上之人言解曰不用心以斷則濫及不辜乃其解下文和平以靜付而不爭又就民言何也夫四句一律下二句既以民言則上二句亦以民言故知其民二字必屬下讀不屬上讀也付而不爭當作附而不爭古字通用尙書梓材篇皇天旣付中國民釋文曰付馬本作附周官小司寇職附刑罰鄭注曰故書附作付並其證也附而不爭謂民親附而不爭尹注曰人被道則相付任而不爭未達假借之旨

出令時當曰政

樾謹按尹注曰令當於正時之謂也疑正文及注均有誤正文當曰出令當時曰政注文當曰令當於時政之謂也並傳寫者到之正之與政則古通用字耳

正衡一靜能守慎乎

樾謹按尹注曰衡平也言但能守慎則政平而靜一是尹所據本作正衡靜今作一靜誤

能服信政此謂正紀能服日新此謂行理

樾謹按上云立常行政能服信乎中和慎敬能日新乎此承上文而言當作能服信此謂正紀能日新此謂行理上句政字涉上文臨政官民而衍下句服字卽涉上句能服信而衍

不事心不勞意不勤力任法

樾謹按爾雅釋詁事勤也勤勞也是事與勞義通禮記儒行篇先勞而後獲鄭注曰勞猶事也然則事亦猶勞也不事心者不勞心也至勤字亦無意疑勤字之誤不事心不勞意不勤力三句一意奇術技藝之人莫敢高言孟行以過其情以遇其主矣

樾謹按遇讀爲愚詩巧言篇遇犬獲之釋文曰遇世讀作愚莊子則陽篇匿爲物而愚不識釋文曰愚本作遇是遇與愚通愚其主者自以爲知而以其主爲愚也尹注訓遇爲待則失其義

國法法不一則有國者不祥

樾謹按此本作有國者國法不一則不祥有國者三字總冒下五句國法不一則不祥與下民不道法則不祥一律因寫者奪有國者三字而誤補之則字之下則與下文句法不一律矣國法不一句又誤疊法字尹注遂斷國法二字爲句解曰有國者有法也增益以成其義足知其非國要立法以典民則祥

樾謹按上下文凡四言不祥則此亦當作不祥傳寫奪不字耳立法固所以典民然成法具在必更易之則不祥矣尹所據本奪不字故失其解

故曰法者不可恆也

樾謹按尹注曰法敝則當變故不恆此說雖若有理然以上下文求之殊不可通上文曰故黃帝之治也置法而不變使民安其法者也此乃云法不可恆則非置法不變之謂矣其不可通一也既云法不可恆而下文乃曰故明王之所恆者二一曰明法而固守之二曰禁民私而收使之此二者主之所恆也則又非法不可恆之謂矣其不可通二也反覆推求三恆字皆慎字之誤法者不可恆也本作法者不可不慎也故其下卽曰存亡治亂之所從出聖君所以爲天下大儀也君臣上下貴賤皆發焉乃申明不可不慎之意禁藏篇曰法者天下之儀也所以決疑而明是非也百姓所縣命也故明主慎之正與此文同義自慎誤爲恆而又奪不字遂失其義矣明王之所恆者二當作明王之所慎者二此二者主之所恆也當作此二者主之所慎也慎字右旁之真隸書作真闕壞而爲亘故慎誤爲恆矣夫兩言所慎文義甚明若作所恆便爲無義其誤顯然所宜訂正然故諶杵習士聞識博學之人不可亂也

樾謹按尹解諶杵曰杵所以毀碎於物者也謂姦詐之人僞託於諶以毀君法此說殊爲迂曲殆非也

讒杵疑當作讒斟。乃疊韻字。後漢書馮衍傳意斟愾而不憺兮。李賢注曰。斟愾猶遲疑也。此作讒斟者。諶與愾同。杵乃斟字之誤。古書斟字或作斗。故斟鄩亦作斗鄩。見玉篇土部。又或作斗。見漢書地理志。應劭注管子原文。疑本作斗。因誤爲杵也。習士者俗士也。說文人部俗習也。習與俗雙聲。故義亦得通。讒斟習士。謂流俗之士。意識遲疑者也。此指愚不肖者而言。下云聞識博學之人。則指賢知者而言。此兩等人。皆能出其私議。以亂國法者也。

卿相不得翦其私。

樾謹按上云。翦公財以祿私士。此乃云翦其私。義不可通。此翦字當讀爲濟聲之誤也。爾雅釋言。翦齊也。郭注曰。南方人呼翦刀爲劑刀。是齊與翦聲相近。又涉上文翦公財而誤耳。

夫日侵而產怨。此失君之所慎也。

樾謹按失君當作人君。涉上文失君則不然而誤。

令求不出謂之滅。出而道留謂之擁。下情求不上通謂之塞。下情上而道止謂之侵。明法。

樾謹按令求不出。據後解作令本不出。然則下情求不上通亦當作下情本不上通。後解奪本字。遂并此文而無從是正矣。尹注曰。求不出令。則下無所稟。故滅。求不上通。則與君隔絕。故曰塞也。兩求字亦本字之誤。

比周以相爲匿。是忘主死交。以進其譽。

樾謹按是下奪故字。後解作比周以相爲慝。是故忘主死交。以進其譽。可證也。尹注誤讀是字絕句。劉氏已訂正矣。惟匿字亦當從後解作慝。言比周而爲姦慝也。匿慝古字通。洪範五行傳。朔而月見東方。謂之側匿。漢書孔光傳作側慝。

不一圖國。

樾謹按當從後解。作不一圖其國。

力罷則不能毋墮。倪正世

樾謹按尹注曰。倪傲也。則墮當讀爲惰。惰與傲義相近。輕重戊篇歸市亦惰倪。是其證。

不繁匿。

樾謹按匿亦當爲慝。說見上篇下文曰。法禁不立則姦邪繁。繁慝卽姦邪繁也。

有愛人之心。而實合於傷民。

樾謹按合於傷民者。足於傷民也。合與給通。給足也。故合亦有足義。論語子路篇始有曰。苟合矣。言苟足也。孟子梁惠王篇。此心之所以合於王者何也。言足於王也。說詳羣經平議。

治莫貴於得齊。

樾謹按水經濟水注引春秋說題辭曰齊度也周官亨人以給水火之齊鄭注曰齊多少之量又酒正辨五齊之名注曰齊者每有祭祀以度量節作之是齊有度量之義治莫貴於得齊謂得其度量也史記孝武紀事化丹砂諸藥齊爲黃金矣索隱曰齊音分劑之劑此齊字讀當與彼同尹注非是

諸子平議卷五

管子五

謀乎莫聞其音內業、

樾謹按謀乎乃形況之辭與下文卒乎冥冥乎淫淫乎一律尹注曰今謀欲尋於道則不聞其音此大誤也謀卽禮記玉藻篇瞿瞿梅梅之梅正義曰梅梅猶微微謂微昧也正與莫聞其音之義合梅或體作模與謀並從某聲故得通用莊子知北遊篇媒媒晦晦釋文引李注曰媒媒晦貌謀與媒亦同飢不廣思飽而不廢

樾謹按下飽字疑飢字之誤上文曰飢則廣思尹注曰飢而廣思則忘其飢然則飢不廣思其飢益甚矣故曰飢而不廢言飢不止也尹注曰廢止也是其義也今作飽而不廢義不可通蓋後人不達其旨而臆改耳

是謂雲氣

樾謹按下文云靈氣在心一來一逝疑此文雲氣亦靈氣之誤隸書靈字或作靈見王稚子闕與雲相似故誤爲雲耳尹注曰能調其氣故比於雲此其所據本已誤故曲爲之說

不可爲數。

樾謹按不可爲數猶言不可勝數。言天下之精材皆聚於我。不可爲之計數也。尹注非。

守戰遠見有患。

樾謹按尹注曰爲國者必入守出戰今吾於此二者預見其患矣。尹氏蓋以遠見有患連讀而解爲預見其患甚爲不辭。遠見卽外知也。下文曰夫民不必死則不可與出乎守戰之難不必信則不可恃而外知。夫恃不死之民而求以守戰恃不信之人而求以外知此兵之三閭也。卽承此文而言故知遠見卽外知也。儀禮特牲饋食禮若不吉則筮遠日。鄭注曰遠日旬之外日。呂氏春秋有始覽冬至日行遠道高注曰遠道外道也是遠卽外也。呂氏春秋自知篇文侯不說知於顏色高注曰知猶見也是見卽知也。

而憂之以德。

樾謹按說文久部憂行之和也。凡經傳憂字皆憇之假字。此則其本字憂之以德謂和之以德也。

除君苛疾與若之多虛而少實。

樾謹按若乃君字之誤。王氏引之已訂正矣。至尹氏謂此句蒙除字爲文解曰謂君之材能多似有而非實如此者亦祝去之也。果如此則祝鳧已疵之言未始不善公何爲不說乎蓋一除一與自是兩事。

除者祝去之與者求與之也多虛而少實謂致力者少而收功者多下文曰又與君之若賢亦是此意祝之意以爲不賢固不可然必實賢則勞矣故以若賢爲祝也此二句正所謂婦寺之忠桓公怒而將誅之是可以責難矣管仲是以知其可霸也

中有卷城

樾謹按卷當讀爲圈大元交次六·大圈閼閼小圈交之范望注曰·圈國也是圈有國邑之義故與城並言

今者寡人見人長尺而人物具焉冠

樾謹按冠下本有冕字說苑辨物篇作有人長尺冠冕是其證也今本奪冕字而藝文類聚太平御覽開元占經諸書所引並作冠冠則又因奪冕字而誤補冠字

右祛衣

樾謹按說苑作左祛衣是也說詳後

從左方涉其深及冠從右方涉其深至膝

樾謹按水而及冠是滅頂矣又何涉乎說苑作從左方渡至踝從右方渡至膝疑此文冠字亦當作踝以聲近而誤也左至踝右至膝是左淺而右深也自踝誤作冠則爲左深而右淺遂改上文之左祛衣

爲右祛衣左方涉爲右方涉皆非管子之原文矣。

昔者吳干戰未亂不得入軍門國子擿其齒遂入爲干國多。

樾謹按尹注曰干江邊地亂毀齒也戰功曰多言於干戰國子功多也此注於干字未得其義干當作邗說文邑部邗國也今屬臨淮從邑干聲一曰邗本屬吳蓋邗古國名後爲吳邑哀九年左傳吳城邗卽其地矣此文吳干戰吳干乃兩國也國子乃干國之人故曰爲干國多言此役也國子在干國中戰功爲最也尹氏不知干爲國名誤解爲江邊地則吳與戰者何國也且其解爲干國多句更文不成義矣

皆要審則法令固七臣七主

樾謹按尹解皆要爲事皆得要殆非也下句曰賞罰必則下服度皆要與賞罰相對爲文若從尹解則不倫矣皆當作比大戴記保傅篇於是比選天下端士漢書賈誼傳比作皆戰國秦策斷死於前者比是也韓子初見秦篇比作皆並其例矣周官小司徒職及三年則大比大比則受邦國之比要鄭司農云五家爲比故以爲比名今時八月案比是也要謂其簿然則比要者大比之簿籍大比之簿籍審則法令固矣管子多本周制於此可見

不辭則國失勢

樾謹按辭乃悟之假字。言不覺悟則國勢必失也。上文曰得六過一是以還自鏡。以知得失。然則過主能早自覺悟。或尙可爲。不悟則已矣。下文凡言不辭者。其義並同。尹注謂辭古伍字。謂偶合也。非是四鄰不計。

樾謹按此本作四隣不計。故尹注曰。四鄰與己爲隣。不計度而知之。四鄰與己爲隣。正解四隣之義。今作四鄰不計者。卽涉注文而誤。下文曰故上惛則隣不計。文與此同。彼奪四字耳。

瑤臺玉鋪不足處。

樾謹按尹注曰。玉鋪猶玉食。然云不足處。則當是居處之事。鋪疑圃之假字。鋪與圃並從甫聲。故得通耳。玉圃猶瑤圃也。楚辭涉江篇曰。吾與重華遊於瑤之圃。

夫亡國踏家者非無壤土也。

樾謹按者字衍文也。此以國家言。故曰非無壤土。若有者字。則以人言。不當云壤土矣。下文夫凶歲雷旱。非無雨露也。亂世煩政。非無法令也。暴主迷君。非無心腹也。並無者字。故知此者字誤衍。

苴多臘墓。

樾謹按苴與菹同。孟子滕文公篇驅蛇龍而放之菹。趙注曰。菹澤生草者也。今青州謂澤有草爲菹。斷名決。

樾謹按尹注曰依名而斷決則其所據本當作名斷決故下文曰名斷言澤

吏不敢以長官威嚴危其命禁藏

樾謹按危當讀爲詭古字通用說見大匡篇曹大家注幽通賦曰詭反也詭其命者反其命也與上句不爲親戚故貴易其法一律

民之承教重於神寶

樾謹按爾雅釋詁神重也此言神寶卽上言重寶因句有重字故變重言神耳尹注曰夫寶有靈故曰神寶失之

能節宮室適車輿以實藏

樾謹按適猶節也呂氏春秋重己篇故聖人必先適欲高注曰適猶節也情欲篇情有節古樂篇有節有侈注並曰節適也是適節義通適車輿猶節車輿也與節宮室一律

氣情不營則耳目穀

樾謹按穀讀爲慤禮記祭義篇其親也慤正義曰慤謂質慤氣情不營則耳目質慤矣尹讀如本字非菹笠以當盾櫓

樾謹按尹注曰取菹澤草以爲笠然則當云草笠不當云菹笠且與上文被蓑以當鎧鐳文義不倫殆

非也。菹者組之假字。說文系部。組綏屬其小者以爲冕纓。然則組笠猶言纓冠。正與被蓑相對成文。農事習則功戰巧矣。

樾謹按功當作攻。上文云耕農當攻戰。此承上文而言。故曰農事習則攻戰巧矣。尹注曰。習農則當功戰。卽依上文爲說。功亦應作攻。荀子議兵篇。械用兵革。攻完便利者強。楊注曰。攻當爲功。是攻功古通用。然觀尹注。則其所據本似本作攻。今作功者聲近而誤。

順天之時。約地之宜。忠人之和。

樾謹按王氏念孫謂約當爲得。草書相似而誤。而未及忠字之義。忠當讀爲中。枚氏古文尙書仲虺之誥。建中于民。釋文曰。中。本或作忠。是中忠通用也。中人之和。猶言得人之和。周官師氏職曰。掌國中失之事。鄭注曰。故書中爲得。呂氏春秋行論篇。以中帝心。高注曰。中猶得。戰國策齊策。是秦之計。中高注曰。中得也。並古人謂得爲中之證。得人之和。正與得地之宜一律。荀子富國篇。上得天時。下得地利。中得人和。文義與此相近。可以證成王說。

夫敍鈞者所以多寡也。

樾謹按所以下有奪字。下文云。權衡者所以視重輕也。戶籍田結者所以知貧富之不訾也可證。而謀有功者五。

樾謹按當作謀而有功者五。

外內蔽塞可以成敗。

樾謹按此欲其敗非欲其成而曰可以成敗乃因敗而連言成古語往往如此說見日知錄卷二十七漢書何進傳先帝嘗與太后不快幾至成敗亦因敗而連言成正與此同王氏引之謂成當爲或非是謹其忠臣。

樾謹按謹當讀爲結言與其忠臣相結也結與謹一聲之轉故古或通用桓三年穀梁傳謹言而退公羊傳作結言而退是其證。

上收而養之疾官而衣食之入國、

樾謹按疾官二字連文官古館字說詳余所著字義載疑疾官乃有疾者所居之館舍當時蓋特設之以居有疾之人故曰上收而養之疾官而衣食之尹注誤於疾字斷句則兩句皆不可通矣。

虛心平意以待須九守

樾謹按須本作傾與上文靜定爲韻待訓爲備國語周語其何以待之韋注曰待猶備也以待傾者以備傾也言虛心平意以備其傾覆也今誤作須則不特失其韻且須卽待也於義複矣鬼谷子符言篇作虛心平意以待傾損是其墮證。

誠暢乎天地通於神明見姦僞也

樾謹按見乃兄字之誤管子書每以兄爲況字大匡篇兄與我齊國之政也是其證也此言精誠可以暢天地通神明況姦僞乎言必爲其所化也古字也與邪通故陸德明經典釋文曰邪也弗殊然則況姦僞也猶云況姦僞邪因段兄爲況又誤兄爲見而其義全失鬼谷子符言篇作誠暢於天下神明而況姦者于君其文雖不同然況字正不誤可據以訂正

因之修理故能長久

樾謹按修乃循字之誤鬼谷子正作循理下文修名而督實修亦當爲循鬼谷子作循名而爲實其文雖不同而循字不誤可據訂

明知千里之外隱微之中曰動姦

樾謹按動當作洞聲之誤也鬼谷子作是謂洞天下姦

上相稽著者所以爲固也度地

樾謹按方言嗇合也廣雅釋詁繕合也稽與嗇繕並通稽著猶合著也文選七發中若結轎李善注引說文曰轎車籍交革也義亦相近

大夫佐各一人率部校長官佐各財足

樾謹按財足猶纔足也。史記孝文本紀見馬遺財足索隱曰財字與纔同漢書楊雄傳財足以奉郊廟師古注曰財讀與纔同漢書以財爲纔不可枚舉此文財足正與彼同言人數不必過多取其纔足任事而已尹注曰財謂其祿廩非是下文云給卒財足亦言給之以卒使纔足任事不必過多也注云財其糧用也亦非是。

可省作者半事之。

樾謹按省與少一聲之轉故義得相通禮記喪服小記篇多陳之而省納之荀子仲尼篇省求多功並以省與多對省卽讀如少矣此言雖有疾病不能多作猶可少作故半事之也尹注謂可以省視作者取其半功未得其義。

補弊久去苦惡。

樾謹按尹注曰其器旣補弊而久有苦惡者除去之此未得其義補弊久與去苦惡相對久讀爲舊尙書無逸篇舊勞于外舊爲小人史記魯周公世家舊皆作久是舊久古通用詩抑篇告爾舊止鄭箋曰舊久也文選答賓戲時暗而久章者注曰久舊也並其證也此文言弊舊者補之苦惡者去之兩句文義一律若云補弊而久則不辭甚矣

不利作土功之事放農焉。

樾謹按放讀爲妨禮記月令篇毋發令而待以妨神農之事也卽其義

寡人悖不知四害之服奈何

樾謹按服讀爲備謂不知四害之備也戰國策趙策騎射之服史記趙世家作騎射之備是服與備古字通

五種無不宜其立后而手實地員

樾謹按兩句傳寫誤倒其立后而手實本在五種句前總冒本篇五種無不宜自與其木宜蚯蕘云云相屬乃專說五施之土證以下文其誤自見矣

先主一而三之四開以合九九

樾謹按一而三之爲三三而三之爲九九而三之爲二十七二十七而三之爲八十一是謂四開以合

九九尹注誤

陝之芳

樾謹按芳當作旁字之誤也陝之旁與下文山之上山之側一律

七八五十六尺而至於臬

樾謹按宋本作八七五十六尺與上文六七四十二尺七七四十九尺一律當從之下文七九六十三

尺亦當作九七。

其草如茅與走。

樾謹按如茅疑卽爾雅釋草所謂茹蘆茅蒐非必二草也走未詳。

山之材

樾謹按材字無義疑矛字之誤矛誤作才因誤作材矣矛者垂之古文見說文我部山之矛卽山之垂說文土部垂遠邊也是垂有邊側之義尹注曰材猶旁也正得其義但未得其字耳

其木乃格

樾謹按木無名格者格乃榦之借字爾雅釋木榦榦郭注以爲柟屬說文木部榦木可作牀几徐鍇繫傳以爲梓屬二者未詳孰是此文以格爲榦猶儀禮古文以格爲榦蓋古音相近故得通用

有龍與斥

樾謹按尹注曰龍斥並古草名此古字殊爲無義疑正文本作有龍古與斥注文本作龍古與斥並草名傳寫奪誤耳爾雅釋草紅龍古卽此草也

右執挾七弟子職

樾謹按尹注曰七者所以載鼎實故曰挾七此說非也古時七有二儀禮士昏禮七俎從設鄭注曰七

所以別出牲體也。此一七也。少牢饋食禮。廩人概餕七與敦于廩饗。注曰。七所以七黍稷者也。此又一七也。說文七部。七相與比敍也。从反人。七亦所以用比取飯。一名柵。木部。柵七也。所以取飯。是七之本義爲取飯之七。因別出牲體之具爲用略同。故亦以七名之。取飯之七小。而別出牲體之七大。易震彖辭不鬯七鬯。注時大東篇有挾棘七傳。並云。七所以載鼎實。蓋皆別出牲體之七也。尹氏因亦襲用其說。然管子此文言弟子爲先生設食之禮。豈必列鼎而食。則所謂七者。自是取飯之七。挾七蓋二物也。挾讀爲棟。禮記曲禮篇。羹之有菜者用棟。鄭注曰。棟猶箸也。然則棟也七也。正食時所必用者。雖疏食菜羹。不可無此二物。弟子執之。正其宜矣。

周還而貳。唯嗛之視。同嗛以齒。

樾謹按尹注曰。貳謂再益食。盡曰嗛。齒類也。謂食者則以其所盡之類而進。尹氏此說於同嗛以齒。未得其義。齒者年也。長幼之次也。同嗛以齒。以先生之齒言。猶下文弟子乃食。以齒相邀。以弟子之齒言也。蓋食盡則更益之。有同盡者。則以齒爲序。先生亦或非一人。自有長幼也。

各撤其餽。如於賓客。

樾謹按於猶爲也。見王氏經傳釋詞。如於賓客者。如爲賓客也。尹注曰。賓客食畢亦自撤也。正見各其餽與賓客同。

旣徹并器。

樾謹按并當爲屏。尙書金縢篇我乃屏璧與珪枚傳曰屏藏也。旣徹屏器謂旣徹之後則藏其器故尹注曰并謂藏去也。

先生若作乃興而辭。

樾謹按先生若作者先生謙故爲之起也。弟子不敢當故必辭。尹注謂以拚未畢故辭之令止此未達其旨爲弟子者豈宜以已拚未畢而止先生之作乎。

有墮代燭。

樾謹按尹注曰燒燭者有墮卽令其次代之也然則正文及注文墮字並當作惰。大戴記盛德篇無度量則小者偷墮是墮與惰古字通。

治安百姓。形勢解

樾謹按治安上當有主字主治安百姓興地生養萬物相對猶上文主牧萬民與天覆萬物相對也人主去其門而迫於民。

樾謹按門字無義疑明字之誤禮記禮運篇故君者所明也鄭注曰明猶尊也去其明卽去其尊上云虎豹去其幽此云人主去其明兩文正相對虎豹必居以幽僻之地故以幽言人主必居於高明之地。

故以明言一幽一明正管子取譬之指也。

濟濟者誠莊事斷也。

樾謹按詩泮水篇實始翦商毛傳云翦齊也鄭箋云斷也正義謂齊卽斬斷之義此文以誠莊事斷釋濟濟卽此意也可證古詩說故特表出之。

度量馬力

樾謹按此本作度量其力承上文善視其馬而言不必言馬也下文說明主善治其民亦云度量其力不言民力可證此文馬力之誤

奚仲之爲車器也

樾謹按車器二字不詞據下文云巧者奚仲之所以爲器也則此文亦當作奚仲之爲器也車字蓋後人妄加耳蘡文類聚及御覽引此文並作奚仲之爲車蓋反以器字爲衍而刪之考工記曰一器而工聚也者車爲多車亦器也此文以作器爲長

備利而偷得

樾謹按備字無義疑苟字之誤苟誤作荀因誤爲備矣禮記表記篇安肆日偷鄭注曰偷苟且也是偷與苟同義苟利卽偷得也

爲人君而不明君臣之義以正其臣則臣不知於爲臣之理以事其主矣。

樾謹按不知下不當有於字乃衍文也下文云爲人父而不明父子之義以教其子而整齊之則子不知爲人子之道以事其父矣不知下亦無於字可證

禹身決瀆斬高橋下以致民利

樾謹按斬當讀爲鑿說文金部鑿小鑿也字亦作嶄文選海賦墾陵巒而嶄鑿汪鑿與嶄古字通禹鑿龍門卽此所謂斬高矣橋讀爲橋引之橋蓋引而上行之意斬高橋下義正相當猶言高者下之下者高之耳

然能戰勝攻取立爲天子

樾謹按能與而古字通然能戰勝攻取卽然而戰勝攻取也下文桀紂貴爲天子富有海內地方甚大戰卒甚衆而身死國亡爲天下僇者羣書治要作然而身死國亡此文正與彼對一作然能一作然而文異而義同韓詩外傳貴而下賤則衆弗惡也富能分貧則窮士弗惡也崔駰大理箴或有忠能被害或有孝而見殘能而互用古書往往有此

如是則朋黨者處前寡黨者處後夫朋黨者處前賢不肖不分則爭奪之亂起而君在危殆之中矣立解九敗政

樾謹按王氏念孫謂朋黨當作多黨是也惟此數句尙有闕文當云夫多黨者處前寡黨者處後則賢不肖不分賢不肖不分則爭奪之亂起而君在危殆之中矣今本奪二句則文義不備

凡觀樂者宮室臺池珠玉聲樂也

樾謹按此釋上文觀樂玩好不當專舉觀樂而釋之疑本作凡觀樂者宮室臺池玩好者珠玉聲樂也傳寫奪三字

疏遠微賤者無所告訥則下饒版法解

樾謹按饒當爲讒說文言部讒恚呼也

凡人君者欲衆之親上鄉意也欲其從事之勝任也而衆者不愛則不親不親則不明不教順則不鄉意

樾謹按不親則不明句當爲衍文上下文均無此意且下文曰明教順以道之是明屬君不屬民故知此句衍文也不教順則不鄉意下尙有闕文據下文當曰不利則不勝任

故莫不得其職姓

樾謹按得職猶得所也漢書趙廣漢傳小民得職注曰得職各得其常所也此文以職姓連文甚爲不詞疑管子原文止作莫不得其職而它本或有作得其姓者姓乃性之假字言得其性也亦與得職同義而後人誤合之遂作得其職姓耳明法解篇孤寡老弱不失其所職所職二字亦爲不詞蓋亦一本

作所一本作職而誤合之夫學者所以自化所以自撫

欽謹按撫當作撫撫卽模字漢書蕭望之傳注曰撫讀曰模是也說文木部模法也所以自撫言以學自爲模範

明主者有術數而不可欺也明法解

欽謹按有字乃明字之誤明字之下又奪於字當云明主者明於術數而不可欺也與下文審於法禁而不可犯也察於分職而不可亂也文誼一律

明主之治國也案其當宜行其正理

欽謹按羣書治要作案賞罰行其正理此非原文也案其當宜行其正理兩句相對成文當猶正也廣韻正正當也正可謂之當當亦可謂之正漢書李尋傳當賀良等執左道亂朝政注曰當謂處正其罪名素問六節藏象論當其時則甚也注曰當謂正直之年也是當與正同也宜通作誼周官肆師職注引鄭司農曰古者書儀但爲義今書所謂義爲誼是誼者古義字宜乃誼之省耳故曰仁者人也義者宜也仁人古通用則義宜亦通用案其當宜猶案其正義與下句行其正理一律王氏念孫反謂當從治要本誤也

人主不參驗其罪過以無實之言誅之則姦臣不能無事貴重而求推譽以避刑罰而受祿賞焉
樾謹按姦臣當作人臣蓋人主以無實之言誅人則人臣皆事貴重以求免非必姦臣也涉上文兩云
姦臣而誤

此页空白

諸子平議卷六

管子六

日至六十日而陽凍釋。七十日而陰凍釋。陰凍釋而秧稷百日不秧稷。故春事二十五日之內耳也。臣乘馬。欒謹按七十日陰凍釋而秧稷至百日而止。則尚有三十日。乃云春事二十五日之內。義不可通。疑管子原文本作七十五日而陰凍釋。後人但取六十日七十日兩文相對。而不顧其數之不合。遂妄刪五字耳。易乾鑿度曰。天氣三微而成一箸。鄭注曰。五日爲一微。十五日爲一箸。故五日成一候。十五日成一氣。然則日至六十日得三微。一至者二。七十五日又得三微。一至者一。以周書時訓篇言之。日至六十日而陽凍釋。是爲驚蟄。七十五日而陰凍釋。是爲雨水。若作七十日。則不相當矣。故知其誤也。

王國守始乘馬數。

欒謹按下文國用一不足。則加一焉。國用二不足。則加二焉。云云。是乃無策之甚者。何以謂之王國。疑王國乃亡國之誤。上文云。出準之令。守地用人。筭故開闢。皆在上。無求於民。霸國守分上分下。游於分之閒而用足。夫無求於民者上也。游於分之閒而用足者次也。然則此爲最下矣。王國之誤無疑也。民無糧賣子數矣。

樾謹按數矣二字衍文涉上文又失諸夏秋之筭數也而衍宋本作數也此其初衍之本今作數矣則又誤也字爲矣字

故以上壤之滿補下壤之衆

樾謹按衆字義不可通疑本作補下壤之虛虛與滿相對國蓄篇曰萬物之滿虛又曰守歲之滿虛並其證也隸書虛字或作爰故誤爲衆耳

齊諸侯方百里事語

樾謹按內業篇節適之齊尹注曰齊中也齊諸侯者中諸侯也謂中國之諸侯也與下文負海子相對負海則非中國矣輕重乙篇作𠂇諸侯齊𠂇一聲之轉猶鱠魚之爲鯀魚也彼壤狹而欲舉與大國爭者

樾謹按舉衍文蓋卽與字之誤而衍者

吾子食鹽二升少半海王

樾謹按尹注曰吾子謂小男小女也然則吾當讀爲牙後漢書崔駰傳注曰童牙謂幼小也吾子卽牙子其作吾者牙吾古同聲猶駟吾之或爲駟牙矣大玄勤次三曰羈角之吾其泣呱呱義與此同集韻有狩字音牙云吳人謂赤子曰稚狩蓋卽牙字而加子旁耳

萬乘之國正九百萬也

樾謹按九乃人字之誤。隸書人字或作九。張休崖渙銘行九過茲隸續云。九卽人字是也。其形與九相似。又因上下文多言數。故誤爲九耳。正人二字連文。國蓄篇云。以正人籍。謂之離情。以正戶籍。謂之養贏。是正人正戶。當時有此名目。尹彼注曰。正數之人。若丁壯也。此正人之義。亦當與彼同。揆度篇曰。萬乘之國爲戶百萬戶。爲開口千萬人。爲當分者百萬人。是萬乘之國。正人止百萬而已。故曰正人百萬也。王氏引之說與余同。而誤以正字絕句。讀爲征。則猶未得。

今夫給之鹽筴。則百倍歸於上。

樾謹按百字衍文。上云月人三千錢之籍。爲錢三千萬。今吾非籍之諸君吾子也。而有二國之籍者六千萬。是國之常征。止三千萬。鹽筴之利。得六十萬。適加一倍。故曰倍歸於上。若作百倍。則太多矣。蓋後人不察文義。而妄如。又按上文三千萬六千萬之數。王氏引之說最塗。尹注皆非也。說具讀書雜志。今不錄。

歲適美。則市糶無予。國蓄。

樾謹按方言。予讎也。此予字當訓爲讎。讎卽售字。說文新附。售賣去手也。詩抑篇箋云。物善則其售賈貴。釋文云。售本作讎。蓋古無售字。卽以讎爲之。此文言無予。卽無售也。猶詩云。賈用不售矣。下文云。穀

賤則以幣予食. 布帛賤則以幣予衣. 言穀賤則以幣售食. 布帛賤則以幣售衣也. 兩予字亦當訓讎. 物適賤則半力而無予.

樾謹按無予之義已見上矣. 半力二字義不可通. 疑半分之誤. 下文云物適貴則什倍而不可得. 半分與什倍正相對. 輕重乙篇十倍而不足. 或五分而有餘. 以五分與十倍相對. 義與此近.

鍾鑲糧食畢取贍於君.

樾謹按鑲宋本作餵. 當從之. 傳寫誤從金耳. 鍾本作種. 今從金旁亦誤. 山國軌篇尹注引此文. 正作種餵糧食可證.

夫國之君不相中. 舉兵而相攻.

樾謹按夫國者彼國也. 漢書賈誼傳. 夫將爲我危. 師古注曰. 夫夫人也. 亦猶彼人耳. 此夫字義亦與同. 以百乘之國視千乘萬乘之國. 則皆彼國耳. 故曰夫國之君. 王氏念孫謂當作大國. 非是.

人衆田不度食若干. 山國軌.

樾謹按不度食當作不足食. 涉上文終歲度人食若干而誤也. 下文云終歲其食不足於人若干可證. 萬物重十倍. 府官以市橫出萬物. 隆而止.

樾謹按隆當作降. 古字通用. 曹大傳. 隆谷鄭注曰. 隆讀如厖降之降. 是其證也. 此言物重則出之. 及降

殺而後止。故曰降而止。廣雅釋詁。屢滅也。降與屢同。

故王者歲守十分之參。三年與少半成歲。三十一年而藏十一年與少半。山樞數。

欽謹按王氏引之曰。三年二字。因下文而衍。當作歲守十分之參與少半。言一歲之穀分爲十分。守其三分與一分之少半。是所守者爲十分中三分之一也。成歲者順成之歲也。藏十一年衍一字。當作藏十年。言順成之歲。三十一年而藏其十年與一年之少半。是所藏者爲三十一年中三分之一也。今按王氏此說殊不可通。所守者旣爲三分之一。則但曰王者歲守三之一。豈不簡而易明。乃必設爲十分。然後以十分之參及一分之小半。迂回取數。何也。且果三分之一。則是三十年而藏十年也。乃不曰三十年而藏十年。而曰三十一年而藏十年與少半。必多此一年。使成奇零之數。又何也。且前之少半爲十分中一分之少半。後之少半爲一年之少半。則多寡迥殊矣。而同以少半言之。使人疑誤難曉。又何也是。故王氏說此文未得其理。此文初無衍字。但三十一年當作三十七年。七誤爲一所闕。止一筆耳。王者歲守十分之參者。一歲之穀分爲十分。用其七藏其三。是謂歲守十分之參。於是三年得九分。又加一年之少半。則又得一分合而爲十分。是與一歲之數相當矣。故曰三年與少半成歲也。三十七年之中。每年三分。共得一百一十一分。夫一百一十分。是十一年也。尙餘一分。是一年之少半也。故曰三十七年而藏十一年與少半。所以必如此計算者。正以三十三年以前。尙不足十年之數。至三十四年。

則十年而餘二分.三十五年則十年而餘五分.三十六年則十年而餘八分.其所餘之數皆不能適與上文少半之數合.故必三十七年方可計算也.古人屬辭之密如此.至歲守十分之三.雖非三之一.然所少亦無幾.故下文曰藏參之一也.王氏泥參之一以爲說.宜所解之皆誤矣.

桓公曰.阨者所以益也.

樾謹按此本作阨者所以隘也.故管子對曰.隘則易益也.正承桓公此語而言.今作所以益也.卽涉下句益二字而誤耳.禮記禮器篇.君子以爲隘矣.釋文曰.隘本作阨.是阨隘義得相通.故曰阨者所以隘也.隘誤作益於義難通.且管子隘則易益之言爲贅設矣.

古者輕賦稅而肥籍歛.山至數.

樾謹按肥當爲肥.乃薄之假字也.魏孝武弔比干墓文.被芰荷之輕衣.屯狀容之藉裳.顧氏炎武金石文字記.謂藉卽葩字.然葩裳之文殊不成義.蓋假葩爲薄.故與輕衣相對.管子此文.假葩爲薄.以輕賦稅薄籍歛相對.正與彼同字誤作肥.遂不可解矣.下文祿肥則士不死.幣輕則士簡賞.肥亦當作肥.而讀爲薄.祿薄幣輕亦相對也.

內則大夫自還而不盡忠.

樾謹按還當讀爲環.韓子五蠹篇曰.自環者謂之私.

特命我曰

樾謹按特者人名也。命猶告也。禮記縕衣篇鄭注曰。傳說作書以命高宗。是古者上下不嫌同詞。以君告臣謂之命。以臣告君亦謂之命也。事語篇秦奢教我曰。佚田謂寡人曰。及此篇梁聚謂寡人曰。有人教我謂之請士。曰。輕重乙篇衡謂寡人曰。並舉人言以問管子。則特命我曰。義亦同也。

上有鉛者。其下有銉銀。上有丹沙者。其下有銉金。地數

樾謹按玉篇金部。銉送死人具也。然則銉金銉銀殊不可通。疑銉字之誤。五音集韻曰。銉堅金也。

故先王各用於其重。

樾謹按各當爲託聲之誤也。國蓄篇作先王爲其途之遠其至之難。故託用於其重可證。揆度篇作故先王度用其重度亦當爲託。

修河濟之流。

樾謹按修乃循字之誤。言循流而下也。循誤作脩。因誤作修。本書類此者不可勝舉。

巨錢而天下貴。

樾謹按此本作吾賤而天下貴。言五穀興豐。則吾國之穀價賤。而天下貴矣。故曰五穀興豐。吾賤而天下貴。則稅於天下。然則吾民常爲天下虜矣。今作巨錢者。吾字闕壞。止存上半之五。遂誤爲巨。至賤之

與錢字形相似音又相同致誤尤易矣
故相任寅爲官都揆度

樾謹按寅字無義疑更字之誤隸書寅作寅其下與更相似故更誤爲寅矣相任更爲官都者言使之相保任而更迭爲官都也官都見問篇按問篇曰問五官有度制官都其有常斷今事之稽也何待然則官都者五官之總司也淮南子天文篇曰何謂五官東方爲田南方爲司馬西方爲理北方爲司空中央爲都都卽此所謂官都也上文云自言能爲司馬不能爲司馬者殺其身以釁其鼓自言能治田土不能治田土者殺其身以釁其社司馬也田也五官中之二也然則相任更爲官都殆謂使四官相保任而更迭爲官都乎

二五者童山竭澤人君以數制之人味者所以守民口也聲者所以守民耳也色者所以守民目也人君失二五者亡其國大夫失二五者亡其勢民失二五者亡其家

樾謹按童山竭澤四字當在上文至於黃帝之王句下輕重戊篇云黃帝之王童山竭澤是其明證傳寫誤入此不可通矣人君以數制之人句亦不可通疑下人字衍文也此文本云二五者人君以數制之人君失二五者亡其國大夫失二五者亡其勢民失二五者亡其身至味者所以守口也三句當在二五者人君以數制之之上試連上文讀之曰其在色者青黃白黑赤也其在聲者宮商羽徵角也其

在味者酸辛鹹苦甘也。味者所以守民口也。聲者所以守民耳也。色者所以守民目也。如此則文義俱順矣。二五者人君以數制之。又遠蒙事名五正名五而言下接人君失二五者亡其國。今於中間又錯入味者。所以守民口也。三句則文不貫矣。幸其衍一人字。知以數制之下本與人君相連。其迹未泯。尙可訂正。

重門擊柝不能去亦隨之以法

樾謹按去字乃者字之誤。上文云。自言能爲司馬。不能爲司馬者。殺其身以釁其鼓。自言能治田土。不能治田土者。殺其身以釁其社。自言能爲官。不能爲官者。劓以爲門父。故此言重門擊柝不能者。亦隨之以法。不以其職微而寬之也。重門擊柝猶言抱關擊柝。

臣之能謀厲國定名者

樾謹按厲讀爲利。厲國卽利國也。史記陳杞世家是爲厲公。索隱曰。厲利聲相近。國策秦策曰。綴甲厲兵。高注曰。厲利也。

百乘之國中而立市東西南北度五十里

樾謹按度當爲各聲之誤也。謂東西南北各五十里也。上文故先王度用其重而因之地數篇作故先王各用於其重度。各聲近而誤。在本篇即可證矣。又按此文當作東西南北各百五十里。故其下云三

日出境明每日行五十里也荀子大略篇所謂吉行五十是也下文千乘之國中而立市東西南北度百五十餘里當作度二百五十里故其下云五日出境亦是每日行五十里也何以明之據下文曰萬乘之國中而立市東西南北度五百里其下卽云十日出境夫五百里而十日出境則日行五十里可知前後必當一例故知此文有奪誤也詳管子之意萬乘之國方千里是古王畿之制千乘之國方五百里是周禮諸公之國之制百乘之國方三百里是周禮諸伯之國之制蓋管子多與周禮合也古者公侯爲一等伯子男爲一等故左傳曰在禮卿不會公侯會伯子男可也此文言公以該侯言伯以該子男耳若如今本則百乘之國方百里千乘之國方三百餘里萬乘之國方千里參差不齊矣又五百五百均無餘數獨於百五十言餘亦不可通也

三日出境五日而反

樾謹按此本作六日而反據下文五日出境十日而反十日出境二十日而反是反之日必倍其出境之日此云三日出境則必六日而反可知傳寫誤也

上農挾五中農挾四下農挾三

樾謹按挾猶給也挾讀爲浹古無浹字故以挾爲之浹之言周也徧也故有給足之誼荀子解蔽篇雖億萬已不足浹萬物之變注曰浹周也文選東京賦饗飴浹乎家陪注曰浹徧也並與給足義相近此

言上農足以給五人中農足以給四人下農足以給三人與下文上女衣五中女衣四下女衣三同義輕重丁篇此何以治治卽給也猶言此何以給也治浹誼同故並有給義矣王氏念孫以治爲給之誤非也

天酸然雨輕重甲

樾謹按酸當爲靉說文雨部靉小雨也從雨酸聲

三月解勾弓弩無匡移者

樾謹按字書無勾字疑医字之誤說文匚部医盛弓弩矢器也從匚從矢國語曰兵不解医

王者乘勢聖人乘幼

樾謹按幼當讀爲幽大戴記誥志篇曰幽幼也史記麻書亦曰幽者幼也是幽與幼聲近義通禮記玉藻篇再命赤韁幽衡鄭注曰幽讀爲黝然則幼之讀爲幽猶幽之讀爲黝矣聖人乘幽卽上文所謂君請籍於鬼神者

令以矩游爲樂

樾謹按矩當爲渠說文水部渠所居從水渠省聲故得段矩爲之以渠游爲樂謂以游於渠爲樂北郭者蓋屢縷之甿也

樾謹按屢縷二字無義。乃婁數之假字。釋名釋姿容曰。婁數猶局縮皆小意也。然則婁數之毗。謂小民也。婁數二字並從婁聲。屢縷二字亦並從婁聲。故得通用矣。

北海之衆無得聚庸而煮鹽。

樾謹按尹注曰。庸功也。其說未合。庸當爲傭。史記陳涉世家嘗與人傭耕。索隱引廣雅曰。傭役也。漢書每以庸爲之。周勃傳取傭苦之。不與錢。司馬相如傳與庸保祿作並段。庸爲傭是其證也。無得聚庸而煮鹽此所謂庸。正是賃作者。尹訓爲功失其義矣。地數篇毋得聚庸而煮鹽義同。

是君朝令一怒布帛流越而之天下。

樾謹按怒讀爲弩。方言凡人語而過東齊謂之劔。或謂之弩。是齊人謂語而過者爲弩。朝令一怒正謂其語之過也。怒者弩之假字。管子齊人故齊言耳。

誰能聽旌旗之所指而得執將首者。輕重乙

樾謹按執將即主將也。淮南說山篇執獄牢者無病。高注曰。執主也。

桓公問於管子曰。崇弟蔣弟丁惠之功世吾歲罔。寡人不得籍斗升焉。去菹菜鹹鹵斥澤山閒壞壘不爲用之壤。寡人不得籍斗升焉。去一削稼緣封十五里之原強耕而自以爲落其民。寡人不得籍斗升焉。則是寡人之國。五分而不能操其二。

樾謹按此文凡三云寡人不得籍斗升焉句下並有去一兩字言如此則是去其一分也今第一句下有去字而奪一字第二句下去一兩字俱存而誤屬下讀第三句下去一兩字俱奪矣不能操其二當作不能操其三蓋上文三言去一則是去其三分故桓公言五分不能操其三也如今本則皆不得其指矣又按吾歲罔者卽吾歲無也罔無一聲之轉尙書湯誓罔有攸赦西伯戡黎罔敢知吉微子乃罔恆獲金縢王其罔害史記並易以無字是其證也歲無卽歲凶或疑罔字爲凶字之誤非是

非歲凶而民飢也辟之以號令引之以徐疾施平其歸我若流水

樾謹按施乃也字之誤平乃乎字之誤宋本正作乎可證也乎上當有粟字管子原文本云非歲凶而民飢也辟之以號令引之以徐疾也粟乎其歸我若流水輕重甲篇曰故申之以號令抗之以徐疾也民乎其歸我若流水文法與此同知此文是粟乎非民乎者以本文是言粟事耳

則請重粟之價金三百

樾謹按此言粟價而云金三百義不可通金乃釜字之誤釜字壞其上半故成金字矣據輕重甲篇云故善者重粟之賈釜四百則是鍾四千也十鍾四萬二十鍾者八萬然則此文亦必與彼同三百當作四百古書四字或作三因誤爲三耳

使卿諸侯藏千鍾

樾謹按此卿諸侯卽儀禮所謂諸公。鄭注燕禮曰：諸公謂大國之孤也。孤一人言諸者，容牧有三監。管子此文有卿諸侯之名，且列於大夫之上，其爲孤無疑矣。

江淮之間有一茅而三脊母至其本名之曰菁茅。輕重丁、

樾謹按母當作母。古貫字。

齊東豐庸而糴賤。

樾謹按庸乃康字之誤。淮南子天文篇十二歲一康。高注曰：康盛也。然則豐康者豐盛也。尹注曰：庸用也。謂豐稔而足用非是。

然則釜十之粟皆實於倉廩。

樾謹按上云：齊西之粟釜百泉。齊東之粟釜十泉。然則所謂釜十之粟者，乃一釜十泉之粟。指齊東而言也。蓋齊西粟貴，齊東粟賤，故雖均是籍人三十泉，而齊西止以粟三斗當泉三十。齊東必以粟三釜當泉三十。於是齊西之粟所入無多，而齊東之粟皆實於倉廩矣。其下曰：西之民飢者得食，寒者得衣。以此故也。管子因桓公欲以東之賤被西之貴，故爲此法。則其所注意者，本在齊東一釜十泉之粟。故曰然則釜十之粟皆實於倉廩。王氏念孫謂十當爲斗。釜斗之粟承上三斗三釜而言，則全失其義矣。此謂乘天嗇而求民鄰財之道也。

樾謹按天嗇無義，當爲天留。留者，災之假字也。隸書留字或作嗇，嗇字或作嗇，兩形相似而誤。

崢丘之戰。

樾謹按尹注曰：崢丘，地名，未聞。說卽葵丘，此說殊不可解。經傳多言葵丘之會，無言葵丘之戰者，安得謂崢丘卽葵丘乎？葵疑乘字之誤。春秋莊十年夏六月，齊師宋師次于郎。公敗宋師于乘丘，或說殆以崢丘之戰爲指此役，故云卽乘丘耳。乘古字作乘，與葵字相似，因而致誤。

然則吾非託食之主邪。

樾謹按吾字乃君字之誤。管仲謂桓公爲託食之主，故桓公遽然起曰：然則爲之柰何？道四涇之水，以商九州之高輕重哉。

樾謹按商當爲障。古音商與章近，尙書策誓篇我商賚女釋文曰：商徐邈音章是也。障從章聲，故得以商爲之。呂氏春秋勿躬篇臣不如弦章，韓子外儲說篇作弦商，然則以商爲障猶以商爲章矣。魯梁之於齊也，千穀也，蠭蝥也。

樾謹按千一本作子，當從之。子穀蓋穀之不成者，猶言童節矣。說文艸部節篆下云：禾粟之采，生而不成者，謂之童節。子穀童節其義一也。

令謂左右伯沐塗樹之枝，左右伯受沐涂樹之枝，闢其年，民被白布，清中而濁。

樾謹按闕字無義，乃閼字之誤。其讀爲朞，古字通也。此當以閼朞年三字爲句。尹氏以闕字屬上讀，注云：闕涂也。非是。

一樹而百乘息其下者，以其不硝也。

樾謹按堯當從宋本作堯。考工記輪人以其圜之助堯其轂。鄭注曰：堯除也。此言一樹而百乘息其下者，以其不堯除之故。下文曰：今吾沐塗樹之枝，日中無尺寸之陰。正是堯除之也。

二十八月菜苦之君請服。

樾謹按二十八月當作二十四月。上文曰：二十四月魯梁之民歸齊者，十分之六。此文亦必與彼同。蓋二十四月者，質言之則二年也。若作二十八月，於義無取，故知其非。

楚生鹿當一而八萬。

樾謹按此本作楚生鹿一而當八萬。言一鹿直八萬泉也。傳寫者誤移當字於一而之上，義不可通。又按下文曰：子爲我致生鹿二十，賜子金百斤。是一鹿直金五斤也。而當八萬泉，則金一斤直泉一萬六千。蓋金一兩而泉一千也。漢書食貨志曰：黃金重一斤，直錢萬。是春秋時金價貴於漢也。

代民必去其本而居山林之中。

樾謹按藝文類聚及御覽引作必去其農。下文代人果去其本處山林之中亦然。此後人不曉古語而

臘改之也。本者根本也。凡有根本之義者皆可以本言之。故古人言本者初無定名。禮記大學篇此謂知本正義曰。本謂身也。禮器篇反本脩古正義曰。本謂心也。周易大過彖傳本末弱也。侯果曰。本君也是知本無定名。對天下國家而言則身爲本矣。對四體而言則心爲本矣。對臣民而言則君爲本矣。管子地數篇守圉之本其用鹽獨重。又云夫齊衛處之本通達所出也。游子勝商之所道人求本者食吾本粟。因吾本幣輕重甲篇曰。守圉之國用鹽獨重輕重乙篇曰。吾國者衛處之國也。遠桔之所通游客蓄商之所道財物之所遵故苟入吾國之粟因吾國之幣前後文小異大同或言本或言國者國亦可謂之本也。淮南子汜論篇立之于本朝之上注曰。本朝國朝也。此古人謂國爲本之證是故守圉之本言守圉之國也。衛處之本言衛處之國也。人求本者求乃來字之誤。言人來吾國也食吾本粟因吾本幣言食吾國粟因吾國幣也。此篇代民必去其本而居山林之中言去其國而居山林之中也。若易本爲農則失其義矣。

此三人者皆就官而衆輕重已

櫟謹按衆當作稟。漢書文帝紀吏稟當受鬻者師古注曰。稟給也就官而稟謂就官而給也。作衆者形近而誤。

苟不樹蓀者謂之賊人下作之地上作之天謂之不服之民

樾謹按兩作字皆讀爲詛古字通用詩蕩篇侯作侯祝釋文曰作本作詛是其證也此言有不樹斂者必下詛之於地上詛之於天明其爲不服之民蓋以神道設教之意若依本字讀之則不可通矣

毋聚大衆毋行大火毋斷大木誅大臣毋斬大山毋戮大衍滅三大而國有害也

樾謹按誅大臣三字衍文也此蓋以斷大木斬大山戮大衍爲滅三大其上文聚大衆行大火非滅之也故不數也若加誅大臣則爲滅四大矣又按斬大山之斬當讀爲鑿與形勢解篇斬高同

西出其國百三十八里而壇

樾謹按上文以冬日至始數四十六日冬盡而春始天子東出其國四十六里而壇以冬日至始數九十二日謂之春至天子東出其國九十二里而壇下文以秋日至始數九十二日天子北出九十二里而壇里數皆與日數相符此云以夏日至始數九十二日謂之秋至則亦宜出國九十二里乃出國百三十八里者蓋自夏日至上溯春盡夏始之四十六日而并計之也然所云四十六日乃舉成數而言實止四十五日有奇故歲實三百六十五日有奇而四時出國則爲三百六十八里也

諸子平議卷七

晏子春秋

公湎而不聽諫上

樾謹按此但言公之不聽耳非必言其沈湎也。湎疑偭字之誤離騷偭規矩而改錯王逸注曰：偭背也。公聞晏子言而不樂故背之而不聽耳。偭湎同聲又因本篇言飲酒事遂誤爲湎矣。

寡人出入不起交舉則先飲禮也

樾謹按也當作邪乃詰問之詞古也邪字通用故陸德明經典釋文曰：邪也弗殊顏氏家訓音辭篇曰：邪者未定之詞北人卽呼爲也並其證矣荀子正名篇其求物也養生也粥壽也楊倞注曰：也皆當爲邪問之詞正與此同

男女羣樂者周觴五獻過之者誅

樾謹按小爾雅廣言周而也蓋觴各五獻一而而止故曰周觴五
故里窮而無告無樂有上矣飢餓而無告無樂有君矣

樾謹按里窮而無告義不可通據下文云民飢餓窮約而無告卽承此文言之則此文亦當作窮約而

無告矣。里字上疑當有鄉字。據上文云：懷寶鄉有數十飢氓里有數家。以鄉里並言，是其證也。晏子原文蓋云：故鄉里窮約而無告，無樂有上矣。飢餓而無告，無樂有君矣。因奪鄉字約字，遂不可通耳。上文懷寶乃壞室之誤。說本王氏念孫讀書雜志：此所謂窮約者，卽承壞室鄉有數十而言。所謂飢餓者，卽承飢氓里有數家而言。

命稟巡氓家有布縷之本而絕食者，使有終月之委，絕本之家，使有期年之食，無委積之氓，與之薪橑，足以畢霖雨。

樾謹按孫氏星衍音義曰：命稟言給之稟也。此說與文義未合。又云：下云柏，則此或臣名。說稍近之。然亦非也。稟乃官名，卽周官廩人也。稟廩古字通耳。使之巡行氓閒，有乏食者，周給之，正廩人之事。令柏巡氓家室，不能禦者予之金。

樾謹按柏亦官名也。與上文命稟一律。古柏與伯通。故漢書古今人表，伯與作柏。譽伯蓋作柏益。伯封作柏封。逢伯陵作逢柏陵。是其證也。此柏字亦當作伯。管子輕重丁篇，令謂左右伯沐涂樹之枝，然則此所謂伯，卽左右伯也。其職卽古之常伯。周書立政篇曰：王左右常伯常任。文選藉田賦注引應劭漢官儀曰：侍中周成王常伯任。是古之常伯，猶漢之侍中，乃近臣也。說文支部，𦥑，迮也。引周書常𦥑，常任，𦥑訓迮，有迫近之意。是此官名本當作𦥑。伯柏並叚字也。發金予民，出自內府之藏，故使近臣將命焉。

巡求氓寡用財乏者，从三日而畢。後者若不用令之罪。

樾謹按从三日而畢五字爲句。从當作終。字之誤也。古文終字或作終。廣雅釋詁曰：終，竟也。終與从相
侶。因致誤耳。巡求氓寡用財乏者，終三日而畢。若過三日，是不用令。將治以罪。故曰：後者若不用令之
罪。下文云：三日更告畢上。是適如其期。無敢後也。

人待三士。待四出之關外也。

樾謹按三謂三日。四謂四日。人則以三日爲期。士則稍優容之。以四日爲期。皆使得辦裝也。

景公燕賞于國內。萬鍾者三千鍾者五。令三出而職計莫之從。公怒令免職計。令三出而士師莫之從。
王氏念孫讀書雜志曰：元人刻本云：職計莫之從。士師莫之從。一作職計算之。士師算之。明沈啓南本
與此同。羣書治要作職計筭之。士師筭之。念孫按：羣書治要是也。筭隸書策字也。據下文云：請從士師
之策。則本作策之明矣。策之蓋謂以策書諫也。

樾謹按王氏說非也。職計莫之從。士師莫之從。文義甚明。若作筭之。則義轉晦矣。王氏謂以策書諫。無
論以策書諫不可。僅謂之策。且亦豈待令三出而始諫乎。令三出而莫之從。正見其持之堅。若令三出
而始諫。轉病其諫之晚矣。蓋晏子原文。正作莫之從。傳寫奪從字。則莫之二字。於義未足。後人因下文
有請從士師之策句。以意妄改之。或爲策。或爲算。禮記仲尼燕居篇注曰：策謀也。文選運命論注引倉

韻曰算計也是策算義相近疑下文請從士師之策或作請從士師之算後人各據所見本改之耳不作策而作筭者因策字之形與莫字不類也卽此可知原文之作莫矣晏子曰今君賞讒諛之民而令吏必從正指兩莫之從者而言凡古書之義必求其安未可喜新而厭故也

先王之立愛以勸善也其立惡以禁暴也

王氏讀書雜志曰立惡本作去惡去惡斯可以禁暴今作立惡則文義反矣羣書治要正作去惡

樾謹按王氏說非也此惡字乃愛惡之惡非善惡之惡若改立惡爲去惡則上句立愛之文又不可通必改爲立善始得矣禮記祭義篇立愛自親始教民睦也立敬自長始教民順也此云立愛立惡義與彼同不當改立爲去羣書治要作去惡乃後人不知立字之義而妄改之耳

今有之家此一國之權臣也

樾謹按今有之家文義未明上文云景公有男子五人所使傅之者皆有車百乘者也疑此當云今有車百乘之家傳寫奪之耳

置大立少亂之本也

樾謹按王氏念孫從羣書治要作置子立少非也下文云廢長立少不可以教下又云今君用讒人之謀聽亂夫之言也廢長立少臣恐後人之有因君之過以資其邪廢少而立長以成其利者並以長少

對言則此文亦當作置大立少。國語周語曰是以小怨置大德也。韋注曰置猶廢也。然則置大立少猶云廢大立少正與廢長立少同義。晏子原文疑本作置大立小亂之本也。大與小對猶長與少對也。後人因下文立少字兩見。因亦改爲立少耳。少小音義並相近故易淆亂儀禮鄉飲酒禮主人少退注云少退少避釋文作小避特牲饋食禮挂於季指注云季小也。釋文作季少並其證也。王氏不知少爲小字之誤而反以置大爲置子失之矣。

使史固與祝佗

樾謹按衛祝鈔漢書古今人表作祝佗是祝佗衛人未聞齊亦有祝佗也。佗疑佞字之誤昭二十年左傳君盍誅於祝固史嚚此云史固祝佞卽彼祝固史嚚也。祝史互錯嚚與佞聲近而誤耳。

使君之年長于胡

樾謹按胡者蓋謂齊之先君胡公靜也。詩齊譜正義言胡公歷懿王孝王夷王是其享國久矣。謚法保民耆艾曰胡則胡公壽考令終可知故封人以爲祝詞而史記乃有見殺之說或傳聞之異不足據也。今君若設文而受諫

樾謹按設疑說字之誤說讀爲悅下文云惡文而疏聖賢人惡文與說文正相對成義。乃令出裘發粟與飢寒。

樾謹按國中之寒者何限必人人衣之以裘勢必無以給之且文王之民老者衣帛而已未聞其衣裘也出裘當作去裘意林作公乃去裘是也公本被狐白之裘聞晏子之言不安於心令左右之人爲之去裘故曰乃令去裘也發粟與飢寒木作發粟與飢人因去裘誤作出裘遂改飢人爲飢寒藝文類聚太平御覽諸書引此文又因飢寒二字於文末安於飢寒下增者字皆非晏子原文也文選雪賦注引作以與飢人可據以訂正

爲田野之不辟倉庫之不實則申田存焉

樾謹按孫氏音義曰申田疑人名此不然也申田官名也申當爲司史記留侯世家以良爲韓申徒徐廣曰申徒卽司徒耳但語音訛轉故字亦隨改莊子大宗師篇申徒狄釋文曰崔本作司徒狄是申與司古通用申田卽司田也管子小匡篇墾草入邑辟土聚粟多衆盡地之利臣不如寧戚請立爲大司田此齊有司田之證

晏子止而問于公曰堯舜支解人從何軀始公矍然曰從寡人始

樾謹按晏子問支解人從何軀始而公遽云從寡人始語殊不倫據韓詩外傳作景公離席曰縱之罪在寡人疑晏子本作公矍然曰從之從卽縱也寡人始三字必有奪誤或亦如外傳文或文不必同而意則必相近也

則嬰有壹妾能書足以治之矣。諫下。

樾謹按孫氏音義曰。言一妾男子能書記者。卽成讞矣。此說非也。一妾男子不可止曰一妾。妾疑妾字之誤。嬰有壹妾能書足以治之。極言治之之易。雖婦女可也。下文曰。則君使吏比而焚之而已矣。蓋兩語皆滑稽之詞。故景公不說也。

今束鷄豚妄投之。其折骨決皮可立得也。

樾謹按得字義不可通。乃見字之誤。史記趙世家。未得一城。趙策得作見。留侯世家。果見穀城山下黃石。漢書見作得。蓋得字古作尋。其上從見。故見得二字往往相混。

吾細人也。皆有蓋廬以避燥濕。

樾謹按蓋乃盍字之誤。盍讀爲闔。襄十七年左傳。吾儕小人皆有闔廬以避燥濕寒暑。語意與此同。未幾朝韋罔解役而歸。

樾謹按孫氏音義曰。朝韋罔未詳。或人名。今按韋罔人名。朝者召也。劉向九歎遠逝篇曰。朝四靈于九濱。王逸注曰。朝召也。左傳蔡朝吳。公羊傳作昭吳。是朝與昭通。故亦與召通。上文景公曰。唯唯。將弛罷之。故未幾召韋罔解役而歸也。後人不知古書之假朝爲召。故不得其解。若從孫氏以朝韋罔三字爲人名。則彼自解役而歸。與景公無與。卽不足見晏子匡諫之功矣。

帶球玉而冠且。

樾謹按且當作組。說文系部。組綏屬其小者以爲冕纓。
聾暗非害國家而如何也。

樾謹按害下奪治字家下衍而字晏子原文本作非害治國家如何也。古而如通用。如何卽而何。上文公曰。則曷害於治國家哉。故晏子言非害治國家如何也。明其與治國家有害也。今奪治字。則與上語不應。又衍而字。則文義複矣。皆由後人臆改說。苑正諫篇作聾暗。則非害治國家如何也。當據以訂正。嬰恐國之流失。而公不得享也。

樾謹按流失義不可通。問上篇曰。臣恐國之危失。而公不得享也。疑此文流字亦危字之誤。

景公與晏子登寢而望國。

樾謹按寢非可登之地。此本作景公與晏子登路寢之臺而望國。傳寫奪之耳。上章景公登路寢之臺。下章景公成路寢之臺。三章皆一時之事。

服牛臥夫婦笑非有骨肉之親也爲其利之大也。

樾謹按笑當爲哭字之誤也。言服牛于人。非有骨肉之親。然臥而哭之者。爲其有利于己也。左傳載晏子之言曰。陳氏之德。民歌舞之矣。卽此意也。

是以詔訛繁於閒邪行交於國也。

樾謹按王氏念孫謂閒字不可通疑閭字之誤然閭里門也詔訛之言豈在里門乎此閒字本不誤王氏特以閒字與國字虛實不倫故疑其誤耳問上篇曰嗜欲備於側毀非滿於國彼以側與國對文則此以閒與國對文亦何不可而必改其字乎

津人皆曰河伯也若治視之則大龜之首

樾謹按若治二字衍文也津人皆曰河伯也視之則大龜之首蓋津人始皆驚疑以爲河伯及審視之則大龜之首耳視之者津人非古治子也古治子親殺龜挈其頭而出復何視乎因涉下文若治之功而衍若治二字耳爾雅釋水疏引此文無若字疑原文并無治字後人據誤本晏子增入之而省若字也

二子同桃而節治專其桃而宜

樾謹按二語不可曉孫氏解上句曰同爭一桃而節解下句曰宜言不宜夫同爭一桃何節之有且宜言不宜則節亦言不節兩句豈容異義乎孫說非也古治子之意蓋以二子之勇相等二子同食一桃則得其節矣治專食一桃則得其宜矣使二子不死卽以此言處置二桃可也上文二子死之治獨生之云云已自明不得不死之故此二言又處置二桃卽以定己與二子之分量故用雖然二字作轉也

君得合而欲多。問上。

樾謹按合與給通。說文系部。給相足也。孟子梁惠王篇。是心足以王矣。下文曰。此心之所以合於王者。何也。上言足於王。下言合以王。合卽給也。君得合而欲多。謂所得者旣給。而所求者彌多也。

佞不吐愚。

樾謹按吐當作咄。從土從出之字。隸書易混。若賣之爲賣。數之爲敖。是也。咄者。詭之假字。從口從言之。字古得相通。若詠之爲咏。譜之爲唔。是也。佞不詭愚。言不以佞而詭愚也。佞者有才辯之稱。故與愚相對。正與上文貴不凌賤。富不傲貧。功不遺罷一律。

彼鄒滕雉奔而出其地。猶稱公侯。

樾謹按雉奔而出其地。乃極言其地之小。謂一雉奔竄。卽出其邦域之外也。孫氏音義曰。雉奔言捷也。未達其旨。又所謂公侯者。有國之君之通稱。故五等之封皆曰諸侯。而春秋書諸君之葬。皆稱公也。孫氏必以其爵爲疑泥矣。

大之事小弱之事強久矣。彼周者。殷之樹國也。

樾謹按大之事小義不可通。王氏念孫謂當作小之事大。其說是也。彼周者。殷之樹國也。乃證小事大。弱事強之誼。言周之初。乃殷之樹國耳。及周日强大。而爲天子。則殷且事之矣。微子是也。正見魯以弱

小而不能事强大之失。

魯近齊而親殷。以變小國而不服於鄰。以遠望魯滅國之道也。

樾謹按此所謂殷卽宋也。宋得稱商則亦得稱殷矣。變小孫氏星衍謂疑卽褊小是也。變褊音近。故假用耳。以遠望魯。當作以遠望晉。左氏傳所謂魯有佗竟。走望在晉也。因晉與魯形相似。此章又論魯事。晉字止此一見。淺人不察文義。妄改爲魯耳。晏子之意。蓋謂魯與齊爲鄰。而不知事齊所親者宋。所望者晉。宋旣小弱。不足爲援。晉相去又遠。緩急不足恃。故曰此滅國之道也。

廢罪順於民。

樾謹按廢罪當作廢置。字之誤也。舉直錯諸枉。則民服。是謂廢置順於民。

不爲行以揚聲。

樾謹按古爲僞字通用。成九年左傳爲將改立君者。定十二年傳子爲不知。釋文並云爲本作僞。是也。不僞行以揚聲。言不僞託高行。以揚聲譽。

中聽以禁邪。

樾謹按聽謂聽訟也。古謂聽訟爲聽書。大傳諸侯不同聽。注曰。聽議獄也。中聽以禁邪。言聽訟得中。則足以禁邪也。尙書呂刑篇曰。罔不中聽。獄之兩辭。然則中聽二字。蓋本於尙書矣。問下篇曰。中聽則民

安夫刑罰不中民無所措手足故中聽則民安也又曰慢聽厚斂則民散聽與斂並言亦孟子省刑罰薄稅斂之意

不權居以爲行不稱位以爲忠

樾謹按王氏念孫據羣書治要以居字爲君字之誤非也權居與稱位相對權猶稱也居猶位也若作權君則義不倫矣古之君子所居雖卑所行則高所居雖汙所行則潔是謂不權居以爲行

積豐義之養

樾謹按豐義二字誼不可通義當作羨字之誤也羨饒也豐羨猶豐饒矣

地不同生

樾謹按古生性字通用周官大司徒職曰辨五地之物生杜子春讀生爲性然則此文生字亦當讀爲性地不同性卽所謂辨五地之物性也羣書治要作宜蓋不知生爲性之假字而改之未足爲據吾欲和民親下柰何

樾謹按和民當作和臣下文晏子對曰君得臣而任使焉云云則臣和矣可證此文民字之誤聞寧戚歌止車而聽之則賢人之風也問下

樾謹按風者聲也風之所至必有聲故文六年左傳曰樹之風聲因而古人卽謂聲爲風管子宙合篇

君失音則風律必流。風律卽聲律也。輕重已篇。吹壠箎之風。猶言壠箎之聲也。淮南原道篇。結激楚之遺風。高注曰。遺風猶遺聲。得其義矣。此云賢人之風。猶賢人之聲也。孫氏曰。讀如諷非。景公問晏子。廉政而長久。其行何也。

欒謹按廉字義不可通。疑當作秉。說文禾部。兼持二禾。秉持一禾。秉與兼形相似。秉誤爲兼。又誤爲廉耳。爾雅釋詁曰。秉執也。秉政猶言執政。景公問晏子。人臣執政而能長久。其所行何若。秉誤爲廉。則義不可通矣。下文曰。廉政而邀亡。其行何也。誤同。

不以威強退人之君。

欒謹按退人之君。義不可通。退疑迫字之誤。若吳人藩衛侯之舍。是以威強迫人之君矣。故晏子以爲諷也。

讎然不滿

欒謹按讎當爲歟。說文欠部。歟食不滿。从欠甚聲。是歟之本義爲食不滿。引申之。凡不滿者皆得言歟。故曰。歟然不滿。

犒魯國化而爲一心。

欒謹按犒當爲橋。字之誤也。說文手部。橋舉手也。故引申之有舉義。史記扁鵲倉公列傳。舌橋然而不

下索隱云：擣舉也。擣魯國化而爲一心。猶云舉魯國化而爲一心。韓非子內儲說作舉魯國盡化爲一。此作擣。彼作舉。文異而義同。若作犒則不可通矣。

夫偏適于君者。距本朝之勢。國之所以治也。

樾謹按此言近臣專權也。乃云國所以治於義難通。治蓋殆字之誤。國之所以殆也。與下文行之所以衰也。身之所以危也。一律。

謹聽節儉。衆民之術也。

樾謹按儉乃歛字之誤。上云慢聽厚歛則民散。此云謹聽節歛。衆民之術也。兩文正相應。

晏子使晉。晉平公饗之文室。既靜矣。晏以平公問焉。

樾謹按既靜矣。晏以五字文不可通。孫云疑有脫誤。是也。靜字疑當作請。聲近而誤。晏當作宴。聲近形似。且本書多晏字。少宴字。故誤也。矣衍字。以字當在宴字之上。其原文云。晏子使晉。晉平公饗之文室。句既句請以宴。句平公問焉。蓋饗禮畢後。又行宴禮。若昭二十五年左傳宋公享昭子。明日宴是也。

考菲履。

樾謹按詩山有樞篇。毛傳曰。考擊也。廣雅釋詁文同此。考字亦當訓擊。孟子滕文公篇。柵屨。趙注曰。柵猶叩柵也。然則考屨與柵屨同義。孫氏訓考爲成。猶未得也。

蠶桑叢收之處不足。雜上。

樾謹按收乃牧字之誤。蠶桑叢牧之處不足。故下云絲蠶于燕。牧馬于魯也。孫氏不知收爲牧之誤。反讀叢爲叢失之矣。

若便不可得。則依物而偶於政。

樾謹按依猶因也。偶讀爲寓。古字通用。寓猶寄也。依物而偶於政者。因物而寄於政也。若晏子因築臺之事。而寄發粟之政是也。孫曰。言據事而不違于政。未得其義。

蚤歲溜水至。

樾謹按孫氏音義曰。說文。雷屋水流也。溜同雷。此說非是。下文曰。鄉者防下六尺。則無齊矣。是水之大如此。豈屋雷水乎。溜疑淄字之誤。齊都營丘。淄水過其南。及東。故有時淄水大至。而爲害也。

醉而不出。是謂伐德。賓之罪也。

樾謹按說苑。反質篇。作賓主之罪也。當從之上云。旣醉而出。並受其福。賓主之禮也。此云醉而不出。是謂伐德。賓主之罪也。兩文相應。不得無主字。後人因醉而不出。以賓言。不以主言。故刪主字。然不出者賓也。留賓不出者。主也。是時晏子爲主人。則固不應專罪客矣。當從說苑補主字。豈過我哉。吾託國于晏子也。

樾謹按豈過我哉當作我豈過哉公自喜託國之得人故曰我豈過哉吾託國于晏子也如今本則語不可通矣

公曰善哉知苦言

樾謹按知當作如苦當作若皆形侶而誤也善哉如若言猶云善哉如若所言

夫愚者多悔不肖者自賢

樾謹按愚者多悔與不肖者自賢兩意不倫說苑雜言篇載越石父曰不肖人自賢也愚者自多也卽本晏子之言疑此文本作愚者自多傳寫奪自字淺人妄補悔字耳

噎而遽掘井

樾謹按掘井與噎無涉說苑雜言篇作譬之猶渴而穿井

方見國之必侵不若死

樾謹按方乃與字之誤與本作与隸書方字作方相似故誤也與見國之必侵不若死日與日不若正相應今誤作方則不可通矣

臣請禳而去

樾謹按句末當有之字說苑辨物篇正作臣請禳而去之

爲禳君鴟而殺之。

樾謹按說苑作爲君禳鴟而殺之。此文君禳字誤倒。且無令君知之。

樾謹按柏常騫知地之將動而借此以欺景公。自必不令君知何必晏子戒之乎。當從說苑作且令君知之。蓋此與外篇所載太卜事相類。彼必使太卜自言。臣非能動地。地固將動。卽令君知之之意。所謂恐君之惶也。後人不達。臆加無字。則晏子與騫比周以欺其君矣。有是理乎。

賴君之賜。得以壽三族。

樾謹按國語楚語。臣能自壽也。韋注曰。壽保也。然則以壽三族者。以保三族也。管子霸言篇。國在危亡而能壽者。明聖也。能壽亦卽能保也。說文土部。壩保也。壽字古作耆。與壩並從曷聲。故義亦得通矣。

免粟之食飽。

樾謹按上云。食脫粟之食。此云免粟之食飽。免卽脫也。廣雅釋詁。免脫也。錢氏大昕養新錄曰。免與脫同義。引論衡道虛篇。免去皮膚爲證。謂免去卽脫去也。而未引晏子此文。失之。

士之一乞也。

樾謹按乞當作旣。說文皂部。旣小食也。論語曰。不使勝食旣。今論語作氣。此省作乞。古字並通。士之一

既猶云士之一食下文二乞三乞並同故曰嬰無倍人之行而有參士之食也。

國不可窮窮不可竊也。

樾謹按荀子哀公篇竊其有益與其無益楊倞注曰竊宜爲察莊子庚桑楚篇竊竊乎又何足以濟世哉釋文曰竊竊崔本作察察蓋竊與察一聲之轉廣雅釋詁曰竊著也釋訓曰察察著也是其聲近義通之證窮不可竊當作窮不可察言窮極之則反無以察矣故國不可窮也。

召衣冠以迎晏子外篇重而異者、

樾謹按此本作召晏子衣冠以迎上文景公曰請易衣革冠更受命故此云衣冠以迎王氏念孫謂易衣革冠已見上文不當重出非也下云公下拜送之門有迎乃有送可知此四字之非衍特傳寫奪去而補者誤著之召字之下則文不成義羣書治要因刪此四字矣。

若使古之王者毋知有死

樾謹按毋知有死本作如毋有死如與而通如毋有死者而毋有死也諫上篇云若使古而無死此云若使古之王者如毋有死文異而義同因如誤作知寫者遂移至毋字之下義不可通矣是以鬼神不饗其國以禍之祝史與焉

樾謹按之字衍文其國以禍四字爲句言國以之而受禍也與上文國受其福相對爲文說詳羣經平

議左傳。

田無字爲埠矣。

樾謹按埠字義不可通。疑圻字之誤。圻誤爲坪。又誤爲埠耳。圻者幾之假字。隱元年穀梁注傳。天子畿內。釋文曰。畿本作圻。然則圻之通作幾。猶圻之通作畿也。田無字爲圻矣。猶曰田無字爲幾矣。問上篇曰。田無字之後爲幾。是其證。

子皆忠其君。故天下皆願得以爲子。今爲人子臣而離散其親戚。孝乎哉。足以爲臣乎。

樾謹按今爲人子下不當有臣字。蓋衍文也。益成适之意。蓋謂忠孝一也。故子胥自忠其君耳。而天下之父母皆願得以爲子矣。今爲人子而父母不得合葬。是離散其親戚也。親戚謂父母也。韓詩外傳。親戚旣沒。雖欲孝誰爲孝。是其證也。爲人子而離散其親戚。非孝矣。非孝卽非忠矣。故曰足以爲臣乎。王氏念孫不達此意。謂有闕文。非是。

臣何敢稿也。

樾謹按此稿字與問下篇犒魯國之犒同爲撓之誤字。荀子臣道篇曰。率羣臣百吏而相與彊君撓君。又曰。事舉君者。有補削。無撓拂。晏子言臣何敢撓。言臣何敢有所撓拂乎。蓋因公忿然作色。故云然。譏佞之人。隱君之威。以自守也。

樾謹按古依隱同聲廣雅釋器曰衣隱也釋名釋衣服曰衣依也是隱與依聲近誼通此隱字當讀爲依依君之威以自守正與上社鼠之喻相應

由是觀之其無字之後無幾

樾謹按無幾當作爲幾字之誤也問上篇正作田無字之後爲幾可據以訂正

今日吾譏晏子訾猶保而高櫟者也

樾謹按訾乃譬字之誤櫟乃擗字之誤高讀爲咎以高爲咎猶以咎爲臯尙書臯陶謨釋文曰臯本作咎是其例也墨子公孟篇是猶果謂擗者不恭也此卽保而咎擗之義保爲保體擗者揭衣也禮記內則篇不涉不擗鄭注擗揭衣也擗誠不恭保則更甚故曰訾猶保而咎擗者也

當此之時民無飢

樾謹按飢下當有者字如今本則文義不足說苑政理篇正作民無飢者

廢置不周於君前謂之專

樾謹按不周當爲不由廢置不由於君前故爲專也疑古本段粵櫟之粵爲由其形與古文周字作粵者相近因誤爲周耳

敬見不問其道外篇不合經術者

樾謹按敬字當作苟爾雅釋詁亟疾也釋文曰字又作苟是苟與亟通苟見猶云亟見孟子萬章篇穆公亟見於子思與此同義亟見而不問其道仲尼所以行也苟字經傳罕見淺人遂加支作敬耳此三者路世之政道事之教也

孫氏星衍音義曰一本道作單非王氏引之曰作單者是也單讀爲瘧爾雅瘧病也字或作癰大雅板篇毛傳曰癰病也路與單義相近方言露敗也路露古字通言此三者以之爲政則世必敗以之爲教則事必病也

樾謹按王說是矣惟從別本作單而訓爲病事之教似近不詞道乃退字之誤說文辵部退數也周書曰我興受其退退事者數事也今微子篇作我興受其敗經傳遂無退字淺人不知其義見上句有路字因妄改爲道字耳

公曰合色寡人也

樾謹按合色無義下文公曰色寡人故將殺之晏子曰雖使色君於法不宜殺也色上並無合字合疑否字之誤否字自爲一句說文▲部否相與語睡而不受也從▲否聲公曰否者深怪其語故先睡而不受耳

昔者秦繆公乘龍舟而理天下以黃布裹蒸棗至東海而捐其布彼黃布故水赤蒸棗故華而不實

欒謹按孫刻本據文選注藝文類聚改彼爲破其實非也。彼黃布者言彼其所捐之布乃黃布也。若作破字則破黃布三字文不成義矣。然棗上亦當有彼字蒙上而省。

晏子沒十有七年景公飲諸大夫酒公射出質堂上唱善若出一口公作色大息播弓矢弦章入公曰章欒謹按此下各本均闕孫刻本據太平御覽增而王氏讀書雜志謂雜取諸書補入不足爲據因詳錄元刻又以羣書治要及御覽人事部所引補之洵較孫刻爲備矣惟此文實見於說苑君道篇治要及御覽所引均非其全者王氏不錄說苑何也故備錄于左補王氏徵引所未及。

晏子沒十有七年景公飲諸大夫酒公射出質堂上唱善若出一口公作色太息播弓矢弦章入公曰章自吾失晏子於今十有七年未嘗聞吾過不善今射出質而唱善者若出一口弦章對曰此諸臣之不肖也知不足以知君之不善勇不足以犯君之顏色然而有一焉臣聞之君好之則臣服之君嗜之則臣食之夫尺蠖食黃則其身黃食蒼則其身蒼君其猶有諂人言乎公曰善今日之言章爲君我爲臣是時海人入魚公以五十乘賜弦章歸魚乘塞途撫其御之手曰曩之唱善者皆欲若魚者也昔者晏子辭賞以正君故過失不掩今諸臣諂諛以干利故出質而唱善如出一口今所輔於君未見於衆而受若魚是反晏子之義而順諂諛之欲也固辭魚不受君子曰弦章之廉乃晏子之遺行也。

諸子平議卷八

老子

道可道非常道名可名非常名一章

樾謹按常與尙古通史記衛綱傳劍尙盛漢書尙作常漢書賈誼傳尙憚以危爲安賈子宗首篇尙作常並其證也尙者上也言道可道不足爲上道名可名不足爲上名卽上德不德之旨也河上公以上篇爲道經下篇爲德經道經首云道可道非尙道德經首云上德不德其旨一也

故常無欲以觀其妙常有欲以觀其微

樾謹按易州唐景龍二年所刻道德經碑與今本異者數百事此文作常無欲觀其妙常有欲觀其微無兩以字當從之司馬溫公王荊公並於無字有字絕句亦當從之常字依上文讀作尙言尙無者欲觀其微也尙有者欲觀其歸也下云此兩者同出而異名同謂之玄正承有無二義而言若以無欲有欲連讀旣有欲矣豈得謂之玄乎

萬物作焉而不辭二章

樾謹按不辭當就聖人說不當就萬物說方與生而不有爲而不恃一律河上公注謂不辭謝而逆上

非也。不辭猶不言。卽上文所謂行不言之教者。唐傳奕本作萬物作而不爲始。畢氏沅謂辭始同聲。以此致異。奕義爲長。然三十四章云。萬物恃之而生而不辭。與此章文義相近。恐未可舍古本而從傳本也。

道沖而用之或不盈。四章、

樾謹按說文皿部。皿器虛也。老子曰。道虛而用之。虛訓虛。與盈正相對。作沖者。段字也。河上公訓沖爲中失之。第四十五章。大盈若冲。冲亦當作虛。又按。或不盈。唐景龍碑作久不盈。久而不盈。所以爲虛。殊勝今本。河上公注曰。或常也。訓或爲常。古無此義。疑河上本正作久也。

解其紛。

樾謹按釋文。河上公本。紛作芬。然芬字無義。此句亦見五十六章。河上公於此注云。紛結恨也。當念道無爲以解釋。於彼注云。紛結恨不休。當念道無爲以解釋之。注義大略相同。則河上本芬字。當讀爲忿。若以本字讀之。則注中結恨之義不可解。此章紛結恨也。俗刻又譌爲結恨。而義益晦。賴此文兩見。注又相同。尙可訂正耳。王弼本五十六章。作解其分。注云。除爭原也。則亦讀爲忿矣。顧歡本正作忿。乃其本字。芬紛並段字耳。

谷神不死。六章、

樾謹按釋文河上本谷作洛云洛養也然洛字實無養義河上本洛字當讀爲穀詩小弁篇蓼莪篇四月篇並云民莫不穀毛傳並云穀養也穀亦通作谷爾雅釋天東風謂之谷風詩正義引孫炎曰谷之言穀穀生也生亦養也王弼所據本作谷者穀之假字河上古本作洛者谷之異文王弼不達古文假借之義而有中央無之說斯魏晉之清談非老氏之本旨

抱一能無離乎十章

樾謹按河上公本無乎字唐景龍碑亦無乎字然淮南子道應篇引老子曰載營魄抱一能無離乎專氣至柔能如嬰兒乎則古本固有乎字又按能如嬰兒句河上公及王弼本均無如字於文義未足惟傳奕有如字與古本合

愛民治國能無知乎天門開闔能無雌乎明白四達能無爲乎

樾謹按唐景龍碑作愛民治國能無爲天門開闔能爲雌明白四達能無知其義並勝當從之愛民治國能無爲卽孔子無爲而治之旨明白四達能無知卽知白守黑之義也王弼本誤倒之河上公本兩句並作無知則詞複矣天門開闔能無雌義不可通蓋涉上下文諸句而誤王弼注云言天門開闔能爲雌乎則物自賓而處自安矣是王弼本正作能爲雌也河上公注云治身當如雌牝安靜柔弱是亦不作無雌故知無字乃傳寫之誤當據景龍本訂正

五色令人目盲。五音令人耳聾。五味令人口爽。十二章。

樾謹按河上公注云。爽亡也。王弼注云。爽差失也。並未得爽字之義。呂氏春秋尊師篇曰。且天生人也。而使其耳可以聞。不學其聞不若聾。使其目可以見。不學其見不若盲。使其口可以言。不學其言不若爽。以口爽與耳聾目盲並舉。正與老子此章同。列子仲尼篇曰。目將眇者。先睹秋毫。耳將聾者。先聞蚋飛。口將爽者。先辨淄澑。鼻將窒者。先覺焦朽。體將僵者。先亟奔佚。心將迷者。先識是非。然則爽者口病之名。故莊子天地篇云。五味濁口。使口厲爽。淮南子精神篇云。五味亂口。使口爽傷。疑古語然也。新序雜事篇引呂子。爽作暗。可知口爽猶口暗。正與聾盲一律矣。

何謂寵辱若驚。寵爲下。十三章。

樾謹按河上公本作何謂寵辱。辱爲下。注曰。辱爲下賤。疑兩本均有奪誤。當云何謂寵辱若驚。寵爲上。辱爲下。河上公作注時。上句未奪。亦必有注。當與辱爲下賤對文成義。傳寫者失上句。遂并注失之。陳景元李道純本均作何謂寵辱若驚。寵爲上。辱爲下。可據以訂諸本之誤。

古之善爲士者。十五章。

樾謹按河上公注曰。謂得道之君也。則善爲士者。當作善爲上者。故以得道之君釋之。上與士形似而誤耳。

夫唯不盈故能蔽不新成。

樾謹按蔽乃敝之假字唐景龍碑作弊亦敝之假字永樂大典正作敝不新成三字景龍碑作復成二字然淮南子道應篇引老子曰服此道者不欲盈故能弊而不新成則古本如此但今本無而字於文義似未足耳。

如春登臺二十章、

樾謹按如春登臺與十五章若冬涉川一律河上公本作如登春臺非是然其注曰春陰陽交通萬物感動登臺觀之意志淫淫然亦未嘗以春臺連文其所據本亦必作春登臺今傳寫誤倒耳文選開居賦注引此已誤。

衆人皆有以而我獨頑似鄙。

樾謹按似當讀爲以古以似通用易明夷象傳文王以之釋文曰以苟向本作似詩旄丘篇必有以也儀禮特牲饋食禮篇注引作必有似也並其證也而我獨頑以鄙六字爲句頑以鄙猶言頑而鄙也故傳弼本作我獨頑且鄙可證河上公於頑字絕句之非王注曰悶悶昏昏若無所識故曰頑且鄙疑王本亦與傳本同矣。

道之爲物惟恍惟惚惚兮恍兮其中有象恍兮惚兮其中有物二十一章、

樾謹按惚兮恍兮二句當在恍兮惚兮二句之下蓋承上惟恍惟惚之文故先言恍兮惚兮其中有物與上道之爲物惟恍惟惚四句爲韻下文惚兮恍兮其中有象乃始變韻也王弼注曰萬物以始以成而不知其所以然故曰恍兮惚兮惚兮恍兮其中有象也注文當是全舉經文而奪其中有物四字然據此可知王氏所見本經文猶未倒也

以閱衆甫

樾謹按甫與父通衆甫者衆父也四十二章我將以爲教父河上公注曰父始也而此注亦曰甫始也然則衆甫卽衆父矣一章曰有名萬物之母二十五章曰可以爲天下母衆父者猶云萬物母天下母也莊子天地篇可以爲衆父而不可以爲衆父父

故從事於道者道者同於道德者同於德失者同於失二十三章

故從事於道者道者同於道德者同於德失者同於道其下德者失者蒙上從事之文而省猶云從事於道者同於道從事於德者同於德從事於失者同於失也淮南子道應篇引老子曰從事於道者同於道可證古本不疊道者二字王弼注曰故從事於道者以無爲爲君不言爲教縣縣若存而物得其真於道同體故曰同於道是王氏所據本正作故從事於道者同於道然以河上公注觀之則二字之衍久矣

其在道也曰餘食贅行二十四章、

樾謹按此河上公本也。河上注曰：使此自矜伐之人在治國之道。是河上本作在道。王弼注曰：其唯於道而論之。若卻至之行盛饌之餘也。則當作其於道也。方與注合。今弼本作在道。河上本作於道。由傳寫互誤。兩失其真矣。

輕則失本。躁則失君。二十六章、

樾謹按河上公本作輕則失臣。注云：王者輕淫則失其臣。竊謂兩本均誤。永樂大典作輕則失根。當從之。蓋此章首云重爲輕根。靜爲躁君。故終之曰：輕則失根。重則失君。言不重則無根。不靜則無君也。王弼所據作失本者。本與根一義耳。而弼不曉其義。以失本爲喪身。則曲爲之說矣。至河上公作失臣。殆因下句失君之文。而臆改耳。

聖人用之。則爲官長。二十八章、

樾謹按此河上公本也。河上注曰：聖人升用則爲百官之元長也。是其本作聖人用之。至王弼注曰：聖人因其分散。故爲之立官長。則當作聖人因之。方與注合。今作用者。後人據河上本改之耳。

或挫或隳。

樾謹按挫河上本作載。注曰：載安也。隳危也。是載與隳相對爲文。與上句或強或羸一律。而王弼本乃

作挫則與隳不分二義矣。疑挫乃在字之誤。在篆文作杜，故誤爲挫也。或在或隳，卽或載或隳，載從𠂔聲，在從才聲，而或亦從𠂔聲。州輔碑載貴不濡是也。其聲既同，故得通用矣。

以道佐人主者三十章、

樾謹按唐景龍碑作以道作人主者，乃古本也。河上公注曰：謂人主能以道自輔佐也。則河上公本亦是作字。若曰以道佐人主，則是人臣以道輔佐其主，何言人主以道自輔佐乎？因作佐二字相信，又涉注文輔佐字而誤耳。王弼所據本已爲佐字，故注曰：以道佐人主，尙不可以兵強於天下。况人主躬於道者乎？後人以王本改河上公本，而河上注義晦矣。

善有果而已。

樾謹按河上公本作善者果而已。當從之。王注曰：果猶濟也。言善用師者，趣以濟難而已矣。是其所據本亦作善者，故以善用師者釋之。今作善有以形近而誤。不敢以取強。

樾謹按敢字衍文。河上公注曰：不以果敢取强大之名也。注中不以二字，卽本經文。其果敢字，乃釋上文果字之義，非此文有果字也。今作不敢以取強，卽涉河上注而衍。王注曰：不以兵力取強於天下也。亦不以二字連文，可證經文敢字之衍。唐景龍碑正作不以取強，當據以訂正。

果而勿強。

樾謹按傅奕本作是果而勿強。當從之上文云善者果而已不以取強。又云果而勿矜。果而勿伐。果而勿驕。果而不得已。皆言其果。不言其強。故總之曰是果而不強。正與上文果而已不以取強相應。讀者誤謂此句與果而勿矜諸句一律。遂妄刪是字耳。唐景龍碑亦有是字。當據增。

道常無名。三十二章、

樾謹按常與尙通。說見首章。道尙無名者。言以無名爲貴也。河上注王注並非。三十七章道常無爲義同。

知止可以不殆。

樾謹按唐景龍碑無可以二字。是也。王注曰知止所以不殆也。蓋加所以字以足句。而寫者誤入正文。故今河上公本作知之所以不殆。此作可以者。又所以之誤矣。

衣養萬物而不爲主。三十四章、

樾謹按河上公本作愛養。此作衣養者。古字通也。蓋衣字古音與隱同。故白虎通衣裳篇曰衣者隱也。以聲爲訓也。而愛古音亦與隱同。故詩燕民篇毛傳訓愛爲隱。孝經疏引劉炫曰愛者隱惜而結於內。不直訓惜而必訓隱惜者。亦以聲爲訓也。兩字之音本同。故愛養可爲衣養。傅奕本作衣被。則由後人。

不通古音不達古義率臆妄改耳。

是以上德無爲而無以爲爲三十八章、

樾謹按無爲與無以爲似無所區別下文云上仁爲之而無以爲夫無爲與爲之其義迥異而同言無以爲其不可透明矣韓非子解老篇作上德無爲而無不爲也蓋古本老子如此今作無以爲者涉上仁句而誤耳傅奕本正作不

下士聞道大笑之四十一章、

樾謹按王氏念孫漢書雜志曰大笑之本作大而笑之猶言迂而笑之也牟子引老子正作大而笑之抱朴子微旨篇亦云大而笑之其來久矣是牟葛所見本皆作大而笑之今按王說是也下士聞道大而笑之與上文上士聞道勤而行之兩句相對傅奕本作上士聞道而勤行之下士聞道而大笑之蓋誤移兩而字於句首然下句之有而句則尚可藉以考見也而勤行之是勤而行之之誤然則而大笑之是大而笑之之誤可以隅反矣

建德若偷四十一章、

樾謹按河上公注曰建設道德之人若可偷引使空虛也王弼注曰偷匹也建德者因物自然不立不施故若偷匹然偷匹之訓於古無徵義亦難曉豈王氏所據本偷或作倫邪以韻求之固不然矣河上

公蓋讀偷爲揄說文手部揄引也故解爲若可偷引又因其義未足加使空虛三字以足成之非經旨矣今按建當讀爲健釋名釋言語曰健建也能有所建爲也是建健音同而義亦得通健德若偷言剛健之德反若偷惰也正與上句廣德若不足一律

禍莫大於不知足四十六章

樾謹按河上公本此句之上有罪莫大於可欲一句據韓非子解老篇則此句當有惟韓子作禍莫大於可欲誤也其上文曰夫上侵弱君而下傷人民者大罪也則本是罪字明矣

取天下常以無事四十八章

樾謹按常乃當字之誤河上公注曰取治也治天下當以無事後人因經文譌作常因於注文增入常字耳

爲天下渾其心聖人皆孩之四十九章

樾謹按爲天下渾其心下河上公本有百姓皆注其耳目七字王弼本當亦有之故注云如此則言者言其所知行者行其所能百姓各皆注其耳目焉吾皆孩之而已是可證其有此句也注有各用聰明四字在爲天下渾其心句下正解百姓皆注其耳目之誼而經文奪此句當據河上公本補之入軍不被甲兵五十章

樾謹按被河上公本作避據韓非子解老篇云入山不恃備以救害故曰入軍不備甲兵則甲兵以在己者言自當以作被爲長

兵無所容其刃

樾謹按釋名釋姿容曰容用也合事宜之用也兵無所容其刃言兵無所用其刃莊子胠篋篇容成氏六韜大明篇作庸成氏是容與庸通庸爲用故容亦用也

塞其兌五十二章

樾謹按兌當讀爲穴文選風賦空穴來風注引莊子空閥來風閥從兌聲閥可假作穴兌亦可假作穴也塞其穴正與閉其門文義一律

是謂盜夸五十三章

樾謹按夸字無義韓非子解老篇作盜等其解曰等也者五聲之長者也故等先則鍾瑟皆隨等唱則諸樂皆和今大姦作則俗之民唱俗之民唱則小盜必和故服文采帶利劍厭飲食而貨盜有餘者是之謂盜等矣蓋古本如此當從之

蜂蠻虺蛇不螫五十五章

樾謹按河上公本作毒蟲不螫注云蜂蠻虺蛇不螫是此六字乃河上公注也王弼本亦當作毒蟲不

蟄後人誤以河上注羼入之。

猛獸不據。

樾謹按據當作虞。說文豕部。虞，鬪相凡。不解也。从豕虎。豕虎之鬪不相捨。一曰虎兩足舉。然則於猛獸言不虞。正與於毒蟲言不蟄同。今作據者。段字耳。

未知牝牡之合而全作五十五章。

樾謹按全字之義未詳。王注曰。作長也。無物以損其身。故能全長也。說殊未安。河上公本全作峻。而其注曰。赤子未知男女之合會。而陰作怒者。由精氣多之所致也。是以陰字釋峻字。玉篇肉部。峻。赤子陰也。峻即殷也。疑王氏所據本作全者。乃會字之誤。會者陰之本字。蓋陰陽字本作會易。其從自者陽。則山南水北。陰則山北水南。並以地言。非會易之本義也。老子古本。蓋從古文作會。而隸書或作会。武梁祠堂畫象。陰字左旁作会。是也會字闕壞。止存上半。則與全字相似。因誤爲全矣。是故作會者。老子之原文。作全者。僉之誤字。作峻者。其別本也。王氏據誤本作注。不能訂正。遂使老子原文不可復見。惜之知和曰常。知常曰明。益生曰祥。心使氣曰強。

樾謹按此下本有是故用其光。復歸其明二句。後人因已見於五十二章。而刪去之耳。淮南子道應篇引老子曰。知和曰常。知常曰明。益生曰祥。心使氣曰強。是故用其光。復歸其明也。是古本有此二句之

明證且用其光復歸其明正見物不可終壯之意故下文曰物壯則老謂之不道不道早已今脫此二句則與下文之意不屬矣文子下德篇曰知和曰常知常曰明益生曰祥心使氣曰強是謂元同用其光復歸其明亦有下二句

以正治國以奇用兵以無事取天下吾何以知其然哉以此五十七章

樾謹按此數句當屬上章如二十二章曰吾何以知衆甫之然哉以此五十四章曰吾何以知天下之然哉以此並用以此二字爲章末結句是其例矣下文天下多忌諱而民彌貧乃別爲一章今誤合之夫唯嗇是謂早服早服謂之重積德五十九章

樾謹按困學紀聞卷十引此文兩服字皆作復且引司馬公朱文公說並云不遠而復又曰王弼本作早服而注云早服常也亦當爲復今按韓非子解老篇曰夫能嗇也是從於道而服於理者也衆人離於患陷於禍猶未知退而不服從道理聖人雖未見禍患之形虛無服從於道理以稱蚤服然則古本自是服字王說非

故大國以下小國則取小國小國以下大國則取大國故或下以取或下而取六十一章

樾謹按古以字與而字通周易同人彖傳曰文明以健中正而應繫辭傳曰蓍之德圓而神卦之德方以知昭十一年左傳曰桀克有緒以喪其國紂克東夷而隕其身孟子告子篇曰秦楚之王悅於利以

罷三綱之師。秦楚之王。悅於仁義而罷三軍之師。並以而互用。是其義同也。大國以下小國。則取小國。小國以下大國。則取大國。猶曰大國而下小國。則取小國。小國而下大國。則取大國也。故或下以取或下而取。兩句文義無別。疑有奪誤。當云故或下以取小國。或下而取大國。蓋卽承上文而申言之一句。作以一句作而以而互用。正與前所引諸文一律。因下文有大國不過欲兼畜人句。兩大國字適相連屬。古人遇重文。每省不書。止於字下作二畫識之。此文云故或下以取小國。或下而取大國。大國不過欲兼畜人。小國不過欲入事人。古本兩大國字不重書。止作大二國三。後人傳寫奪之。因以大國字屬下句。而以或下而取四字爲句。并上句小國字亦刪去之。使兩句一律。而其誼不可曉矣。

美言可以市尊。行可以加人。六十二章。

樾謹按淮南子道應篇。人閒篇。引此文。並作美言可以市尊。美行可以加人。是今本脫下美字。

古之所以貴此道者何。不曰以求得有罪以免邪。故爲天下貴。

樾謹按唐景龍碑及傅奕本。並作求以得。正與有罪以免相對成文。當從之。古之所以貴此道者何。九字爲句。乃設爲問辭以曉人也。不曰求以得有罪以免邪。言人能修道。則所求者可以得。有罪者可以免也。不曰字邪字相應。猶言豈不以此邪。謙不敢質言也。下云故爲天下貴。則自問還自答也。河上公本不曰誤作不日。因曲爲之說曰。不日日遠行求索。近得之於身。失其義矣。

報怨以德六十三章、

樾謹按論語子路篇以德報怨朱文公集注曰或人所稱今見老氏書然老氏之意實不如此第三十六章云將欲翕之必故張之將欲弱之必故彊之將欲廢之必故興之第四十二章云故物或損之而益或益之而損此云報怨以德其旨一也下文言圖難於易爲大於細夫圖難於易善於圖難者也爲大於細善於爲大者也然則報怨以德正深於報怨矣第七十三章云天之道不爭而善勝老子之說大抵如此朱文公引以證論語或人所稱失老子本旨矣

不敢爲天下先故能成器長六十七章、

樾謹按韓子解老篇作不敢爲天下先故能爲成事長事器異文或相傳之本異或彼涉上文事無不事句而誤皆不可知至故能下有爲字則當從之蓋成器二字相連爲文襄十四年左傳成國不過半天子之軍杜注曰成國大國昭五年傳皆成縣也成縣亦謂大縣然則成器者大器也二十九章天下神器不可爲也爾雅釋詁神重也神器爲重器成器爲大器二者並以天下言質言之則止是不敢爲天下先故能爲天下長耳乃上言天下而下變文言成器古人自有此例史記伯夷傳伯夷叔齊雖賢得夫子而名益彰顏淵雖篤學附驥尾而行益顯顏淵所附本是夫子因上句言夫子故下句變文言驥尾顧氏炎武謂是回避假借之法是也自宋以來儒者不以修辭爲事莫窺斯祕矣

是謂配天古之極六十八章、

樾謹按此文王弼無注河上公以是謂配天四字爲句注云能行此者德配天也古之極三字爲句注云是乃古之極要道也然此章每句有韻前四句以武怒與下爲韻後三句以德力極爲韻若以是謂配天爲句則不韻矣疑古字衍文也是謂配天之極六字爲句與上文是謂不爭之德是謂用人之力文法一律其衍古字者古卽天也周書周祝篇曰天爲古尙書堯典篇曰若稽古帝堯鄭注曰古天也是古與天同義此經配天之極佗本或有作配古之極者後人傳寫誤合之耳

故抗兵相加哀者勝矣六十九章、

樾謹按哀字無義疑襄字之誤史記梁惠王卒襄王立襄王卒哀王立據竹書紀年無哀王顧氏日知錄謂哀襄字近史記誤分爲二人又按秦哀公陳哀公史記十二諸侯年表皆作襄公是二字之相混久矣襄者讓之假字周官保氏職鄭注襄尺釋文曰襄音讓本作讓是古襄讓通用上文曰吾不敢爲主而爲客吾不敢進寸而退尺卽所謂讓也故曰抗兵相加讓者勝矣亦卽七十三章不爭而善勝之意因假襄爲讓又誤襄爲哀故學者失其解耳

聖人不病以其病病是以不病七十章、

樾謹按上文已言夫唯病病是以不病此又言以其病病是以不病則文複矣韓非子喻老篇作聖人

之不病也.以其不病是以無病當從之.蓋上言病病故不病此言不病故無病兩意皆承不病者不以爲病也.韓非所謂越王之霸也不病宦武王之王也不病嘗是也.無病則莫之能病矣.此越王所以霸武王所以王也.

常有司殺者殺七十四章、

樾謹按常當作尙與第一章非常道非常名諸常字同尙者上也上有司殺者謂天也河上公注曰司殺者天居高臨下司察人過是正作上字解.

木強則兵七十六章、

樾謹按木強則兵於義難通河上公本作木強則共更無義矣老子原文本作木強則折因折字闕壞止存右旁之斤又涉上句兵強則不勝而誤爲兵耳共字則又兵字之誤也列子黃帝篇引老聃曰兵強則滅木強則折卽此章之文可據以訂正.

是以聖人爲而不恃功成而不處其不欲見賢七十七章、

樾謹按賢下當有乎字其不欲見賢乎文義方足乎者語之餘古人多不箸於文字而使讀者自得之尚書西伯錢黎篇我生不有命在天據史記則句末亦有乎字而經文無有卽其例矣.

無德司徹.

樾謹按古字徹與轍通。二十七章善行無轍迹。釋文作徹。引梁注曰。徹應車邊。今作彳者。古字少也。然則此文徹字亦與彼同矣。有德司契。無德司轍。言有德之君。但執左契合符信而已。無德之君。則皇皇然司察其轍迹也。河上公解善行無轍迹曰。善行道者。求之於身。不下堂不出門。故無轍迹。此即可說無德司徹之義。

使有什伯之器而不用。八十章、

樾謹按什伯之器乃兵器也。後漢書宣秉傳注曰。軍法五人爲伍。二五爲什。則共其器物。故通謂生生之具爲什物。然則什伯之器猶言什物矣。其兼言伯者。古軍法以百人爲伯。周書武順篇。五五二十五曰。元卒四卒成衛。曰伯。是其證也。什伯皆士卒部曲之名。禮記祭義篇曰。軍旅什伍。彼言什伍。此言什伯。所稱有大小。而無異義。徐鍇說文繫傳。於人部伯下引老子曰。有什伯之器。每什伯共用器。謂兵革之屬。得其解矣。使有什伯之器而不用。使民重死而不遠徙。兩句一律。下文云。雖有舟輶。無所棄之。雖有甲兵。無所陳之。舟輶句。蒙重从不遠徙而言。甲兵句。蒙什伯之器不用而言。文義甚明。河上公本什伯下誤衍人字。遂以使有什伯四字爲句。失之矣。

信言不美。美言不信。八十一章、

樾謹按此當作信者不美。美者不信。與下文善者不辯。辯者不善。知者不博。博者不知。文法一律。河上

公於信者不美注云信者如其實不美者朴且質也是可證古本正作信者不美無言字也於美言不信注云滋美之言者孳孳華詞不信者飾僞多空虛也疑此注爲後人增益其原文云美者孳孳華詞不信者飾僞多空虛也自經文誤作美言不信後人因改注文美者爲滋美之言者不詞甚矣

諸子平議卷九

墨子一

三子之能達名成功於天下也皆於其國抑而大醜也。親士。

樾謹按抑之言屈抑也。抑而大醜與達名成功相對。言於其國則抑而大醜。於天下則達名成功。正見其由屈抑而達下文所謂敗而有以成也。畢氏沅校注曰。抑安也。猶曰安其大醜。於文義未得。

君子進不敗其志。內究其情。

樾謹按內當作納。卽退字也。進不敗其志。退究其情。正相對成文。所謂大行不加窮居不損也。因退從或體作納。又闕壞而作內。畢氏遂據上句增入不字。說曰。疚究同。猶云內省不疚。殊失其旨。分議者延延而支苟者諂諂焉可以長生保國。

樾謹按王氏念孫斷焉字下屬爲句。謂焉猶乃也。其說是也。支苟二字。畢云疑誤。今按支苟乃稽穢二字之假音。說文禾部。穢。穢穢也。徐鍇曰。穢穢不伸之意。然則穢穢者諂諂。殆謂在下位者或爲上所凌壓而不得伸。亦必諂諂然自伸其意而後已。上文所謂上必有諂諂之下是也。是以甘井近竭。招木近伐。靈龜近灼。神蛇近暴。

樾謹按四近字皆先字之誤。上文曰：今有五錐。此其銛銛者必先挫。有五刀。此其錯錯者必先靡。然則甘井四喻正承上文而言。亦必是先字明矣。先篆書作𠂔。近字古文作𠂔。篆書作𠂔。兩形相似而誤。禮記大學篇舉而不能先。先乃近字之誤。與下退而不能遠。相對成文說詳羣經平議可以與此互證。

夫惡有同方取不取同而已者乎。

樾謹按取不二字傳寫誤倒。而字當在取同二字之上。己當爲人己之己。此文本云：夫惡有同方不取而取同己者乎。同方謂同道也。同己謂與己意同也。聖人但取其與道同而不必其與己意同。故曰夫惡有同方不取而取同己者乎。傳寫錯誤。遂不可讀。畢曲爲之說非是。

是故谿陝者速涸逝淺者速竭。

樾謹按逝當讀爲澨。古字通也。詩有杕之杜篇。噬肯適我。釋文曰：噬韓詩作逝。然則逝之通作澨。猶逝之通作噬也。成十五年左傳則決睢澨。楚辭湘夫人篇。夕濟兮三澨。杜預王逸注並曰：澨水涯澨淺與谿陝對文。因假逝爲澨。其義遂晦。王氏引之謂逝當作遊。亦未免不求之聲而泥其形矣。

君子戰雖有陳而勇爲本焉。喪雖有禮而哀爲本焉。脩身。

樾謹按君子二字衍文也。此蓋以戰雖有陳。喪雖有禮二句起。士雖有學一句若冠以君子二字。則既言君子不必又言士矣。馬總意林作君子雖有學行爲本焉。戰雖有陳。勇爲本焉。喪雖有禮。哀爲本焉。

與今本不同。然有君子字卽無士字亦可知今本旣言君子又言士之誤矣。士雖有學與君子雖有學文異而義同或它本自有作君子者而馬氏誤移作首句傳寫者乙正之仍從古本作士雖有學而篇首君子二字失於刪去耳。

是故置本不安者無務豐末。

樾謹按者衍字也下文近者不親無務來遠親戚不附無務外交事無終始無務多業舉物而闇無務博聞上句並無者字是其證。

守道不篤徧物不博辯是非不察者不足與游。

樾謹按徧亦辯也儀禮鄉飲酒禮衆賓辯有脯醢燕禮大夫辯受酬少牢饋食禮辯孺于三豆今文辯皆作徧是辯與徧通用物言徧是非言辯文異而義同。

晉文染於舅犯高偃所染

樾謹按畢云呂氏春秋高作郤疑當爲郤晉有郤氏然晉有郤偃也王氏念孫曰高當作翫卽城郭之郭左傳晉大夫卜偃晉語作郭偃今按王說得之矣然必謂高是翫之誤則猶求之形而未求之聲也高與郭一聲之轉耳故從高得聲之字玉篇墮音口角切燭音胡角切然則高亦可讀如郭矣詩緜篇毛傳曰王之郭門曰皋門郭偃之爲高偃猶郭門之爲皋門也。

無巧工不巧工皆以此五者爲法法儀、

樾謹按五當作四上文百工爲方以矩爲圓以規直以繩正以縣並無五者。

賊其人多故天禍之。

樾謹按當作其賊人多與上文其利人多故天福之相對。

仕者待祿游者憂反七患

樾謹按王氏念孫謂待當爲持憂反當爲愛交管子明法篇小臣持祿養交晏子春秋問篇士者持祿游者養交養交與愛交同意今按王說是矣然以憂爲愛字之誤恐未必然古書多言持祿養交��子持祿愛交者且持養二字同義荀子勸學篇除其害者以持養之榮辱篇以相羣居以相持養議兵篇高爵豐祿以持養之呂氏春秋長見篇申侯伯善持養吾意並以持養連文墨子天志篇亦云持養其萬民然則此文旣云持祿必云養交不當云愛交也墨子原文蓋本作恙交恙卽養之假字古同聲而通用莊子至樂篇若果養乎予果歡乎養當讀爲恙爾雅釋詁恙憂也故與歡爲對文也此云仕者持祿游者恙交恙當讀爲養後人不達假借之旨引爾雅恙憂也之訓以釋之遂有改其字作憂者而墨子原文不可復見矣

所言不忠所忠不信

樾謹按言乃信字之誤。

二穀不收謂之旱。

樾謹按旱者不雨也。不得爲二穀不收之名。疑旱乃罕字之誤。一穀不收謂之饉。二穀不收謂之罕。饉也罕也。皆稀少之謂。饉猶僅也。故襄二十四年穀梁傳作一穀不升謂之嗛。嗛猶歉也。然則二穀不收謂之罕。其義正一律矣。

爲者疾食者衆則歲無豐。

樾謹按疾當爲寡。爲之者寡。食之者衆。則雖有豐年。不足以供之。故歲無豐也。今作爲者疾。則不可通矣。蓋後人據大學以改之。而不知其非也。

故食無備粟不可以待凶饑。

樾謹按食乃倉字之誤。倉無備粟。與下句庫無備兵文正相對。若作食字。失其旨矣。下文云食者國之寶也。兵者國之爪也。食字卽此文粟字。不得據彼而疑此文當作食也。

以爲錦繡文采靡曼衣之辭過。

樾謹按衣之當作之衣。此十字一句讀。

此非云益燠之情也。

樾謹按情猶實也。煙之情猶言煙之實。云益者有益也。廣雅釋詁曰。云有也。此非云益煙之情。猶曰此非有益煙之實。上文曰。冬則輕煙。夏則輕清。而此獨言煙者。衣固以煙爲主耳。

冬則凍冰。夏則飾餧。

樾謹按畢解飾字曰。若覆食之幕。然凍冰二字一義。飾餧二字亦必一義。不當如畢氏說也。飾疑飼字之誤。論語曰。食餧而飼。冬則凍冰。夏則飼餧。兩句文義正一律。飼字右旁之曷。隸書或止作鳥。而飾字隸書或以飭爲之。兩形相近故誤耳。

無乃非有血氣者之所不能至邪。三辯。

樾謹按非字衍文。

昔者堯舜有第期者。且以爲禮。且以爲樂。

樾謹按畢據太平御覽改第期爲茅茨。然茅茨土階。是言古明堂之儉。不得云且以爲禮且以爲樂也。下文曰。周成王之治天下也。不若武王。武王之治天下也。不若成湯。成湯之治天下也。不若堯舜。故其樂逾繁者。其治逾寡。然則其說堯舜。亦當以樂言。不當以宮室言也。下文程繁曰。子曰聖王無樂。此亦樂已。若之何。其謂聖王無樂也。今作茅茨。則真無樂矣。疑後人不達第期之義。而臆改之。未可爲據。仍當從原文而闕其疑。

以勞殿賞

樾謹按畢云殿讀如奔而殿此殆非也論功行賞勞者當在前安得反云殿乎殿者定也殿與定一聲之轉文選江賦注曰澣與淀古字通殿之與定猶澣之與淀也詩采菽篇殿天下之邦毛傳曰殿鎮也鎮卽有定義小爾雅廣言殿墳也墳與奠通禮記檀弓篇主人旣祖墳池鄭注墳池當爲奠徹是也奠亦定也周官司士職曰以久奠食此云以勞殿賞句法一律殿奠文異而義同

舉公義辟私怨

樾謹按畢云辟讀如辟舉之辟此說非也豈有私怨者不問其賢否而概辟舉之乎小爾雅廣言辟除也辟私怨謂惟公義是舉而私怨在所不問故除去之也又禮記郊特牲篇有由辟焉鄭注曰辟讀爲弭此辟字或從鄭讀亦通

雖在於厚祿尊位之臣莫不敬懼而施

樾謹按畢云下疑脫一字非也施當讀爲惕尙書盤庚篇不惕予一人白虎通號篇引作不施予一人是也敬懼而施卽敬懼而惕文義已足非有闕文

是以民皆勸其賞畏其罰相率而爲賢者以賢者衆而不肖者寡尙賢中

樾謹按相率而爲賢絕句者字乃是字之誤屬下讀惟其相率而爲賢是以賢者衆而不肖者寡也兩

句皆用是以字古人行文不避重複今誤作相率而爲賢者則是民之相率爲賢以賢者衆而不肖者寡之故於義不可通矣

內有以食饑息勞將遺其萬民

樾謹按將當作持持養乃古人恆言詳見七患篇此作將養形似而誤天志中篇正作內有以食飢息勞持養其萬民可據以訂正非命上篇將養老弱亦持養之誤

旣曰若法未知所以行之術則事猶若未成

樾謹按王氏念孫以曰字爲有字之誤非也曰字乃云字之誤云者有也說見辭過篇旣云若法卽旣有此法淺人不達云字之義謂是云曰之云疑本書皆用白字此不當用云字故改云作曰耳

親戚則使之無故富貴面目佼好則使之夫無故富貴面目佼好則使之豈必智且有慧哉

樾謹按無故富貴義不可通無乃衍字故富貴謂本來富貴者也不問其賢否而惟故富貴者是使之則非尙賢之謂矣上文曰故古者聖王甚尊尙賢而任使能不黨父兄不偏富貴不嬖顏色此云親戚則使之是黨父兄矣故富貴面目佼好則使之是偏富貴而嬖顏色矣後人不達故富貴之義而妄加無字殊失其旨下篇同

周頤道之曰聖人之德若天之高若地之普其有昭於天下也若地之固若山之承不坼不崩若日之光

若月之明與天地同常。

樾謹按此文疑有錯誤。當云聖人之德昭於天下。若天之高。若地之普。若山之承。不坼不崩。若日之光。若月之明。與天地同常。蓋首四句下普隔句爲韻。中二句承崩末三句光明常皆每句協韻。昭於天下一句傳寫脫去。而誤補於若地之普下。則首二句無韻矣。又增其有也三虛字。則非頌體矣。旣云若地之普。又云若地之固。重複無義。故知其錯誤也。

是故昔者舜耕於歷山。陶於河瀨。漁於雷澤。灰於常陽。尙賢下

樾謹按灰字之義不可曉。疑反字之誤。反者販之假字。販從反聲。古文以聲爲主。故止作反也。尙書大傳曰販於頓丘。

昔者伊尹爲莘氏女師僕。

樾謹按師當爲私聲之誤。僕猶臣也。禮記禮運篇仕於公曰臣。仕於家曰僕。是臣僕一也。私僕猶曰私臣。中篇曰伊摯有莘氏女之私臣。

古者民始生未有刑政之時。蓋其語人異義。尙同上

樾謹按此本作古者。民始生未有政長之時。蓋其語曰天下之人異義。中篇文同可據訂。天下之百姓皆上同於天。一而不上同於天。則舊猶未去也。

樾謹按而字乃夫字之誤。夫字篆書作而與而相似。故誤。一夫不上同於天。謂有一夫不與天同也。尙同下篇使天下之民若使一夫以一夫對天下之民言。與此一律可證。

古者聖王爲五刑。請以治其民。譬若絲縷之有紀。罔罟之有綱。所連收天下之百姓。不尙同其上者也。樾謹按。請字衍文。古者聖王爲五刑。以治其民。十一字爲一句。中篇曰。昔者聖王制爲五刑。以治天下。是其證也。所下奪以字。所以連收天下之百姓。不尙同其上者也。若無以字。則不成義。中篇曰。將以連役天下。淫暴而一同其義也。彼云將以此云。所以文法雖異。而實同。連役即連收之誤。王氏念孫已訂正矣。

是故靡分天下。設以爲萬諸侯國君尙同中。

樾謹按。靡當爲歷。字之誤也。大戴記五帝德篇。歷離日月星辰。是歷與離同義。此云歷分天下。與彼云歷離日月星辰。文義正同。若作靡字。則無義矣。非攻下篇。禹旣已克有三苗焉。磨爲山川別物。上下天志中篇。磨爲日月星辰。以昭道之。兩磨字皆歷字之誤。磨卽歷之叚字也。說本王氏念孫。此歷字誤作靡。被靡字誤作磨。古書之晦久矣。

故古者聖王明天鬼之所欲。不避天鬼之所憎。以求興天下之利。樾謹按。此本作明天鬼之所欲。而避天鬼之所憎。今作不避者。篆文相似而誤。天志中篇。正作而辟天。

鬼之所憎。

春秋祭祀不敢失時幾。

樾謹按畢以幾字屬下聽獄不敢不中讀解曰幾讀如關市譏然關市與獄訟不當并爲一事殆失之矣幾字仍當屬上讀幾者期也詩楚茨篇如幾如式毛傳訓幾爲期是也不敢失時幾者不敢失時期也國語周語注曰期將事之日也是期以日言不敢失時并不敢失日故曰不敢失時幾

昔者聖王制爲五刑以治天下逮至有苗之制五刑以亂天下

樾謹按之衍字

故古者聖王唯而以尙同以爲正長是上下情請爲通

樾謹按畢云而讀與能同又據文選東京賦注引此文作古者聖王惟能審以尙同是故上下通情因增入審字故字王氏念孫謂此本作是故上下請通請卽情字墨子書多以請爲情今作情請爲通者後人旁記情字而誤入正文又衍爲字耳文選注作通情者涉賦文上下通情而誤今按其說皆是也惟以爲正長句亦有衍字下文曰故古者聖人之所以濟事成功垂名於後世者無它故異物焉曰唯能以尙同爲政者也然則此文當云唯而審以尙同爲政上下文義始相應因涉上文屢言正長遂誤作以爲正長上下不應矣且旣云審以尙同又云以爲正長一句中兩用以字義亦未安上文曰其爲

正長若此是故出誅勝者何故之以也曰唯以尙同爲政者也然則爲正長以人言爲政以事言明爲正長者當以尙同爲政也若作尙同以爲正長卽失其義矣下篇云聖王皆以尙同爲政故天下治亦其證也選注刪此句畢氏王氏說亦未及故具說之

助之動作者衆卽舉其事速成矣

樾謹按此本作卽其舉事速成矣上文三言則其此言卽其卽則古通用也今作卽舉其事誤
今天下之王公大人士君子請將欲富其國家

樾謹按請上奪中字墨子書多以請爲情中請卽中情也下篇曰今天下王公大人士君子中情將欲爲仁義是其證也後人不知請之當讀爲情故誤刪中字耳尙賢篇曰且今天下之王公大人士君子中實將欲爲仁義中實亦卽中情也

當若尙同之不可不察此之本也

樾謹按若字衍文不可不察上奪說字此下奪爲政二字當據下篇補

故賞不得下之情而不可不察者也尙同下

樾謹按賞下當有罰字義見上文而不可當作不可而猶言不可以也說見王氏引之經傳釋詞然胡不審稽古之治爲政之說乎

樾謹按治字乃始字之誤。下文曰：古者天之始生民未有正長也云云。是從古之始爲政者說。故此云胡不審稽古之始爲政之說乎。

故又使國君選其國之義。以義尙同於天子。

樾謹按下義字衍文。上文云：故又使家君總其家之義。以尙同於國君。下文云：天子又總天下之義。以尙同於天。並無下義字。是其證也。畢校已及之矣。上下文並言總。而此言選。選亦總也。詩猗嗟篇舞則選兮。毛傳訓選爲齊。選其國之義。猶齊其國之義。曰總曰選。文異而義同也。史記仲尼弟子列傳任不齊字選。是選有齊義。賈子等齊篇曰：撰然齊等。撰與選通。

天子又總天子之義。以尙同於天。

樾謹按當作天子又總天下之義。以尙同於天。義見上下文。

先之譽令聞。先人發之。

樾謹按畢校云：先之二字一本作光。當從之。光廣古通用。光譽卽廣譽。孟子曰：令聞廣譽施於身。臣自愛不自愛。君兼愛上。賊愛其身不愛人。故賊人以利其身。

樾謹按下自字衍文也。上文子自愛不愛父。弟自愛不愛兄。皆無下自字。賊愛其身不愛人。故賊人以利其身。

樾謹按兩人字下並奪身字。本作賊愛其身。不愛人身。故賊人身。以利其身。方與上句一律。下文云。視人身若其身。誰賊亦以人身其身對言。中篇云。今人獨知愛其身。不愛人之身。是以不憚舉其身。以賊人之身。並可證人下當有身字也。

然則崇此害亦何用生哉。兼愛中

樾謹按崇字無義。乃察字之誤。何用生者。何以生也。一切經音義卷七引蒼頡篇曰。用以也。詩桑柔篇。逝不以濯。尚賢篇引作鮮不用濯。卽其證也。言國與國相攻。家與家相篡。人與人相賊。以及君臣父子兄弟之不惠忠不慈孝不和調。當察其害之何以生。故曰然則察此害亦何用生哉。上篇曰。當察亂何自起。與此同義。

以不相愛生邪。子墨子言以不相愛生。

樾謹按以不相愛生邪。當作以相愛生邪。乃反言以問之。起子墨子之正對也。下篇云。姑嘗本原。若衆害之所自此胡自生。此自愛人利人生與。卽必曰非然也。必曰從惡人賊人生。又云。姑嘗本原。若衆利之所自生。此胡自生。此自惡人賊人生與。卽必曰非然也。必曰從愛人利人生。皆以反言發問而起正對。正與此同。若如今本。則文義複沓矣。

然而今天下之士君臣相愛則惠忠。父子相愛則慈孝。兄弟相愛則和調。天下之人皆相愛。強不執弱。衆

不劫寡富不侮貧子墨子言曰然乃若兼則善矣雖然天下之難物於故也

樾謹按君臣相愛至富不侮貧四十字本在上文人與人相愛則不相賊之下然而今天下之士子墨予言曰十二字當作然而今天下之君子曰王氏念孫已訂正矣惟天下之難物於故也句亦難解於故二字當爲衍文下文云然而今天下之士君子曰然乃若兼則善矣雖然不可行之物也正與此文一律惟其爲難物故爲不可行之物也今衍於故二字則無義矣

子墨子言曰天下之士君子特不識其利辯其故也

樾謹按辯其下脫害字下文愛人者人必從而愛之利人者人必從而利之是其利也惡人者人必從而惡之害人者人必從而害之是其害也

連獨無兄弟者

樾謹按畢云連同鰥音相近字之異也經典或作熒或作惄皆假音然鰥熒惄三字聲皆不與連相近畢說非也連當讀爲離連與離一聲之轉淮南子原道篇終身運枯形于連嶻列埒之門高注曰連嶻猶離嶻也是其證也又本經篇愚夫憇婦皆有流連之心注曰流連猶爛漫失其識業也然則流連卽流離也亦其證也

是故別非也子墨子曰兼愛下

樾謹按此本作是故子墨子曰別非也下文是故子墨子曰兼是也與此爲對文可證。

非人者必有以易之若非人而無以易之譬之猶以水救火也其說必將無可焉

樾謹按以水救火何不可之有畢校云一本作火救水然墨子此譬本明無以易之之不可若水火是相反之物無論以水救火以火救水皆是有以易之與設喻之旨不合疑墨子原文本作猶以水救水以火救火也故曰其說必將無可今本作水救火別本作火救水皆有脫文

疾病不侍養

樾謹按侍當爲持古書多言持養淺人不達而改爲侍非是非命下篇下以待養百姓侍亦當作持然卽敢問不識將惡也

樾謹按惡下脫從字將惡從也猶云將何從也下文曰不識將擇之二君者將何從也是其證吾惡能爲吾萬民之身爲吾身

樾謹按爲吾身上當有若字上文曰吾豈能爲吾友之身若爲吾身是其證

意我先從事乎惡人之親然後人報我以愛利吾親乎

樾謹按惡下脫賊字當據上文補故約食爲其難爲也

樾謹按其當作甚。下二句並同。甚難爲卽至難爲也。下文曰。是故約食焚舟苴服。此天下之至難爲也。是其證。

以攻戰之故。土地之博。至有數千里也。人徒之衆。至有數百萬人。故當攻戰而不可爲也。非攻中。

樾謹按不可爲也。當作不可不爲也。方與上文語意相屬。此是飾攻戰者之言。非子墨子之言也。今脫不字。義不可通。

古者吳闔閭教七年。奉甲執兵奔三百里而舍焉。

樾謹按教下疑脫士字。奉甲執兵奔三百里而舍。卽教士之法。乃古所謂武卒者。荀子議兵篇。魏氏之武卒。以度取之衣。三屬之甲。操十二石之弩。負矢五十箇。置戈其上。冠軸帶劍。羸三日之糧。日中而趨百里。中試。則復其戶。利其田宅。今據墨子之言。則闔閭先有此法矣。

今天下之諸侯。將猶多皆免攻伐并兼。非攻下。

樾謹按免字衍文。天志篇云。今天下之諸侯。將猶皆侵凌攻伐兼并。無免字可證。

夫殺之人爲利人也。博矣。

樾謹按博疑當作薄。言殺人以利人。其利亦薄也。若作博字。則不可通。

率不利和。

樾謹按率讀爲將率之率。利卽和字之誤而衍者。

糧食不繼僥食飲之時。

樾謹按之時當作不時。王氏念孫已訂正矣。僥字王云未詳。今按僥卽際字。張遷碑。臘正之僥是也。昭四年左傳。爾未際。孟子萬章篇。敢問交際何心也。杜預趙岐注並曰。際接也。疑墨子原文本作糧食不僥。不僥卽不接也。與中篇所云糧食輒絕而不繼文異義同。後人不達僥字之義。據中篇改爲不繼。而寫者兩存之。遂作不繼僥耳。

然則是虧不足而動有餘也。

樾謹按動乃重字之誤。中篇曰。則是棄所不足。而重所有餘也。是其證。

天不序其德。

樾謹按序乃享字之誤。莊子則陽篇隨序之相理。釋文曰。序一本作享。是其例也。天不享其德。文義甚明。字誤作序。不可通矣。下文曰。量我師舉之費。以諍諸侯之斃。則必可得而序利焉。序亦享字之誤。

諸子平議卷十

墨子二

芋鮒不加者去之。節用上。

樾謹按芋鮒二字凡四見。疑當作鮮且。蓋鮮字左旁之魚誤移在且字左旁耳。且讀爲鱠。鮮且者鮮鱠也。說文黹部。鱠合五采鮮色。從黹盧聲。詩曰衣裳鱠鱠鮮色。謂之鱠。故合而言之曰鮮鱠。今詩作楚楚。毛傳曰楚楚鮮明貌。然則鮮鱠連言正古義也。鮮且不加謂徒爲華美而無益於用。畢云不加猶言無益是也。鱠從虍聲。虍從且聲。故鱠得以且爲之。如籀文遮小篆作退。或作徂。而詩湊洧篇士曰旣且。釋文曰且往也。則卽以且爲之。是其例矣。

凡真爲此物也。無加用而爲者。

樾謹按上文云無不加用而爲者。此脫不字。

於是利爲舟楫。足以將之則上。雖止者三公諸侯至。舟楫不易津人不飾。

樾謹按利當作制。王氏念孫已訂正矣。上當作止。止當作上。足以將之則止。雖上者三公諸侯至。文義甚明。兩字互易不可通矣。畢氏但訂正止字。未訂正上字。故爲補訂之。

仁者將興之天下。誰賈而使民譽之。終勿廢也。節葬下

樾謹按此上舊有仁者將求興天下誰霸而使民譽之云云。共六十四字。畢氏謂與下文複。故刪之。今按畢說是也。惟將下當有求字。下文云仁者將求除天下之利。而使民譽之。終身勿廢。與此爲對文可證也。然兩文均有錯誤。此當云仁者將求興天下之利。而使民譽之。終身勿廢也。下當云仁者將求除天下之害。而使人非之。終身勿爲也。文義方明。其下云且故興天下之利。除天下之害。令國家百姓之不治也。自古及今。未嘗之有也。正承此兩文而言。又按且故二字。文義不順。蓋終身勿爲下舊有也字。且卽也字之誤。

虛車府然後金玉珠璣北乎身。

樾謹按車乃庫字之誤。北乃比字之誤。漢書王尊傳師古注曰。比周也。比乎身。猶言周乎身。使王公大人行此。則必不能蚤朝。

樾謹按蚤朝下脫宴退二字。蚤朝晏退與下蚤出夜入夙興夜寐對文。若無晏退二字。文義未完。尙賢中篇。非樂上篇。非命下篇。並有蚤朝晏退之文。尙賢篇與夜寢夙興蚤出莫入相對。非樂篇。非命篇。與蚤出暮入夙興夜寐相對。是其證也。細計厚葬爲多埋賦之財者也。

樾謹按細字無義蓋卽上句紙字之誤而衍者紙本作紅因誤爲細矣埋賦二字亦不可通賦當作贓玉篇貝部贓作郎切藏也是埋贓卽埋藏也贓賦相似因而致誤耳贓字雖說文所無然藏字亦說文所無且從艸無義不如從貝之爲勝玉篇收贓字而訓爲藏或轉爲古字古義乎

財以成者扶而埋之

樾謹按扶字義不可通扶乃抉字之誤廣雅釋詁抉穿也抉而埋之謂穿地而埋之也說文穴部突穿也又曰突深抉也義並與抉相近

君死喪之三年父母死喪之三年妻與後子死者五皆喪之三年

樾謹按王氏念孫曰者五當爲五者謂君父母妻與後子也然上文君死父母死旣已別而言之此不當總數爲五五疑二字之誤

內續奚吾並爲淫暴而不可勝禁也

樾謹按內續奚吾四字不可解疑當爲內積奚后皆字之誤也奚后卽譏詬之假音說文言部譏恥也重文謨曰譏或從集又曰詬譏詬恥也重文詢曰詬或從句荀子非十二子篇作譏詢是其本字漢書賈誼傳作集詬集卽謨之省墨子作奚后奚卽譏之省后卽詬之省古文以聲爲主故省不從言耳內積譏詬者內積恥辱也蓋出則無衣入則無食不勝其恥辱故並爲淫暴而不可勝禁也

無封。

樾謹按畢注云後漢書注引作窆封窆聲相近然上云旣斂畢云斂當爲犯窆字之假音也則此不當云無窆矣且窆者葬下棺也葬雖至薄亦必下棺而云無窆理不可通封仍當讀如本字禮記王制篇不封不樹鄭注曰封謂聚土爲墳無封言不爲墳也檀弓曰古也墓而不墳此所謂便其習而義其俗者也

樾謹按義猶善也謂善其俗也禮記緇衣篇章義禪惡釋文曰尙書作善皇云義善也是義與善同意秦之西有儀渠之國者

樾謹按渠舊作乘畢據列子改今按史記秦本紀厲共公三十三年伐義渠虜其王卽此國也且語言有之曰焉而晏曰焉而得罪將惡逃避之天志上

樾謹按畢改兩曰字皆作日然上曰字實不誤且語有之曰蓋述古語也言字卽語字之誤而衍者下曰字當從畢改作日焉而字疊出文義難通疑上焉而字亦爲衍文墨子本作且語有之曰晏日焉而得罪將惡逃避之晏者清也明也說文日部晏天清也小爾雅廣言晏明也文選羽獵賦于是天清日晏淮南子繆稱篇暉目知晏陰暗知雨並其證也此謂人苟於昏暮得罪猶有可以逃避之處若晏日則人所共覩無所逃避矣下文曰夫天不可爲林谷幽門無人明必見之然則墨子正以晏日之不可

逃避起下文明必見之之意晏之當訓明無疑矣畢注謂猶云日暮途遠是但知晏晚之義而忘天清之本訓宜於墨子之意不得矣

天之爲政於天子天下百姓未得之明知也

樾謹按下之字當在知字下畢校已及上之字當在天字上屬上爲句本云天子爲政於三君諸侯士庶人天下之士君子固明知之今之字誤在天字下則固明知句文氣未足且天爲政與天子爲政相對不當作天之爲政也畢校未及故具說之

義者善政也何以知義之善政也曰天下有義則治無義則亂是以知義之善政也天志中

樾謹按三善字皆言字之誤隸書善字或作善張遷碑有張良善用籌策靈臺碑君子善之孫叔敖碑去不善如絕絶與言字相似故言誤爲善義者言政也何以知義之言政也曰天下有義則治無義則亂是以知義之言政也語意甚明若作善政則義之善政不可通矣下篇曰義者正也何以知義之爲正也天下有義則治無義則亂我以此知義之爲政也並無善字可知此文善字之誤義之言政猶義之爲正也

今國君諸侯之有四境之內也夫豈欲其臣國萬民之相爲不利哉

樾謹按臣國當爲國臣正對國君而言君曰國君故臣曰國臣也今倒作臣國義不可通

今夫天兼天下而愛之。撤遂萬物以利之。

樾謹按撤遂二字義不可通。撤當爲邀。疑本作邀。或作撤。傳寫誤合之爲撤邀。而邀又誤爲遂耳。邀與交通。莊子庚桑楚篇。夫至人者。相與交食乎地。而交樂乎天。徐無鬼篇。作吾與之邀樂於天。吾與之邀食於地。是交邀古通用也。邀萬物以利之。卽交萬物以利之。與兼天下而愛之同義。交猶兼也。兼愛中篇曰。以兼相愛。交相利之法易之。又曰。況兼相愛。交相利。與此異矣。又曰。欲天下之治。而惡其亂。富兼相愛。交相利。下篇曰。今若夫兼相愛。交相利。此自先聖六王者親行之。非命上篇曰。與其百姓兼相愛。交相利。然則愛言兼利言交。固本書之通義矣。

若豪之末。非天之所謂也。

樾謹按。非上脫無字。下文同。言雖至秋豪之末。無非天之所爲也。謂當作爲。古字通用。下文正作爲。而民得而利之。則可謂否矣。

樾謹按。否字義不可通。乃后字之誤。后讀爲厚。禮記檀弓篇。后木正義曰。世本云厚。此云后。其字異耳。是后厚古通用。說文。厚古文作屋。本從后聲。故聲近而義通也。此云若豪之末。無非天之所爲也。而民得而利之。則可謂厚矣。言天愛民之厚也。下文且吾所以知天之愛民之厚者有矣。又曰。此吾以知天之愛民之厚也。並可爲證。

然而莫知以相極戒也。天志下。

樾謹按極戒卽儆戒也。極通作亟。荀子賦篇出入甚極。又曰反覆甚極。楊倞注並曰。極讀爲亟。是也。廣雅釋詁。亟敬也。亟爲敬。故亦爲儆矣。亟又與苟通。見爾雅釋詁篇釋文。而敬字卽從苟。是可知其義之通。說文心部。極疾也。從心亟聲。一曰謹重貌。謹重之義。亦與儆相近。

誰爲知。天爲知。然則義果自天出也。

樾謹按此上脫。誰爲貴。天爲貴六字。中篇曰。然則孰爲貴。孰爲知。曰。天爲貴。天爲知而已矣。是其證。

三不利而無所利。是謂之賊。

樾謹按之當作天。是謂天賊。與是謂天德對文中篇正作天賊。

今知氏大國之君寬者。

樾謹按知字衍文。蓋涉上句。吾以知天下之士君子。何以知天下之士君子。兩句並有知字而衍。氏當讀爲是。禮記曲禮篇是職方。鄭注曰。是或爲氏。儀禮覲禮篇大史是右。注曰。古文是爲氏也。周官射人注引作大史氏右。然則是氏古通用。今氏卽今是也。今是卽今夫也。禮記三年問篇。今是大鳥獸。荀子禮論篇。今是作今夫。荀子宥坐篇。今夫世之陵遲亦久矣。韓詩外傳。今夫作今是。並其證也。上文曰。今是楚王食於楚之四境之內。此云。今氏大國之君。文法正同。上文作是。此文作氏。則字之異耳。寬者下

當有闕文。蓋言其土地之廣大也。故下文以然字作轉語。今無他據。不敢臆補。比列其舟車之卒。

樾謹按卒下脫伍字。非攻下篇作皆列其舟車之卒伍。是其證也。皆列卽比列。王氏念孫說。而況有踰人之牆垣。担格人之子女者乎。

樾謹按狃字無義。當爲衍文。蓋卽垣字之誤。而複者。格人之子女。與下竊人之金玉。粢。竊人之牛馬。一律。曰格曰竊。皆以一字爲文也。下文踰人之牆垣。担格人之子女者。亦衍狃字。又下文此爲踰人之牆垣。格人之子女者。正無狃字。可證上兩處之衍矣。畢反謂其脫狃字。非也。格人之子女。謂拘執人之子女。後漢書鍾離意傳注曰。格拘執也。是其義。

與角人之府車。

樾謹按角字無義。乃穴字之誤。穴隸書作內。角隸書作角。兩形相似而誤。

於先生之書大夏之道之然。

樾謹按大夏卽大雅也。雅夏古字通。荀子榮辱篇曰。越人安越。楚人安楚。君子安雅。儒效篇曰。居楚而楚居。越而越居。夏而夏。是夏與雅通也。下文所引帝謂文王六句。正大雅皇矣篇文。退無罪人乎。道路率徑明鬼下。

樾謹按退字無義。疑迫字之誤。謂迫而奪其車馬衣裘也。率徑二字亦無義。據下文此語兩見。而皆無率徑二字。疑爲衍文。

故當鬼神之有與無之別。以爲將不可以明察此者也。

樾謹按此本作故。當鬼神之有與無之別。不可以不察者也。下文曰。旣以鬼神有無之別。以爲不可不察已。然則吾爲明察此。此文以爲字。卽涉下文而衍。明察此字。卽涉下文而誤。下云不可不察。正承此而言。故知此文無明字也。

若死而有知。不出三年。必使吾君知之。其三年。周宣王合諸侯而田於圃田。車數百乘。從數千人。滿野。樾謹按必使吾君知之絕句。其下脫後字。本作其後三年。太平御覽引此文。正作後三年。但刪其字耳。韋昭注周語。引作後二年。雖誤三爲二。而後字固在。皆可爲證。文選劉孝標重答劉林陵書注。引作必死吾君之期。則誤其爲期而屬上讀。且誤使爲死。又脫知字。文不成義。不足據也。田於圃田者。圃田地名。詩車攻篇。東有甫草。駕言行狩。鄭箋以鄭有甫田說之。爾雅釋地。作鄭有圃田。卽其地也。畢讀圃字絕句。非是從乃徒字之誤。車數百乘。徒數千人。徒與車爲對文。御覽引作車徒滿野。是其證。

株子杖楫出。

樾謹按下文株子舉揖而橐之。揖未知何物。疑此文本作株子揖杖出。下文本作株子舉杖而橐之。尙

書大傳八十者杖於朝見君揖杖鄭注曰揖挾也此揖杖之義也因揖杖誤倒爲杖揖後人遂改下文之舉杖爲舉揖以合之耳舉杖而橐之猶定二年左傳云奪之杖以敲之橐卽敲之假音

請品先不以其請者鬼神之誅至若此其懲速也

樾謹按畢云品當爲盟下請字當爲情王氏引之云上請字當爲諸下請字卽情字墨子書通以請爲情不煩改字今按二說皆是也惟先字之義尙不可曉王氏改爲共字而移在盟字之上似亦未安先疑矢字之誤矢誓古通用盟矢卽盟誓也矢字隸書或作夫見孔宙碑先字隸書或作先見北海相景君碑兩形相似而誤

雖有深谿博林幽澗毋人之所施行不可以不董

樾謹按董字無義疑董字之誤董借爲謹言不可以不謹也管子五行篇修曆水土以待乎天董尹知章注曰董誠也訓董爲誠卽讀董爲謹也說文董古文作董形與董相似故誤

予非爾田野葆土之欲也

樾謹按葆土無義土疑玉字之誤葆玉卽寶玉也史記周本紀展九鼎葆玉徐廣曰保一作寶卽其例也古之伐國者或取其田野或俘其寶玉故禹自言予非爾田野寶玉之欲也

湯乘大贊

樾謹按畢云贊疑輦字實非也湯乘大贊卽書序所謂升自陑者枚傳云湯升道從陑出其不意是也呂氏春秋簡選篇亦云登自鳴條蓋湯之伐桀必由閒道從高而下故書序言升呂覽言登墨子言乘乘卽升也登也詩七月篇毛傳曰乘升也襄二十三年左傳杜注曰乘登也升陑登鳴條皆以地言則乘大贊亦必以地言但不能知其所在耳

自夫費之特注之汙壑而棄之也

樾謹按畢云一本作非直注之是也直特固得通用而非字則必當有墨子蓋謂非空棄之而已且可以合驩聚衆也今脫非字則義不可通下文正作非直注之汙壑而棄之也當據補

則是得吾父母弟兄而食之也

樾謹按弟兄當作兄姒義見上文

仁之事者必務求興天下之利除天下之害非樂上

樾謹按仁之事者當作仁人之所以爲事者見兼愛中篇

非直掊潦水拆壞垣而爲之也

樾謹按畢氏改垣爲垣是也壞疑壞字之誤掊者說文手部云杷也今鹽官入水取鹽爲掊拆者說文广部云庠郤屋也一切經音義引說文作卸屋也隸變作斥俗又加手耳行潦之水而掊取之毀壞之

壇而拆卸之不足爲損益若王公大人造爲樂器豈直如此哉故曰非直接潦水拆壞壇而爲之也王氏念孫以此二語爲未詳故具說之

意舍此

樾謹按此三字乃承上文而作轉語也意通作抑論語學而篇抑與之與漢石經抑作意是其證也抑舍此者言姑舍此弗論而更論它事也上文言樂之無益於飢者寒者勞者下文言樂之無益於大國攻小國大家伐小家而以此三字作轉語正墨子文法之妙王氏念孫謂此下有脫文非也卽我未必然也

樾謹按我下脫以爲二字當據上文補

明不轉朴

樾謹按此句義不可曉下文作眉之轉朴更爲無義疑眉字乃音字之誤此句作明則涉上文耳目不聰明而誤也朴當作朴亦以形似故誤朴者變之假字尙書堯典篇於變時雍孔宙碑作於卞時雍卽其例也上句云聲不和調此云音不轉變正以類相從矣

昔者齊康公興樂萬

樾謹按興猶喜也禮記學記篇不興其蓺鄭注曰興之言喜也歛也尙書堯典庶績咸熙史記五帝紀

作衆功皆興揚雄勸秦美新引作庶績咸喜是興與喜一聲之轉其義得通興樂萬者喜樂萬也樂卽本篇非樂之樂萬謂萬舞也

孰爲大人之聽治而廢國家之從事曰樂也

樾謹按而廢二字當在大人之上國家二字當作賤人後人不達文義而誤改也此本云孰爲而廢大人之聽治賤人之從事曰樂也言大人聽樂則廢聽治賤人聽樂則廢從事也上文曰與君子聽之廢君子聽治與賤人聽之廢賤人之從事是其證也

啓乃淫溢康樂野于飲食將將銘覩磬以力

樾謹按畢云野于疑作于野實非也此本以啓乃淫溢康樂爲句野于飲食爲句野于飲食卽下文所謂渝食于野也與左傳室於怒市於色文法正同將將銘覩磬以力疑有脫文蓋亦八字作二句也力字與食字爲韻畢失其讀故但知下文翼式是韻也

百姓之諱也非命上

樾謹按諱讀爲悴說文心部悴憂也猶曰百始之憂也故下文曰說百姓之諱者是滅天下之人也畢引爾雅諱告也釋之非是

與其百姓兼相愛交相利則

樾謹按則上脫移字下脫分字上文曰與其百姓兼相害交相利移則分是其證也王氏念孫謂則卽利字之誤而衍者非

奈何乎使文王之地及我吾則吾利豈不亦猶文王之民也哉

樾謹按則上吾字豈上利字並衍文

此上之所賞而百姓之所譽也執有命者之言曰上之所賞命固且賞非賢故賞也上之所罰命固且罰不暴故罰也

樾謹按上之所罰命固且罰不暴故罰也十三字當爲衍文說詳下

此上之所罰百姓之所非毀也執有命者之言曰上之所罰命固且罰不暴故罰也上之所賞命固且賞非賢故賞也

樾謹按上之所賞命固且賞非賢故賞也十三字當爲衍文蓋上文說賞事故述執有命者之言曰上之所賞命固且賞非賢故賞也此文是說罰事故述執有命者之言曰上之所罰命固且罰不暴故罰也今上文衍上之所罰云云此文衍上之所賞云云皆於文義未合卽此文之罰賞倒置而其傳寫誤衍之跡居然可見矣

今故先生對之曰非命中

樾謹按此子墨子託爲先生之言以折執有命者之說畢謂生當爲王非是是故國爲虛厲身在刑僇之中必不能曰我見命焉

樾謹按必不能曰下有闕文下文必不能曰我罷不肖我從事不疾必曰我命固且窮是其證也凡出言談則必可而不先立儀而言非命下

樾謹按則必可當作則不可中篇曰則不可而不先立義法是其證也不可而者不可以也王氏念孫說

大誓之言也於去發曰

樾謹按下文又云武王爲大誓去發以非之去發二字畢云未詳竊疑是大子發之誤古人作書或合二字爲一如石鼓文小魚作鯀散氏銅盤銘小子作孚是也此文大子字或合書作李其下闕壞則似玄字因誤爲去耳詩思文篇正義引大誓曰惟四月大子發上祭於畢下至於孟津之上又云太子發升舟中流白魚入於王舟王跪取出渙以燎之注曰得白魚之瑞卽變稱王應天命定號也疑古大誓三篇其上篇以太子發上祭於畢發端至中下兩篇則作於得魚瑞之後無不稱王矣故學者相承稱大誓上篇爲太子發以別於中下兩篇亦猶古詩以篇首字命名之例也

從十簡之篇以尙皆無之

樾謹按尙當讀爲上。

今雖毋在乎王公大人。蕡若信有命而致行之。

樾謹按蕡字乃藉字之誤。藉若猶言假如也。本書屢見。

若以尊卑爲歲月數。則是尊其妻子與父母同而親伯父宗兄而卑子也。非儒下。

樾謹按親伯父宗兄句文義未明。王氏念孫謂親伯父宗兄親當爲視。其說是也。王氏引之謂而讀爲如亦當從之。惟謂當作卑如庶子。則以意增益。未爲可據。今按視伯父宗兄如卑子者。卑子卽庶子。乃取卑小之義。僖二十二年左傳公卑邾杜注曰卑小也。故凡從卑得聲者。並有小義。廣雅釋詁。裨小也。方言曰。巖小者謂之巖。史記孟子荀卿列傳。於是有裨海環之。索隱曰。裨海小海也。漢書衛青傳。得右賢裨王十餘人。師古曰。裨王。小王也。若言裨將也。然則卑子之稱。正與裨王裨將一律矣。

秉轡授綏如抑嚴親。

樾謹按抑當作御字之誤也。天志下篇以御其溝池。王氏引之謂御當爲抑。隸書抑字或作抑。見漢校官碑。御字或作御。見帝堯碑。兩形相似而誤。正可與此互證。

君子必服古言然後仁。

樾謹按此本作君子必古服古言然後仁。脫上古字。公孟篇作必古言服然後仁。亦當作必古言古服。

脫下古字。

巧垂作舟。

樾謹按巧垂當作功垂。字之誤也。問官肆師職注曰。古者工與功同字。然則功垂卽工垂也。莊子胠篋篇。儻工倕之指。釋文曰。倕音垂。堯時巧者也。堯典。咨垂女共工。是稱工垂者。工其官。垂其名。夫仁人事上竭忠事親得孝務善則美。有過則諫。

樾謹按得字務字傳寫互易。事親務孝言事親者務爲孝也。與事上竭忠相對。得善則美。言有善則美之也。與有過則諫相對。

隱知豫力恬漠待問而後對。

樾謹按豫猶儲也。荀子儒效篇。仲尼將爲司寇。魯之鬻牛馬者不豫賈。家語相魯篇。孔子爲政。三月則鬻牛馬者不儲賈。是豫與儲義通。隱知豫力兩文相對。言隱藏其知。儲蓄其力也。畢云言隱其先知豫事之識。失其義。并失其讀。雖恐後言。

樾謹按雖當作唯。古字通也。上文有見利二字。蓋言利之所在。唯恐後言也。下文云。君若言而未有利焉。則高拱下視。會噎爲深。曰。惟其未之學也。正與此文反復相明。言苟無利。則君雖言之而已亦以未

學謝也。正所以破儒者擊之則鳴。弗擊不鳴之說。務興天下之利。曲直周旋。利則止。

樾謹按利則止。當作不利則止。傳寫脫不字也。非樂上篇曰。必務求興天下之利。除天下之害。將以爲法乎天下。利人乎卽爲。不利人乎卽止。與此文有詳略而義正同。教行下必於上。

樾謹按此本作教行於下必利上。與上句言聽於君必利人。相對爲文。教行下脫於字。而利字又誤作於義。不可通矣。

深慮同謀以奉賊。

樾謹按同乃周字之誤。深慮周謀。相對爲文。言其慮深沈。其謀周密也。

其道不可以期世。

樾謹按晏子春秋雜篇。作其道也不可以示世。此文期字亦示字之誤。古文其字作丌。見集韻。示誤爲丌。因誤爲期矣。

曩與女爲苟生。今與女爲苟義。

樾謹按王氏念孫以苟爲說文自急救之苟。而非苟且之苟。謂曩以生爲急。今以義爲急也。然求之文

義亦似未合。本文言爲苟生爲苟義，不言以生爲急以義爲急也。此字仍當爲苟且之苟。苟生者，苟可以得生而止也。苟義者，苟可以得義而止也。儀禮燕禮聘禮記並有賓爲苟敬之文。鄭注聘禮曰：燕私樂之禮，崇恩殺敬也。又曰：苟敬者，主人所以小敬也。然則苟敬之義，亦謂苟可以致敬而止此言爲苟生爲苟義。正與爲苟敬一律。蓋古語有然，未可臆改也。淮南子繆稱篇云：小人之從事也，曰苟得。君子之從事也，曰苟義。文義正與此相近。

此页空

白

諸子平議卷十一

墨子三

知材也。經上。

樾謹按知讀爲智。故經說上曰。知也者。所以知者。卽智也。淮南子主術篇。任人之才。難以至治。高誘注曰。才智也。才與材通。才訓智。故智亦訓材。

同長以击

樾謹按畢謂击卽正字。是也。惟此句疑當在下文中同長也之下。爾雅釋言。齊中也。是中與齊同義。故以同長釋之。而中之義又爲正。下文曰。日中击南也。是也。故又申之曰。同長以正。

併自作也。

樾謹按作疑佐字之誤。爾雅釋言。併貳也。佐與貳義相近。老子以道佐人主者。唐景龍二年石刻。作以道作人主者。作佐形似本易相混。而此又涉下文有三作字。故誤耳。

勇志之所以敢也。次無閒而不擾擾也。力刑之所以奮也。

樾謹按次無閒而不擾擾也。當在上文似有以相擾有不相擾也之上。文義方以類相從。此文勇志之

所以敢也。力刑之所以奮也。兩語本相儻。中間闡入此句。則儻句隔絕矣。下文利所得而喜也。害所得而惡也。譽明美也。誹明惡也。功利民也。罪犯禁也。賞上報下之功也。罰上報下之罪也。聞耳之聰也。言口之利也。法同則觀其同。法異則觀其宜。並是儻句。今皆以它文隔絕。由墨子寫此篇本旁行故易以錯亂。今亦未敢一一訂正也。

廣與循經下

樾謹按循乃脩字之誤。蓋以廣脩相對爲文。隸書脩與循相似。古書二字互誤者。不可枚舉。經說下篇。廣循堅白。循亦脩之誤。廣脩與堅白。皆二字平列。

鑑位量一小而易一大而击

樾謹按鑑上脫臨字。位當讀爲立。量乃景字之誤。畢氏王氏均訂正矣。惟未及易字之義。易讀爲施。詩何人斯篇我心易也。釋文曰。易韓詩作施。戰國韓策。易三川而歸。史記韓世家作施三川。是易與施古字通。施者邪也。淮南子要略篇接徑直施高注曰。施邪也。孟子離婁篇施從良人之所之。趙注曰。施者邪施而行。丁公著音述。說文走部。述襄行也。是述正字。施段字此作易者。又其段字也。一小而易。猶言一小而邪。與一大而击。相對爲文。击卽正字。經說下篇。木柂景短大。木正景長小。以柂與正對。卽其例也。

一少於二而多於五。

樾謹按數至於十則復爲一故多於五經說下篇曰一句五有一焉一有五焉五有一者一二三四之一也一有五者一十一百之一也。

知狗而自謂不知犬過也說在重物箕不甚說在若是。

樾謹按畢讀說在重物爲句非也上文云狗犬也而殺狗非殺犬也可說在重文義與此相近然則此文亦當以說在重斷句矣物箕不甚疑當作物甚不甚言有甚有不甚也甚誤作其又誤爲箕耳。

知材知也者所以知也而必知若明慮經說上

樾謹按經上篇有知材也又有知接也知接之知是本字知材之知則是智字故此先著知材二字然後以知也者釋之所以別於下文之知也者古人文字之密也若明慮句慮字涉下慮也者而衍下文若曉知句知字涉下知也者而衍若見恕句恕字涉下恕也者而衍並當刪去

義志以天下爲芬而能能利之不必用。

樾謹按志當作者草書相似而誤能能疊用無義當作而能利之不能必用下文孝以親爲芬而能能利親不必得亦當作而能利親不能必得誤與此同且自前曰且自後曰已方然亦且若石者也

樾謹按若石者也涉下句君以若名者也而衍又誤名爲石耳此當讀云且句自前曰且句自後曰已句方然亦且蓋凡事從事前言之或臨事言之皆可曰且如歲且更始之且事前之且也如匪且有且之且毛傳曰此也此方然之且也惟從事後言之則爲已然之事不得言且故云自後曰已曆外之利害未可知也趨之而得力則弗趨也是以所疑止所欲也

樾謹按力字無義疑人字之誤篆書人字作刀故誤爲力耳趨之而得爲句人則弗趨也爲句蓋趨之則得利而人以爲利害未可知止而弗趨是以所疑止所欲也

鬻買化也

樾謹按鬻買之義難曉上文雖有化若鬻爲鶉之文然買與鶉音義俱遠形又不相似未可與彼并爲一談也鬻疑賣字之誤說文貝部賣箚也讀若育今經典通以鬻爲之上云買鬻易也此云賣買化也文異而義同易有交易之義故以買鬻言化亦易也尚書舉陶謨篇懋遷有無化居枚傳曰化易也交易其所居積是化易同義故亦以買鬻言也

非力之任也爲握者之賴倍經說下

樾謹按字書無賴字疑解字之誤玉篇角部解女卓切握也

惟是當牛馬數牛數馬則牛馬二數牛馬則牛馬一

樾謹按惟是當牛馬絕句數牛數馬則牛馬二謂分牛馬而數之也畢讀惟是當牛馬數爲句失之

景光至景亡若在盡古息

樾謹按此當讀云景句光至景亡句若在盡古息蓋句首景字舉經文而說之光至景亡者謂所以有景由無光也下文曰足敝下光故成景於上首敝上光故成景於下是也光之所至則景亡矣若在盡古息又與上句反復相明言景若在則光盡古息也盡古猶終古也考工記則於馬終古登陑也莊子大宗師篇終古不忒是終古爲古人恆言釋名釋喪制曰終盡也故終古亦曰盡古也畢讀皆誤遠脩近脩也先後久也

樾謹按上脩字衍文遠近脩也先後久也相對爲文以地之相去言曰脩以時之相去言曰久牛狂與馬惟異以牛有齒馬有尾說牛之非馬也不可

樾謹按狂與惟皆性字之誤此言牛性與馬性異非徒以牛有齒馬有尾爲別也權非爲是也非非爲非也大取

意獲也乃意禽也

樾謹按乃意禽也。當作非意禽也。與上文非意木也。非意人也。一律。智是之世之有盜也。盡愛是世。

樾謹按當作智是世之有盜也。不盡是世。下文智是室之有盜也。不盡是室也可證。益其益尊其尊。

樾謹按尊當讀爲剗。說文刀部。剗滅也。剗有滅損之義。故與益其益對文成義。昔之知牆。非今日之知牆也。

樾謹按牆字不可通。乃嗇字之誤。呂氏春秋情欲篇論早定則早知嗇。先己篇。嗇其大寶。高注並曰。嗇。愛也。昔之知嗇。非今日之知嗇。猶上文云昔者之愛人也。非今之愛人也。

貴爲天子。其利人不厚於正夫。

樾謹按正夫當爲匹夫。禮記禮器篇。匹士大牢而祭謂之攘。釋文曰。匹本或作正。是其例也。節葬下篇。存乎匹夫賤人死者。今亦誤作正夫。王氏念孫已訂正。

長人之異短人之同。其貌同者也。故同。

樾謹按長人之異短人之同。當作長人之與短人也。同下二句正釋長人短人所以同之故也。下文曰。指之人也。與首之人也。異人之體非一貌者也。故異。將劍與挺劍異。劍以形貌命者也。其形不一故異。

並與此文一律可證。

摹略萬物之然小取、

樾謹按然字無義。疑當作狀。狀誤爲狀。因誤爲然。行而異。轉而危。

樾謹按危讀爲詭。漢書天文志。司詭星出正西。史記天官書。詭作危。是危詭古字通行而異。轉而詭。亦異也。

不愛人不待周。不愛人不失周愛。因爲不愛人矣。

樾謹按周猶徧也。失字衍文。此言不愛人者。不待徧不愛人。而後謂之不愛人也。有不徧愛。因爲不愛人矣。今衍失字。義不可通。乃淺人不達文義而加之。

子兼愛天下。未云利也。我不愛天下。未云賊也。耕柱。

樾謹按廣雅釋詁。云有也。此兩云字均當訓有說。詳王氏經傳釋詞。

毋幾何而遺十金於子墨子。

樾謹按戰國齊策注。二十兩爲一金。然則十金爲二百兩矣。墨氏崇儉。其徒以十金餽遺。不爲不豐。畢云。十金當爲千金之誤。率意增益。厚誣古人。殊爲無謂。

古之善者不誅。

樾謹按誅當爲讞字之誤也。上文君子不作術而已。此云古之善者不讞。術與讞並述之段字。其字並從朮聲。故得相假借也。若作誅則與述聲絕遠矣。故有我有殺彼以我無殺我以利。

樾謹按此當作故我有殺彼以利我無殺我以利彼。是猶弃其目而祝於禁社也。苟使我都視。

樾謹按祝於禁社也。當作祝於禁社曰。其下句卽祝詞也。上文而祝於禁社曰。苟使我和。是其證。又按禁社乃叢社之誤。王氏念孫已訂正。

嘿則思。言則誨。動則事。使者三代御必爲聖人。貴義。

樾謹按使者三代御當作使三者代御。三者卽嘿言動三事也。御用也。荀子禮論篇時舉而代御。楊注曰。御進用也。此云代御義與彼同。言更迭用此三者。則必爲聖人也。因三者二字傳寫誤倒。畢遂曲爲之說謬矣。

必去喜去怒去樂去悲去愛而用仁義。

樾謹按去愛下當有去惡二字。傳寫脫之。喜怒樂悲愛惡共六者。皆宜去之。卽上文所謂去六辟也。

鉅者白也。

樾謹按鉅無白義字當作豈。豈者體之假字廣雅釋器體白也。體省作豈。又誤作巨。因爲鉅矣。呂氏春秋有始覽。南方曰巨風。李善注文選木元虛海賦王子淵洞簫賦潘安仁河陽縣作詩並引作凱風。蓋亦省凱爲豈。而誤爲巨也。可以爲證。

吾取飾車食馬之費與繡衣之財以畜士。

樾謹按吾當爲若字之誤也。

是數人之齒而以爲富。公孟。

樾謹按畢云齒年也。然數人之年安得以爲富。畢說非也。齒者契之齒也。古者刻竹木以記數其刻處如齒故謂之齒。易林所謂符左契右相與合齒是也。列子說符篇宋人有遊於道得人遺契者歸而藏之密數其齒曰吾富可待矣此正數人之齒以爲富者蓋古有此喻。

是譬猶噎而穿井也。

樾謹按晏子春秋雜上篇噎而遽掘井說苑雜言篇作譬之猶渴而穿井渴字較噎爲勝疑此文亦當作渴。因噎字古作餽。漢書賈山傳祝餽在前。師古曰餽古噎字是也。形與渴微似故渴誤爲噎。是猶果謂攝者不恭也。

樾謹按畢謂果當爲裸是也。謂櫛當爲蹶。引說文云僵也。一曰跳也。則失之矣。蹶與裸兩意不倫。不當取以爲喻。禮記內則篇不涉不櫛。鄭注櫛揭衣也。櫛衣雖不恭。然裸則更甚。故曰是猶果爲櫛者不恭也。

三年之喪學吾之慕父母。

樾謹按吾下脫子字。管子海王篇。吾子食鹽二升少半。尹知章注曰。吾子謂小男小女也。此文公孟子曰。三年之喪學吾子之慕父母。故下子墨子曰。夫嬰兒子之知。獨慕父母而已。嬰兒子卽吾子也。今我問曰。何故爲室。曰。冬避寒焉。夏避暑焉。室以爲男女之別也。

樾謹按避寒避暑爲男女之別三句皆以室言。不當於男女之別句獨著室字。室乃且字之誤。古書且字或誤爲宜。詩假樂篇釋文曰。且君且王。一本且並作宜是也。且誤爲宜。因誤爲室矣。

是亦當而不可易者也。

樾謹按亦當爲兀。古文其字也。言我所稱於孔子者。是其當而不可易者也。其字卽以孔子言。本篇其字多誤爲亦。畢氏已訂正而未及此。

子亦聞乎。匿徒之刑之有刑乎。

樾謹按之刑二字衍文。子亦聞乎。匿徒之有刑乎。徒謂胥徒給徭役者。匿徒謂避役。

魯君謂子墨子曰吾恐齊之攻我也可救乎魯問

樾謹按此魯君自是魯國之君故恐齊攻而求救畢謂是魯陽文君楚縣之君非也魯陽文君耕柱篇再見此篇亦屢見子墨子之意皆勸以無攻小國與此不同且此篇有魯君又有魯陽文君別而書之其非一人明甚

讐怨行暴失天下

樾謹按怨字乃忠字之誤言與忠臣爲讐也上文說禹湯文武曰說忠行義取天下與此相對可證

子墨子見齊大王曰

樾謹按齊大王卽田齊之大公和也大公者始有國之尊稱故周追王自亶父始而稱大王齊有國自尙父始而稱大公以及吳之大伯晉之大叔皆是也說詳羣經平議田齊始有國者和也故稱大公猶尙父稱大公也至其後子孫稱王則亦應稱大王矣猶亶父稱大王也因齊大王之稱它書罕見故學者不得其說太平御覽引此文遂刪大字矣

子墨子曰出曹公子而於宋

樾謹按王氏念孫謂此本作子墨子出曹公子於宋曰字而字皆衍文其說是也然出字義不可通出當爲士字之誤史記夏本紀稱以出徐廣曰一作士是其例也士與仕通子墨子士曹公子於宋卽仕

曹公子於宋也。貴義篇曰。子墨子仕人於衛。

而以夫子之政。家厚於始也。

樾謹按政乃故字之誤。蓋子墨子仕曹公子於宋。則宋必致祿。故曰以夫子之故。家厚於始也。耕柱篇曰。君以夫子之故。致祿甚厚。

若以白公爲不義。何故不受王誅。白公然而反王。

樾謹按畢讀誅。白公爲句。則然而反王文不成義矣。禮記檀弓篇。穆公召縣子而問然。鄭注曰。然之言焉也。誅白公然而反王。猶云誅白公焉而反王。七字爲一句。

北方有侮臣。願藉子殺之。公輸。

樾謹按有侮臣下脫者字。

子墨子解帶爲城。以牒爲械。

樾謹按畢據太平御覽改作牒。王氏念孫又以作牒爲是。其實牒牒皆假字也。其本字當作棟。棟與牒疊韻。字玉篇从部。牒。夾牒也。虫部。蛺。蛺蝶也。棟之與牒。亦猶夾之與牒。蛺之與蝶。聲近而義通矣。禮記曲禮篇。羹之有菜者用棟。鄭曰。棟猶箸也。以棟爲械者。以箸爲械也。文選陳孔璋爲曹洪與文帝書曰。墨子之守。縗帶爲垣。折箸爲械。

然則守者必善。而君尊用之。然後可以守也。備城門。

樾謹按尊當爲遼古字通也。此下有脫簡在下文。說詳後。

塹長以力。

樾謹按力字無義。疑方字之誤。

廣三尺廣四尺。

樾謹按兩言廣義不可通。下廣字疑當作長。蓋言爲坐候樓之法。廣三尺長四尺也。下文言陛之制曰。廣長各三尺。彼廣長同制。故合言之。此廣長異制。故別言之也。

五十步一方。

樾謹按方者房之段字。五十步置一房爲守者入息之所。故必爲關籥守之也。尙書序乃遇汝鳩汝方。史記殷本紀作女房。是方房古字通。

百步爲幽牘。

樾謹按牘即竇字之誤。其上本從穴。篆文穴字與隸書肉字相似。傳寫誤從肉。後人以從肉之字皆在左旁。作月因變而爲牘矣。管子侈靡篇有牕字。卽竇字之誤。正與此同。說詳管子可以爲證。夫長丈二尺。

櫟謹按畢云夫疑卽扶字所以著手王氏念孫據雜守篇改夫爲矢今按二說皆非也下文云爲韻皋必以堅杖爲夫畢云夫同趺如足兩分也此說得之下云臂長六尺是趺也臂也皆取象於人身畢得之後而失之前偶不照耳雜守篇作矢乃字之誤不當反據以改不誤者後文夫字應讀趺者視此

五十二者十步而二

櫟謹按上二字衍文下二字當爲四古人書四字作三傳寫誤分爲兩二字遂移其一於上耳上十字當爲升上文云容十升以上者五十步而十此云五升者十步而四蓋言盛水之器大者容十升小者半之容五升其大者則五步而一故五十步而十其小者則五步而二故十步而四也下文五十步丈夫十人丁女二十人又曰廣五百步之隊丈夫千人丁女子二千人是丈夫五十步而十丁女十步而四與此數一律

城四面四隅皆爲高磨櫟

櫟謹按王氏引之謂磨當爲磨櫟當爲櫟卽說文櫟櫟押指之異文其說是也惟以爲樓名則無據疑高下脫樓字本云皆爲高樓磨櫟號令篇曰它門之上必夾爲高樓與此同義爲高樓磨櫟猶云夾爲高樓也磨櫟卽夾也

時換吏卒署而毋換其養養母得上城

樾謹按畢云養糧也此說非是養卽斬養之養宣十二年公羊傳斬役扈養死者數百人何休注曰炊亨者曰養

此十四者具則民亦不宜上矣然後城可守十四者無一則雖善者不能守矣

樾謹按上云備穴者城內爲高樓以謹下云守法五十步丈夫十人丁女二十人老小十人文氣正相聯貫入此三十字則隔斷矣此三十字當在上文罰嚴足畏之下又按上文自凡守圍城者至罰嚴足畏也凡一百十二字亦與前後文義不倫當在篇首然則守者必善而君尊用之然後可以守也之下蓋自子墨子曰我城池修守器具至十四者無一則雖善者不能守矣皆是先論守城之本其下云故凡守城之法備城門爲縣門云云乃始詳言其法也今考正之如左

子墨子曰我城池修守器具推粟足上下相親又得四鄰諸侯之救此所以持也且守者雖善而君不用之則猶若不可以守也若君用之守者又必能守守者不能而君用之則猶若不可以守也然則守者必善而君尊用之然後可以守也凡守圍城之法□□厚以高壕池深以廣樓撕掘守備繕利薪食足以支三月以上人衆以選吏民和大臣有功勞於上者多主信以義萬民樂之無窮不然父母墳墓在焉不然山林草澤之饒足利不然地形之難攻而易守也不然則有深怨於適而有大功於上不然則賞明可信而罰嚴足畏也此十四者具則民亦不宜上矣然後城可守也十四者無一則雖善者不

能守矣。

右文字譌脫之處皆據畢氏王氏之說訂正惟弟一句則猶若不可以守也舊脫猶字今據下句補守者又必能守舊作守者又必能乎今以意改君尊用之尊讀爲遵古字通也凡守圍城之法以下所說凡十四事其文自明大臣有功勞至萬民樂之無窮共爲一事蓋大臣素有功勞則主信而義之萬民樂之然後可以有爲也此十四者具則民亦不宜上矣總上十四事而言當作則民亦宜其上矣墨子書其字多作兀因誤作不寫者遂移至宜字之上耳

鑿井城上

樾謹按城上無鑿井之理城上當作城內卽上文穿井城內之事必以堅杖爲夫

樾謹按夫當從畢讀爲趺杖乃材字之誤言必以材之堅者爲頓皋之趺也備高臨篇杖大方一方一尺備穴篇兩杖合而爲之轎杖並當作材

兩軸三輪備高臨

樾謹按既爲兩軸不得三輪三當爲四古三四字皆積畫因而致誤

煙資吾池備梯

樾謹按王氏念孫讀煙爲堙是也惟資字尙未得其義資當讀爲茨淮南子泰族篇茨其所決而高之高注曰茨積土壤滿之也是茨與堙同義古茨字或作賚爾雅釋草篇茨蒺藜釋文茨本作賚是也墨子書作資者卽賚字而省艸耳說文土部塗以土增大道上茨與塗通

高廣如行城之法

樾謹按上文皆言行城而此卽云高廣如行城之法義不可通疑高廣上脫雜樓兩字上文云守爲行城雜樓相見以環其中以適廣狹爲度然則行城也雜樓也本有二事故云相見相見卽相閒也備城門篇見一寸畢云見疑閒字是其例也上文旣言行城之法此繼言雜樓故省其文曰雜樓高廣如行城之法

中鑿夫之爲道臂臂長至桓備穴

樾謹按此當作中鑿之爲道夫長若干尺臂長至桓夫字誤移在上遂脫其尺數臂字又誤疊皆不可通下文曰夫長丈臂長六尺備城門篇雜守篇並云夫長丈二尺臂長六尺故知此文亦並言夫長臂長而傳寫脫去也桓疑垣字之誤

什大容二什以上到三十

樾謹按什十並斗字之誤斗大容二斗以上到三斗猶下文云大容一斗以上至二斗也凡斗字誤作

什者王氏已訂正此又誤作十則未及。

以盆盛醯置穴中。

樾謹按醯疑醯之壞字下文又曰及以油油疑油之壞字。

令有力四人下上之勿難備蛾傳。

樾謹按難乃離字之誤備城門篇突一旁以二橐守之勿離備穴篇令一善射之者佐一人皆勿離並其證。

敵引哭而去。

樾謹按哭當作師說文帀部師古文作率形與哭相似故師誤爲哭也王氏念孫謂墨子多古字然所引如所染篇之高尙賢篇之佚非儒篇之苟皆未甚塙若此率字則真古文也故爲表出之。

壇高八尺堂密八迎敵祠。

樾謹按密字無義疑當作窪說文穴部窪深也謂堂深八尺也不言尺者蒙上而省窪密相似因誤爲密矣下密字並同它書深字無作窪者亦古字也。

設守門三人掌右閥二人掌左閥四人掌閉百甲坐之。

樾謹按左右人數不應有異疑三人是二人之誤蓋門之啓閉皆四人守之啓則有左右之分故曰二

人掌右閽。二人掌左閭。及閉則無左右之分。故止曰四人掌閉也。百甲坐之。百乃皆字之誤。言守門者皆甲而坐也。

移中中處澤急而奏之。

樾謹按畢云澤當爲擇是也。惟未解奏字之義。史記蕭相國世家索隱曰。奏者趨向之也。擇急而奏之。謂有急則趨向也。

死士爲倉英之旗。旗幟。

樾謹按倉英之旗乃青色旗。倉英卽滄浪也。在水爲滄浪。在竹爲蒼筤。並是一義。此又作倉英者。英音古音如央。故與浪同聲。

城上舉旗備具之官致財物之足而下旗。

樾謹按下之字衍文本作足而下旗。蓋城上舉旗則備具之官各致其財物。旣足而後下旗也。之字卽足字之誤而複者當刪。

牲格內廣二十五步外廣十步表以地形爲度。

樾謹按表乃袤字之誤。備穴篇。鑿廣三尺表二尺。王氏念孫訂表爲袤之誤。正與此同。謹令信人守衛之。謹密爲故號令。

樾謹按故猶事也。言務以謹密爲事也。備梯篇以靜爲故。備穴篇以急爲故。義與此同。畢屬下讀失之。乃傳城。

樾謹按乃傳當作及傳。字之誤也。上云敵去邑百里以上。此云及傳城。其事正相次。傳卽蛾傳之傳。備蛾傳篇曰。遂以傳城是也。畢不能訂正。而屬上謹密爲故。讀之解曰。必有故乃傳用也。殊不可通。及窮巷閒無人之處。

樾謹按閒上脫幽字。幽閒二字連文。明鬼篇作幽澗。毋人澗卽閒之假字。天志篇作幽門。無人門卽閒之壞字。王氏念孫已訂正。

縣各上其縣中豪傑。若謀士居大夫。

樾謹按居乃若字之誤。若謀士若大夫。猶言或謀士或大夫也。秦爵有大夫。有官大夫。有公大夫。有五大夫。是民間賜爵至大夫者多矣。上不能悉知。故使縣各上其名也。上文關內侯五大夫公乘之名。悉如秦制。則此所謂大夫者。非必如周官之大夫也。

客射以書無得譽。

樾謹按譽當作舉。字之誤也。下文曰。禁無得舉矢書。望舉一垂。入境舉二垂。狎郭舉三垂。入舉四垂。狎城舉五垂。

樾謹按王氏引之於舉一垂上補見寇二字於舉四垂上補郭字均當從之惟以垂字爲表字之誤非也垂者郵之壞字郵卽表也禮記郊特牲篇有郵表曠鄭君說此未明阮氏元擧經室集有釋一篇稍近之然亦有未盡者郵表曠蓋一物也古者於疆界之地立木爲表綴物於上若旌旗之旒謂之郵表曠郵與旒通曠與綴通鄭君引詩爲下國曠郵今長發篇作綴旒是知郵曠卽綴旒也以其用而言所以表識也以其制而言若綴旒然此郵表曠所以名也凡置郵表曠之處必在邊境因於其地置舍使傳送文書者居焉其始亦名之曰郵表曠後從省而止曰郵說文邑部郵境上行書舍是也凡置郵表曠必於兩道歧出之處因而凡兩道歧出之處卽以爲名其始亦曰郵表曠後從省而止曰曠說文田部曠兩陌閒道也是也郵曠之名旣有專歸於是從省止稱表而郵表曠之名湮其義晦矣墨子書多古言雜守篇守表者三人更立捶表而望捶表卽郵表也郵誤爲垂後人妄加手旁耳重言之曰郵表單言之則或曰表或曰郵皆古人之常語也王氏竟改爲表雖於義未失而古語亡矣又按狎郭狎城兩狎字並當作甲後人不達而加大旁也甲者會也詩大明篇會朝清明毛傳曰會甲也是甲與會聲近而義通甲郭者會于郭外也甲城者會于城外也此言甲郭甲城雜守篇言郭會城會文異而義同其罪射

樾謹按射疑別字之誤畢云射謂貫耳然古不名貫耳爲射殆非也

凡有司不使去卒吏民聞誓令。

樾謹按去乃士字之誤。

升食終歲三十六石。參食終歲二十四石。食終歲十八石。五食終歲十四石升六食。終歲十二石升食。食五升。參食食參升四食。食二升半五食。食二升六食。食一升大半。

樾謹按升食當爲斗食。畢已疑及之而未敢決。今以下文推之。則升爲斗字之誤無疑也。日食一斗。則終歲三十六石矣。下云升食食五升。則終歲十八石兩數不同者。上所說是常數。下所說是圍城之中。民食不足。減去其半之數也。參食者參分斗而日食其二也。故終歲二十四石也。句下脫四字。當據下文補。四食者四分斗而日食其二也。故終歲十八石也。五食者五分斗而食其二。則每日食四升。終歲當食十四石四斗。今作終歲十四石升。蓋誤斗爲升。又脫四字耳。盧疑是十四石五升。于數不合。非也。六食者六分斗而食其二也。故終歲十二石也。其下依前數而各減其半。斗食者每日一斗。今則爲五升矣。參食者每日六升大半。今爲參升小半矣。不言小半者。傳寫脫去也。下文言六食食一升大半。則此必言食參升小半可知。蓋參食本食六升大半而減之爲三升小半。猶六食本食三升小半而減之爲一升大半也。無小半二字。卽於數不足矣。四食本食五升。故減爲二升半。五食本食四升。故減爲二升。其數甚明。畢氏王氏皆未見及。故具說之。

必爲疑人。令往來行夜者射之。謀其疏者。

樾謹按。疑人蓋束草爲人形。望之如人。故曰疑人。謀其疏者。謀乃誅字之誤。

此页空白

諸子平議卷十二

荀子一

君子博學而日參省乎己。勸學。

樾謹按省乎二字後人所加也。荀子原文蓋作君子博學而日參己。參者驗也。史記禮書曰。參是豈無堅革利兵哉。索隱曰。參者驗也。管子君臣篇曰。若望參表。尹注曰。參表謂立表所以參驗曲直。是參有參驗之義。君子博學而日參驗之於己。故知明而行無過也。後人不得參字之義。妄據論語三省吾身之文。增省乎二字陋矣。大戴記勸學篇作君子博學如日參己焉。如而古通用。無省乎二字可據以訂正。

干越夷貉之子。

樾謹按楊倞注曰。干越猶言吳越。盧氏文弨本從元刻改正文。干越爲于越。注文吳越爲於越。劉氏台拱補注王氏念孫讀書雜志並糾盧本之誤。今按盧刻誠非。而楊注原文謂猶言吳越亦恐不然。干與越並言。則干亦國名。管子內業篇昔者吳干戰未亂。不得入軍門。國子擿其齒。遂入爲干國。多則干與吳。且爲敵國。非卽吳明矣。尹知章注管子以干爲江邊地。非是。辨見管子字本作邗。說文邑部。邗國也。

今屬臨淮從邑干聲一曰邢本屬吳蓋邢古國名後爲吳邑哀九年左傳吳城邢是也古書言干越者則當從國名之本訓不得因其後爲吳邑而卽訓爲吳也

神莫大於化道福莫長於無禍

樾謹按上引詩云神之聽之介爾景福此文神字福字卽本詩文也今本此二句提行屬下節非是假舟楫者非能水也

樾謹按能當讀爲耐漢書食貨志能風與旱量錯傳其性能寒趙充國傳漢馬不能冬師古注並曰能讀曰耐此文能字正與彼同

故不問而告謂之傲

樾謹按論語季氏篇言未及之而言謂之躁釋文曰魯讀躁爲傲荀子此文蓋本魯論下文曰故未可與言而言謂之傲可與言而不言謂之隱不觀氣色而言謂之瞽皆與論語同惟變躁爲傲可證也傲卽躁之假字不問而告未可與言而言皆失之躁非失之傲也魯論之說今不可得而詳以意度之殆亦假傲爲躁自古文論語出得其本字遂謂魯論讀躁爲傲實不然也躁字義長傲字義短魯之經師豈不知此而改躁爲傲乎

故誦數以貫之

樾謹按誦數猶誦說也。詩擊鼓篇與子成說。毛傳曰。說爲數。故數亦爲說。禮記儒行篇。遽數之不能終其物正義曰。數說也。荀子王霸篇曰。不足數於大君子之前。仲尼篇曰。固曷足稱乎大君子之門哉。稱與數文異而義同。凡稱說必一一數之。故卽謂之數。誦數以貫之。猶云誦說以貫之。與下句思索以通之一律。誦數思索皆兩字平列。楊注云。使習禮樂詩書之數以貫穿之。非是。隱十一年穀梁傳。植言同時也。累數皆至也。范注曰。累數總言之也。言卽說也。

及至其致好之也。目好之五色。耳好之五聲。口好之五味。心利之有天下。

樾謹按楊注曰。致極也。謂不學極恣其性欲不可禁也。又云。或曰。學成之後。必受榮貴。故能盡其欲也。二說並非是。上文云。使目非是。無欲見也。使耳非是。無欲聞也。使口非是。無欲言也。使心非是。無欲慮也。皆言君子爲學之道。及至其三字。直接上文。安得云。謂不學者乎。若云學成榮貴。義更粗矣。古之字於字通用。大戴禮事父母篇曰。養之內不養於外。則是越之也。養之外不養於內。則是疏之也。之內之外。卽於內於外也。廣雅釋言曰。諸之也。又曰。諸於也。則之與於義。固得通矣。此文四之字。並猶於也。目好於五色。耳好於五聲。口好於五味。心利於有天下。言所得於學者深。佗物不足以尙之也。下文曰。是故權利不能傾也。羣衆不能移也。天下不能蕩也。生乎由是。死乎由是。正申明此數句之諱。足徵楊注之非矣。

天見其明地見其光君子貴其全也。

樾謹按兩見字並當作貴蓋貴字漫漶止存其下半之貞因誤爲見耳光與廣通說見王氏讀書雜志言天貴其明地貴其廣君子貴其全貴誤作見則與君子句不一律失荀子語意矣。

勇膽猛戾則輔之以道順脩身

樾謹按道順二字不可通順當讀爲訓古順訓字通用國語周語能導訓諸侯者史記魯世家訓作順此文道順正與彼同道順卽導訓也楊注曰此性多不順故以道順輔之非是

愚款端慤則合之以禮樂通之以思索

樾謹按自血氣剛強則柔之以調和以下八句文法皆同此獨多通之以思索五字與上文不一律據韓詩外傳無此五字當爲衍文楊注曰愚款端慤多無潤色故合之以禮樂不及思索之說是其所見本未衍也

事亂君而通不如事窮君而順焉

樾謹按顧氏千里曰窮順二字互錯此不然也荀子之意以爲事亂君則不順矣事窮君則不通矣然與其事亂君而通不如事窮君而順正上文身勞而心安爲之利少而義多爲之之意若從顧校則全失其旨矣王氏采其說入雜志補誤也

饒樂之事，則佞兌而不曲。

樾謹按不字衍文。涉下不慤不錄而衍曲者委曲也。言遇饒樂之事必委曲以取之也。因衍不字。楊注曰。不曲謂直取之誤矣。

行而俯項非擊戾也。

樾謹按楊注曰。擊戾謂項曲戾不能仰者也。擊戾猶言了戾也。此說擊戾之義未明。擊戾者拂戾也。考工記弓人和弓轂。鄭注曰。轂拂也。擊與轂通。郭仲奇碑鷹恃電轂。轂卽擊字也。

則有鈞無上可以爲君子者矣。

樾謹按有鈞無上謂但有與之齊等無更在其上者也。故謂之君子。楊注非。

不窮窮而通者積焉。

樾謹按楊注以不窮窮謂惠恤鰥寡非也。窮通以賢不肖言。孔晁注周書常訓篇曰。窮謂不肖之人是也。不窮窮者不強人以所不知不能中庸所謂矜不能也。若以窮爲鰥寡則通者豈不鰥寡之謂乎。非十二子篇曰。聰明聖知不以窮人即可說此文不窮窮之義。

人有此三行雖有大過天其不遂乎。

樾謹按人有此三行則君子矣。小過或有之安有大過乎。過當爲禍。漢書公孫宏傳雖陽與善後竟報

其過史記過作禍是過與禍通遂成也言雖有大禍天必不成之也楊注曰若不幸而有過天亦祐之矣此固不宜有大災也大災二字正可以釋正文之大過楊不知過爲禍之假字故不得其解耳

鉤有須不苟

樾謹按楊注云未詳或曰卽丁子有尾也丁之曲者爲鉤須與尾皆毛類此亦曲說不可從鉤疑姁之假字說文女部姁嫗也嫗無須而謂之有須故曰說之難持者也惠氏棟校本引大元經婦人睫鉤爲說謂鉤音拘與須音相近睫鉤者須出乎口也按大元迎次四裳有衣襦男子目珠婦人睫鉤范望及溫公集注並無婦人須出乎口之說且謂鉤與須音近則睫鉤卽睫須也以說此文是爲須有須矣豈可通乎今讀鉤爲姁亦卽惠氏之意而說似較安

盜跖吟口

樾謹按楊注曰吟口吟咏長在人口也此說殊爲迂曲又曰說苑作盜跖凶貪然韓詩外傳亦作吟口則又似不誤也吟蓋黔之假字黔口卽黔喙周易說卦傳爲黔喙之屬釋文引鄭注曰謂虎豹之屬貪冒之類然則盜跖黔口乃以虎豹擬之正論篇所謂禽獸行虎狼貪也

君子易知而難狎

樾謹按韓詩外傳作易和而難狎字之誤也知者接也墨子經篇曰知接也古謂相交接曰知故後漢

書宋宏傳貧賤之交不可忘。羣書治要作貧賤之知。是知有交接之義。易知而難狎。謂易接而難狎也。詩苑蘭篇首章曰。能不我知。次章曰。能不我甲。毛傳訓甲爲狎。蓋首章言不與我交接。次章言不與我狎習也。說詳羣經平議。荀子以知狎對文。正本乎詩。韓嬰不達此旨。改知爲和。失之矣。王氏念孫謂當從外傳。非也。

以義變應

欒謹按變讀爲辯。周易文言曰。由辯之不早辯也。釋文曰。辯苟作變。禮記禮運篇。大夫死宗廟謂之變。鄭注曰。變當爲辯。是變與辯古通。辯之言偏也。儀禮鄉飲酒禮。衆賓辯有脯醢。燕禮。大夫辯受酬。鄭注並云。今文辯作偏。是其證也。變與辯通。則亦可借爲偏。以義變應者。以義偏應也。下文引詩曰。左之左之。君子宜之。右之右之。君子有之。此言君子之能以義屈伸變應也。左宜右有正。以義偏應之謂。楊注曰。以義隨變。而應增字以成其說。失其旨矣。君道篇曰。並遇變應而不窮。變與並對文可知。變之爲偏也。致士篇。臨事接民而以義變應。義與此同。

人汙而修之者。非案汙而修之之謂也。

欒謹按修當讀爲滌。周官司尊彝職曰。凡酒修酌。鄭注曰。修讀如滌濯之滌。是其證也。滌從條聲。條從攸聲。修亦從攸聲。聲同之字。故得通用。楊注曰。人有汙穢之行。將修爲善。失之矣。荀子書每以修與汙

對文並當讀爲滌。

不誠則不獨。不獨則不形。

樾謹按上文云致誠則無它事矣。唯仁之爲守。唯義之爲行。所謂獨者。卽無它事之謂。唯仁唯義。故無它事。無它事是謂獨。故曰不誠則不獨。不獨則不形。言不能誠實。則不能專一於內。不能專一則不能形見於外。楊氏未達獨字之旨。故所解均未得也。

唯利所在。無所不傾。

樾謹按文選孫子荆詩傾城遠追送李善注傾猶盡也。無所不傾卽無所不盡。楊注謂傾意求之。非是夫貧賤者則求柔之。

樾謹按注不釋求字。禮記曲禮篇曰君子行禮不求變俗。鄭注曰求猶務也。求柔之猶言務柔之矣。

是非仁人之情也。

樾謹按仁字衍文也。上文云夫富貴者則類傲之。夫貧賤者則求柔之。蓋言遇富貴者率傲慢之。遇貧賤者務柔屈之。此非人情也。正與上文人之所惡者吾亦惡之相應。上文泛言人。則此文亦不當言仁人。後人因下云是姦人。將以盜名於掩世者也。故於上句加仁字。以對下姦字。而不知其義之非耳。巨涂則讓。小涂則殆。榮辱。

樾謹按楊注曰殆近也。凡行前遠而後近故近者亦後之義。謂行於道涂。大道並行則讓之。小道可單行則後之。此說於殆字之義甚爲迂曲。且與下文雖欲不謹。文氣亦不貫。楊注非也。讓當讀爲擾攘之攘。說文女部。嬾煩攘也。經典無嬾字。多以攘爲之。禮記曲禮篇鄭注曰。攘古讓字。故此又以讓爲之也。文選舞賦。擾攘就駕。李善引埤蒼曰。攘疾行貌。巨塗人所共行。故擾攘而不止。小塗人所罕由。故危殆而不安。是塗無巨小皆不可不謹。故下文曰。雖欲不謹。若云不使也。

辯而不說者爭也。

樾謹按楊注曰。不說不爲人所稱說。或讀爲悅。二義皆非。是淮南子俶真篇辨者不能說也。高誘注曰。說釋也。斯得之矣。辯而不說。謂辯而人不解說。由其好與人爭。而不能委曲以曉人也。

重死持義而不撓。

樾謹按此本作重死而持義不撓。故楊注曰。雖重愛其死。而執節持義。不撓曲以苟生也。是楊氏所據本而字在持義之上。

胠於沙而思水則無逮矣。

樾謹按楊注曰。胠與祛同。方言曰。祛去也。謂失水去在沙上也。然失水在沙上而曰去於沙。甚爲不詞。楊注非也。胠當作陸。文選吳都賦曰。陸以九疑。注曰。陸闡也。因山谷以遮獸也。陸於沙義亦同。此言遮

關於沙而思水則無及矣。下云挂於患而欲謹則無益矣。陸於沙挂於患文義一律成則必不得其所好必遇其所惡焉。

樾謹按楊注曰雖使姦詐得成亦必有禍無福其說非也。尚書皋陶謨篇簫韶九成鄭注曰成猶終也古謂終爲成言終則必不得其所好必遇其所惡焉下文於君子曰成則必得其所好必不遇其所惡焉並以其終竟言之。臣道篇曰成於尊君安國彊國篇曰道德之威成乎安彊暴察之威成乎安弱狂妄之威成乎滅亡諸成字並當訓終。

然而人力爲此而寡爲彼何也。

樾謹按力乃多字之誤多與寡對文成義下同。

堯禹者非生而具者也夫起於變故成乎脩脩之爲待盡而後備者也。

樾謹按脩之二字衍文也起於變故成乎脩爲二語相對成文下文曰非孰脩爲之君子莫之能知也正以脩爲二字連文可證。

約者有筐篋之藏然而行不敢有輿馬。

樾謹按楊注曰約儉嗇也既云儉嗇則不敢有輿馬固無足怪不必更用然而字作轉矣楊注非也淮南子主術篇所守甚約高注曰約要也漢書禮樂志治本約師古曰約讀曰要是約與要一聲之轉古

亦通用約者猶云要者孝經先王有至德要道疏引殷仲文曰以一管衆爲要蓋物之藏於筐篋者必是貴重之物視上文所云餘刀布有困窮爲尤要矣故特以要者言之非儉嗇之謂也然後使懋祿多少厚薄之稱

樾謹按懋當作穀孟子滕文公篇穀祿不平趙注曰穀所以爲祿也此文言穀祿正與彼同作懋者聲之誤也楊注曰懋實也以本字讀之失其旨矣王霸篇曰心好利而穀祿莫厚焉此穀祿二字見於本書者

子弓短非相

樾謹按楊注曰子弓蓋仲弓也此說是也又曰言子者著其爲師也則恐不然仲弓稱子弓猶季路稱子路耳子路也子弓也其字也曰季曰仲至五十而加以伯仲也

仁義功名善於後世

樾謹按善乃蓋字之誤隸書蓋字或作善見北海相景君銘善字或作善見張遷碑兩形相似而誤今世俗之亂君鄉曲之儇子

樾謹按下文云中君羞以爲臣則此不應言君且與婦人莫不願得以爲夫處士莫不願得以爲士及束乎有司戮乎大市諸語皆不合疑本作世俗之亂民傳寫誤耳

今夫猩猩形笑亦二足而毛也。

樾謹按形笑二字甚爲不詞注云形笑者能言笑也望文生義未足爲據笑疑當作狀傳寫者失爿旁但存犬字而俗書笑字亦或從犬後人以形犬二字難通因猩猩能笑遂改作笑字耳毛上當有無字上文云然則人之所以爲人者非特二足無毛也下文云故人之所以爲人者非特以其二足而無毛也則此文亦當作無毛明矣

守法數之有司極禮而褫

樾謹按極禮而褫文不可通疑禮字衍文也極而褫三字爲句上云文久而息節族久而絕此云極而褫正與久而息久而絕一律楊注曰褫解也有司世世相承守禮之法數至於極久亦下脫也是楊氏所見本尙未衍禮字故云至於極久亦下脫是極下無禮字也所云守禮之法數者此禮字乃楊氏增出以解法數之誼非正文有禮字也今作極禮而褫卽因注文而衍

欲觀聖王之跡則於其粲然者矣後王是也

樾謹按楊注曰後王近時之王也又引司馬遷曰法後王者以其近已而俗相類議卑而易行也此自得荀子之意劉氏台拱曰後王謂文武也楊注非汪氏中曰史記引法後王蓋如賦詩之斷章耳此注承其誤名爲解荀子而實汨之王氏念孫曰後王二字本篇一見不苟篇一見儒效篇二見王制篇一

見正名篇三見成相篇一見皆指文武而言楊注皆誤此三君之說皆有意爲荀子補弊扶偏而實非其雅意也據下文云彼後王者天下之君也舍後王而道上古譬之是猶舍己之君而事人之君也然則荀子生於周末以文武爲後王可也若漢人則必以漢高祖爲後王唐人則必以唐太祖太宗爲後王設於漢唐之世而言三代之制是所謂舍己之君而事人之君矣豈其必以文武爲後王乎蓋孟子言法先王而荀子言法後王亦猶孟子言性善而荀子言性惡各成其是初不相謀比而同之斯惑矣呂氏春秋察今篇曰上胡不法先王之治非不賢也爲其不可得而法又曰世易時移變法宜矣譬之若良醫病萬變藥亦萬變病變而藥不變鄉之壽民今爲殤子矣蓋當時之論固多如此其後李斯相秦廢先王之法一用秦制後人遂以爲荀卿罪不知此固時爲之也後人不達此義於數千年後欲復先王之道而復之而卒不可復吾恐其適爲秦人笑矣

妄人者門庭之間猶可誣欺也而況於千世之上乎

樾謹按可字衍文涉上文猶可欺也而衍誣乃挾字之誤挾字右旁之夾與巫相似故誤也上言衆人乃受欺者此言妄人乃欺人者若云猶可誣欺則與衆人之可欺者同矣且誣欺二字連文亦爲不倫韓詩外傳作彼詐人者門庭之間猶挾欺而況乎千歲之上乎可據以訂正

傳者久則論略近則論詳

樾謹按兩論字皆俞字之誤。俞讀爲愈。榮辱篇清之而俞濁者口也。象之而俞瘠者交也。楊注曰。俞讀爲愈是也。俞誤作俞。因誤作論矣。韓詩外傳正作久則愈略。近則愈詳可據訂。

黨學者

樾謹按楊注曰。黨親比也。於義未合。方言曰。黨曉哲知也。楚謂之黨。或曰曉。齊宋之閒謂之哲。郭注曰。黨黨朗也。解寤貌然則黨學者。猶言曉學者。蓋法先王順禮義以曉學者也。荀卿居楚久故楚言耳。遠舉則病繆。近世則病傭。善者於是閒也。亦必遠舉而不繆。近世而不傭。

樾謹按世字當作舉。遠舉近舉相對爲文。楊注曰。遠舉上世之事。則患繆妄。下舉近世之事。則患傭鄙。蓋因正文有兩舉字。故注亦云然也。不曰近舉下世。而曰下舉近世者。避不詞耳。今作近世者。卽涉注文而誤。

然而口舌之均。嗜唯則節。

樾謹按之猶則也。僖九年左傳曰。東略之不知。西則否矣。晉語曰。華則榮矣。實之不知之亦則也。互文耳。說木王氏釋詞。口舌之均。嗜唯則節。相對成文。詩皇皇者華篇毛傳曰。均調也。言雖上不足以順明主。下不足以和齊百姓。然而口舌則調均。嗜唯則中節。故下文云。足以爲奇偉。偃却之屬也。嗜字疑諾字之誤。凡從言之字。亦得從口。如詠之爲咏。讀之爲嘖。是也。俗書諾字。或作喏。因誤爲嗜矣。

喬字嵬瑣，非十二子。

樾謹按楊注曰：喬與譎同。字未詳。或曰：字大也。今按讀喬爲譎是矣。訓字爲大，則與譎誼不倫。字當讀爲訏說文言部。訏詭譎也。然則喬字猶言譎詭矣。

以爲仲尼子游爲茲厚於後世。

樾謹按楊注曰：仲尼子游爲此言，垂德厚於後世，則爲茲厚三字，於文未足，殆非也。厚猶重也。戰國策秦策曰：其於敝邑之王甚厚。注曰：厚重也。爲茲厚於後世者，茲卽指子思孟子而言。蓋荀子之意，謂仲尼子游之道，不待子思孟子而重，而世俗不知以爲仲尼子游因此而後得重於後世，故曰：是則子思孟軻之罪也。

成名況乎諸侯，莫不願以爲臣。

樾謹按楊注讀諸侯莫不願以爲臣作一句，則成名況乎四字文不成義。又載或說以況乎屬下句，則成名二字更不成義，皆非也。此當以成名況乎諸侯爲句，成與盛通。周易繫辭傳成象之謂乾，蜀才本成作盛。史記封禪書曰：主祠成山。漢書郊祀志成作盛。然則成名猶盛名也。況者，賜也。言以盛名爲諸侯賜也。大賢所至，莫不以爲榮幸。若受其賜，然漢書灌夫傳將軍迺有幸臨況魏其侯，卽此況字之義。

爲詐而巧。

樾謹按爲與僞通爲詐卽僞詐也管子兵法篇不可數則僞詐不敢嚮幼官篇作爲詐不敢鄉正與此同楊注曰巧於爲詐非是

察辯而操僻淫大而用之

樾謹按楊注讀察辯而操僻淫爲句誤也當以察辯而操僻五字爲句大略篇亦云察辯而操僻是其證大讀爲汰淫汰連文仲尼篇曰若是其險汙淫汰也是其證之者乏之壞字襄十四年左傳曰匱神乏祀釋文曰本或作之祀蓋之乏形似故易誤耳淫汰而用乏與察辯而操僻相對成文此文自知而無法勇而無憚至利足而迷負石而隊凡七句語皆一律而總之曰是天下之所弃也楊以大而用之四字爲句而釋之曰以前數事爲大而用之則上下文氣隔矣

樂富貴者也

樾謹按楊注曰樂其道也夫樂富貴豈得爲樂其道正文樂字疑涉注文而誤下云羞獨富者也以獨富爲羞必不以富貴爲樂今雖不知爲何字之誤大要是不慕富貴之意故注以樂道說之也

其冠進

樾謹按楊注曰進謂冠在前也以冠在前爲進不詞甚矣進讀爲峻峻高也言其冠高也下云其衣逢注曰逢大也於冠言高於衣言大義正相類進峻音近故得通用禮記祭統篇百官進徹之鄭注曰進

當爲餽。然則峻之爲進。猶餽之爲進矣。

侈然。

樾謹按漢書敍傳。媯媯公主師古曰。媯媯好貌。侈卽媯之假字。嚴威儼恪成人之道。非所以事親。故子弟之容必媯媯然好也。楊注曰。侈然恃尊長之貌。爾雅曰。侈。恃也。失之迂曲。

盡盡然。

樾謹按楊注曰。極視盡物之貌。望文生訓。非其旨也。盡盡猶津津也。莊子庚桑楚篇曰。津津乎猶有忍也。此作盡盡者。聲近故假用耳。周官大司徒職曰。其民黑而津。釋文云。津本作盡。然則津津之爲盡盡。猶津之爲盡矣。

倓然見管仲之能足以託國也。仲尼

樾謹按說文見部。窺。暫見也。目部。睇。暫視貌。二字音義俱近。倓卽其睇字也。倓然者。暫見之謂。暫見而卽知其足以託國。是以謂之大知。楊注曰。倓妥也。失之。

武王誅二。

樾謹按楊注引史記武王斬紂與妲己。又引尸子武王親射惡來之口。親斫殷紂之頸。然皆不足以爲二所謂誅二者。殆卽孟子所稱誅紂伐奄與。

求善處大重理任大事擅寵於萬乘之國必無後患之術莫若好同之。

樾謹按理字衍文也處大重任大事相對皆蒙善字爲義楊注曰大重謂大位也不釋理字之義知楊氏作注時尙無理字也理字蓋卽重字之誤而衍者

以事君則必通以爲仁則必聖

樾謹按仁當作人言以事君則必通達以爲人則必聖知也楊注曰仁仁人失之矣

是猶伏而咷天

樾謹按楊注曰咷與舐同伏而舐天愈益遠也然舐天二字甚爲無誼人豈有能舐天者乎以此爲喻近於戲矣疑荀子原文作伏而眡天眡卽古視字也伏而視天則不可見故曰說必不行也眡誤爲舐傳寫者又改爲咷耳

必蚤正以待之也儒效

樾謹按必字衍文也下文孝弟以化之也與此句相對下無必字則此亦當無必字矣蚤字無義疑脩字之誤脩字闕壞止存右旁之彖故誤爲蚤耳榮辱篇曰脩正治辨矣非十二子篇曰脩正者也富國篇曰必先脩正其在我者王霸篇曰內不脩正其所以有皆以脩正二字連文可以爲證新序引此作布正布隸書或作侖亦與脩字左旁相似

圖回天下於掌上。

樾謹按楊注曰。圖謀也。回轉也。言圖謀運轉天下之事。如在掌上也。然圖謀運轉兩義不倫。恐非其旨。圖者圓之誤字。廣雅釋詁。圓圓也。圓回猶圓轉也。淮南原道篇曰。圓者常轉。是其義也。圓回天下於掌上。言天下之大可圓轉於掌上也。隸書圖字或作圖。或作圓。皆與圓字相似。學者多見圖。少見圓。因誤爲圖耳。

分分兮其有終始也。

樾謹按分當讀爲份。說文人部。份文質備也。從人分聲。論語曰。文質份份。分分卽份份也。省偏旁耳。楊注曰。事各當其分。卽無雜亂。故能有終始。分扶問反。然各當其分。豈可謂之分分乎。不詞甚矣。君子篇。分然各以其誠通義亦同此。

樂樂兮其軌道不殆也。

樾謹按楊氏不釋樂樂之誼。蓋卽以本字讀之。然樂樂字經傳尗見。王霸篇曰。櫟然扶持心國。楊注曰。櫟讀爲落石貌也。此云樂樂兮。彼云櫟然。文異義同。老子曰。落落如石。樂樂猶落落也。以其軌道不殆。故以石形容之。

遂選馬而進。

樾謹按楊注曰選簡擇也然荀子之意方言周公之不戒若馬必簡擇則非其義矣詩猗嗟篇曰舞則選兮毛傳曰選齊也此選字亦當訓齊車攻篇曰我馬旣同傳曰同齊也然則選馬而進蓋戎事齊力之義非簡擇之謂下文曰輿固馬選矣誼亦同此猶言我車旣攻我馬旣同也若以選爲簡擇則選馬可通馬選不可通矣

厭旦於牧之野

樾謹按楊注曰厭掩也夜掩於旦謂未明以前也然未明以前謂之厭旦於古無徵且以文義論之上云朝食於戚莫宿於百泉則此文旦下亦當有一字今止云厭旦於牧之野文義殊未足也厭旦當作旦厭厭讀爲壓彊國篇如牆厭之注曰厭讀爲壓此文厭字正與彼同旦壓於牧之野與上文朝食莫宿文義一律成十六年左傳楚晨壓晉軍而陳此云旦厭猶彼云晨壓矣

弓調矢直矣而不能以射遠中微則非羿也

樾謹按此本作及遠中微故楊注曰善射者旣能及遠又中微細之物也及遠二字卽本正文又王霸篇曰故人主欲得善射射遠中微則莫若羿蠭門矣楊注曰射及遠中微細之物是其所據本亦作及遠中微注文射字包及遠中微二意讀者不察謂注文作射及遠則正文必是射遠於是盡改爲射遠中微非苟子之舊矣君道篇曰人主欲得善射射遠中微者縣貴爵重賞以招致之韓詩外傳四引作

及遠中微可據以訂正而外傳五引儒效篇文亦作射遠中微疑後人依誤本荀子改之

隨其長子

樾謹按長子猶鉅子也莊子天下篇釋文引向秀曰墨家號其道理成者爲鉅子若儒家之碩儒長與鉅義同鉅子長子蓋當時有此稱隨其長子謂奉一先生以爲師從而附和之也楊注曰長子謂君之世子也殊非其義

事其便辟舉其上客

樾謹按王氏讀舉爲與是也解爲交其上客則非是此蒙事字爲文猶言事其便辟及其上客耳然而明不能齊法教之所不及聞見之所未至則知不能類也

樾謹按楊注斷明不能齊爲句解曰雖有大體其所見之明猶未能齊言行使無纖介之差此失其讀也齊讀爲濟然而以下十八字作一句讀言法教所及聞見所至則明足以及之而不能濟其法教所未及聞見所未至也所以然者由其知不能類也學者誤謂明不能齊知不能類相對成文遂以齊字斷句失之矣韓詩外傳正作明不能濟法教之所不及聞見之所未至無知不能類句

用大儒則百里之地久而後三年天下爲一諸侯爲臣

樾謹按楊注斷久字爲句則而後三年句不成文義此當以久而後三年五字爲句言姑舉其久者言

之則以三年爲期。若速則或一年或二年，即可以一天下而臣諸侯矣。韓詩外傳作久而三年，無後字。

諸子平議卷十三

荀子二

若是則大事殆乎弛。小事殆乎遂。

王制、

樾謹按說文走部。遂亡也。小事殆乎遂。謂近乎亡失也。正論篇。國雖不安。不至於廢易遂亡。以遂亡連文。此古義之幸存者。楊曰。遂。因循也。乃不得其義而曲爲之說。

成侯嗣公聚斂計數之君也。未及取民也。子產取民者也。未及爲政也。

樾謹按楊注以取民爲得民心於義甚晦。殆非也。老子曰。故取天下者常以無事。河上公注曰。取治也。此取字亦當訓治。取民言治民也。

人之城守。人之出戰。而我以力勝之也。

樾謹按出當爲士字之譌也。古書士出二字。每每相混。史記五帝紀稱以出。集解引徐廣曰。出一作士。淮南子繆稱篇。其出之誠也。新序雜事篇。出作士。並其證也。守必以城。戰必以士。人之城守。人之士戰。正相對成文。士譌爲出。義不可通矣。是以大者之所以反削也。

樾謹按上以字衍文是大者之所以反削也與上文是彊者之所以反弱也正相對諸侯莫不懷交接怨而不忘其敵

樾謹按楊注曰諸侯皆欲相連結怨國而不忘與之爲敵是於怨字絕句又曰本多作壩交接言壩其與己交接之道也則又於接字絕句二說皆未安王氏念孫謂當從後說非也疑怨字當在交接二字之上本作諸侯莫不懷怨交接而不忘其敵懷怨交接猶云匿怨而友其人也故不忘其敵傳寫奪怨字而誤補之接字之下耳

案謹募選閥材技之士

樾謹按募乃纂字之譌毛詩猗嗟篇舞則選兮韓詩作舞則纂兮是纂與選聲近義同故此以連文纂選皆具也說文人部僕具也食部爨具食也選與僕並從巽聲纂與爨並從算聲於義得通閥亦具也說文門部閥具數于門中也小爾雅廣詰閥具也是纂選閥三字同義古書往往有之襄三十一年左傳繕完葺牆繕完葺一義也楚語蓄聚積實蓄聚積一義也並其例也案謹纂選閥材技之士質言之止是具材技之土耳纂誤爲募楊注曰募招也非古義矣管子心術篇纂選者所以等事也今本皆作慕選誤與此同說詳管子

宰爵知賓客祭祀饗食犧牲之牢數

樾謹按楊注曰宰膳宰爵主掌也。饗食饗宴也。周禮膳夫之屬有庖人獸人皆掌犧牲一曰爵官爵也。言膳宰之官爵掌犧牲之事者也。此二說皆未安。以爵爲主掌則旣言主掌不必更言知矣。以爵爲官爵則下文司徒司馬何獨不言爵乎。今以下文例之。曰司徒知百宗城郭立器之數。司馬知師旅甲兵乘白之數。上二字皆官名。則宰爵二字亦官名也。周官天官序官鄭注曰宰主也。然則宰爵者主爵也。漢書百官公卿表主爵中尉秦官掌列侯秦官之有主爵殆本於古之宰爵乎。其所掌爲列侯故賓客祭祀饗食犧牲之牢數無不與知考主爵中尉所屬有掌畜令丞正合古制矣學者徒以周官之膳宰說此文遂失其解。

脩採清

樾謹按採乃採字之誤方言曰塚秦晉之閒謂之採是也。清者說文广部廁清也急就篇屏廁清澁糞土壤字亦作圃玉篇口部圃圃園也蓋墟墓之間清澁之處皆穢惡所積聚故必以時修治之也。楊注非。

是非功名之所就也非存亡安危之所墮也。

樾謹按墮字義不可通當作隨字之誤也隨從也言非存亡安危之所從也。

偃然案兵無動以觀夫暴國之相卒也。

樾謹按卒當作猝。國語晉語。戎夏交猝。韋注曰。猝交對也。彼云交猝。此云相猝。義正同。案然脩仁義。伉隆高正法則。選賢良。養百姓。

樾謹按然衍字案乃語詞。上文云案平政教審節奏砥礪百姓與此文一律可證。非特以爲淫泰夸麗之聲。富國。

樾謹按聲字衍文也。荀子原文。蓋作非特以爲淫泰夸麗也。因也字誤作之後人妄加聲字耳。下文云。非特所以爲淫泰也。句法與此同。是其證。

守時力民。進時長功。和齊百姓。使人不偷。是將率之事也。

樾謹按此言足天下之道。前後皆言農事。而此云是將率之事。楊注曰。將率猶主領也。若今宰守此曲爲之說。未爲得也。蓋古之爲將率者。其平時卽州長黨正之官。周官州長職。若國作民而師田行役之事。則帥而致之。掌其戒令與其賞罰。鄭注曰。掌其戒令賞罰。則是於軍因爲師帥。賈疏曰。云因爲師帥者。若衆屬軍吏。別有軍吏掌之。何得還自掌之。故知因爲師帥也。但在鄉爲州長。已管其民。在軍還領己民爲師帥。卽是因內政寄軍令也。又黨正職注曰。亦於軍因爲旅帥。族師職注曰。亦以軍因爲卒長。以是推之。閭胥卽爲兩司馬。比長卽爲伍長。夏官序官疏曰。閭胥以下。雖不言因爲。義可知是也。此云將率。卽指州長黨正之屬。從其在軍之名而稱之曰將率。正見內政軍令之可通。楊注未達斯旨。

垂事養民。

樾謹按垂猶委也。說文女部。姪諉也。垂之爲委。猶姪之爲諉也。爾雅釋言。諉諉累也。孫炎曰。楚人曰諉。秦人曰譎。是諉諉疊韻二字義同。垂之與委。猶諉之與諉也。垂事養民者。委事養民也。言委置其事以養民也。下文曰。進事長功輕非譽而恬失民。正與此垂事養民相反。又曰。垂事養譽不可。句以遂功而忘民亦不可。垂事者。卽所謂垂事養民也。遂功者。卽所謂進事長功輕非譽而恬失民也。然則垂事之義可見矣。楊注訓垂爲下。非是。

則和調累解。

樾謹按楊注曰。累解。嬰累解釋也。然累解與和調皆二字平列。訓爲嬰累解釋。非其義矣。儒效篇曰。解果其冠。楊注引說苑蟹螺者宜禾爲證。竊謂累解與蟹螺一也。彼從虫而此否者。書有繁簡耳。蟹螺到爲累解。猶和調亦可云調和也。說苑以蟹螺汚邪對文。則蟹螺之義。殆猶平正矣。

凡主相臣下百吏之俗。

樾謹按俗當爲屬。聲近而譌也。下文又曰。凡主相臣下百吏之屬。可證俗字之譌。楊氏不據以訂正。而曰俗謂風俗失之。

須孰盡察。

樾謹按須字無義。乃順字之誤。禮論篇曰。非順孰脩爲之。君子莫之能知也。亦以順孰連文。是其證。順與須形近而誤。楊注非境內之聚也。保固視可。

樾謹按楊讀保固視可四字爲句。解爲保其險固。視其可進。王氏念孫非之。謂可字衍文。視字當屬下。午其軍取其將若撥麪讀。然彊國篇亦有視可司閒之文。舊說恐未可改。

午其衆取其將若撥麪。

樾謹按楊注曰。周禮籩人職云。朝食之籩。其實麌蕡。鄭云。麌熬麥。今河閒以北。煮種麥賣之名曰麌。據鄭之說。麌麥之牙蘖也。至脆弱故以喻之。若撥麌如以手撥麌也。麌音豐。楊氏此注合先後鄭二說爲一。又臆造牙蘖之說。先後鄭均無此義。未知所據。不可從也。古義每存乎聲。麌既音豐。即可讀爲豐。尙書顧命篇。敷坐豐席。枚氏傳曰。豐莞。正義曰。釋草云。莞荷蘿。郭璞曰。今之西方人呼蒲爲莞。用之爲席也。王肅亦云。豐席莞。然則豐者蒲也。蒲之爲物。至脆弱。故以手撥之至易也。字本宜作豐。從麥旁作麌。乃古文假借字。楊泥本字爲說。故失之。

彼得之。不足以藥傷補敗。

樾謹按藥當讀爲藥。說文广部。藥治也。或作療。古書每以藥爲之。大雅板篇。不可救藥。韓詩外傳作不

可救療。毛用段字。韓用正字耳。藥傷卽療傷也。楊法曰。藥猶醫也。雖得其義。未得其字。是猶好聲色而恬無耳目也。王霸。

樾謹按恬當作恬。字之誤也。爾雅釋言。覲恬也。釋文引李巡孫炎注並曰。人面恬然也。是恬然爲人面之貌。故詩何人斯篇有覲面目毛傳曰。覲恬也。鄭箋曰。恬然有面目是其義也。恬無耳目猶言恬然無耳目學者多見恬少見恬。因誤恬爲恬。楊注卽訓爲安然失之矣。

此夫過舉蹠步而覺跌千里者夫。

樾謹按楊注曰。言此歧路第過舉半步則知差而哭。況跌千里者乎。然如注義則以跌千里者夫爲句。不詞甚矣。覺當爲聾。玉篇引聲類曰。聾誤也。廣雅釋詁同。聾訓誤。正與楊注跌訓差。其義相近。言此歧路第過舉蹠步而其聾跌乃至千里。故可悲也。自聾誤爲覺而義不可明矣。

若夫貫日而治平。
樾謹按上文云。若夫貫日而治詳。君道篇云。併耳目之樂而親。自貫日而治詳。兩文相同。此文平字疑亦當作詳。蓋段羊爲詳。又誤羊爲平耳。楊注非以非所取於民而巧。

樾謹按非所猶非時也。文十三年公羊傳往黨衛侯會公于沓。何休解詁曰。黨所也。所猶時也。以非時

取於民而巧言以非時取民而巧爲之名也。

佻其期日而利其巧任。

樾謹按巧任與期日對文。楊注曰。巧任。巧者之任。非其義也。莊子秋水篇曰。任土之所勞。釋文引李注曰。任能也。然則巧任猶巧能也。言佻緩其期日而其巧能者。則豐厚其氣稟以利之。百工乃忠信而不楷矣。

是狂生者也。狂生者不胥時而落君道。

樾謹按狂卽𡇗之假字。說文土部。𡇗草木忘生也。從之在土上。讀若皇。狂說文作狃。本從𡇗聲。故義得通。狂生蓋以草木爲比。故云不胥時而落。落亦以草木言也。臣道篇迷亂狂生義同。楊彼注曰。迷亂其君使生狂也。未得其義。韓詩外傳作枉生。枉亦𡇗之假字。

善顯設人者也。君道。

樾謹按設者大也。考工記桃氏曰。中其莖設其後。鄭注曰。從中以郤稍大之也。賈疏曰。後鄭意訓設爲大。故易繫辭曰。益長裕而不設。鄭注曰。設大也。是設有大誼。顯設猶云顯大。

重味而成珍備。

樾謹按珍備二字無義。此本作重味而備珍怪。正論篇。食飲則重太牢而備珍怪。是其證也。因涉上句。

重色而成文章誤衍成字遂倒備珍爲珍備而臆刪怪字矣韓詩外傳作重色而成文累味而備珍上句無章字下句無怪字然成文備珍正本荀子可據以訂正

今人主有六患

樾謹按下文使賢者爲之則與不肖者規之使知者慮之則與愚者論之使脩士行之則與汙邪之人疑之止可云三患不可云六患六疑大字之誤學者誤以下文一句爲一患故臆改爲六不知合二句方成一患若止是使賢者爲之知者慮之脩士行之非患也循乎道之人汙邪之賊也

樾謹按羣書治要無乎字當從之循乃脩字之誤盧校云元刻循作脩是也脩道與汙邪相反上文曰使脩士行之則與汙邪之人疑之亦以脩與汙邪對是其證

欲得善馭速致遠者一日而千里

樾謹按盧校云善馭下俗閒本有及字王氏念孫據王霸篇欲得善馭及速致遠則莫若王良造父矣謂有及字者是不知此與彼文不同彼無一日而千里五字故有及速二字此云一日而千里則及速不待言矣荀子原文不獨無及字并無速字儒效篇曰輿固馬遷矣而不能以致遠一日而千里則非造父也亦言一日千里而無及速之文可證也俗本據王霸篇誤加及速二字宋呂錢本無及字而有

速字則刪之未盡者耳。

倜然乃舉太公於州人而用之。

樾謹按州人當從韓詩外傳作舟人。太公身爲漁父而釣於渭濱故言舟人也。舟州古字通。卿相輔佐人主之基杖也。

樾謹按基杖二字義不可通。基當爲綦。儀禮士喪禮組綦繫于踵。鄭注曰綦履係也。所以拘止屨也。漢書楊雄傳履綦檜以爲綦。外戚傳思君兮履綦綦也杖也。皆人所以行者。故以爲喻。

然而應薄扞患足以持社稷。

樾謹按薄之言迫也。僖二十三年左傳薄而觀之文十二年傳薄之河杜注並曰薄迫也。然則應薄猶應迫也。言有逼迫者足以應之也。臣道篇曰應卒遇變卒與薄義相近。

推類接譽臣道

樾謹按楊注曰推其比類接其聲譽此未得接譽二字之義也。下句曰以應無方接其聲譽豈遂足以應無方乎。譽當讀爲豫。昭二年左傳宣子譽之孟子梁惠王篇引作豫。梁惠王篇一游一豫。昭二年注引作譽。是古字譽與豫通也。大略篇曰先事慮事謂之接。先患慮患謂之豫。卽此文接譽之義。爪牙之士施則仇讎不作。

樾謹按莊子秋水篇是謂謝施釋文引司馬注曰施用也淮南子原道篇施之無窮高誘注亦曰施用也爪牙之士施猶曰爪牙之士用楊注曰施謂展其材也訓施爲展而以展其材足成之迂矣曉然以至道而無不調和也

樾謹按然字衍文當作曉以至道而無不調和也言事暴君者當以至道曉之也楊注曰曉然明喻之貌曉然以至道甚爲不詞蓋楊氏所見已衍然字

以德復君而化之大忠也

樾謹按韓詩外傳復作覆當從之以德覆君謂其德甚大君德在其覆冒之中故足以化之下文曰若周公之於成王也可謂大忠矣是大忠之名非周公不足當也楊氏不知復與覆通而訓復爲報謂以德行之事報白於君然則如次忠之以德調君而補之者豈不以德行報白乎且但報白而已又何足以化之乎

故君子安禮樂利謹慎而無鬪怒

樾謹按樂利當爲和樂和樂與安禮相對成文安禮和樂承上禮樂而言謹慎而無鬪怒承上謹慎鬪怒而言因和字譌作利又涉上文謹慎利也疑利字屬謹慎言遂移置樂字之下使安禮樂利謹慎兩句相對而文義俱違矣

衡聽顯幽重明退姦進良之術致士

樾謹按楊注曰衡平也謂不偏聽也下文云凡流言流說流事流謀流譽流憩不官而衡至者君子慎之注曰衡讀爲橫楊氏於前後兩衡字異訓殆失之矣衡聽之衡亦當讀爲橫蓋彼以衡至故亦以衡聽也古橫衡同字詩衡門篇釋文曰衡古文橫字是其證也漢書王莽傳昔帝堯橫被四表魏志文帝紀引獻帝傳曰廣被四表是橫廣音近義通流言之屬一時而並至故曰橫至猶曰大至矣

莫不明通方起以尙盡矣

樾謹按楊注曰尙與上同上盡謂盡忠於上也然盡忠於上而曰上盡甚爲不詞盡當讀爲進列子天瑞篇終進乎不知也張湛注曰進當爲盡是其證也漢書高帝紀主進顏師古注曰進字本作薦又作贐音皆同耳古字假借故轉而爲進然則以盡爲進猶以進爲贐矣爾雅釋詁薦進也薦從盡聲則盡亦進也尙盡猶言上進忠言忠說忠事忠謀忠譽忠憩皆願進於上故曰莫不明通方起以上進矣楊氏知尙之爲上而不知盡之爲進於古人假借之道未盡得也

水深則回葉落糞本弟子通利則思師

樾謹按葉落下當有則字此以上二句喻下一句若無則字句法不一律矣盧校曰宋本作水深而回樹落則糞本今從元刻其實宋本是也古書每以而則互用孟子告子篇人有雞犬放則知求之有放

心而不知求。墨子明鬼篇，非父則母，非兄而姪。史記繆布傳，與楚則漢破，與漢而楚破，皆其證也。宋本上句用而字，下二句用則字，必荀子之原文，乃反不之從，何歟。

延則若莫邪之長刃，嬰之者斷。兌則若莫邪之利鋒，當之者潰。譏兵

樾謹按楊注曰：兌猶聚也。與隊同謂聚之使短。新序作銳，則若莫邪之利鋒也。盧校曰：延韓詩外傳作延居。兌作銳居。延讀延袤之延，謂衡布。兌讀爲銳，謂直擣。外傳兩居字，與下文圜居一例，可知注未是矣。今按楊訓兌爲聚，不如盧說之長。惟依外傳延居銳居爲說，則非也。延則若莫邪之長刃，兌則若莫邪之利鋒。與上文聚則成卒，散則成列，句法一律，不得有居字。下文云：圜居而方止。此自以圜居方止，相對成義。外傳因圜居之文，改作方居以對之，遂於此文延下銳下各衍居字。盧氏據以說荀子誤矣。延之言長也。故若長刃銳之言利也。故若利鋒以文義論，亦不當有居字。

故仁人用國日明。

樾謹按楊注曰：日益明察，非也。明之言盛也。淮南子說林篇曰：長而愈明。高注曰：明猶盛也。禮記明堂位正義曰：明堂盛貌，然則明之訓盛，蓋古誼也。國日明，猶言國日盛矣。

負服矢五十个。

樾謹按盧校曰：元刻作負矢，無服字。與漢書同。然服字實不可無。服者，箙之假字。說文竹部，箙，弩矢箙。

也。經傳通以服爲之。詩采薇篇象弭魚服。國語齊語服無矢。皆是也。負服矢五十个者。盛矢五十个於服而負之也。若但云负矢。則矢無服不可負。若云负矢服。則疑五十个以服計矣。故曰负服矢五十个。古人之辭。所以簡而明也。漢書奪服字元刻從之。非是。

置戈其上。

樾謹按此承負服矢五十个而言。所謂其上者。矢服之上也。蓋負矢服於背。而荷戈於肩。戈之上半。適在矢服之上。故曰置戈其上也。楊注不解服字之義。故于此句亦失其解。而曰置戈於身之上。不可通矣。

日中而趨百里。

樾謹按日中者。自旦至於日中。蓋半日而趨百里也。楊注謂一日之中。則但云日趨百里足矣。

有遇之者。若以焦熬投石焉。

樾謹按楊注曰。猶以焦熬之物投石也。然以投石爲喻。不必言焦熬之物。注義未安。上文云。以桀詐堯。譬之若以卵投石。以指撓沸。此文以焦熬投石。疑有奪誤。當云以指焦熬。以卵投石。焦讀爲樵。廣雅釋詁曰。樵拭也。說文火部。熬乾煎也。然則以指樵熬。其義猶以指撓沸也。

故招近募選。

樾謹按楊注曰近當爲延是也招延二字同義則募選二字亦必同義募乃纂字之誤纂選皆具也說詳王制篇楊注曰募選謂以財召之而選擇可者非是

韜如金石

樾謹按史記禮書作堅如金石故楊注訓韜爲堅貌卽引史記爲證然韜之訓堅貌諸書皆無明文殆非也說文韜有二其一見革部爲正篆其一見鼓部爲篆之古文磬鼓聲也故文選上林賦鏗鎗闔韜李善注曰鏗鎗鍾聲也闔韜鼓聲也此文韜如金石當以聲言不當以貌言謂扣之而其聲韜然如金石也必以鼓聲相況者鼓是革所爲上云鮫革犀兕以爲甲則亦革所爲也正見其屬辭之密史記作堅自與荀子異不得并爲一談也

而順暴悍勇力之屬爲之化而愿

樾謹按楊注曰順從也謂好從暴悍勇力之人皆化而愿慇也然此句與下二句本一律多一順字則不詞矣而順當作順而順而猶從而也順而暴悍勇力之屬爲之化而愿旁辟曲私之屬爲之化而公矜糾收繚之屬爲之化而調皆承上文所存者神所爲者化而言性惡篇曰順是故爭奪生而辭讓亡焉順是故殘賊生而忠信亡焉順是故淫亂生而禮義文理亡焉諸順字並與此同猶言順是而暴悍勇力之屬皆爲之化焉因順而譎爲而順文義遂不可通或乃疑其有闕文矣

已綦三年然後民可信也。

樾謹按楊注曰已過也過一綦之後至於三年然後新歸之民可信其義甚爲迂曲疑非也荀子書多用綦字作窮極之義此綦字蓋亦綦字之誤已綦三年猶云已極三年也有坐篇綦三年而百姓往矣可證此文之譌正論篇期臭味注曰期當爲綦得之矣

敵中則奪偃國

樾謹按楊注曰敵人得中道則奪其國一曰中擊也然此以民情言不以敵國言楊注非是敵當讀爲適古字通用論語里仁篇無適也釋文曰鄭本作敵禮記玉藻篇敵者不在釋文曰敵本作適並其證也上文言刦則致畏羸則敖上執拘則最得閒則散並就其一偏者而言之此云敵中謂適乎其中也既不用道德之威而用暴察之威適乎其中則反失其所以爲暴察矣故曰適中則奪下文曰非刦之以形埶并振之以誅殺則無以有其下正承此文而言足見楊注之非

楚人則乃有襄貢開陽以臨吾左

樾謹按乃疑又字之誤上已云巨楚縣吾前故此云楚人則又有襄貢開陽以臨吾左

是一國作謀則三國必起而乘我

樾謹按三國乃二國之誤上文止有楚燕魏三國若依此文則是四國矣故知其誤也

如是則齊必斷而爲四三國若假城耳

樾謹按楊注曰三國分齊則斷爲四謂楚取其二魏燕各取其一也又曰言齊如三國之寄城不久當歸之也然楚雖當齊之二面要是二國不當分爲二楊注非也四字疑衍文當云齊必斷而爲三其下句則云國若假城耳言齊之國若假人之城不久當歸之也古四字作三與三字混疑三譌作三後人校正作三傳寫者遂並存四三兩字楊氏不能是正以四字屬上讀三字屬下讀而兩句俱不可通矣乃能使說已者使耳

樾謹按下使字當訓從爾雅釋詁使從也

所謂廣大乎舜禹也

樾謹按盧校曰此句或疑當在彊殆中國句下王氏念孫曰此汪說也汪直移此句於上文彊殆中國下是也今按上文威彊乎湯武廣大乎舜禹相對爲文是於湯武言威彊舜禹言廣大若威動海內彊殆中國下接此所謂廣大乎舜禹也則文義錯雜矣汪說非也此所謂句當移在是地徧天下也句下試以上文例之上文曰是乃使讎人役也此所謂威彊乎湯武也此文曰是地徧天下也此所謂廣大乎舜禹也文法正相準威動海內彊殆中國二句又承威彊乎湯武句以起下文言威彊不言廣大者舉一以包其一耳

霸者之善著焉。可以時託也。

樾謹按託乃記字之譌。言霸者之善所以明著者以其可以時記也。下文云王者之功名不可勝日志也。正王者敬日。霸者敬時之意。記志義同。記譌作託。則時託與日志不倫矣。又按不可勝下據楊注當有數字。王氏讀書雜志已及之日志也。上亦當有可以二字與可以時記也一例。王氏未及。

夫義者內節於人而外節於萬物者也。

樾謹按節猶適也。呂氏春秋重己篇故聖人必先適欲高注曰適猶節也。然則節亦猶適矣。管子禁藏篇故聖人之制事也能節宮室適車輿以實藏是節與適同義。下文曰上安於主而下調於民者也。訓節爲適則與調安相近。楊注曰節謂限禁也非是。

諸子平議卷十四

荀子三

天行有常天論

樾謹按爾雅釋宮行道也天行有常卽天道有常楊注曰天自有常行之道則道字反爲增出矣養略而動罕則天不能使之全

樾謹按楊注曰罕希也動罕言怠惰也然上文云養備而動時則天不能病備與略義正相對時與罕則不倫矣罕疑劣字之誤劣卽今逆字說文干部劣不順也疋部逆迎也是逆爲送逆字其順逆字本作劣也養略而動劣正與養備而動時相對成義

所志於天者

樾謹按禮記緇衣篇曰爲上可望而知也爲下可述而志也鄭注曰志猶知也所志於天者卽所知於天者下文志於地志於四時志於陰陽並同此卽承上文知其所爲知其所不爲而言楊訓志爲記識非

詩曰何恤人之言兮此之謂也

樾謹按何恤上本有禮義之不愆五字而今奪之文選答名難篇傳曰天不爲人之惡寒而輟其冬地不爲人之惡險而輟其廣君子不爲小人之匈匈而易其行天有常度地有常形君子有常行君子道其常小人計其功詩云禮義之不愆何恤人之言李善注曰皆孫卿子文是其證也正名篇引此詩曰禮義之不愆兮何恤人之言兮亦其證也

楚王後車千乘非知也君子啜菽飲水非愚也是節然也

樾謹按節猶適也說詳彊國篇是節然也猶曰是其適然者也劉氏台拱引正名篇節遇謂之命釋之節遇之節亦當訓適適與之遇所謂命也楊注並非又大略篇湯旱而禱曰政不節與節亦適也謂不調適

故君子敬其在己者

樾謹按敬當爲苟說文苟部苟自急救也經典通作亟爾雅釋詁亟疾也釋文曰字又作苟是也君子苟其在己者猶云君子急其在己者正與小人錯其在己者相對成義學者罕見苟字因誤爲敬耳星隊木鳴國人皆恐

樾謹按木不能鳴或因風而鳴人亦不忍而此云然者蓋古有社鳴之說文選運命論里社鳴而聖人出李善注引春秋潛潭巴曰里社明此里有聖人出其响百姓歸天辟亡明與鳴古字通所謂社鳴者

社必樹其土所宜木故古文社從木作社。社鳴實卽其木鳴也。古人蓋甚畏之。故荀子以星隕木鳴並言也。

水行者表深。

樾謹按水行當作行水。行水者表深。與下文治民者表道一律。孟子離婁篇如智者若禹之行水也。此行水二字之證。

故至賢疇四海湯武是也。正論。

樾謹按楊注曰疇四海謂以四海爲疇域。或曰疇與籌同計度也。此二義皆非是。疇者保也。國語楚語臣能自壽也。韋注曰壽保也。晏子雜篇賴君之賜得以壽三族。壽三族卽保三族也。管子霸言篇國在危亡而能壽者明聖也能壽卽能保也。此文作疇者古字通耳。說文土部塙保也。凡作疇作壽皆塙之假字。

譬之是猶僂巫跋匡大自以爲有知也。

樾謹按大字乃而字之譌。而大篆文相但因而致誤。注云猶巫尪大自以爲神異則曲爲之說矣。

溝中之瘠也。則未足與及王者之制也。

樾謹按此文當在東海之樂下。荀子原文蓋云語曰淺不足與測深愚不足以謀知坎井之鼃不可與

語東海之樂溝中之瘠未足與及王者之制此之謂也坎井之鼃二句所謂淺不足與測深也溝中之瘠二句所謂愚不足以謀知也傳寫誤到在上又衍兩也字一則字

天下有聖而在後者則天下不離

樾謹按後下當有子字下文云聖不在後子而在三公則天下如歸楊注曰後子嗣子謂丹朱商均三公宰相謂舜禹此說是也荀子之意謂傳賢與傳子同天下有聖而在後子則傳之子可也聖不在後子而在三公則傳之賢可也故兩言天下厭然與鄉無以異也以堯繼堯夫又何變之有矣正見傳賢傳子之不異也乃自此文奪子字而其義不顯楊氏遂疑後三句爲重出矣

持老養衰猶有善於是者與不老者休也

樾謹按此當作猶有善與是者不與不讀爲否傳寫誤倒在與下楊注曰不老老也或曰衍不字並非故作者不祥學者受其殃非者有慶

樾謹按此謂作世俗之說者不祥學者從而傳述之必受其殃能非而闢之則有慶也下文引詩曰下民之孽匪降自天噂沓背憎職競由人可見荀子之意深疾世俗之說故爲此言楊注未得其旨

故盜不竊賊不刺

樾謹按楊注曰盜賊通名分而言之則私竊謂之盜刦殺謂之賊此蓋以刺爲刺殺之刺實非然也漢

書郊祀志刺六經中作王制師古注曰刺采取之也又丙吉傳至公車刺取注曰刺謂探候之也然則刺者探取之義盜不竊賊不刺變文以成句耳非有異義也

是何也則求利之詭緩而犯分之差大也

樾謹按楊注曰詭詐也求利詭詐之心緩也其義甚迂曲詭疑說字之誤言古者民生富厚求利之說在所緩也詭說形似致誤楊注非

金舌弊口猶將無益也

樾謹按楊注曰金舌以金爲舌金舌弊口以喻不言也金或讀爲噤然上文云今子宋子不能解人之惡侮而務說人以勿辱也豈不過甚矣哉則金舌弊口謂說人非謂不言楊注非也此文當作金口弊舌金讀爲唶說文口部唶口急也弊讀爲敝言雖說之至於口唶舌敝猶無益也戰國策秦策舌敝耳聾此可證敝舌之義今作金舌弊口義不可通據楊注引法言金口而木舌又似本作金口者豈爲後人改竄故歟

將恐得傷其體也

樾謹按得字無義疑復字之誤復者反也猶曰將恐反傷其體也言子宋子之說非徒無益於人或反以傷其體耳

祭齊大羹而飽庶羞禮論

樾謹按楊注曰齊讀爲疇此因大戴記而誤也齊當爲躋禮記樂記篇鄭注曰齊讀爲躋是也文二年左傳躋僖公杜注曰躋升也然則躋大羹者升大羹也正與上文尙玄尊先黍稷一律下文云豆之先大羹也是其義也大戴記禮三本篇作疇疑卽躋之壞字史記禮書疇下有先字疑史公原文作先大羹後人因大戴之文妄增疇字耳

利爵之不醮也

樾謹按楊注曰醮盡也謂祭祀畢告利成利成之時其爵不卒奠于筵前也此說殊未盡其義利者謂佐食也利爵不醮蓋據大夫賓戶之禮有司徹篇利洗爵獻于戶戶酢獻祝祝受祭酒啐酒奠之是其事也利既獻戶戶卒爵酢利利又獻祝祝受奠之不卒示祭事畢也說詳羣經平議

大昏之未發齊也

樾謹按齊當讀爲醮發猶致也昏禮父親醮子而命之迎未發醮者未致醮也亦詳羣經平議

大路之素未集也

樾謹按楊注曰未集不集丹漆也則但言素而其義已足矣不必言未集且未集二字義亦未足楊注非也未字當爲本末之末素末是一事素集是一事蓋一本作末一本作集傳寫誤合之而因改末爲

未以曲成其義非荀子原文也末者辟之假字上文絲末楊注曰末與辟同禮記曰君羔辟虎楂鄭云覆苓也然則大路之素末亦卽素辟耳大戴記禮三本篇作素幘幘與辟同荀子作末之本與大戴合集者幘之假字集音轉而爲就詩小旻篇是用不集韓詩作是用不就是也故得讀爲幘爾雅釋訓幘謂之帳釋文曰幘本或作幘是幘字或從周聲山海經中山經暴山其獸多麋鹿麌就郭注曰就雕也然則以就爲幘猶以就爲雕矣史記禮書正作素幘荀子作就之本與史記合

本末相順

樾謹按順讀爲巡禮記祭義篇終始相巡此云本末相巡其義正同順巡並從川聲故得假用文理情用相爲内外表裏並行而雜

樾謹按雜讀爲帀古雜與帀通呂氏春秋圜道篇圜周復雜注曰雜猶帀也淮南子詮言篇以數雜之壽憂天下之亂注曰雜帀也人生子從子至亥爲一帀然則並行而雜言並行而周帀也楊注曰情文代勝並行相雜猶未達假借之旨

絃續聽息之時則夫忠臣孝子亦知其閔已

樾謹按楊注曰言此時知其必至於憂閔也文義迂曲殆非也爾雅釋詁閔病也詩柏舟篇觀閔旣多鴟鴞篇鬻子之閔斯毛傳並曰閔病也亦知其閔已猶言亦知其病已病謂疾甚也儀禮旣夕記注曰

疾甚曰病。

一朝而喪其嚴親。

樾謹按禮記大傳篇收族故宗廟嚴鄭注曰嚴猶尊也嚴親即尊親嚴謂君親謂父母。

芻豢稻粱酒醴餚鬻魚肉菽藿酒漿。

樾謹按酒漿當爲水漿王氏念孫謂涉上酒醴而誤是也魚肉二字當在餚鬻二字之上蓋芻豢稻粱酒醴魚肉屬吉餚鬻菽藿水漿屬凶方與上下文一律今魚肉字誤倒在餚鬻下則吉凶不倫矣楊注曰餚鬻菽藿喪者之食疑楊氏所見本尙未倒故以餚鬻菽藿連文也當據以訂正。

故如死如生如存如亡終始一也。

樾謹按如死如生如存如亡義不可通當作事死如生事亡如存上兩如字誤也篇末云哀夫敬夫事死如事生事亡如事存可知此文之譌當據以訂正。

棺槨其貌象版蓋斯象拂也。

樾謹按板者車轔也漢書景帝紀令長吏二千石車朱兩轔千石至六百石朱左轔應劭曰車耳反出所以爲之藩屏翳塵泥也廣雅釋器曰轔謂之輶版與輶通楊注說版字未了又云斯未詳象衍字象旣爲衍字則斯拂連文楊云拂卽茀也然則斯與拂必同類之物爾雅釋器云輶革前謂之輶後謂

之弗輶字從艮聲與斤聲相近故垠從艮聲或體作折從斤聲是其例也斯疑斬字之誤斬之本義爲當膺而古或借爲輶廣雅釋器弸輶謂之斬王氏疏證亦云未詳不知弸輶之斬卽輿革前謂之輶也惟其在前故繫於輶也此以版蓋斬拂並言版卽輶也在車旁蓋者車蓋也在車上斬在前拂在後其所說至爲詳備矣斬字本當作輶而借用斬亦猶齒本字本當作歛而太元密次八琢齒依齷則借用齷齷者齷也非齒本也艮斤聲近故字得通耳乃斬又誤作斯則其義遂不可見矣

其銘誄繫世敬傳其名也

樾謹按周官小史職曰奠世繫辨昭穆鄭司農云繫世謂帝繫世本之屬是也以帝繫解繫字世本解世字則繫也世也自是二事與銘誄相對楊注未得

彼君子者固有爲民父母之說焉

樾謹按子字衍文也此本說君之喪所以三年之故故引詩而釋之曰彼君者固有爲民父母之說焉下文云父能生之不能養之母能食之不能教誨之君者已能食之矣又善教誨之者也下言君者則此文亦當作君者涉上愷悌君子之文而衍子字耳

毋利舉爵

樾謹按特性饋食禮主人主婦賓長三獻之後長兄弟衆賓長又行加爵之禮然後利洗散獻于戶鄭

注謂以利待尸禮將終宜一進酒然則利之獻尸非祭之正故以祭禮將終始行之也此云毋利舉爵蓋以主人爲重猶言不使利代舉爵耳故下云主人有尊如或觴之楊注曰當云無舉利爵卽上文云利爵之不醮也如此則與下意不貫矣

帶甲嬰軸歌於行伍使人之心傷樂論

樾謹按歌於行伍何以使人心傷義不可通傷當爲惕荀子書多用惕字脩身篇曰加惕悍而不順注引韓侍郎云惕與蕩同字作心邊易謂放蕩兇悍也又榮辱篇曰惕悍懦暴注亦云惕與蕩同歌於行伍則使人之心爲之動蕩故曰使人之心惕惕傷形似因致譌耳

君子明樂乃其德也亂世惡善不此聽也

樾謹按自窮本極變樂之情也至弟子勉學無所營也十八句皆有韻之文獨德字不入韻當必有誤荀子原文疑作乃斯聽也斯與此文異義同乃斯聽也與不此聽也反復相明古人用韻不避重複如采薇首章連用二獮狁之故句正月一章連用二自口字十月之交首章連用二而微字車牽三章連用二庶幾字文王有聲首章連用二有聲字召旻卒章連用二百里字並其例也後人疑兩句不得疊用聽字因改上句爲乃其德也不特於韻不諧而亦失其義矣

樾謹按翁當爲渝文選江賦曰氣渝渤以霧杳翁博猶渝渤也博與渤亦一聲之轉

琴婦好

樾謹按賦篇蠶賦曰此夫身女好而頭馬首者與注云女好柔婉也婦好當與女好同亦柔婉之意兩疑則惑矣解蔽

樾謹按兩讀如兩政之兩桓十八年左傳並后匹嫡兩政耦國是兩與匹耦義同疑讀如疑妻疑適之疑管子君臣篇內有疑妻之妾此宮亂也庶有疑適之子此家亂也朝有疑相之臣此國亂也字亦作擬韓子說疑篇孽有擬適之子配有擬妻之妾廷有擬相之臣臣有擬主之寵此四者國之所危也意與管子同天下之道一而已矣有與之相敵者是爲兩有與之相亂者是爲疑兩焉疑焉惑從此起故曰兩疑則惑矣楊注曰兩疑謂不知一於正道而疑蔽者爲是若然則疑卽惑也於義復矣又曰一本作兩則疑惑矣此不得其解而誤乙其文也

心不使焉則白黑在前而目不見雷鼓在側而耳不聞況於使者乎

樾謹按下使字乃蔽字之誤白黑之形雷鼓之聲尙且不見不聞況於蔽者乎此承上文蔽於一曲而言下文欲爲蔽惡爲蔽諸句又承此而極言之故篇名解蔽也因涉心不使焉句而誤作使旣云心不使焉又云況於使者乎文不可通楊曲爲之說非是

故爲蔽。

樾謹按宋呂夏卿錢佃本並如是。故猶胡也。墨子尙賢中篇故不察。尙賢爲政之本也。下文作胡不察。尙賢爲政之本也。是故與胡同管子侈靡篇公將有行故不送公亦以故爲胡故爲蔽。猶云胡爲蔽。胡之言何也。乃設爲問辭。下文欲爲蔽惡爲蔽云云。乃歷數以應之也。元刻涉注文而誤作數爲蔽。盧氏從之非。

昔賓孟之蔽者亂家是也。

樾謹按楊注曰。賓孟周景王之佞臣。欲立王子朝者。亂家謂亂周之家事。使庶孽爭位也。此注殊誤。下文歷數墨子諸人之蔽。全與賓孟無涉。此二語上無所承。下無所應。殊爲不倫。據上文云。昔人君之蔽者。夏桀殷紂是也。下乃極言桀紂之蔽。而終以成湯文王之不蔽者。明不蔽之福。又云。昔人臣之蔽者。唐鞅奚齊是也。下乃極言唐鞅奚齊之蔽。而終以鮑叔甯戚諸人之不蔽者。明不蔽之福。此文云。昔賓孟之蔽者亂家是也。下乃歷舉墨子諸人之蔽。而終以孔子之不蔽者。明不蔽之福。三段相對成文。則賓孟之蔽句正與上文人君之蔽人臣之蔽相對。所云賓孟殆非周之賓孟。且非人名也。孟當讀爲萌。孟與明古音相近。故孟可爲萌。猶孟豬之爲明都。孟津之爲盟津也。呂氏春秋高義篇載墨子之言曰。若越王聽吾言用吾道。翟度身而衣。量腹而食。比於賓萌。未敢求仕。高注曰。賓客也。萌民也。所謂賓萌。

者蓋當時有此稱戰國時遊士往來諸侯之國謂之賓萌若下文墨子宋子慎子申子惠子莊子皆其人矣然則上言人君之蔽人臣之蔽此言賓萌之蔽文正相對人君之蔽人臣之蔽止舉兩人故可曰夏桀殷紂是也唐鞅奚齊是也賓萌之蔽則所舉人多不可并列故曰亂家是也亂家包下文諸子而言上文云亂國之君亂家之人又曰亂國之君非之上亂家之人非之下此亂家二字之證也賓萌之稱佗書罕見而字又假孟爲萌適與周賓孟之名同其義益晦矣

宋子蔽於欲而不知得

樾謹按古得德字通用周易上九君子得輿釋文曰得京作德論語泰伯篇民無得而稱焉季氏篇戒之在得釋文並云得本作德是其證也蔽於欲而不知德正與下句慎子蔽於法而不知賢一律注謂不知得欲之道失之

以其不可道之心取人則必合於不道人而不知合於道人

樾謹按知字衍文也下文云以其可道之心取人則合於道人而不合於不道人正與此文相對彼云不合而不云不知合則此文亦無知字明矣

夫何以知

樾謹按楊注曰問何道以知道人也此注甚誤夫何以知與下文何患不知相對蓋言心不知道則將

與不道人論道人必至妬賢害善矣夫何以知心知道則與道人論非道必能懲姦去惡矣何患不知此兩知字與知道之知不同當讀爲智夫何以知猶言夫何能智也楊注以爲問辭失之甚矣曰心知道然後可道

樾謹按曰字衍文也心知道然後可道與上文心不知道則不可道而可非道相對成文皆承故心不可以不知道而言因上句夫何以知楊注誤以爲問辭後人遂以此數句爲答辭妄加曰字矣有人也不能此三技而可使治三官曰精於道者也精於物者也

樾謹按精於物上疑當有非字言此人不能三技而可治三官者精於道非精於物也精於物若農精於田賈精於市工精於器是也精於道則君子是也下文云精於物者以物物精於道者兼物物故君子一於道而以贊稽物可證其義今本奪非字則精於道者也精於物者也兩語平列而其義違矣

其爲人也善射以好思

樾謹按楊注曰清靜思其射之妙然凡射者必心手相得方可求中非徒思之而已且其下文曰耳目之欲接則敗其思蚊蟲之聲聞則挫其精無一字及射然則楊注非也此射字乃射策射覆之射漢書藝文志著龜家有隨曲射匿五十卷射匿疑卽射覆覆而匿之人所不知以意縣揣而期其中此射之義也呂氏春秋重言篇載成公賈說荆莊王曰有鳥止于南方之阜三年不動不飛不鳴是何鳥也王

射之曰有鳥止於南方之阜其三年不動將以定志意也其不飛將以長羽翼也其不鳴將以覽民則也然則古人設爲廋辭隱語而使人意度之皆謂之射此云善射以好思卽謂此也非眞援弓而射之也

故濁明外景清明內景

樾謹按大戴記曾子天圓篇參嘗聞之夫子曰天道曰圓地道曰方方曰幽而圓曰明明明者吐氣者也是故外景幽者含氣者也是故內景故火日外景而金水內景荀子濁明外景清明內景之說卽孔子之緒言也楊注所說未盡其旨

見植林以爲後人也

樾謹按上文見寢石以爲伏虎也伏與寢義相應此云後人則與植林不相應矣植林豈必在後乎疑荀子原文本作立人立與植正相應下文曰俯見其影以爲伏鬼也仰視其髮以爲立魅也亦以伏立對文可證也今作後人者疑涉上文誤立爲伏又誤伏爲後耳

而無所疑止之

樾謹按詩桑柔篇靡所止疑傳曰疑定也疑訓定故與止同義此云疑止猶詩云止疑荀子傳詩故用詩義耳楊注云疑或爲疑非是

其所以貫理焉。雖億萬已不足以浹萬物之變。

樾謹按已猶終也。言終不足以浹萬物之變也。詩葛藟篇終遠兄弟傳曰已相遠矣箋云今已遠棄族親是傳箋並訓終爲已。僖二十四年左傳婦怨無終杜注曰終猶已也故已亦猶終也。

案彊鉗而利口。

樾謹按大元元瑩篇箝知休咎范望注曰箝求也。鬼谷子有飛箝篇其文曰以飛箝之辭鉤其所好以箝求之此范望注所本鉗猶箝也彊鉗謂彊求也楊注以鉗人口釋之非是。

憂戚之無益於幾也。

樾謹按幾者事之微也無益於幾卽無益於事憂戚之而仍於事無益則爲君子所不取矣楊注謂憂戚亦不能近道是訓幾爲近又增出道字非其旨也。

正利而爲謂之事正義而爲謂之行正名

樾謹按廣韻正正當也正利而爲正義而爲猶文四年左傳曰當官而行也楊注以正道釋之非是聲音清濁調竽奇聲以耳異。

樾謹按楊注曰調竽謂調和笙竽之聲也然笙竽之聲而獨言竽義不可通楊又引或說謂竽八音之首斯曲說也調竽疑當爲調笑字之誤也孟子告子篇曰則已談笑而道之調笑與談笑文異而誼同。

玉篇廣韻並曰。談戲調也。蓋談與調一聲之轉耳。笑竽形似。因而致誤。楊注非也。

然而徵知必將待天官之當簿其類。然後可也。

樾謹按楊注曰。天官耳目也。疑此文及注。並有奪誤。上文云。然則何緣而以同異。曰。緣天官。注曰。天官耳目鼻口心體也。是天官本兼此六者而言。此何以獨言耳目乎。疑天官乃五官之誤。上云心有徵知。此當云。然而徵知必將待五官之當簿其類。注當云。五官耳目鼻口體也。所以不數心者。徵知卽心也。下文云。五官簿之而不知。心徵之而無說。卽承此文而言。可知天官爲五官之譌。因五官譌爲天官。而注又有闕文。遂不可讀。

有時而欲偏舉之。故謂之鳥獸。鳥獸也者。大別名也。

樾謹按上文云。故萬物雖衆。有時而欲偏舉之。故謂之物。物也者。大共名也。旣有大共大別之不同。而上云偏舉之。此亦云偏舉之。不可通矣。疑此偏字乃偏字之誤。上云偏舉之。乃普偏之義。故曰大共名也。此云偏舉之。乃一偏之義。故曰大別名也。偏與偏形似。因而致誤。

說不行則白道而冥窮。

樾謹按楊注曰。白道明道也。冥幽隱也。冥窮謂遐而窮處也。其說冥窮之義。甚爲迂曲。窮當讀爲躬。白道而冥躬者。明白其道。而幽隱其身也。古窮與躬通用。論語鄉黨篇。鞠躬如也。儀禮聘禮鄭注作鞠窮。

是其證矣。

吐而不奪利而不流。

樾謹按楊注曰。吐而不奪謂吐論而人不能奪。此說非也。吐當爲噓形似而誤。從土從出之字。隸書每每相亂。若敷從出而今譌作敖。貲從出而今譌作賣。是也。咄者謔之假字。從口從言之字。古或相通。若詠之爲咏。譖之爲唁。吟之爲詒。噴之爲讚。是也。謔而不奪利而不流。二句相對。言雖困謔而不可劫奪。雖通利而不至流蕩也。上文於聖人之辨說曰。說行則天下正。說不行則白道而冥躬。此於士君子之辨說曰。謔而不奪利而不流。謔謂說不行。利謂說行。其文正相配也。

欲不待可得而求者從所可。

樾謹按待字衍文也。當作欲不可得而求者從所可。楊注曰。凡人之情欲雖未可得以有欲之意。及至求之時。則從其所可得也。注不釋待字。故知爲衍文矣。

欲不待可得所受乎天也。求者從所可受乎心也。

樾謹按待字亦衍文也。受乎心也。上當有所字。所受乎心與所受乎天正相對。下文亦以所受乎天所受乎心並言。則此文有所字明矣。當據補。

所受乎天之一欲制於所受乎心之多。因難類所受乎天也。

樾謹按楊注曰此一節未詳或曰當爲所受乎天之一欲制於所受乎心之計其餘皆衍字也一欲大凡人之情欲也言所受乎天之大欲皆制節於所受心之計度今按或說甚晦義不可通此文當云所受乎天之一所受乎心之多固難類也所受乎天所受乎心卽承上文而言一與多正相對所受乎天之一言天之與人有定也所受乎心之多言人之心無窮也固難類也猶言固不可同耳

輕煖平簾

樾謹按平乃席名故與簾並言說文艸部蒻蒲子可以爲平席釋名釋牀帳曰蒲平以蒲作之其體平也並可爲證

乘軒戴綻其與無足無以異

樾謹按無足謂刖者也乘軒戴綻而行榮之至矣然實與無足者之詮卓而行無以異也無足與乘軒相應盧曰無足當謂貧人之本不足者未得其義

此页空白

諸子平議卷十五

荀子四

合於犯分亂理而歸於暴性惡。

樾謹按犯分當作犯文。此本以文理相對。上文曰順是故淫亂生而禮義文理亡焉。下文曰合於文理而歸於治並其證也。合於犯文亂理與合於文理正相對成義。今作犯分則與下文不合矣。當由後人習聞犯分罕聞犯文而誤改之耳。

今人飢見長而不敢先食者將有所讓也。

樾謹按注不釋長字蓋以爲尊長也。然下文云勞而不敢求息者將有所代也。無爲尊長任勞之文則此句長字亦非謂尊長也。長讀爲糧爾雅釋言糧也。詩崧高篇以峙其糧鄭箋曰糧也。見糧而不敢先食與下文勞而不敢求息意正相配若作見長則轉與下意不倫矣。

故聖人之所以同於衆其不異於衆者性也。

樾謹按同於衆卽不異於衆也。於文複矣據下文云所以異而過衆者僞也。疑此文亦當作所以同於衆而不過於衆者性也。而譌作其過譌作異而詞意俱不可通矣。

諸子平議 荀子四

若是則兄弟相拂奪矣。

樾謹按楊注曰拂違戾也。或曰拂字從木旁弗擊也。違戾之訓既得之矣。讀拂爲拂義轉迂曲。說文拂過擊也。拂自可訓擊何必改爲拂乎。拂者農器也。施之於此非所安矣。又按說文色部。艴。慍怒色也。此拂字疑艴之假音。言兄弟必艴然爭奪也。

衆者暴寡而譁之。

樾謹按楊注曰衆者陵暴於寡而誼譁之。然上文云彊者害弱而奪之。譁與奪義不倫矣。禮記曲禮篇爲國君華之鄭注曰華中裂之。此文譁字當讀爲華而從中裂之訓。陵暴於寡而分裂之與害弱而奪之者無異也。

不然今塗之人者皆內可以知父子之義外可以知君臣之正。

樾謹按不然二字當在今字之下。今不然三字爲句。上文云今不然人之性惡是其例也。若佚之以繩。

樾謹按楊注曰佚猶引也。然佚無引義恐不可從。佚當讀爲秩。秩之言次也序也。僖三十一年公羊傳天子秩而祭之何休注曰秩者隨其大小尊卑高下所宜故字亦通作程。尙書堯典平秩東作平秩南訛平秩西成史記五帝本紀秩皆作程段氏玉裁以說文載越字皆讀若詩秩秩大獸爲證是程與秩

聲義俱相近.秩之以繩.猶程之以繩也.致仕篇曰.程者物之準也.是其義也.其舉事多悔.

樾謹按多悔.義不可通.盧從元刻作悔.是也.詩生民篇.庶無罪悔.鄭箋曰.無有罪過.是過謂之悔也.襄二十九年公羊傳.尙速有悔於予身.何休解詁曰.悔咎.是咎謂之悔也.多悔猶云多過多咎耳.其本字當作悔.悔乃假借字.詩十月之交篇.亦孔之悔.釋文曰.悔本作悔.

上不循於亂世之君.下不俗於亂世之民.

樾謹按楊注曰.循順從也.俗謂從其俗也.然以從其俗爲俗.義不可通.俗乃鉛字之誤.荀子書屢用鉛字.榮辱篇曰.鉛之重之.又曰.反鉛察之.而愈可好也.禮論篇曰.則必反鉛過故鄉.注並曰.鉛與沿同循也.是鉛循同誼.上不循於亂世之君.下不鉛於亂世之民.兩句一律.鉛俗字形相似.傳寫者因而致誤耳.

莫敢犯大上之禁.君子.

樾謹按楊注曰.大讀爲太太上至尊之號.其說非也.此當作莫敢犯上之大禁.傳寫到之耳.下文云.皆知夫犯上之禁.不可以爲安也.不言犯大上之禁.可知此文之誤矣.故莫不服罪而請.

樾謹按楊注謂自請刑戮非也。請當讀爲情。成相篇明其請。注曰：請當爲情。禮論篇：情文俱盡。史記禮書情作請。徐廣曰：古情字或假借作請。是其證也。情實也。莫不服罪而情猶莫不服罪而實也。言服罪而不敢虛誕也。論語所謂則民莫敢不用情也。楊注以本字釋之誤矣。成相篇曰：下不欺上皆以情言明若日。卽此情字之義。

政令致明而化易如神。

樾謹按易當讀爲施。詩皇矣篇：施于孫子。鄭箋曰：施猶易也。故施易二字古通用。何人斯篇：我心易也。釋文曰：易韓詩作施。是其證也。化易如神者，化施如神也。正與上句威行如流一律。

論知所貴則知所養矣。事知所利則動知所出矣。

樾謹按四句相對成文。下句不應多動字。注亦不及動字之誼。則動字衍文也。

忠者敦慎此者也。

樾謹按楊注曰：慎讀爲順。人臣能厚順此五者，則爲忠也。然厚與順誼不倫。其說非是。敦慎當作敦慕。儒效篇曰：敦慕焉君子也。王氏引之曰：敦慕皆勉也。爾雅曰：敦勉也。又曰：慎慎勉也。釋文慎亦作慕。是敦慕並爲勉。此文疑本作忠者敦慎此者也。敦慎與敦慕文異而義同。言人臣能勉此，則爲忠也。說文心部：慎勉也是慎其本字。慕其假字。此用本字作慎，因譌爲慎矣。

請成相成相

樾謹按楊解篇名引或曰成功在相故作成相三章盧云成相之義非謂成功在相也禮記治亂以相相乃樂器所謂春牘又古者瞽必有相審此篇章節卽後世彈詞之祖篇首稱如瞽無相何僂僂義已明矣首句請成相言請奏此曲也漢蓺文志成相雜辭十一篇惜不傳大約託於瞽矇諷誦之詞亦古詩之流今按盧說是也惟引治亂以相及瞽必有相以釋相字則皆失之樂器多矣何獨舉春牘爲言既以爲樂器又以爲瞽必有相義又兩歧矣此相字卽春不相之相禮記曲禮篇鄰有喪春不相鄭注曰相謂送杵聲蓋古人於勞役之事必爲歌謳以相勸勉亦舉大木者呼邪許之比其樂曲卽謂之相請成相者請成此曲也漢志有成相雜辭足徵古有此體王氏引之必以盧說爲謬何也

請布基慎聖人

樾謹按人字不入韻疑有誤當作慎聽之聖與聽音近而譌尙書無逸篇此厥不聽漢石經作不聖秦泰山碑皇帝躬聽史記作躬聖並其證也聽譌作聖則聖之二字不成義後人因改爲聖人矣請布基慎聽之欲人慎聽其言下文云請牧基賢者思欲賢者思其言義正同也慎聽之三字本禮記仲尼燕居篇

尊主安國尙賢義

樾謹按義讀爲儀。儀亦賢也。尙書大誥篇民獻有十夫。枚傳訓獻爲賢。大傳作民儀有十夫。廣雅釋言曰儀賢也。尙賢儀言崇尙賢者也。作儀者古字通用。

武王善之。封之於宋。立其祖。

樾謹按楊注曰。立其祖使祭祀不絕也。左傳曰。宋祖帝乙。此說未得祖字之義。說文示部。祖。始廟也。蓋祖之本義爲廟。故尙書甘誓曰。用命賞于祖。弗用命戮于社。考工記匠人曰。左祖右社。並以祖社對文。猶言廟社也。鄭康成注考工記曰。祖宗廟得其義矣。封之於宋立其祖。言封之於宋而立其宗廟也。今人但知有爾雅祖王父也之訓。而說文祖始廟也之訓。遂爲所奪。古誼之湮久矣。

讒人罔極。險陂傾側此之疑。

樾謹按爾雅釋言。疑戾也。郭注曰。戾止也。疑者亦止。儀禮鄉射禮賓升西階上。疑立。鄭注曰。疑止也。是疑有止義。其字蓋乚之假借。說文匕部。乚定也。定故爲止。今說文譌作未定而疑之訓。止遂不可曉矣。讒人罔極。險陂傾側此之疑。承上文堯在萬世如見之而言。此之疑者。此之止也。言堯明見萬世。雖險陂傾側之徒。莫不由此而止也。楊注言當疑此讒人陂險。則與上意不貫矣。

身讓下隋舉牟光。

樾謹按舉當讀爲與。古舉與字通。周官師氏職曰。王舉則從。鄭注曰。故書舉爲與。史記呂后紀蒼天舉

直徐廣曰舉一作與是其證也此文本云身讓卞隨與牟光作舉者假字耳

中不上達

樾謹按中當讀爲忠言忠誠之士不能上達也古中忠通用漢張遷碑中譽於朝魏橫海將軍呂君碑君以中勇並假中爲忠國語周語曰考中度衷爲忠蓋中衷忠三字義並通耳

郭公長父之難厲王流于彘

樾謹按楊注曰郭或爲郭盧曰古郭號字通郭公長父卽呂氏春秋當染篇之號公長父作郭爲是之難二字當屬下爲七字句王氏念孫曰之是也言難厲王者是此人也今按之難厲王流于彘七字爲句義終未安此篇之例雖以兩三字句一七字句一四字句一七字句爲一節然古人之文變動不居如云治之道美不老君子由之佼以好下以教誨子弟上以事祖考此節詞意明白無奪文譌字其弟四句六字其弟七句五字豈能以子弟二字屬下爲七字句乎然則此文以郭公長父之難六字爲句厲王流于彘五字爲句於義較安不必拘泥字數轉致不通也

欲衷對言不從

樾謹按此篇之例首句必入韻而此句對字與下文從凶江不協王氏念孫因改欲衷對爲欲剖衷此臆說也對字實不誤但當在衷字上對讀爲遂爾雅釋言對遂也詩皇矣篇以對于天下江漢篇對揚

王休蕩篇流言以對毛傳並曰對遂也又禮記祭義篇對揚以辟之鄭注亦曰對遂也蓋對遂音近以聲相訓耳欲對衷者欲遂衷也言欲遂其衷忱而無如言之不從也今本作欲衷對者因淺人不知對之爲遂而疑對衷二字無義因到其文楊氏卽據以爲說曰欲誠意以對失之矣

君法儀禁不爲

樾謹按楊注曰爲君之法儀在自禁止不爲惡然禁不爲惡而止曰禁不爲則辭不達矣注義非也君法儀之儀當讀爲俄說文人部俄行頃也詩賓之初筵篇側弁之俄鄭箋曰俄頃貌廣雅釋詁曰俄袤也是俄有頃邪之義管子書或段義爲之明法解曰雖有大義主無從知之故明法曰佼衆譽多外內朋黨雖有大姦其蔽主多矣以大姦爲大義是其證也義儀古通用義可爲俄故儀亦可爲俄君法儀與上文君法明相對上云君法明論有常此云君法儀禁不爲言君法明盛則其論有常君法傾邪則當禁之使不爲也蓋此皆蒙上文臣下職而言所陳皆臣道也楊注因上文君論有五約以明之句妄舉五節以當之而以君法明爲其一所舉又不相連屬更有佗文以間之殆不足據也

請牧祺明有基

樾謹按上文云請牧基賢者思此文亦當作請牧基明有祺傳寫者誤到基祺兩字耳楊注曰請牧治吉祥之事在明其所有之基業也則所見本已倒矣

潛潛淑淑賦

樾謹按楊注曰。潛潛思慮昏亂也。淑淑未詳。或曰美也。然淑淑訓美。則與潛潛不倫矣。淑當讀爲踧。文選長笛賦。踧踧攢仄。注曰。踧踧。迫蹙兒海賦。葩蕘踧沮。注曰。踧沮。蹙聚也。踧踧之誼。亦猶是耳。印印兮。天下之咸蹇也。

樾謹按楊注曰。雲高而不雨。則天下皆蹇難也。此注非是。蹇當讀爲撻方言。撻取也。雲行雨施。澤被天下。天下皆有取也。故曰印印兮。天下之咸撻也。下文德厚而不捐。卽承此而言。若如楊注。則與下意不貫矣。

冬伏而夏游

樾謹按下文云。食桑而吐絲。前亂而後治。此文游字。獨不入韻。疑滋字之誤。呂氏春秋明理篇曰。草木庳小不滋。注曰。滋亦長也。冬伏而夏滋。言冬伏而夏長也。楊以化而出釋游字。誼亦迂曲。非獨於韻不協也。

喜溼而惡雨

樾謹按注曰。溼謂浴其種。旣生之後。則惡雨也。其說甚得荀子之意。蓋此句與上文夏生而惡暑相對。生於夏宜不惡暑矣。而蠶則惡暑。其種必浴。有似喜溼者。宜不惡雨矣。而蠶則惡雨。此兩而字。正明其

性之異也。太平御覽資產部引作疾溼而惡雨。蓋後人疑蠶性惡溼不得言喜溼故妄改之。言疾溼又言惡雨辭複而意淺非荀子原文也。王氏念孫反據御覽以訂正荀子誤矣。

簪以爲父。

樾謹按簪當爲鑽。禮記喪大記用雜金鑽。正義曰鑽釘也。釘與箴形質皆同。磨之琢之而後成箴。方其未成箴之時。則箴亦一鑽而已矣。故曰鑽以爲父。作簪者段字耳。若是首笄之簪。則與箴全不相涉。楊注謂言此者欲狀其形失之迂矣。盧氏謂簪當爲鑽。所以琢箴之線孔者也。箴賴以成形故曰爲父。此尤曲說。箴所賴以成形者豈特一鑽之功乎。王氏載之讀書雜志誤矣。

聖人其手時幾將矣。

樾謹按楊注曰。將送也去也。言戰國之時世事已去不可復治也。如此則與上意不貫。上文曰千歲必反古之常也。弟子勉學天不忘也是荀子之意。謂亂極必反非謂世事已去不可復治也。此二句乃望之之辭。言聖人於此亦拱手而待之耳。所謂千歲必反者此時殆將然矣。楊注非。

念彼遠方何其塞矣。

樾謹按楊注曰。遠方猶大道也。然以遠方爲大道其義未安。此章蓋亦遺春申君者。下文仁人紓約暴人衍矣。諸句其意實譏楚也不敢斥言楚國故姑託遠方言之。若謂彼遠方之國有如此耳。此荀卿之

危行言孫也。

不敬交大略

樾謹按上句不時宜注曰時謂得時宜謂合宜是二字平列下句不驩欣亦二字平列則此文不敬交疑不敬文之誤勸學篇曰禮之敬文也注曰禮有周旋揖讓之敬車服等級之文也禮論篇曰事生不忠厚不敬文謂之野送死不忠厚不敬文謂之瘠注曰敬文恭敬有文飾是荀子書屢言敬文性惡篇曰不如齊魯之孝具敬父者何也注曰敬父當爲敬文此敬文誤爲敬交猶彼敬文誤爲敬父楊氏於此無注其所據本必未誤敬文二字本書屢見故不說也

舜曰維予從欲而治

樾謹按此卽所謂不思而得不勉而中從容中道聖人也孔子七十而從心所欲不踰矩可釋此文從欲之義故下文曰禮之生爲賢人以下至庶民也非爲成聖也楊氏誤據古文尙書爲說乃曰引之以喻禮能成聖亦猶舜賴皋陶也失之矣

奉妒昧者謂之交譖

樾謹按交讀爲狡禮記樂記篇血氣狡憤釋文曰狡本作交是交狡古通用狡與譖同義下文曰交譖之人妒昧之臣是交譖與妒昧皆兩字平列楊注曰交通於譖詐之人失之矣

有法者以法行。無法者以類舉。

樾謹按古所謂類卽今所謂例。史記屈原賈生傳吾將以爲類正義曰類例也。非目益明也。眸而見之也。

樾謹按楊注曰眸謂以眸子審視之也。此說未安。以眸子審視豈可但謂之眸乎。眸當讀爲睇。說文目部。睇低目視也。從目冒聲。與牟聲相近。釋名釋首飾曰牟冒也。眸之與睇猶牟之與冒矣。說文又有睂篆。曰低目謹視也。從目攷聲。亦與牟聲相近。荀子成相篇身讓下隋舉牟光卽莊子大宗師篇之務光也是其例矣。

冢卿不脩幣。

樾謹按上云士不通財貨。楊注曰不得貿遷如商賈也。此云冢卿不脩幣。注曰謂不脩財幣販息之也。然則與士之不通貨財何以異乎。據韓詩外傳作冢卿不脩施。疑此文奪施字。幣乃敝字之誤。施當爲柂。古同聲假借字也。柂卽今籬字。一切經音義十四云籬柂同力支反。引通俗文云柴垣曰柂。木垣曰柂。說文木部柂落也。冢卿不脩敝柂。謂籬落敝壞不修葺之也。與下文大夫不爲場園正同一意。皆不與民爭利之義。

不知而問堯舜。無有而求天府。

樾謹按楊注曰。好問則無不知。故可比堯舜。知無而求之。是有天府之富。蓋楊讀不知而問無有而求絕句。故其解如此。實非荀子意也。不知而問之。堯舜無有而求之。天府語意本連屬。下文先王之道。則堯舜已六貳之博。則天府已。乃自解堯舜天府之義也。使謂不知而問。即是堯舜無有而求。即是天府下文贅矣。故知楊注非也。六貳當從盧說。爲六蓀之誤。何謂堯舜先王之道是也。問者問此而已。非必真起堯舜而問之也。何謂天府六蓀之博是也。求者求此而已。非必真入天府而求之也。

臨患難而不忘細席之言。

樾謹按郝氏懿行曰。細席恐茵席之譌。蓋茵借爲綑。綑又譌爲細耳。王氏念孫載之讀書雜志。洵墮見矣。楊注引尸子臨大事不忘昔席之言。昔亦茵之譌。荀子作細席者。其原文是綑席也。尸子作昔席者。其原文是茵席也。兩文雖異而實同。郝王均未見及。

雨小漢故潛。

樾謹按楊注曰。未詳。又引或曰。言漢者本因雨小水濫觴而成。至其盛也。乃溢爲潛矣。其說迂曲。不可從。漢字疑衍文。雨小故潛者。爾雅釋言曰。潛深也。言雨小故入地深也。下文云。夫盡小者大。積微者箸。是其義矣。

國將興必貴師而重傳。貴師而重傳。則法度存。

樾謹按下文云國將衰必賤師而輕傳賤師而輕傳則人有快人有快則法度壞據此則貴師而重傳下疑有闕文

古者匹夫五十而士

樾謹按楊注曰禮四十而士五十而後爵此云五十而士恐誤或曰爲卿士是二說皆非也下文云天子諸侯子十九而冠注曰先於臣下一年也然則四十而士猶二十而冠皆是論其常五十而士猶十九而冠皆是言其異也禮所謂四十始仕五十命爲大夫者蓋指卿大夫元士之適子而言此明言匹夫則殆謂鄉之俊士選士矣禮記王制篇正義曰鄉人旣卑節級升之故爲選士俊士至於造士若王子與公卿之子本位旣尊不須積漸學業旣成卽爲造士以是言之古人於世族子弟及民間秀士自有區別故其始仕有十年之差也荀子不直曰古者五十而士必加匹夫二字明與下文天子諸侯子相對知十九而冠爲天子諸侯子之制則知五十而士爲匹夫之制不必疑其與禮經不合矣

移而從所仕

樾謹按楊注曰仕與事同事所能也義甚迂曲仕疑任字之誤莊子秋水篇任士之所勞釋文引李注曰任能也然則移而從所任者移而從所能也於義較捷矣

詩曰瞻彼日月悠悠我思道之云遠曷云能來子曰伊稽首不其有來乎宥坐

樾謹按楊注曰有所不來者爲上失其道而人散也若施德化使下人稽首歸向雖道遠能無來乎如注義則伊稽首三字甚爲不詞殆非也首當讀爲道周書芮良夫篇予小臣良夫稽道羣書治要作稽首是首道古通用彼文稽道當爲稽首此文稽首當爲稽道皆古文假借字也尙書堯典曰若稽古正義引鄭注曰稽同也禮記儒行篇古人與稽鄭注曰稽猶合也合亦同也稽道猶同道也伊者語詞猶維也詩言道之云遠曷云能來孔子言道苟同則雖遠而亦來故曰伊稽道不其有來乎蓋借詩言而反之若唐棣之詩矣

吳子胥不磔姑蘇東門外乎

樾謹按楊注曰磔車裂也然子胥不被車裂之刑楊注非是漢書景帝紀改磔曰棄市師古注曰磔謂張其尸也當從此訓

夫遇不遇者時也賢不肖者材也君子博學深謀不遇時者多矣由是觀之不遇世者衆矣

樾謹按由是觀之四字當在君子博學深謀句上

從命則親危不從命則親安孝子不從命乃衷子道

樾謹按衷與忠通言孝子之不從命乃其忠也下文從命則親辱不從命則親榮孝子不從命乃義從命則禽獸不從命則脩飾孝子不從命乃敬忠與義敬正一律作衷者假字耳國語楚語又能齊肅衷

正周禮春官序官鄭注引作中正孝經中心藏之釋文中本亦作忠蓋衷中忠三字同聲而通用楊注曰衷善也未得假借之旨

今女衣服旣盛顏色充盈天下且孰寫諫女矣由

樾謹按楊注曰告之畢又呼其名丁寧之也此說非是下文孔子曰志之吾語女此由字當在孔子曰之下由志之三字連文上文孔子曰由志之吾語女雖有國士之力不能自舉其身亦以由志之三字連文可證孔子曰下必當有由字也韓詩外傳正作孔子曰由志之吾語汝

奮於言者華奮於行者伐

樾謹按韓詩外傳作慎於言者不譁慎於行者不伐當從之華卽譁之省文兩奮字皆春字之誤乃古文慎字也春誤爲奮則奮於言行不能謂之不華不伐矣於是又刪去兩不字耳楊氏據誤本作注非也

夫魚鼈鼈鼈猶以淵爲淺而掘其中鷹鳩猶以山爲卑而增巢其上法行

樾謹按堦下當有穴字掘穴其中增巢其上相對爲文晏子春秋諫篇古者嘗有處檜巢窟穴亦以窟穴對檜巢是其證也大戴記曾子疾病篇作鷹鶠以山爲卑而曾巢其上魚鼈鼈鼈以淵爲淺而厯穴其中厯穴卽堦穴也春秋文十年次于厥貉公羊作屈貉然則以厯爲堦猶以厥爲屈也荀子此文本

於曾子。彼作墮穴。此作掘穴。乃古書以聲音假借之常例。若無穴字。則文爲不備矣。交而不見敬者。吾必不長也。

樾謹按楊注以不長爲不長厚非也。以上下文例之。不仁故不見愛。不信故不見信。若不長厚與不見敬。則不倫矣。且不長厚而曰不長亦近不詞。不長者無所長也。子道篇色知而有能者小人也。韓詩外傳。能作長。是不長猶不能也。吾無所能。宜其不見敬矣。

然則夫章甫絢屨紳而措笏者。此賢乎。哀公。

樾謹按此當作比。說文白部皆俱詞也。從比從白。徐鍇繫傳曰。比皆也是。比有皆義。比賢乎。猶言皆賢乎。大戴禮保傅篇於是比選天下端士。漢書賈誼傳。比作皆。是其證矣。此文亦見大戴記哀公問五義篇。作此皆賢乎。蓋比誤爲此。後人又增皆字耳。

不知選賢人善士託其身焉以爲己憂。

樾謹按此十五字爲一句。廣雅釋詁爲瘞也。爲有瘞義。故左傳有疾不可爲之文。爲己憂者。瘞己憂也。得賢人善士以託其身。則可瘞己之憂。而庸人不知也。故曰不知選賢人善士託其身焉以爲己憂。楊注曰。不知託賢。但自憂而已。則失其義。

是故其事大辨乎天地。明察乎日月。

樾謹按大字絕句是故其事大與上文大道者相應明字衍文辨乎天地察乎日月二語相對說詳羣經平議大戴記

兩驂列兩服入廄

樾謹按楊注曰列與裂同謂外馬擘裂中馬牽引而入廄是以七字作一句殆非也兩驂裂者兩驂斷鞅而去也兩驂在外故得自絕而去於是止存兩服馬還入廄中矣故曰兩驂列句兩服入廄聞之曰無越踰不見士堯問

樾謹按楊注曰周公聞之古也越踰謂過一日也然則荀子原文當作聞之無越日不見士楊注原文當作越日謂過一日也今衍踰字者涉下文楊注有越踰字而誤衍也既衍踰字則越踰日之文甚爲不辭乃以日字爲曰字之誤而移植聞之二字之下遂成今本之誤盧校云宋本曰作日此則其舊迹之猶未盡泯者也

人人皆以我爲越踰好士然故士至

樾謹按踰字亦衍文也人人皆以我爲越好士者越之言過也人人皆以我爲過於好士也然故士至者然故卽是故也說見王氏經傳釋詞大略篇曰然故民不困財亦以然故連文是其證也楊注曰人不知則以爲越踰然士亦以禮貌之故而至也此由不達然故之義故爲抑揚其辭至越踰連文則以

踰字釋越字。注家往往有此例。非以正文有踰字也。而正文踰字之衍。卽因此矣。

此页空白

諸子平議卷十六

列子

謂之生化形色智力消息者非也。天瑞。

樾謹按謂當作爲。古書謂爲通用。說詳王氏引之經傳釋詞。上文云。自生自化自形自色自智自力自消自息。故此云爲之生化形色智力消息者非也。張湛注上文云。皆自爾耳。豈有戶而爲之者哉。正得其義。

九變者究也。乃復變而爲一。

樾謹按上變字衍文。本作九者究也。乃復變而爲一。因涉上文一變七變而誤爲九變。則於詞贅矣。

頤輶食醯。頤輶生乎食醯。黃輶食醯。黃輶生乎九猷。

樾謹按頤輶食醯。黃輶食醯八字皆衍文。莊子至樂篇。止作頤輶生乎食醯。黃輶生乎九猷。無此八字。而欲恆其生。畫其終。惑於數也。

樾謹按畫者止也。論語雍也篇。今女畫。孔注曰。畫。止也。畫其終者。止之使不終也。上文云。生者理之必終者也。然則生固不可得而常終。固不可得而止矣。而欲恆其生。畫其終。故曰惑也。張注曰。畫。亡也。疑

本作畫止也。以形似而誤。呂氏春秋本味篇道者亾彼在己。今誤作止彼在己。與此正可互證。殷敬順釋文曰。畫一作盡。此乃字誤。盧氏文弨羣書拾補謂張本作盡。注云盡亾也。非是。

故吾知其不相若矣。

樾謹按吾下脫安字。上云死之與生一往一反。故云安知其不相若。言死生一致也。下云吾又安知營營而求生非惑乎。正承此而言。若作知其不相若。則於語意大背矣。淺人見下兩言安知句。未並用乎字。而此是矣字。疑其不協。遂妄刪安字。不知矣猶乎也。語有輕重耳。古書多以矣字代乎字。說詳王氏經傳釋詞。

食不知所以

樾謹按莊子知北遊篇作食不知所味。

沒其先居之財。

樾謹按居猶蓄也。謂其先所蓄積之財也。論語公冶長篇臧文仲居蔡。皇侃義疏曰。居猶畜也。是其義。盜陰陽之和。以成若生載若形。

樾謹按載亦成也。尙書臯陶謨篇。乃賡載歌曰。枚傳載成也。是其義。

養正命黃帝

樾謹按正當爲生古字生與性通周官大司徒職辨五地之物生杜子春讀生爲性是其例也列子原文本作養生命蓋段生爲性因誤爲正耳張注曰正當爲性雖得其字而古字亡矣其國無帥長自然而已

樾謹按釋文帥或作師當從之周官太宰職以九兩繫邦國之民二曰長以貴得民三曰師以賢得民此師長二字之義其國無帥長見其無貴賤無賢愚也若作帥長則止是無貴賤耳於義轉有所不盡矣盧仲元本正作師長

至人潛行不空

樾謹按張注曰不空者實有也至人動止不以實有爲閑者也其說甚爲迂曲釋文曰空一本作窒當從之莊子達生篇正作不窒

夫得是而窮之者焉得爲正焉

樾謹按爲正當作而止字之誤也止與正字形相似爲古文作而與而亦相似襄十四年左傳射爲禮乎太平御覽工藝部引作射而禮乎孟子滕文公篇方里而井論語顏淵篇正義引作方里爲井並其證也莊子達生篇述此文曰夫得是而窮之者物焉得而止焉可據以訂正其神無郤

樾謹按釋文曰：郤，閑也。閑乃閒字之誤。謂閒隙也。郤與隙通。莊子知北遊篇若白駒之過郤。釋文曰：郤本作隙。是也。故郤有閒隙之義。禮記曲禮篇相見於郤地曰會。鄭注曰：郤，閑也。莊子養生主篇批大郤德充符篇使日夜無郤。釋文引崔李云：郤，閑也。並可爲證。

口所偏肥。晉國黜之。

樾謹按釋文曰：肥皮美反。說文字林並作屨。又作圮。皆毀也。字從其省。然說文無屨字。戶部屨，崩也。崩與毀義近。是屨爲崩字之誤。張注曰：音鄙。肥薄也。疑本作肥。音鄙。薄也。蓋謂讀如鄙薄之鄙耳。崩字孫愐音符鄙切。與張讀正合。崩省作肥。故釋文曰：字從其省也。秦氏恩復校刻盧重元本以屨爲胞字之誤。夫胞字何得訓毀。於義難通。蓋誤讀張注作肥薄也。故爲此說。今正其字爲屨。其義爲毀。其音爲鄙。則皆得之矣。秦說非也。

潛於牖北聽之。

樾謹按牖北卽室中矣。禾生子伯宿於田更商丘開之舍必當在其室中。商丘開安得更於牖北聽之。牖北疑當作北牖。所謂向也。詩七月篇毛傳曰：向北出牖也。是也。二子在室中。商丘開於北牖外聽之。正合事理。古者士庶人之室皆有北牖。說詳羣經平議。

衆昉同疑子華昉令豫肉食衣帛之次。

樾謹按張注曰：防，始也。釋文曰：防或作放。古字放與方通。尙書堯典篇：方命圮族。漢書傅喜傳：王商傳：並作放命圮族。是其證也。廣雅釋詁：方，始也。然則防者俗字，放者假字，實即方始之方耳。

吾誠之無二心。

樾謹按爾雅釋詁：誠，信也。吾誠之，卽吾信之也。下文唯恐誠之之不至，卽唯恐信之之不至也。太平御覽引此文，改誠爲信，意雖是而非古義矣。

用志不分乃疑於神。

樾謹按疑道藏本作凝。盧重元本亦作凝。莊子同。然此字實當作疑。卽所謂驚猶鬼神也。上文孔子曰：吾以子爲鬼也。察子則人也。亦可爲乃疑於神之證。管子形勢篇：無廣者疑。神解篇曰：以規矩爲方圓。則成以尺寸量長短，則得以法數治民，則安。故事不廣於理者，其成若神。此正用志不分乃疑於神之所謂也。說互詳莊子。

丈人曰：汝逢衣徒也，亦何知問是乎？脩汝所以而後載言其上。

樾謹按張注曰：脩治也。言治汝所用仁義之術，反於自然之道，然後可載此言於身上也。殊於義未得味。丈人之言，其輕儒術甚矣。豈復使治其術乎？故必增出反於自然一語，則非本文所有矣。今按脩者脩除也。周官典祀職帥其屬而脩除。鄭注曰：脩除芟掃之，是其義也。又司尊彝職脩酌。司農注曰：以水

洗勺而酌也。以水洗勺謂之脩。亦脩除之義。此文脩汝所以言汝故所以者。宜脩除之。然後可載吾言於其上也。

吾與汝無其文。未旣其實。而固得道與。

樾謹按無當作母。母讀爲貫。蓋貫母本一字也。爾雅釋詁。貫習也。母其文。言習其文也。黃帝篇。吾與若玩其文也久矣。而未達其實。釋文曰。玩五貫反。習也。然則此作母。彼作玩。聲近而義同。因母字誤作母。後人遂以無字易之。而義不可通矣。盧重元本作旣其文。未旣其實。則據莊子改之。非列子之舊。列入。涕泣沾衾。

樾謹按衾當作衿。卽襟字也。莊子應帝王篇。正作泣涕沾襟。

罪乎不諴不止。

樾謹按罪當讀爲罪。說文山部作𡇗。云山貌是也。釋文云。罪本作萌。盧重元本亦作萌。乃後人據莊子改之。萌乃罪之誤字。說詳莊子。

是殆見吾衡氣幾也。鯢旋之潘爲淵。止水之潘爲淵。流水之潘爲淵。濫水之潘爲淵。沃水之潘爲淵。氿水之潘爲淵。雍水之潘爲淵。汧水之潘爲淵。肥水之潘爲淵。是爲九淵焉。嘗又與來。

樾謹按上文云。是殆見吾杜德幾也。嘗又與來。又曰。是殆見吾善者幾也。嘗又與來。然則此文是殆見

吾衡氣幾也下卽當言嘗又與來方與上文一律乃於中間羅列九淵殊爲無謂疑此五十八字乃它處之錯簡莊子應帝王篇止列首三句而總之曰淵有九名此處三焉正以其與本篇文義無關故略之耳然可證莊子所見本已與今同蓋古書之錯誤久矣

夫漿人特爲食羹之貨無多餘之贏

樾謹按無字衍文釋文曰一本無無字是也張注曰所貨者羹食所利者盈餘而已則張本亦無無字淺人妄加也若云無多餘之贏則下不必更言其爲利也薄矣盧重元本無無字莊子列御寇篇亦無無字當據刪

舍者迎將家公執席妻執巾櫛

樾謹按者字衍文盧重元本無者字是也舍與舍者不同下云舍者避席又云舍者與之爭席矣皆謂同居逆旅者此云舍則謂逆旅主人也主逆旅者卽謂之舍猶典市者卽謂之市主農者卽謂之田禮記王制篇注曰市典市者月令篇注曰田主農之官是其例也今涉下文而誤衍者字則與下兩言舍者無別矣莊子寓言篇已誤當據盧本刪

王之嬪御膻惡而不可親周穆王

樾謹按膻當作羶言臭惡而不可親也廣雅釋器羶臭也

終身不著其術故世莫傳焉。

樾謹按故盧重元本作固。固與故通。此古本也。張湛本竟改作故。轉非古書之舊。此者八徵形所接也。

樾謹按當作此八者形所接也。與下文此六者神所交也相對。

其陰陽之審度故一寒一暑。

樾謹按審度二字傳寫誤倒。本作其陰陽之度審。下句云其昏明之分察故一晝一夜度與分對審與察對以是明之。

吾今得之彼直真夢者矣。

樾謹按此本作彼直真夢矣者字衍文。盧重元本無者字。

常甘以爲苦。

樾謹按常道藏本作嘗。然常嘗古通用。禮記少儀篇馬不常秣。釋文曰常本亦作嘗。爾雅釋詁嘗祭也。釋文曰嘗字又作常並其證也。列子原文借常爲嘗。道藏本易以本字轉非古書之舊矣。

榮汝之糧不若遄歸也。

樾謹按張湛盧重元注並曰榮棄也。訓榮爲棄不知何據殆非也。榮者對實而言。榮猶華也。爾雅釋草

曰木謂之華草謂之榮不榮而實者謂之秀榮而不實者謂之英是其義也古人之詞凡無實者謂之華後漢書馬融傳注曰華譽虛譽也訓華爲虛則榮亦可爲虛矣榮汝之糧言其虛費而無實用也漢書楊雄傳四皓采榮於南山師古曰榮者聲名也蓋榮與實對故亦可訓名以草木言之則榮實也以人事言之則名實也虛實也其義固得通矣

子昔給若

樾謹按昔當爲皆字之誤也

不治而不亂仲尼

樾謹按此本作不治而自亂亂治也謂不治而自治也正與下文不言而自信不化而自行文義一律後人不達亂字之義改爲不亂失之矣張注曰不以治治之故不可亂也是其所據本已誤盧本同夫回能仁而不能反

樾謹按反字無義疑刃字之誤俗書刃字作及故誤爲反耳刃與忍通詩將仲子篇毛傳彊忍之木抑篇鄭箋柔忍之木釋文並云忍本作刃是其證也能仁而不能刃卽能仁而不能忍正與下文賜能辨而不能訥由能勇而不能怯師能莊而不能同一律淮南子人閒篇亦載此事曰丘能仁且忍辨且訥勇且怯字正作忍是其明證張注曰反變也是其所據本已誤矣盧本同

雖然子列子亦微焉。

樾謹按微猶昧也周易屯彖傳天造草昧正義引董遇曰昧微物繫辭傳知微知彰文選西京賦注引舊注曰知微謂幽昧是微謂之昧昧謂之微二字義通子列子亦微焉猶曰子列子亦昧焉故張注曰亦自不知其數。

衍衍然若專直而在雄者。

樾謹按釋文曰一本作存當從之莊子天下篇施存雄而無術亦有存雄之文可以爲證無言與不言無知與不知亦言亦知。

樾謹按與猶爲也上云用無言爲言亦言無知爲知亦知故此云無言爲不言無知爲不知亦言亦知蓋承上文而更進一義也上文用爲字此文用與字文異而義不異古書多有此例管子戒篇自妾之身之不爲人持接也尹知章注曰爲猶與也然則與亦猶爲也說詳王氏經傳釋詞。

人之游也觀其所見我之游也觀之所變

樾謹按觀之所變盧重元本作觀其所變然之卽其也呂氏春秋音初篇之子是必大吉高誘訓之爲其是也孟子公孫丑篇皆悅而願爲之氓矣周官載師注引作皆悅而願爲其民矣是之其同義上言觀其所見下言觀之所變文異義同古書多有此例盧本作其乃不達古書義例而改之。

羣才備也。而無相位者。

樾謹按位當作涖。涖臨也。言無相臨者也。周官肆師職。凡師甸用牲于社宗則爲位。注曰。故書位爲涖。是位與涖古字通。

臣之力能折春螽之股。堪秋蟬之翼。

樾謹按堪當讀爲戡。說文戈部。戡刺也。春螽之股細。故言折。見能折而斷之也。秋蟬之翼薄。故言戡。見能刺而破之也。作堪者假字耳。尙書西伯旣戡黎。爾雅釋詁注引作堪。此古字通用之證。張注曰。堪猶勝也。則螽股亦可言堪。不見古人文字之密矣。

孤犧未嘗有母。非孤犧也。

樾謹按有母下當更疊有母二字。本云孤犧未嘗有母。有母非孤犧也。莊子天下篇釋文引李云。駒生有母。言孤則無母。孤稱立則母名去也。此可證有母非孤犧之義。因古書遇重字多省不書。但於字下作二畫識之。故傳寫脫去耳。

堯還宮召舜。因禪以天下。舜不辭而受之。

樾謹按辭通作詞。釋名釋典藝曰。詞嗣也。故辭亦通作嗣。尙書大誥篇。辭其考我民。辭即嗣也。顧命篇。恐不獲誓言。嗣嗣卽辭也。說詳羣經平議。蓋辭籀文作嗣。本與嗣同聲。故得通用。堯典篇。舜讓于德。弗

嗣而此云舜不辭而受之然則古本堯典作弗辭也所謂舜讓于德者讓當爲攘禮記曲禮篇注曰攘古讓字然則古本堯典必作舜攘于德也攘者取也尙書微子篇枚傳曰自來而取曰攘舜無得天下之心而天下自來是其取天下也以德取之也正所謂自來而取曰攘也故曰舜攘于德弗辭下文無帝堯申命之文而卽紀元日受終之事然則舜之不辭審矣賴列子此言可以見尙書之古義余作羣經平議未見及此故具說之

唯默而得之而性成之者得之

樾謹按而性成之當作性而成之湯問篇曰默而得之性而成之是其證

帝怒流於西極失羣聖之居湯問

樾謹按盧重元本作帝恐流於西極失羣仙聖之居當從之五山之根無所連著其流於西極勢使然耳何怒之有蓋涉下文帝憑怒而誤又仙聖字上下文三見可證此作羣聖之非矣至西極字亦疑有誤五山隨波上下往還安知其必流於西極也下文云岱輿員嶠二山流於北極可證其不必西流矣西極似當作四極

終髮北之北有溟海者天池也

樾謹按釋文曰一本無髮字當從之終北國名下文曰禹之治水土也迷而失塗謬之一國濱北海之

北其國名曰終北是也終北之北謂在其國之北今衍髮字者蓋後人據莊子逍遙遊篇加之不知彼自言窮髮之北此自言終北之北兩文不同若據彼以增此則旣言終髮北又言之北文義複沓矣其民孳阜亡數有喜樂亡衰老哀苦

樾謹按孳阜二字疑當在喜樂之上其民亡數有孳阜喜樂亡衰老哀苦蓋以衰老對孳阜哀苦對喜樂

臣恐彼國之不可知之也

樾謹按張注曰此國自不可得往耳然則不可知之者不可得往也呂氏春秋審應篇其在於民而君弗知高注曰知猶得也是其義下文云伯牙所念鍾子期必得之得猶知也知與得義相近一兒以日初出遠而日中時近也

樾謹按兒下當有曰我二字方與上句一律

同請扁鵲求治

樾謹按旣言請又言求於義複矣請乃詣字之誤詣至也言至扁鵲之所而求治也故下文曰二人辭歸

柱指鉤弦三年不成章

樾謹按盧重元本鉤作鈞當從之張注曰按指調弦三年不能成曲是其所據本亦作鈞故以調弦釋之國語周語細鈞有鍾無鑄韋注曰鈞調也

汝何蚩而三招予

樾謹按說文手部招手呼也黑卵之子不見來丹之以劍擊己但見其舉手若相招然故曰汝何蚩而三招予釋文云一本作拈此乃字誤不當曲爲之說

仲尼之德不出諸侯之下而同於陳蔡力命

樾謹按同乃困字之誤楊朱篇作圍於陳蔡亦困字之誤盧重元本皆作困

北宮子之寐久矣一言而能寤易怛也哉

樾謹按怛當讀爲旦詩氓篇信誓旦旦說文心部引作信誓懸懸卽怛之或體是怛旦古通用也人之寐者至平旦則寤矣北宮子久寐而忽寤故曰易旦也哉釋文音當割反未得其讀或作悟則後人不達而臆改之

仲父之病疾矣

樾謹按疾盧重元本作病當從之莊子徐無鬼篇同

年兄弟也言兄弟也才兄弟也貌兄弟也

樾謹按言字無義。當從釋文作訾。管子君臣上篇。吏嗇夫盡有訾程事律。卽此訾字之義。官秩貴賤必視訾程爲準。訾兄弟也。正與下文貴賤父子也相應。殷敬順不達訾字之義。而以爲當作貲財字。則下當言貧富。不當言貴賤矣。

至人居若死動若械。

樾謹按械字無義。釋文曰。本又作戒。實皆駭之假字也。周官大僕始嘒戒鼓。故書戒爲駭。列子原文。蓋亦假戒爲駭。而寫者又從木作械耳。居若死動若駭。卽處女脫免之意。

自全也。自亡也。自喪也。

樾謹按自亡也三字。疑爲衍文。上文云。唯亡所量。亡所不量。則全而亡喪。亦非知全。亦非知喪。皆以全喪對言。此云自全也。自喪也。文義已足。增出自亡也三字。則與上文不合矣。蓋涉上有三亡字。而誤衍此句。不知上三亡字。皆有無之無。非喪亡之亡也。

若實名貧。僞名富。楊朱。

樾謹按此下當有實名賤僞名貴二句。上文曰。凡爲名者必廉。廉斯貧。爲名者必讓。讓斯賤。故此引管仲陳氏事。證爲實名則貧賤。爲僞名則富貴也。

當身之娛。非所去也。

樾謹按當身乃當生之誤下云死後之名非所取也當生與死後正相對下文云且趣當生奚遑死後是其證

雖殊方偏國非齊土之所產育者無不必致之

樾謹按下文云雖山川阻險塗逕修遠無不必之則此文當云無不必致誤衍之字

賓客在庭者日百住

樾謹按住當爲數聲之誤也黃帝篇漚鳥之至者百住而不止張注曰住當作數是其證矣此篇盧重元本作往則是誤字

一國之人受其施者相與賦而藏之

樾謹按賦者計口出錢也周官大宰職鄭注曰賦口率出泉也漢書食貨志師古注曰賦謂計口發財是其義矣藏猶言葬也禮記檀弓篇葬也者藏也故葬與藏義得相通周易繫辭傳葬之中野漢書劉向傳引作臧之中野臧卽藏字也端木叔死無瘞埋之資故受其施者相與賦錢而葬之也

雖毀之不知雖稱之弗知

樾謹按上文言舜禹周孔曰雖稱之弗知雖賞之不知則此言桀紂宜云雖毀之不知雖罰之弗知之對稱之言罰之對賞之言方與下文彼四聖雖美之所歸彼二凶雖惡之所歸文義相應稱之賞之

是美之所歸也。毀之罰之。是惡之所歸也。今涉上文而亦作稱之。義不可通矣。物非我有也。旣有。不得不去之。

樾謹按不得不去之。當作不得而去之。故下文曰。雖不去物。不可有其物也。今作不得不去。與下文不合矣。蓋涉上文旣生不得不全之故。誤而爲不。

彊食靡角說符

樾謹按靡讀爲摩。莊子馬蹄篇喜則交頸相摩。釋文引李云摩也。是靡與摩義通。靡角之靡。卽交頸相靡之靡。謂以角相靡也。

故不班白語道失而況行之乎。

樾謹按上文曰。色盛者驕。力盛者奮。未可以語道也。然則色力方盛之人。不可以語道。必待班白之人。方可語之。若不班白而語道。未有不失者矣。所謂不班白語道失也。張注謂色力旣衰。方欲言道。悟之已晚。言之猶未能得。而况行之乎。核之本文。與上文義皆不合。

忠信錯吾軀於波流。而吾不敢用私。

樾謹按忠信字。涉上句而衍。

白公不得已。遂死於浴室。

樾謹按已字乃也字之誤。淮南子道應篇作白公不得也。呂氏春秋精諭篇作白公弗得也。並其證也。張注曰不知言之所謂遂便作亂故及於難正解不得之義。

今趙氏之德行無所施於積。

樾謹按施行字蓋卽於字之誤而複者呂氏春秋慎大篇亦有此文正無施字。

臣有所與共擔纏薪菜者。

樾謹按張注曰共同也此說失之共乃供之假字釋文曰一作供是也蓋擔纏薪菜皆此人供之耳擔纏薪菜是兩事擔纏者負荷什物薪菜者以給炊也纏乃纏字之誤周易坎上六係用徽纏馬融曰徽纏索也說本王氏念孫淮南子雜志菜當爲采古字通用。

爵高者人妒之官大者主惡之祿厚者怨逮之。

樾謹按淮南子道應篇作祿厚者怨處之是也怨處之謂怨讐之所處也猶曰爲怨府也處與妒惡爲韵若作逮則失其韵矣蓋由淺人不達處字之義而臘改。

王亟封我矣吾不受也。

樾謹按張注訓亟爲急非也亟者數也言王數封我而吾不受也下文城市患其亟也注曰亟數也此亦當與同訓。

盡取其衣裝車牛步而去。

樾謹按此當作盡取其衣裝車馬牛缺步而去。呂氏春秋必己篇作求其車馬則與之。求其衣被則與之。牛缺出而去是其證也。出卽步字之誤耳。此文脫馬字缺字遂以車牛連文失之矣。

利出者實及怨往者害來。

樾謹按及乃反字之誤。出與反猶往與來相對成文。孟子曰。出乎爾者反乎爾者也。

其鄰人遽而伐之。

樾謹按鄰字衍文也。上云人有枯梧樹者。此云其人卽此人也。上下文所云鄰父。謂此人之鄰也。豈得又就鄰人言之。而謂此人爲鄰人乎。下文其人乃不悅曰。亦無鄰字可證此鄰字之衍。

此页空白

諸子平議卷十七

莊子一

蜩與學鳩笑之曰逍遙遊

樾謹按釋文曰學本或作鶩音預據文選江文通雜體詩鶩斯蒿下飛李善注卽以莊子此文說之又引司馬彪曰鶩鳩小鳥毛萇詩傳曰鶩斯鵠居鵠居鴉烏也音豫然則李氏所據本固作鶩不作學也今釋文引司馬云學鳩小鳩也此經後人竄改非其原文矣

時則不至而控於地而已矣

樾謹按王氏引之經傳釋詞曰則猶或也引史記陳丞相世家則恐後悔爲證此文則字亦當訓或蓋其決起而飛槍榆枋也有時能至有時不能至至則集于榆枋不至則投於地故曰時或不至而控於地也

奚以之九萬里而南爲

樾謹按南上本有圖字上文曰而後乃今將圖南故此卽承上文言也文選注正作奚以之九萬里而圖南爲

之二蟲又何知。

樾謹按郭象注曰。二蟲謂鵬蜩也。此恐失之。二蟲當謂蜩與蠶鳩。下文曰。奚以知其然也。朝菌不知晦朔。蟪蛄不知春秋。是所謂不知者。謂小不足以知大也。然則此云之二蟲又何知。其謂蜩鳩二蟲明矣。楚之南有冥靈者。以五百歲爲春。五百歲爲秋。上古有大椿者。以八千歲爲春。八千歲爲秋。而彭祖乃今以久特聞。

樾謹按彭祖人名也。然則冥靈大椿亦人名也。猶上文朝菌不知晦朔。蟪蛄不知春秋。蟪蛄蟲名也。而高誘注淮南道應篇曰。朝菌朝生暮死之蟲。則亦蟲名也。蓋論大年小年。當以有血氣之屬言之。故論小者。則以蟲言。朝菌也。蟪蛄也。蟲之中尤爲小年者也。論大者。則以人言。冥靈也。大椿也。彭祖也。人之中尤爲大年者也。若雜以草木。則不倫矣。大椿疑本作大春。以八千歲爲春。故以大春名之。漢有井大春。或卽取之。此後人誤解爲木名。遂加木旁作椿耳。據釋文冥靈之冥。亦或作楨。卽其例也。冥字不必從木。則春字亦何必從木乎。潘尼以木槿說朝菌。司馬彪又以木槿說大椿。幾乎無大小之辨。足知其不然矣。

湯之間棘也是已。

樾謹按釋文。棘李云。湯時賢人。此說得之矣。又引簡文云。一曰湯廣大也。棘狹小也。則以湯棘爲厲名。

是殆未讀列子者。湯之間棘見列子湯問篇上文所說鯤鵬及冥靈大椿皆本是篇故以此結之明所言之有徵也。

吾將爲賓乎。

樾謹按此本作吾將爲實乎與上吾將爲名乎相對成文。吾將爲名乎名者實之賓也。其意已足。吾將爲實乎當連下文讀之。其文曰。吾將爲實乎。鷦鷯巢於深林。不過一枝。偃鼠飲河。不過滿腹。歸休乎君。予無所用天下爲。蓋無所用天下則以實而言。又不足爲矣。故云吾將爲實乎。呂氏春秋求人篇載許由之言曰。爲天下之不治與。而旣已治矣。自爲與。啁噍巢於林。不過一枝。偃鼠飲於河。不過滿腹。歸已君乎。惡用天下。其文與此大略相同。彼云爲天下之不治與。卽此云吾將爲名乎。彼云自爲與。卽此云吾將爲實乎。實與賓形似。又涉上句實之賓也。而誤不可以不正。若如今本則爲賓。卽是爲名。兩文複矣。

非不嗁然大也。

樾謹按釋文。嗁本亦作号。崔作謬然。說文号部。号痛聲也。嗁謬說文所無。蓋皆号之俗體。施之於此義不可通。文選謝靈運初發都詩。李善注引此文作楞。當從之。爾雅釋天元楞虛也。虛則有大義。故曰楞然大也。釋文引李云。号然虛大貌。是固以楞字之義說之。

宋人有善爲不龜手之藥者。

樾謹按釋文引司馬云文拆如龜文也。又云如龜攢縮也。義皆未安。向云拘坼也。郭注亦云能令手不拘坼。然則龜字宜卽讀如拘。蓋龜有丘音。後漢西域傳龜茲讀曰丘慈是也。古丘音與區同。故亦得讀如拘矣。拘之言拘攢也。不龜者不拘攢也。龜文之說雖非攢縮之說。則是但不必以如龜爲說耳。

嗒焉似喪其耦齊物論

樾謹按喪其耦卽下文所謂吾喪我也。郭注曰。若失其配匹。未合喪我之義。司馬云耦身也。此說得之。然云身與神爲耦。則非也。耦當讀爲寓。寓寄也。神寄於身。故謂身爲寓。

夫大塊噫氣其名爲風

樾謹按大塊者地也。塊乃由之或體。說文土部。由墣也。蓋卽中庸所謂一撮土之多者。積而至於廣大。則成地矣。故以地爲大塊也。司馬云。大朴之貌。郭注曰。大塊者無物也。並失其義。此本說地籁。然則大塊非地而何。

小知閒閒

樾謹按廣雅釋詁。閒視也。小知閒閒。當從此義。謂好觀察人也。釋文曰。有所閒別。非是。故爲是舉。莊與楹厲與西施。恢恠惱怪道通爲一。

樾謹按釋文引司馬彪說以筵爲屋梁檻爲屋柱故郭注曰筵橫而檻縱然說文艸部筵莖也屋梁之說初非本義漢書東方朔傳以筵撞鍾文選答客難篇筵作筵李善注引說苑曰建天下之鳴鐘撞之以筵豈能發其音聲哉筵與筵通是古書言筵者謂其小也筵與檻以大小言廣與西施以好醜言舊說非是

而其子又以文之綸終

樾謹按釋文綸音倫崔云琴瑟絃也然以文之絃終其義未安郭注曰昭文之子又乃終文之緒則是訓綸爲緒今以文義求之上文曰彼非所明而明之故以堅白之昧終之昧與之綸必相對爲文周易繫辭傳故能彌綸天地之道京房注曰綸知也淮南子說山篇以小明大以近論遠高誘注曰論知也古字綸與論通淮南與明對言則綸亦明也以文之綸終謂以文之所知者終卽是以文之明終蓋彼非所明而明之故以堅白之昧終而昭文之子又以文之明終則仍是非所明而明矣故下曰終身無成也郭注尙未達其旨

有倫有義

樾謹按釋文云崔本作有論有議當從之下文云六合之外聖人存而不論六合之內聖人論而不議又曰故分也者有不分也辯也者有不辯也彼所謂分辯卽此有分有辯然則彼所謂論議卽此有論

有議矣。

瞿鵠子問乎長梧子曰吾聞之夫子。

樾謹按瞿鵠子必七十子之後人所稱聞之夫子謂聞之孔子也下文長梧子曰是黃帝之所聽熒也而丘也何足以知之丘卽是孔子名因瞿鵠子述孔子之言故曰丘也何足以知之也而讀者不達其意誤以丘也爲長梧子自稱其名故釋文云長梧子崔云名丘此大不然下文云丘也與女皆夢也予謂女夢亦夢也夫予者長梧子自謂也旣云丘與女皆夢又云予亦夢則安得卽以丘爲長梧子之名乎。

技經肯綮之未嘗養生主。

樾謹按郭注曰技之妙也常遊刃於空未嘗經槩於微礙也是以技經爲技之所經殊不成義技經肯綮四字必當平列釋文曰肯說文作冂字林同著骨肉也一曰骨無肉也綮司馬云猶結處也是肯綮並就牛身言技經亦當同之技疑枝字之誤素問三部九候論治其經絡王注引靈樞經曰經脈爲裏支而橫者爲絡古字枝與支通枝謂枝脈經謂經脈枝經猶言經絡也經絡相連之處亦必有礙於游刃庖丁惟因其固然故未嘗礙也。

族庖月更刀折也。

樾謹按郭注曰中骨而折刀也此於文義未合上文云良庖歲更刀割以用刀言則折亦以用刀言折謂折骨非謂刀折也哀元年左傳曰無折骨

指窮於爲薪火傳也不知其盡也

樾謹按郭注曰爲薪猶前薪也前薪以指指盡前薪之理故火傳而不滅此說殊未明了且爲之訓前亦未知何義郭注非也廣雅釋詁取爲也然則爲亦猶取也指窮於爲薪者指窮於取薪也以指取薪而然之則有所不給矣若聽火之自傳則忽然而不知其薪之盡也郭得其讀未得其義釋文引崔云薪火爝火也則并失其讀矣

是以人惡有其美也人聞世

樾謹按釋文惡音烏路反非也美惡相對爲文當讀如本字有者育字之誤釋文云崔本作育云賣也說文貝部賣箇也讀若育此育字卽賣之假字經傳每以鬻爲之鬻亦音育也以人惡育其美謂以人之惡鬻己之美也

是皆脩其身以下偃拊人之民

樾謹按下字衍文脩其身以偃拊人之民不當有下字涉下文以下拂其上者也因而誤衍耳
大多政法而不謀

樾謹按政字絕句大多政者郭注所謂當理無二而張三條以政之也法而不譟四字爲句列禦寇篇形譟成光釋文曰譟便僻也此譟字義與彼同謂有法度而不便僻也李訓安崔訓閒譟並失其義聽止於耳心止於符氣也者虛而待物者也

樾謹按上文云無聽之以耳而聽之以心無聽之以心而聽之以氣此文聽止於耳當作耳止於聽傳寫誤倒也乃申說無聽之以耳之義言耳之爲用止於聽而已故無聽之以耳也心止於符乃申說無聽之以心之義言心之用止於符而已故無聽之以心也符之言合也言與物合也與物合則非虛而待物之謂矣氣也者虛而待物者也乃申說氣字明當聽以氣也郭注曰遺耳目去心意而符氣性之自得此虛以待物者也誤以符氣二字連讀不特失其義且不成句矣

瞻彼闕者虛室生白吉祥止止

樾謹按止止連文於義無取淮南子俶真篇作虛室生白吉祥止也疑此文下止字亦也字之誤唐盧重元注列子天瑞篇曰虛室生白吉祥止耳亦可證止止連文之誤

妄則其信之也莫

樾謹按郭注曰莫然疑之此說非也莫然疑之不可但謂之莫且既云信之又何云疑乎莫者無也猶曰莫信之也不曰妄則莫信之而曰妄則其信之也莫取與上下句法一律耳

始乎諒常卒乎鄙。

樾謹按諒與鄙文不相對上文云始乎陽常卒乎陰始乎治常卒乎亂陰陽治亂皆相對而諒鄙不相對諒疑諸字之誤諸讀爲都爾雅釋地宋有孟諸史記夏本紀作明都是其例也始乎都常卒乎鄙都鄙正相對因字通作諸又誤作諒遂失其旨矣淮南子詮言篇曰故始於都者常大於鄙卽本莊子可據以訂正彼文大字乃卒字之誤說見王氏念孫讀書雜志

故忿設無由巧言偏辭

樾謹按由用也經傳由字訓用者不可枚舉此當以九字爲句設疑說字之誤大戴記子張問入官篇且夫忿數者獄之所由生也忿數與忿說同禮記儒行篇遽數之不能終其物正義曰數說也是其證也忿怒之說無所用其巧言偏辭故曰忿說無由巧言偏辭無由卽無用也下文獸死不擇音卽申明此句之義無用巧言偏辭所謂不擇音也郭氏不知由之訓用乃曰夫忿怒之作無他由也常由巧言過實偏辭失當是讀故忿設無由五字爲句巧言偏辭上必更有一由字於義方足是可知其非矣過度益也

樾謹按益當讀爲溢言過其度則溢矣上文曰夫兩喜必多溢美之言兩怒必多溢惡之言是其義惡成不及改

樾謹按不及改。樾言其速也。改且不及。速可知矣。上句曰。美成在久。此云惡成不及。改文不一律。而義相準。言美成之久。而惡成之速也。正見惡易而美難。郭注未達其旨。

其可以爲舟者。旁十數。

樾謹按。旁讀爲方。古字通用。尙書皋陶謨篇。方施象刑。惟明新序節士篇。方作旁。甫刑篇。方告無辜于上。論衡變動篇。方作旁。並其證也。在宥篇。出入無旁。卽出入無方。此本書段旁爲方之證。詩正月篇。民今方殆。鄭箋云。方且也。其可以爲舟者。方十數。言可以爲舟者。且十數也。釋文引崔曰。旁。旁枝也。蓋不知旁爲方段字。故語詞而誤以爲實義矣。

大枝折小枝泄。

樾謹按。釋文引崔云。泄洩同。然洩字之義。於此無取。殆非也。泄當讀爲抶。荀子非相篇。接人則用抶。楊注曰。抶。牽引也。小枝抶。謂見牽引也。詩七月篇。取彼斧斨。以伐遠揚。卽此所云大枝折也。又曰。猗彼女桑。卽此所云小枝抶也。鄭箋云。女桑。少枝。少枝卽小枝矣。猗乃掎之段字。說文手部。掎。偏引也。是與抶同義。說詳羣經平議。

故解之以牛之白頰者。與豚之亢鼻者。與人有痔病者。不可以適河。

樾謹按。郭注曰。巫祝解除。棄此三者。必妙選駢具。然後敢用。此說於故解之三字。殊不可通。上云宋有

荆氏者宜歛柏桑司馬云荆氏地名也疑此文解字亦是地名蓋各舉其地所有之事爲說也僖十五年左傳賂秦伯以河外列城五東盡虢略南及華山內及解梁城杜預注解梁城曰河東解縣此所云解卽其地矣解地近河故相傳以牛之白頰者豚之亢鼻者人有痔病者爲不可以適河也鳳兮鳳兮何如德之衰也

樾謹按如而古通用此如字當讀爲而而卽爾也蓋指鳳而言郭注以何如連讀非是

彼爲己以其知得其心以其心得其常心德充符

樾謹按以其知得其心句以其心得其常心句兩句相對彼爲己三字總冒此兩句郭讀彼爲己以其知爲句得其心以其心爲句而以得其常心四字屬下讀失之

受命於地唯松柏獨也在冬夏青青

樾謹按在疑正字之誤受命於地唯松柏獨也正與下文受命於天唯舜獨也正兩文相對舜爲大聖其正之義易見故不煩申說松柏則二木耳其正之義難見故必著冬夏青青一句以明之莊子行文錯綜變化未可以後世之文法繩之也學者不達而臆改爲在失之矣

彼何賓賓以學子爲

樾謹按賓賓之義釋文引司馬云恭貌張云猶賢賢也崔云有所親疎也簡文云好容貌皆望文生義

未達古訓。賓賓猶頻頻也。漢書司馬相如傳。仁頻并閭。顏注曰。頻字或作賓。是其例也。詩桑柔篇。國步斯頻。說文目部。作國步斯贊。書禹貢篇。海濱廣斥。漢書地理志。作海瀕廣潟。是皆賓聲頻聲相通之證。廣雅釋訓。頻頻比也。楊子法言學行篇。頻頻之黨。甚於鷗斯。皆可說此賓賓之義。彼且斬以淑詭幻怪之名聞。

樾謹按。淑與詭語意不倫。淑詭當讀爲弔詭。齊物論篇。其名爲弔詭。正與此同。弔作淑者。古字通用。哀十六年左傳。昊天不弔。周官大祝職。先鄭注引作閔。天不淑。是其證矣。

適見孔子食於其死母者。少焉。恂若。皆棄之而走。

樾謹按。恂若。猶恂然也。徐無鬼篇。衆狙見之。恂然棄而走。此云恂若。彼云恂然。文異義同。恂恂並寧之。段字說文。今部。寧。驚辭也。從今。匚聲。恂恂亦從匚聲。故得通用。釋文引司馬曰。驚貌得之矣。恂若。皆棄之而走。言。恂子皆驚而走也。蓋始焉不知其爲死母。就之而食。少焉覺其死。故皆驚走也。恂若二字。以其子言。不以其母言。釋文又引崔云。目動也。謂死母目動。然則其母不死。與下意不合矣。下文云。不見已焉爾。不得類焉爾。郭注曰。夫生者以才德爲類。死而才德去矣。故生者以失類而走也。若從崔說。死母之目尚動。是其才德未去。何爲以失類而走乎。

若然者過而弗悔。當而不自得也。大宗師、

樾謹按過者謂於事有所過失也當者謂行之而當也在衆人之情於事有所過失則悔矣行之而當則自以爲得矣真人不然故曰過而弗悔當而不自得也正文明言過郭注謂全當而無過失之是之謂不以心捐道不以人助天

樾謹按捐字誤釋文云郭作揖崔云或作楫所以行舟也其義彌不可通疑皆僞字之誤僞卽背字故郭注曰真人知用心則背道助天則傷生是郭所據本正作僞也

古之真人其狀義而不朋

樾謹按郭注曰與物同宜而非朋黨是訓義爲宜朋爲黨望文生訓殊爲失之此言其狀豈言其德乎義當讀爲峨峨與義並從我聲故得通用天道篇而狀義然義然卽峨然也朋讀爲堋易復彖辭朋來无咎漢書五行志引作堋來無咎是也其狀峨而不堋者言其狀峨然高大而不崩壞也廣雅釋詁峨高也釋訓峨峨高也高與大義相近故文選西京賦神山峨峨薛綜注曰峨峨高大也天道篇義然卽可以此說之郭不知義爲峨之假字於此文則訓爲宜於彼文則曰踴躍自持之貌皆就本字爲說失之

與乎其觚而不堅也

樾謹按郭注曰常遊於獨而非固守是讀觚爲孤然與不堅之義殊不相應釋文引崔云觚棱也亦與

不堅之義不應殆皆非也。養生主篇技經冇繁之未嘗而況大輒乎。釋文引崔云：槃結骨疑此觚字卽彼觚字骨之槃結是至堅者也。輒而不堅是謂真人。崔不知觚字故前後異訓耳。

厲乎其似世乎。

樾謹按郭注曰：至人無厲與世同行故若厲也。此注殊不可通且如注意當云世乎其似厲不當反言其似世也。今按世乃泰之假字。荀子榮辱篇橋泄者人之殃也。劉氏台拱補注曰：橋泄卽驕泰之異文。苟子他篇或作汎或作忼或作泰皆同漏泄之泄古多與外大害敗爲韵亦讀如泰也。又引賈子簡泄不可以得士爲證然則以世爲泰猶以泄爲泰也。猛厲與驕泰其義相應。釋文曰：厲崔本作廣廣大亦與泰義相應泰亦大也。若以本字讀之而曰似世則皆不可通矣。

以德爲循

樾謹按釋文曰：循本亦作修兩得然下文曰以德爲循者言其與有足者至於丘也則自以作循爲是說文彳部循順行也故曰與有足者至於丘若修字則無義矣蓋字相似而誤陸氏以爲兩得非

夫藏舟於壑藏山於澤謂之固矣然而夜半有力者負之而走昧者不知也

樾謹按山非可藏於澤且亦非有力者所能負之而走其義難通山疑當讀爲汕爾雅釋器翼謂之汕詩南有嘉魚篇毛傳曰：汕，汕櫟也。箋云：今之撩罟也。藏舟藏汕疑皆以漁者言恐爲人所竊故藏之乃

世俗常有之事故莊子以爲喻耳。

在太極之先而不爲高。

樾謹按下云在六極之下而不爲深則此當云在太極之上方與高義相應今作在太極之先則不與高義相應而轉與下文先天地生而不爲久其義相複矣周易繫辭傳曰易有太極釋文曰太極天也然則莊子原文疑本作在太極之上猶云在天之上也後來說周易者皆以太極謂天地未分之前於是疑太極當以先後言不當以上下言乃改太極之上爲太極之先而於義不可通矣淮南子覽冥篇曰引類於太極之上

已外生矣而後能朝徹

樾謹按爾雅釋詁朝早也朝徹猶早達也郭注曰豁然無滯見機而作斯朝徹也正得其義釋文引李云不崇朝而遠徹則當爲不朝徹矣

俄而子輿有病子祀往問之曰偉哉夫造物者將以子爲此拘拘也

樾謹按此當作子來有病下文曰俄而子來有病當作子輿有病何以明之淮南子精神篇曰子求行年五十有四而病僵僵脊管高于頂脇下迫頤兩脾在上燭營指天匍匐自闕於井曰偉哉造化者其以我爲此拘拘邪卽本莊子之文而作子求求者來字之誤尙書呂刑篇惟貨惟來馬融本來作求是

其例也。釋文引崔譏云：淮南作子永行年五十四而病僵僂抱朴子博喻篇亦云子永歎天倫之偉永亦求字之誤也。若是子輿則與求與永絕不相似無緣致誤故知此文本作子來與下文傳寫互易矣。予因以求時夜。

樾謹按釋文云一本無求字當從之下云浸假而化予之右臂以爲彈予因以求鴟炙蓋以彈求鴟乃可爲炙故曰因以求鴟炙若鷄則自能時夜旣化予之左臂以爲鷄則因以時夜可矣又何求焉求字卽涉下句而衍。

相造乎水者穿池而養給相造乎道者無事而生定。

樾謹按定疑足字之誤穿池而養給無事而生足兩句一律給亦足也足與定字形相似而誤管子中匡篇功定以得天與失天其人事一也今本定誤作足與此正可互證。

鼈萬物而不爲義。

樾謹按鼈卽說文鼈字其或體作鼈古或以齊爲之周官醢人職五齊七醢七菹三臠是也鼈與菹醢爲同類之物。鼈萬物猶云菹醢萬物故天道篇云鼈萬物而不爲戾郭於此無注彼注云變而相雜故曰鼈是訓鼈爲雜也蓋鼈合衆味而成釋名釋飲食曰齋濟也與諸味相濟成也故有相雜之義列禦寇篇使人輕乎貴老而鼈其所患釋文曰鼈亂也亂與雜義同然云雜萬物而不爲戾則義有未安矣。

知北遊篇若儒墨者師故以是非相鑿也此則當訓爲雜蓋儒墨兩家是非鑿起故雜也郭訓爲和義雖相通然言固各有當矣

日中始何以語女應帝王

樾謹按釋文引李云日中始人姓名賢者也此恐不然中始人名日猶云日者也謂日者中始何以語女也文七年左傳日衛不睦襄二十六年傳日其過此也昭七年傳日君以夫公孫段爲能任其事十六年傳日起請夫環並與此日字同義李以日中始三字爲人姓名失之矣崔本無日字

何問之不豫也

樾謹按爾雅釋詁豫厭也楚辭惜誦篇行婞直而不豫兮王逸注亦曰豫厭也是豫之訓厭乃是古義無名人深怪天根之多問故曰何問之不豫猶云何許子之不憚煩也簡文云豫悅也殊失其義

汝又何帛以治天下感予之心爲

樾謹按帛未詳何字釋文曰徐音藝又魚例反司馬云法也一本作寢以諸說參考之疑帛乃臬字之誤故有魚例反之音而司馬訓法亦卽臬之義也然字雖是臬而義則非臬當讀爲寢寢本從臬聲古文以聲爲主故或止作臬也一本作寢者破段字而爲正字耳一切經音義引通俗文曰夢語謂之寢無名人蓋謂天根所問皆夢語也故曰女又何寢以治天下感予之心爲

有人於此嚮疾彊梁物徹疏明學道不勸。

樾謹按釋文引崔云所在疾彊梁之人也則字當爲嚮疾又引李云敏疾如嚮也簡文云如嚮應聲之疾則字當爲響疾疑莊子原文本作鄉故各以意讀之耳文選羽獵賦蠻智如神善注曰蠻智疾也蠻與響同智與智同然則響自有疾義響疾連文響亦疾也自以作響爲長矣惟自來讀者皆以響疾彊梁爲句物徹疏明爲句殊不可通此當於徹字勸字絕句物讀爲勿古字通用尙書立政篇時則勿有閒之論衡譏告篇作時則物有閒之是也天道篇中心物愷釋文曰物本亦作勿此物勿通用見於本書者徹去也響疾彊梁物徹者言響疾彊梁而勿去也與疏明學道不勸相對爲文皆以六字爲一句因學者不知物爲勿之段字故失其讀矣。

萌乎不震不正。

樾謹按列子黃帝篇作罪乎不謚不止當從之罪讀爲罪說文山部作𡇗云山貌是也謚卽震之異文不謚不止者不動不止也故以罪乎形容之言與山同也今罪誤作萌正誤作止失其義矣據釋文則崔本作不謚不止與列子同可據以訂正。

子之先生不齊。

樾謹按下文郭注曰無往不平混然一之以管闕天者莫見其涯故似不齊張湛注列子黃帝篇引向

秀注同然則向郭皆讀齊如本字釋文音側皆反非是

吾鄉示之以太沖莫勝

樾謹按勝當讀爲朕勝本從朕聲故得通用莫朕者無朕也言無朕兆也郭注曰居太沖之極浩然泊心而元同萬方故勝負莫得厝其閒也此泥本字爲說未達假借之旨列子黃帝篇正作向吾示之以太沖莫朕張湛引向秀注曰居太沖之極皓然泊心元周萬方莫見其迹郭注正竊用向說但以不達假借之旨改其末四字耳

鯢桓之審爲淵止水之審爲淵流水之審爲淵淵有九名此處三焉

樾謹按審司馬云當爲蟠蟠聚也崔本作潘云回流所鍾之域也今以字義求之則實當爲瀘說文水部瀘大波也從水旛聲作潘者字之省司馬彪讀爲蟠誤也郭本作審則失其字矣又按列子黃帝篇云鯢旋之潘爲淵止水之潘爲淵溢水之潘爲淵沃水之潘爲淵汎水之潘爲淵雍水之潘爲淵汧水之潘爲淵肥水之潘爲淵是爲九淵焉九淵全列然於上下文殊不相屬疑爲它處之錯簡莊子所見已然雖不敢徑去而實非本篇文義所繫故聊舉其三耳

此页空白

諸子平議卷十八

莊子二

駢拇枝指出乎性哉。而侈於德。附贅縣疣。出乎形哉。而侈於性。駢拇。

樾謹按性之言生也。駢拇枝指生而已然者也。故曰出乎性。附贅縣疣。成形之後。而始有者也。故曰出乎形。德者所以生者也。天地篇曰。物得以生謂之德。是也。駢拇枝指出乎性。而以德言之。則侈矣。附贅縣疣。出乎形。而以性言之。則侈矣。崔云。德猶容也。司馬云。性人之本體也。混性與德。與形而一之。殊失其旨。

而離朱是已。

樾謹按而如古通用。而離朱是已。猶云如離朱是已。下文而師曠而曾史而楊墨並同。彼正正者不失其性命之情。

樾謹按上正字乃至字之誤。上文云。故此皆多駢旁枝之道。非天下之至正也。此云彼至正者。不失其性命之情。兩文相承。今誤作正正。義不可通。郭曲爲之說。非是。

今世之仁人蒿目而憂世之患。

諸子平議 莊子二

三四五

樾謹按司馬云蒿亂也郭注曰兼愛之迹可尙則天下之目亂矣以可尙之迹蒿令有患而遂憂之此爲陷人於難而後拯之也是以蒿目二字爲句解爲亂天下之目義殊未安蒿乃睢之假字玉篇目部睢庚韻切目明又望也是睢爲望視之貌仁人之憂天下必爲之睢然遠望故曰睢目而憂世之患睢與蒿古音相近故得通用詩靈臺篇白鳥翯翯孟子梁惠王篇作鶴鶴文選景福殿賦作睢然則蒿之通作睢猶翯之通作鶴與睢矣周易文言傳確乎其不可拔說文土部曰墠堅不可拔也卽本易義是確與墠通亦其例也

自虞氏招仁義以撓天下也

樾謹按國語周語好盡言以招人過韋注曰招舉也舊音曰招音翹漢書陳勝傳贊招八州而朝同列鄧展曰招舉也蘇林曰招音翹此文招字亦當訓舉而讀爲翹言舉仁義以撓天下也郭注曰故當而無傷者非仁義之招也然而天下奔馳棄我殉彼以失其常然是讀如本字然以仁義招人不得反云招仁義可知其非矣

雖有義臺路寢馬蹄

樾謹按義徐音儀當從之周官肆師職鄭注曰古者書儀但爲義是義卽古儀字也儀臺猶言容臺淮南子覽冥篇容臺振而掩覆高注曰容臺行禮容之臺儀與容異名同實蓋是行禮儀之臺故曰儀臺

也。

燒之剔之刻之雒之。

樾謹按司馬彪解雒之曰。謂羈雒其頭也。是以雒爲絡之假字。然下文連之以羈轡。乃始言羈絡之事。此恐非也。雒疑當爲烙。說文火部新附有烙字。曰灼也。今官馬以火烙其皮毛爲識。卽其事矣。

夫赫胥氏之時。

樾謹按釋文引司馬云。赫胥時上古帝王也。此爲允當。又曰。一云有赫然之德。使民胥附。故曰赫胥。蓋炎帝也。此望文生訓。殊不足據。炎帝卽神農也。胠篋篇旣云赫胥氏。又云神農氏。其非一人明矣。赫胥疑卽列子書所稱華胥氏。華與赫一聲之轉耳。廣雅釋器。赫赤也。而古人名赤者多字華。羊舌赤字伯華。公西赤字子華。是也是華亦赤也。赤謂之赫。亦謂之華。可證赫胥之卽華胥矣。

然則鄉之所謂知者。不乃爲大盜積者也。胠篋。

樾謹按不字衍文。此卽上文而斷之。不當作疑詞。下文曰。故嘗試論之。世俗所謂知者。有不爲大盜積者乎。所謂聖者。有不爲大盜守者乎。則因此文而推論之。用者乎作問詞。宜有不字矣。此文不字。卽涉下文而衍。

故田成子有乎盜賊之名。而身處堯舜之安。小國不敢非。大國不敢誅。十二世有齊國。

樾謹按釋文曰。自敬仲至莊子九世。知齊政。自太公和至威王。三世爲齊侯。故云十二世。此說非也。本文是說田成子。不當追從敬仲數起。疑莊子原文本作世世有齊國。言自田成子之後。世有齊國也。古書遇重字。止於字下作二字以識之。應作世二。有齊國。傳寫者誤倒之。則爲二世有齊國。於是其文不可通。而從田成子追數至敬仲。適得十二世。遂臆加十字於其上耳。

脣竭則齒寒。

樾謹按此竭字。當讀爲竭其尾之竭。說文篆說解曰。竭其尾故謂之豕。是也。蓋竭之本義爲負舉。竭其尾。卽舉其尾也。此云脣竭者。謂反舉其脣以向上。

故遂於大盜揭諸侯竊仁義。并斗斛權衡符璽之利者。

樾謹按此二十一字作一句讀。蓋揭諸侯竊仁義云云。皆大盜之利也。人苟遂於大盜之利。則必軒冕弗能勸。斧鉞弗能禁。如下文所云矣。郭注曰。重賞罰以禁盜。然大盜者。又逐而竊之。則反爲盜用矣。是誤以逐屬大盜言。失其旨。并失其讀。

人大喜邪毗於陽。大怒邪毗於陰。在宥。

樾謹按釋文。毗如字。司馬云。助也。一云并也。然下文云。陰陽并毗。四時不至。寒暑之和不成。則訓助已不可通。訓并更爲失之矣。此毗字。當讀爲毗劉。暴樂之毗爾雅釋詁。毗劉暴樂也。合言之。則曰毗劉分。

言之則或止曰劉詩柔柔篇。捋采其劉是也。或止曰毗。此言毗於陽。毗於陰是也。暴樂毛傳作爆爍。鄭箋云。捋采之則爆爍而疏。然則爆爍猶剝落也。喜屬陽。怒屬陰。故大喜則傷陽。大怒則傷陰。毗陰。毗陽。言傷陰陽之和也。故四時不至。寒暑之和不成。若從司馬訓。毗爲助。則下三句不貫矣。淮南子原道篇。人大怒破陰。大喜墜陽。與此同義。

其動也縣而天。

樾謹按釋文曰。向本無而字。當從之。郭注曰。動之則係天而踊躍也。以係天釋縣天。疑其所據本亦無而字也。而與天篆文相似。而卽天字之誤而衍者。

故賢者伏處大山嶺巖之下。

樾謹按釋文。大山音泰。亦如字。當以讀如字爲是。此泛言山之大者。不必東嶽泰山也。嶺當爲湛。文選封禪文。湛恩厖鴻。李注曰。湛深也。湛巖猶深巖。因其以山巖言。故變從水者而從山耳。山言其大巖言其深。義正相應。學者不達其義。而音大爲泰。失之矣。田子方篇。其神經乎大山而無介入乎淵泉而不濡。釋文。大音泰。失與此同。文選風賦。緣泰山之阿。古詩。冉冉孤生竹。結根泰山阿。夫風之所緣。竹之所生。非必泰山也。其原文應並作大山。泛言山之大者。後人誤讀爲泰。并改作泰耳。

吾未知聖知之不爲桁楊接摺也。仁義之不爲桎梏鑿枘也。焉知曾史之不爲盜跖嚆矢也。

樾謹按嚆矢未詳何物。向云矢之鳴者也。則因其字從口而爲之說。崔本作蒿。云蕭蒿可以爲箭。此更曲說。未聞矢以蒿爲之也。釋文稱或作矯。矯揉也。疑古本如此。說文矢部。矯。揉箭箙也。漢書嚴安傳有矯箭控弦之語。正可以說此文。蓋摺也。柄也。矢也。皆物也。接之鑿之矯之。則皆人也。接字見說文木部。云續木也是。凡接續字本當作接摺者。桁楊之楔也。柄者。桎梏之孔也。言聖知爲桁楊接其摺。仁義爲桎梏鑿其柄。曾史爲桀跖矯其矢也。淮南子有大者爲柱梁。小者爲接摺之說。鄭康成注考工記。有調其鑿枘之說。則誤以接摺鑿枘爲皆二字連文。自漢世已然。釋文所引諸說。宜其皆誤矣。

禍及止蟲。

樾謹按止蟲卽豸蟲也。爾雅釋蟲。有足謂之蟲。無足謂之豸。是也。史記五帝紀。鳥獸蟲蛾。正義曰。蛾音豸。直起反。直起之音與止相近。宣十七年左傳。庶有豸乎。豸卽止也。此云禍及止蟲。止卽豸也。

吐爾聰明。

樾謹按吐當作杜。言杜塞其聰明也。

有大物者不可以物。物而不物。故能物物。

挈汝適復之撓撓以游無端。
樾謹按郭斷不可以物。物爲句。失其讀矣。此當讀不可以物爲句。物而不物爲句。

樾謹按郭於撓撓下出注曰。撓撓自動也。提挈萬物使復歸自動之性。卽無爲之至也。此未得其解爾。雅釋詁適往也。然則適復猶往復也。撓撓亂也。廣雅釋詁撓亂也。重言之則爲撓撓矣。適復之撓撓。此世俗之人所以不能獨往獨來也。惟大人則提挈其適復之撓撓者。而與之其游於無端。故曰挈汝適復之撓撓以游無端。二句本止一句。郭失其解。并失其讀矣。

應於禮而不諱

樾謹按諱讀爲達。達諱並從韋聲。故廣雅釋詁曰。諱避也。韋昭注周語晉語並曰。達避也。是二字聲近義通。應於禮而不諱。卽不違也。郭注曰。自然應禮。非由忌諱。則失之迂曲矣。

夫子曰。夫道覆載萬物者也。天地。

樾謹按此與下節並冠以夫子曰。釋文引司馬云。莊子也。一云老子也。然下文有云夫子問于老聃曰。則夫子非老子明矣。據下老子答辭曰。丘予告若而所不能聞。與而所不能言。則問老聃者。自是孔子。故釋文曰。夫子仲尼也。以後例前。則此兩夫子曰。亦是孔子之言矣。

吾子明於此十者。則韜乎其事心之大也。

樾謹按郭注曰。心大故事無不容也。此未得事字之義。事心猶立心也。言其立心之大也。禮記郊特性篇。鄭注曰。事猶立也。釋名釋言語曰。事傳也。傳立也。並其證也。如郭注。則是心足以容事。而非事心矣。

呂氏春秋論人篇事心乎自然之塗亦以事心連文義與此同足證郭注之誤。

方且爲緒使

樾謹按緒使疑本作使緒故郭注曰將興後世事役之端以事役字釋使字以端字釋緒字也下句曰方且爲物絃使緒物絃兩文相對言爲事作端緒爲物作絃束也若作緒使不特意不可通且與下句不倫矣

雖然願先生之言其風也

樾謹按風當讀爲凡猶云言其大凡也風本從凡聲故得通用

汝將固驚邪

樾謹按固讀爲胡胡固並從古聲故得通用汝將胡驚邪言汝與真渾沌遇則不驚也郭注曰故與世同波而不自失則雖遊於世俗而泯然無迹豈必使汝驚哉正得其意古書胡字或以故字爲之管子侈靡篇公將有行故不送公墨子尚賢中篇故不察尚賢爲政之本也皆以故爲胡之證禮記哀公問篇鄭注曰固猶故也然則以固爲胡猶以故爲胡矣

而今也以天下惑予雖有祈嚮不可得也

樾謹按祈字無義司馬云祈求也則但云予雖有求嚮足矣郭注云雖我有求嚮至道之情則又增出情

字殆皆非也。祈疑所字之誤。言天下皆惑。予雖有所嚮往。不可得也。祈所字形相似。故誤耳。下同。
以二缶鍾惑而所適不得矣。

樾謹按二缶鍾之文。未知何義。釋文云。缶應作垂。鍾應作踵。言垂脚空中。必不得有之適也。此於莊子之意不合。所適謂所之也。郭注曰。各自信據。故不知所之是也。如陸氏說。則以適爲適意之適。當云不得其適。不當云所適不得也。今按鍾當作踵。而二則一字之誤。缶則企字之誤。企下從止。缶字俗作缶。其下亦從止。兩形相似。因致誤耳。文選歎逝賦注引字林曰。企舉踵也。一切經音義十五引通俗文曰。舉踵曰企。然則企踵猶舉踵也。人一企踵。不過步武之間耳。然以一企踵惑。則已不得其所適矣。故下云而今也以天下惑。予雖有所嚮。其庸可得邪。以天下惑極言其地之大。以一企踵惑極言其地之小也。上文二人惑則勞而不至。惑者勝也。而今也以天下惑。予雖有所嚮。不可得也。以天下對二人言。則以人之多寡言。此以天下對一企踵言。則以地之廣狹言。一企踵誤爲二缶鍾。則不得其義矣。明於天。通於聖。六通四辟於帝王之德者。天道、

樾謹按上文天道帝道聖道並列。此云明於天。承天道而言。通於聖。承聖道而言。六通四辟於帝王之德。承帝道而言。曰六曰四。極言其無所不通。無所不辟也。天下篇六通四辟。小大精粗。其運無乎不在。是其義也。釋文以六氣四方說之。則非言帝王之德矣。

因任已明而原省次之。

樾謹按郭注曰物各自任則罪責除也此未得其義下文云原省已明而是非次之是非已明而賞罰次之然則此時尙未有是非未有賞罰又何罪責之有乎今按省之言省察也原與省同義晏子春秋問下篇春省耕而補不足者謂之遊管子戒篇作春出原農事之不本者謂之遊是原省義同也蓋旣因物而任之又從而原省之於是其是非可得而賞罰可加矣

賓禮樂

樾謹按賓當讀爲擯謂擯斥禮樂也與上句退仁義一律郭注曰以性情爲主也則以本字讀之其義轉迂達生篇曰賓於鄉里逐於州部此卽假賓爲擯之證

世人以形色名聲爲足以得彼之情夫形色名聲果不足以得彼之情則知者不言言者不知而世豈識之哉

樾謹按果不足以得彼之情衍不字莊子之意謂形色名聲果足以得彼之情則所恃乎得情者莫如言矣而知者不言言者不知世又何從識之哉正見得彼之情不在形色名聲也此二十七字本一氣相屬妄增不字則語意隔絕果字則字上下相應之妙全失矣達生篇世人以爲養形足以存生而養形果不足以存生則世奚足爲哉亦衍不字而如古通用如養形果足以存生則世奚足爲哉兩

句一氣今衍不字則亦隔絕矣凡此皆淺人拘泥字句者所妄加不達莊子文法也。

孰隆施是天運

樾謹按此承上雲雨而言隆當作降謂降施此雲雨也書大傳隆谷鄭注曰隆讀如厖降之降蓋隆從降聲古音本同荀子天論篇隆禮尊賢而王韓詩外傳隆作降齊策歲八月降雨下風俗通義祀典篇降作隆是古字通用之證

天有六極五常

樾謹按六極五常疑卽洪範之五福六極也常與祥古字通儀禮士虞禮記薦此常事鄭注曰古文常爲祥是其證也說文弌部祥福也然則五常卽五福也下文曰九洛之事治成德備其卽謂禹所受之洛書九類乎

一死一生一債一起所常無窮而一不可待

樾謹按一不可待者皆不可待也大戴記衛將軍文子篇則一諸侯之相也盧注曰一皆也荀子勸學篇一可以爲法則君子篇一皆善也謂之聖楊注曰一皆也是一有皆義郭注曰不能待之以一與語意未合

今而夫子亦取先王已陳芻狗取弟子遊居寢臥其下

樾謹按上取字如字下取字當讀爲聚周易萃象傳以正也釋文曰聚苟作取漢書五行志內取茲師古曰取讀如禮記聚塵之聚是聚取古通用

故西施病心而贖其里其里之醜人見而美之歸亦捧心而贖其里其里之富人見之堅閉門而不出貧人見之挈妻子而去之走

樾謹按兩其里字皆不當疊病心而贖捧心而贖文義甚明若作贖其里則不可通矣皆涉下句而衍外無正而不行

樾謹按正乃匹字之誤禮記緇衣篇唯君子能好其正鄭注曰正當爲匹字之誤也是其例矣此云中無主而不止外無匹而不行與宣三年公羊傳自內出者無匹不行自外至者無主不止文義相似自外至者無主不止故此言中無主而不止也自內出者無匹不行故此言外無匹而不行也因匹誤爲正郭注遂以正已爲說殊非其義則陽篇自外入者有主而不執由中出者有正而不距正亦當爲匹誤與此同

夫白鶲之相視眸子不運而風化蟲雄鳴於上風雌應於下風而化

樾謹按而化一本作而風化當從之郭注曰鶲以眸子相視蟲以鳴聲相應俱不待合而便生子故曰風化是郭所據本兩句皆作風化故總釋之如此也

故曰夫恬淡寂寞虛無爲此天地之平而道德之質也刻意

樾謹按質當讀爲至史記蘇秦傳趙得講於魏至公子延索隱曰至當爲質謂以公子延爲質也是至質古通用至可爲質質亦可爲至矣道德之質卽道德之至也天道篇曰夫虛靜恬淡寂寞無爲者天地之平而道德之至文與此同而字正作至是其明證

故曰聖人休休焉則平易矣刻意

樾謹按休焉二字傳寫誤倒此本作故曰聖人休休焉則平易矣天道篇故帝王聖人休休焉則虛與此文法相似可據訂正

滑欲於俗思以求致其明繕性

樾謹按釋文滑音骨亂也崔云治也此當從崔說爲長上文繕性於俗學以求復其初崔注繕亦訓治蓋二句一義繕也滑也皆治也故曰求復其初求致其明若訓滑爲亂則與求字之義不貫矣滑得訓治者滑猶汨也說文水部汨治水也是其義也玉篇手部曰汨亦搘字然則滑之與汨猶搘之與汨矣禮樂偏行則天下亂矣

樾謹按郭注曰以一體之所履一志之所樂行之天下則一方得而萬方失也是偏爲一偏之偏故郭以一體一志說之釋文作偏而音遍非是

心與心識知而不足以定天下。

樾謹按識知二字連文詩曰不識不知是識知同義故連言之曰識知也心與心識知而不足以定天下明必不識不知而後可言定也諸家皆斷識字爲句非是向本作職尤非。

人卒九州穀食之所生舟車之所通人處一焉秋水、

樾謹按人卒二字未詳何義司馬訓卒爲衆崔訓卒爲盡皆不可通且下云人處一焉則此不當以人言人卒疑大率二字之誤人閒世篇率然拊之釋文曰率或作卒是率卒形似易誤之證率誤爲卒因改大爲人以合之據至樂篇人卒聞之盜跖篇人卒未有不興名就利者是人卒之文本書所有然施之于此不可通矣大率者總計之辭上云計四海之在天地之間也又云計中國之在海內計與大率其義正同。

梁麗可以衝城。

樾謹按司馬云梁麗小船也崔云屋棟也然小船與屋棟皆非所以衝城詩皇矣篇與爾臨衝毛傳曰臨臨車也衝衝車也正義曰兵書有作臨車衝車之法墨子有備衝之篇知臨衝俱是車也然則此云可以衝城其爲是車明矣徐無鬼篇君亦必無陳鶴列於麗譙之間郭注曰麗譙高樓也司馬曰麗譙樓觀名也此所云梁麗疑是車之有樓者若左傳所稱樓車矣文選辨亡論衝棚息於朔野李善注曰

字略作轎樓也可爲衝車有樓之證。

於是逡巡而卻告之海曰夫千里之遠不足以舉其大千仞之高不足以極其深。

樾謹按海字當在曰夫二字之下。

故曰忠諫不聽蹲循勿爭至樂、

樾謹按郭注曰唯中庸之德爲然此不知何義殆不得其旨而妄說也蹲循當讀爲逡巡古書逡巡字或作逡遁漢鄭固碑逡遁退讓是也此又作蹲循者據外物篇帥弟子而跋於縠水釋文引字林云跋古蹲字然則蹲循者跋循也漢碑作逡遁莊子書作蹲循字異而音義同矣忠諫不聽蹲循勿爭謂人主不聽忠諫則爲人臣者當逡巡而退勿與之爭也下文曰故夫子胥爭之以殘其形言子胥事不聽忠諫之君而必欲與之爭故殘其形也學者不達蹲循之義遂失其解并莊子引古語以起下文其意亦不顯矣。

若果養乎予果歡乎。

樾謹按養當讀爲恙爾雅釋詁恙憂也若果恙乎予果歡乎恙與歡對猶憂與樂對也言若之死非憂予之生非樂也恙與養古字通詩二子乘舟篇中心養養傳訓養爲憂卽本雅詁矣司馬本養作暮乃字之誤。

胡蝶胥也。

樾謹按釋文曰。胡蝶胥也。一名胥也。此失其義。當屬下句讀之。本云胡蝶胥也。化而爲蟲。與下文鴟掇千日爲鳥。兩文相對。千日爲鳥。言其久也。胥也。化而爲蟲。言其速也。列子天瑞篇釋文曰。胥少也。謂少時也。得其義矣。

人又反入於機。

樾謹按又作當久。字之誤也。久者老也。上文黃輓生乎九猷。釋文引李注曰。九宜爲久。久老也。是其義也。人久反入於機者。言人老復入於機也。列子天瑞篇。正作人久入於機。用志不分。乃凝於神。達生。

樾謹按凝當作疑。下文梓慶削木爲鏤。鏤成見者驚猶鬼神。卽此所謂乃凝於神也。列子黃帝篇。正作疑。張溝注曰。意專則與神相似者也可據以訂正。覆郤萬方。陳乎前而不得入其舍。

樾謹按萬下脫物字。此本以覆郤萬物爲句。方陳乎前而不得入其舍爲句。方者並也。方之本義爲兩舟相並。故方有並義。荀子致仕篇。莫不明通。方起以尙盡矣。楊注曰。方起並起。漢書楊雄傳。雖方征僑與偓佺兮。師古注曰。方謂並行也。皆其證也。方陳乎前。謂萬物並陳乎前也。今上句脫物字。而以方字

屬上讀則所謂陳前者果何指歟郭注曰覆郤雖多而猶不以經懷是其所據本有物字蓋正文是萬物故以多言若如今本作萬方當以廣大言不當以多言也列子黃帝篇正作覆郤萬物方陳乎前而不得入其舍可據以訂正

有張毅者高門縣薄無不走也

樾謹按無不走也語意未明司馬云走至也言無不至門奉貴富也亦殊迂曲走乃趣之壞字文選幽通賦李善注引此文曰有張毅者高門縣薄無不趣義也字正作趣但衍義字耳呂氏春秋必已篇曰張毅好恭門閭帷薄聚居衆無不趨高誘注曰過之必趨淮南子人閒篇曰張毅好恭過宮室廊廟必趨見門閭聚衆必下嘶徒馬圉皆與伉禮然不終其壽內熱而死其義更明莊子文不備故學者莫得其解耳

沈有履竈有髻

樾謹按司馬云沈水汙泥也則當與水有罔象等句相次不當與竈有髻相次也沈當爲燧燧從甚聲沈從尤聲兩音相近詩蕩篇其命匪諶說文心部引作天命匪忱常棣篇和樂且湛禮記中庸篇引作和樂且耽並其證也燧之通作沈猶諶之通作忱湛之通作耽矣白華篇印烘於燧毛傳曰燧竈也是燧竈同類故以燧有履竈有髻並言之耳鄭裨諶字竈諶卽燧之假字漢書古今人表作裨湛湛亦燧

之段字李善注文選鄒陽上吳王書曰湛今沈字又注答賓戲曰湛古沈字然則以沈爲燧卽以湛爲燧也

若夫以鳥養養鳥者宜棲之深林浮之江湖食之以委蛇

樾謹按委蛇未詳何物李云大鳥食蛇然未聞養鳥者必食之以蛇也司馬云委蛇泥鰌此亦臆說今按至樂篇云夫以鳥養養鳥者宜棲之深林遊之壇陸浮之江湖食之鰐鰩隨行列而止委蛇而處然則此文宜亦當云食之以鰐鰩委蛇而處傳寫有闕文耳且云委蛇而處方與下句則平陸而已矣文氣相屬若無而處二字下句便不貫矣

一上一下以和爲量山木

樾謹按此本作一下一上以和爲量上與量爲韵今作一上一下失其韵矣古書往往倒文以協韵後人不知而誤改者甚多秋水篇無東無西始於元冥反於大通亦後人所改莊子原文本作無西無東與通爲韵也王氏念孫已訂正矣

尊則議

樾謹按議當讀爲俄詩賓之初筵篇側弁之俄鄭箋云俄傾貌尊則俄謂崇高必傾側也古書俄字或以義爲之說見王氏經義述聞尙書立政篇亦或以議爲之管子法禁篇法制不議則民不相私議亦

俄也。謂法制不傾喪也。又或以儀爲之。荀子成相篇君法儀禁不爲儀亦俄也。謂君法傾喪則當禁使不爲也。

吾敬鬼尊賢親而行之無須臾離居然不免於患。

樾謹按崔譏本無離字而以居字連上句讀當從之。呂氏春秋慎人篇胼胝不居高誘訓居爲止無須臾居者無須臾止也。正與上句行字相對成義學者不達居字之旨而習於中庸不可須臾離之文遂妄加離字而居字屬下讀失之矣。下文居得行而不名處亦以居與行對言郭注曰居然自得此行非是。

王獨不見夫騰猿乎其得枮梓豫章也攬蔓其枝而王長其閒。

樾謹按郭注曰遭時得地則申其長技是讀長爲長短之長然於本文之義殊爲未合司馬云兩枝相去長遠也則就樹木言義更非矣此當就猿而言謂猿得枮梓豫章則率其屬居其上而自爲君長也故曰王長其閒釋文王往况反長丁亮反頗得其讀。

人貌而天虛緣而葆真清而容物田子方

樾謹按郭注以人貌而天四字爲句殆失其讀也此當以人貌而天虛爲句人貌天虛相對成義緣而葆真爲句與清而容物相對成義虛者孔竅也淮南子汜論篇若循虛而出入高注曰虛孔竅也訓孔

竊故亦訓心淑真篇虛室生白注曰虛心也大元斷初一曰斷心滅斧失初一曰刺虛滅刃滅刃與滅斧同刺虛與斷心同故毅初一曰懷威滿虛猶言滿心也說詳太元經此云人貌而天虛卽人貌而天心言其貌則人其心則天也學者不達虛字之義誤屬下讀則人貌而天句文義不完下兩句本相儼者亦參差不齊矣養生主篇緣督以爲經釋文引李云緣順也緣而葆真者順而葆真也上綴虛字亦爲無義

諸大夫蹙然曰先君王也

樾謹按先君下疑奪命字此本作先君命王也故下文曰先君之命王其無它

文王觀於國則列士壞植散羣

樾謹按司馬云植行列也散羣言不養徒衆也一云植者疆界頭造屋以待諫者也此兩說並未得植字之義宣二年左傳華元爲植杜注曰植將主也列士必先有主而後得有徒衆故欲散其羣必先壞其植也植之訓主說詳羣經平議

楚王與凡君坐少焉楚王左右曰凡亡者三

樾謹按楚王左右言凡亡者三人也郭注曰言有三亡徵也非是若正汝形一汝視天和將至攝汝知一汝度神將來舍知北遊

樾謹按一汝度當作正汝度蓋此四句變文以成辭其實一義也攝汝知卽一汝視之意所視者專一故所知者收攝矣正汝度卽正汝形之意度猶形也淮南子道應篇文子道原篇並作正汝度可據以訂正

是天地之委形也

樾謹按司馬云委積也於義未合國策齊策願委之於子高注曰委付也成二年左傳王使委于三吏杜注曰委屬也天地之委形謂天地所付屬之形也下三委字並同邀於此者

樾謹按說文無邀字彳部微循也卽今邀字也又曰循行順也然則邀亦順也邀於此者猶言順於此者郭注曰人生而遇此道是以遇訓邀義既迂曲且于古訓無徵殆失之矣

神農隱几擁杖而起

樾謹按旣言擁杖而起不當言隱几疑隱几字涉上文神農隱几闔戶晝暝而衍

光曜問乎無有曰夫子有乎其無有乎光曜不得問而孰視其狀貌

樾謹按淮南子道應篇光曜不得問上有無有弗應也五字當從之惟無有弗應故光曜不得問也此脫五字則義不備

此页空白

諸子平議卷十九

莊子三

夫春氣發而百草生。正得秋而萬寶成。庚桑楚

樾謹按得字疑衍文。莊子原文蓋作正秋而萬寶成。周易說卦傳兌正秋也。萬物之所說也。正義曰。正秋而萬物皆說成也。卽本莊子之義是其證也。得字蓋涉下句夫春與秋豈無得而然哉。因而誤衍。春氣發而百草生。正秋而萬寶成。文義已足不必加此一字與上句相儻偶也。

函車之獸介而離山

樾謹按方言獸無偶曰介一本作分非

抱汝生

樾謹按釋名釋姿容曰抱保也。相親保也是抱與保義通。抱汝生卽保汝生。郭注曰無攬乎其生之外也。猶泥抱字爲說未達假借之旨。

夫外轄者不可繁而捉。將內捷。內轄者不可繆而捉。將外捷。

樾謹按郭於此無注而注下文曰雖繁手以執之。綢繆以持之。弗能止也。則訓繁爲繁手殆不可通矣。

繁疑繁字之誤繁俗作繳漢書司馬相如傳名家苛察繳繞如淳曰繳繞猶纏繞也此以繁而捉繆而捉並言繁謂繁繞繩謂綢繆廣雅釋詁繁與綢繆並訓纏是其義一也繁繁形似因而致誤耳

終日嗥而嗌不嗄

樾謹按釋文嗄本作嘁徐音憂當從之老子終日號而不嗄傅奕本作歟卽嘁之異文也楊子太元經夷次三日柔嬰兒于號三日不嗄二宋陸王本皆如是蓋以嘁與柔爲韵可知楊子所見老莊皆作嘁也

終日握而手不捥

樾謹按說文無捥字角部覲角覲曲也疑卽此捥字以角言則從角以手言則從手變覲爲捥字之所以孳乳浸多也終日握而手不捥謂手不拳曲也崔云捥寄也殊非其義

夫至人者相與交食乎地而交樂乎天

樾謹按郭注曰自其無心皆與物共釋文引崔云交俱也李云共也是皆未解交字之義徐無鬼篇曰吾與之邀樂於天吾與之邀食於地與此文異義同交卽邀也古字止作徼文二年左傳寡君願徼福於周公魯公此云邀食乎地邀樂乎天語意正相似作邀者後出字作交者假借字詩桑扈篇彼交匪傲漢書五行志作匪徼匪傲卽其例矣

不可內於靈臺

樾謹按不可上當有萬惡二字。上文云若是而萬惡至者皆天也而非人也不足以滑成其文已足。萬惡不可內於靈臺則又起下意。下文云靈臺者有持而不知其所持而不可持者也皆承此言之讀者不詳文義誤謂不可內於靈臺與不足以滑成兩句相屬故刪萬惡二字耳文選廣絕交論李善注引此文正作萬惡不可內於靈臺。

券外者志乎期費

樾謹按郭注曰有益無益期欲損己以爲物也則旣言志又言期於義複矣釋文曰期卒也費耗也卒有所費耗也然志乎卒耗於義亦不可通今按荀子書每用綦字爲窮極之義王霸篇目欲綦色耳欲綦聲楊倞注曰綦極也亦或作期議兵篇曰已綦三年然後民可信也有坐篇曰綦三年而百姓往矣是期與綦通期費者極費也費謂財用也呂氏春秋安死篇非愛其費也高注曰費財也期費之義與綦色綦聲相近彼謂窮極其聲色此謂窮極其財用也故下文曰志乎期費者惟賈人也

與物且者其身之不能容焉能容人

樾謹按且卽苟且之且詩東門之枌篇穀旦于差韓詩旦作且云苟且也是重言爲苟且單言爲且也上文與物窮者郭注曰窮謂終始是窮爲窮極之義苟且與窮極義正相反也釋文曰且始也非是

孰知有無死生之一守者吾與之爲友。

樾謹按一守者一道也。道字古讀若守故與守通。知北游篇大馬曰子巧與有道與曰臣有守也。守卽道字達生篇仲尼曰子巧乎有道邪曰我有道也是其明證說本王氏念孫

道者德之欽也。

樾謹按說文广部厥陳輿服于庭也。小爾雅廣詰厥陳也。此欽字卽厥之段字蓋所以生者爲德而陳列之卽爲道故曰德之厥也。漢書哀帝紀注引李斐曰陳道也是其義矣。

介者移畫外非譽也。

樾謹按郭注曰畫所以飾容貌也。別者之貌旣以虧殘則不復以好醜在懷故移而棄之然云外非譽似不當以容貌言崔云移畫不拘法度也當從之漢書司馬相如傳瘳以陸離師古注曰瘳自放縱也卽此移字之義桓六年穀梁傳以其畫我公羊傳作化我何休注曰行過無禮謂之化卽此畫字之義蓋人旣別足不自顧惜非譽皆所不計故不拘法度也。

下之質執飽而止是狸德也。徐無鬼

樾謹按廣雅釋獸狸貓也。貓之捕鼠飽而止矣故曰是狸德也。秋水篇曰駢驥驥驥一日而馳千里捕鼠不如狸狌此本書以狸爲貓之證御覽引尸子曰使牛捕鼠不如貓狌之捷莊子言狸狌尸子言貓

牲一也。釋文曰：狸德謂貪如狐狸也。未得其義。

察士無凌諱之事則不樂。

樾謹按禮記鄉飲酒篇：愁以時察。鄭注曰：察猶察察嚴殺之貌也。老子俗人察察河上公注曰：察察急且疾也。然則察有嚴急之意，故以凌諱爲樂。李云：察識也。則與上文知士複矣。

枯槁之士宿名。

樾謹按宿讀爲縮。國語楚語：縮於財用則匱。戰國秦策：縮劍將自誅。韋昭高誘注並曰：縮取也。枯槁之士縮名，猶言取名也。釋文曰：宿積久也。于義未安。又引王云：其所寢宿唯名而已。更爲迂曲。由不知宿爲縮之假字耳。

農夫無草萊之事則不比。商賈無市井之事則不比。

樾謹按比通作庀。周官遂師疏云：周禮之內云比者，先鄭皆爲庀是也。國語魯語子將庀季氏之政焉。又曰：夜庀其家事。韋注並曰：庀治也。農夫惟治草萊之事，故無草萊之事則不庀。商賈惟治市井之事，故無市井之事則不庀也。郭注曰：能同則事同，所以比是以本字讀之非是。

其求唐子也，而未始出域，有遺類矣。

樾謹按有遺類矣。當連下夫字爲句，有遺類矣。夫與襄二十四年左傳有令德也。夫有令名也。夫句法

相似類謂種類也。詩裳裳者華序棄賢者之類。正義曰：類謂種類是也。求亡子而不出域，則其亡子不可得，必無遺類矣。故曰有遺類矣夫。反言以明之也。郭注失其讀所說未得。

夫楚人寄而蹠閭者。

樾謹按夫字當屬上有遺類矣爲句。蹠當讀謫方言謫怒也。廣雅釋詁謫責也。楚人寄而蹠閭者，謂寄居人家而怒責其閭者也。與下文夜半於無人之時而與舟人鬪，均此楚人之事，皆喻其自以爲是也。郭注曰：俱寄止而不能自投於高地，於義殊不可通。

王射之敏給搏捷矢。

樾謹按郭於敏給下出注曰：敏疾也。給續括也。是以敏給屬王言殆非也。敏給二字同義。後漢書酈炎傳言論給捷李賢注曰：給敏也。是其證也。故國語晉語曰：知羊舌職之聰敏肅給也。使佐之荀子性惡篇曰：齊給便敏而無類。並以敏給對言。然則郭以給爲續括非古義矣。敏給當以狃言。謂狃性敏給能搏捷矢也。捷讀爲接爾雅釋詁接捷也是捷與接聲近義通。莊十二年左氏經文宋萬弑其君捷僖十三年鄭伯捷卒文十六年晉人納捷菑于邾公羊捷並作接人閒世篇必將乘人而鬪其捷釋文曰：捷本作接。此捷接通用見於本書者搏捷矢卽搏接矢。謂以手搏而接其矢也。郭注曰：捷速也。夫矢自無不速。又何必言捷乎。

故足之於地也踐雖踐恃其所不踐而後善博也。

樾謹按兩踐字並當作淺或字之誤或古通用也足之於地止取容足而已故曰足之於地也淺然容足之外雖皆無用之地而不可廢也故曰雖淺恃其所不踐而後善博也外物篇曰夫地非不廣且大也人之所用容足耳然則廁足而墊之致黃泉人尚有用乎卽此義也下文曰人之知也少雖少恃其所不知而後知天之所謂也少與淺文義相近若作踐則不可通矣

舊國舊都望之暢然雖使丘陵草木之緝入之者十九猶之暢然況見見聞聞者也則陽

樾謹按緝字司馬云盛也郭云合也於義俱通入之者十九釋文曰謂見十識九也此未得其義入者謂入於丘陵草木所掩蔽之中也入之者十九則其出於外而可望見者止十之一耳而猶覺暢然喜悅故繼之曰況見見聞聞者也郭曰見所嘗見聞所嘗聞而猶暢然則於況見見聞聞句不復可通遂增益之曰況體其體用其性也於莊子本義不合矣

以十仞之臺縣衆閒者也

樾謹按此承見見聞聞而言以十仞之臺而縣於衆人耳目之間此人所共見共聞者非猶夫丘陵草木之緝入之者十九也其爲暢然可知矣郭注曰衆之所習雖危猶閒此誤讀閒爲閑於義殊不可通蓋由不解上文故於此亦失其旨

築十仞之城城者既十仞矣則又壞之

樾謹按下十字疑七字之誤城者既七仞則雖未十仞而去十仞不遠矣故壞之爲可惜若既十仞則直謂之已成可耳不當言既十仞也下文曰今兵不起七年矣此王之基也明是以七仞喻七年其爲字誤無疑

故鹵莽其性者欲惡之孽爲性萑葦兼葭始萌以扶吾形尋擢吾性

樾謹按爲性萑葦兼葭六字爲句郭於萑葦下出注云萑葦害禾稷欲惡傷正性此失其讀也始萌以扶吾形尋擢吾性尋與始相對爲義尋之言寢尋也漢書郊祀志寢尋於泰山矣晉灼曰尋遂往之意也始萌以扶吾形言其始若足以扶助吾形也尋擢吾性言寢尋旣久則拔擢吾性也郭解扶吾形曰形扶疎則神氣傷亦爲失之

至齊見辜人焉

樾謹按釋文曰辜罪也李云謂應死人也此失其義辜謂辜磔也周官掌戮殺王之親者辜之鄭注曰辜之言枯也謂磔之是其義也漢書景帝紀改磔曰棄市師古曰磔謂張其尸也是古之辜磔人者必張其尸於市故柏矩推而強之解朝服而幕之也

子乎子乎

樾謹按子乎子乎乃歎辭也。詩綱繆篇子兮子兮毛傳曰子兮者嗟茲也。管子小稱篇嗟茲乎聖人之言長乎哉。說苑貴德篇曰嗟茲乎我窮必矣並以嗟茲爲歎辭。說詳王氏引之經義述聞此云子乎子乎正與子兮子兮同義。子當讀爲噬。釋文不爲子字作音蓋失其義久矣。

匿爲物而愚不識

樾謹按下文大爲難而罪不敢重爲任而罰不勝遠其塗而誅不至曰罪曰罰曰誅皆謂加之以刑也。此曰愚則與下文一律矣。釋文曰愚一本作遇。遇疑過字之誤。廣雅釋詁曰過責也。因其不識而責之是謂過不識。呂氏春秋適威篇曰煩爲教而過不識數爲令而非不從巨爲危而罪不敢重爲任而罰不勝與此文義相似而正作過不識。高誘注訓過爲責可據以訂此文之誤。過誤爲遇又臆改爲愚耳。

是故丘山積卑而爲高江河合水而爲大。

樾謹按水乃小字之誤。卑高小大相對爲文。

陰陽相照相蓋相治

樾謹按蓋當讀爲害爾雅釋言蓋割裂也。釋文曰蓋舍人本作害。是蓋害古字通。陰陽或相害或相治猶下句云四時相代相生相殺也。

季真之莫爲接子之或使

樾謹按尙書微子篇殷其勿或亂正四方多士篇時予乃或言枚傳竝曰或有也禮記祭義篇庶或饗之孟子公孫丑篇夫旣或治之鄭趙注並曰或有也此云季真之莫爲接子之或使或與莫爲對文莫無也或有也周易益上九莫益之或擊之亦以莫或相對

木與木相摩則然外物

樾謹按淮南子原道篇亦云兩木相摩而然然兩木相摩未見其然下句云金與火相守則流疑此句亦當作木與火下文云水中有火乃焚大槐又云利害相摩生火甚多衆人焚和月固不勝火是此章多言火益知此文之當爲木與火矣蓋木金二物皆畏火故舉以爲言見火之爲害大也

相結以隱

樾謹按李云隱病患也然病患非所以相結郭注曰隱括進之謂也然隱括所以正曲木亦非所以相結也隱當訓爲私呂氏春秋圜道篇分定則下不相隱高注曰隱私也文選赭白馬賦恩隱周渥李善引國語注曰隱私也相結以隱謂相結以恩私舊說皆非

天之穿之日夜無降

樾謹按降當作瘡卽癰之籀文素問宣明五氣篇膀胱不利爲癰又五常政大論篇其病癰闕日夜無

瘠謂不癰闊也

官事果乎衆宜。

樾謹按論語子路篇行必果皇侃義疏曰果成也衆有所宜而後官事以成故曰官事果乎衆宜。

彼視三釜三千鍾如鶴雀蚊虻相過乎前也寓言

樾謹按雀字衍文也釋文云元嘉本作如鶴蚊無虻字則陸氏所據本尙未衍雀字故元嘉本作鶴蚊。陸氏但言其無虻字不言其無雀字也惟鶴與蚊虻一鳥一蟲取喻不倫王云謂取大小相縣以喻三釜三千鍾之多少此不然也夫至人之視物一映而已豈屑屑於三釜三千鍾之多寡而必分別其爲鶴爲蚊乎今按釋文云鶴本作觀疑是古本如此其文蓋曰彼視三釜三千鍾如觀蚊虻相過乎前也淮南子俶真篇毀譽之於己猶蚊虻之一過也義與此同因觀誤作鶴則鶴蚊虻三字不倫乃有刪一虻字使蚊與鶴兩文相稱者元嘉本是也又有增一雀字使鶴雀與蚊虻兩文相稱者今本是也皆非莊子之舊矣

越人三世弑其君王子搜患之讓王

樾謹按釋文云搜淮南子作翳然翳之前無三世弑君之事史記越世家索隱以搜爲翳之子無顓據竹書紀年翳爲其子所弑越人殺其子立無余又見弑而立無顓是無顓以前三君皆不善終則王子

搜是無顯之異名無疑矣淮南子蓋傳聞之誤當據索隱訂正。

顏闔對曰恐聽者謬而遣使者罪不若審之。

樾謹按上者字衍文恐聽謬而遣使者罪恐其以誤聽得罪也聽卽使者聽之非聽者一人使者一人也呂氏春秋貴生篇正作恐聽繆而遣使者罪。

夫生者豈特隨侯之重哉。

樾謹按隨侯下當有珠字若無珠字文義不足呂氏春秋貴生篇作夫生豈特隨侯珠之重也哉當據補。

子綦爲我延之以三旌之位。

樾謹按綦字衍文此昭王自與司馬子綦言當稱子不當稱子綦。

不能自勝則從神無惡乎。

樾謹按釋文曰不能自勝則從絕句此讀是也又曰一讀至神字絕句則失之呂氏春秋審爲篇亦載此事作不能自勝則縱之神無惡乎文子下德篇淮南子道應篇并疊從之二字作從之從之則從神之不當連讀明矣又按從呂氏春秋作縱則當讀子用反而釋文無音亦失之。

不能自勝而強不從者此之謂重傷。

樾謹按重傷猶再傷也。不能自勝，則已傷矣。又強制之而不使縱，是再傷也。故曰此之謂重傷。呂氏春秋審爲篇高誘注曰：重讀復重之重，是也。釋文音直用反，非是。

天寒既至，霜雪既降，吾是以知松柏之茂也。

樾謹按天乃大字之誤。國語魯語大寒降，韋昭注曰：謂季冬建丑之月大寒之後也。若作天寒既至，失其義矣。呂氏春秋慎人篇亦載此事，正作大寒。

道德於此則窮通爲寒暑風雨之序矣。

樾謹按德當作得。呂氏春秋慎人篇作道得於此，則窮達一也。爲寒暑風雨之序矣。疑此文窮通下亦當有一也二字，而今奪之。

時祀盡敬而不祈喜。

樾謹按喜當作禧。爾雅釋詁：禧，福也。不祈禧者，不祈福也。呂氏春秋誠廉篇作時祀盡敬而不祈福也。與此字異義同。

樂與政爲正，樂與治爲治。

樾謹按呂氏春秋誠廉篇作樂正與爲正，樂治與爲治，疑此文亦當同。傳寫誤倒。子之罪大極，重盜跖。

樾謹按極當作殛爾雅釋言殛誅也言罪大而誅重也極殛古字通書洪範篇鯀則殛死多士篇大罰殛之僖二十八年左傳明神殛之昭七年傳昔堯殛鯀于羽山釋文並曰殛本作極

卽將疏戚無倫貴賤無義長幼無序五紀六位將何以爲別乎

樾謹按五紀司馬云歲月日星辰麻數然與疏戚貴賤長幼之義不相應殆非也今按五紀卽五倫也六位卽六紀也白虎通三綱六紀篇曰六紀者謂諸父兄弟族人諸舅師長朋友也此皆所以爲疏戚貴賤長幼之別不曰五倫而曰五紀不曰六紀而曰六位古人之語異耳家語八官篇羣僕之倫也王肅注曰倫紀也然則倫紀得通稱矣

孔子不見母

樾謹按孔子無不見母事疑仲子之誤卽謂避兄離母之陳仲子也下句匡子不見父釋文云案此事見孟子不知兩事並見孟子也

十步一人千里不留行說劍

樾謹按十步之內輒殺一人則歷千里之遠所殺多矣而劒鋒不缺所當無撓者是謂十步一人千里不留行極言其劒之利也行以劒言非以人言下文所謂行以秋冬是也司馬云十步與一人相擊輒殺之故千里不留於行也未得其義

今日試使士敦劍。

樾謹按詩闕宮篇敦商之旅鄭箋云敦治也然則敦劍猶治劍司馬云敦斷也試使用劍相擊斷截也失之迂曲。

曩者先生有緒言而去漁父

樾謹按楚辭九章款秋冬之緒風王注曰緒餘也讓王篇曰其緒餘以爲國家是緒與餘同義緒言者餘言也先生之言未畢而去是有不盡之言故曰緒言釋文曰猶先言也非是今者丘得過也若天幸然

樾謹按釋文曰過或作遇當從之讓王篇君過而遺先生食釋文過本亦作遇是二字形近易誤也過字義不可通釋文謂得過失也則失之迂曲矣

闔胡嘗視其良旣爲秋柏之實矣列御寇

樾謹按釋文曰良者良人謂緩也此與下句之義不屬又云良或作埌冢也此說近之埌猶墳也墳墳本疊韵字應帝王篇以處墳墳之野是也故墳亦得謂之埌管子度地篇郭外爲之土閭閭與埌同外物篇胞有重閭郭注曰閭空曠也其義亦相近自是有德者以不知也而況有道者乎

樾謹按自是二字絕句。若緩之自美其儒。是自是也。有德者已不知有此。有道者更無論矣。故曰有德者以不知也。而況有道者乎。以讀爲已。郭注所說殊未明了。

歸精神乎無始。而甘冥乎無何有之鄉。

樾謹按釋文冥如字。又云本亦作瞑。又音眠。當從之。瞑眠古今字。文選養生論。達旦不瞑。李善注曰。瞑古眠字。是也。甘瞑卽甘眠。徐無鬼篇。孫叔敖甘寢秉羽。而郢人投兵。司馬云。言叔敖願安寢恬臥。以養德于廟堂之上。折衝于千里之外。此云甘瞑。彼云甘寢。其義一也。並謂安寢恬臥也。釋文讀冥如字。失之。淮南子淑真篇曰。甘瞑于溷淵之城。卽本之此。

槁項黃馘者。

樾謹按馘者。俘馘也。非所施於此。馘疑穀之叚字。說文尸部。馘頭痛也。黃馘謂頭痛而色黃。

宵人之離外刑者。

樾謹按郭注曰。不由明坦之途者。謂之宵人。釋文引王注云。非明正之徒。謂之宵夜之人也。皆望文生義。未爲塙詰。宵人猶小人也。禮記學記篇。宵雅肄三。鄭注曰。宵之言小也。習小雅之三。謂鹿鳴四牡。皇皇者華也。然則宵人爲小人。猶宵雅爲小雅矣。字亦作宵。方言曰。宵小也。史記太史公自序。申呂宵矣。徐廣曰。宵音瘠。瘠猶衰微。義亦相近。文選江文通雜體詩。宵人重恩光。李善注。引春秋演孔圖曰。宵人

之世多飢寒宋均曰宵猶小也此說得之

故有貌愿而益

樾謹按益當作溢溢之言驕溢也荀子不苟篇以驕溢人是也謹願與驕溢義正相反有堅而綈有緩而針

樾謹按綈者慢之假字針者悍之假字堅強而又惰慢紓緩而又桀悍故爲情貌相反也

醉之以酒而觀其側

樾謹按釋文曰側不正也一云謂醉者喜傾側冠也王云側謂凡爲不正也然上文觀其忠觀其敬云云所觀者皆舉美德言之此獨觀其不正則不倫矣諸說皆非也其云側或作則當從之則者法則也國語周語曰威儀有則既醉之後威儀反反威儀佖佖是無則矣故曰醉之以酒而觀其則周書官人篇作醉之酒以觀其恭與此文語意相近大戴記文王官人篇作醉之以觀其不失也不失卽謂不失法則也

賊莫大乎德有心而心有睫

樾謹按郭注曰役心於眉睫之間則僞已甚矣然正文言心有睫非役心於眉睫之謂郭注非也心有睫謂以心爲睫也人於目之所不接而以意度之謂其如是是心有睫也聖人不逆詐不意不信豈如

是乎故曰賊莫大乎德有心而心有睫下文曰及其有睫也而內視內視而敗矣然則心有睫正內視之謂內視者非謂收視返聽也謂不以目視而以心視也後世儒者執一理以斷天下事近乎心有睫矣

天下多得一察焉以自好天下

樾謹按郭注斷天下多得一爲句釋文曰得一偏得一術王氏念孫謂天下多得一察焉以自好當作一句讀一察謂察其一端而不知其全體今按郭讀文不成義當從王讀惟以一察爲察其一端義亦未安察當讀爲際一際猶一邊也廣雅釋詁際邊並訓方是際與邊同義得其一際卽得其一邊正不知全體之謂察際並從祭聲古音相同故得通用耳下文云不該不偏一曲之士也一際與一曲其義相近

爲之大過已之大順

樾謹按已讀爲以順讀爲馴古字並通以用也以之大馴謂用之太習熟也

名山三百支川三千

樾謹按名山當作名川字之誤也名川支川猶言大水小水下文曰禹親自操橐耜而九雜天下之川可見此文專以川言不當言山也若但言支川而不言名川則是舉流而遺其原於文爲不備矣襄十

一年左傳曰名山名川是山川並得言名學者多見名山謚見名川故誤改之耳呂氏春秋有始覽篇淮南子墜形篇並曰名川六百

雖然墨子真天下之好也

樾謹按真天下之好謂其真好天下也卽所謂墨子兼愛也下文曰將求之不得也雖枯槁不舍也此求字卽心誠求之之求求之不得雖枯槁不舍卽所謂摩頂放踵利天下爲之也郭注未得

龜長於蛇

樾謹按此卽莫大於秋毫之末而大山爲小之意司馬云蛇形雖長而命不久龜形雖短而命甚長則不以形言而以壽言真爲龜長蛇短矣殊非其旨

惠施日以其知與人之辯特與天下之辯者爲怪此其柢也

樾謹按與人之辯義不可通蓋涉下句天下之辯者而衍之字柢與氐通史記秦始皇紀大氐盡畔秦吏正義曰氐猶略也此其柢也猶云此其略也上文卵有毛鷄三足以下皆是

此页空白

諸子平議卷二十

商子

無宿治則邪官不及爲私利於民而百官之情不相稽則農有餘日邪官不及爲私利於民則農不敵而不敵而有餘日則草必墾矣懲令

樾謹按此當作無宿治則邪官不及爲私利於民而百官之情不相稽邪官不及爲私利於民則農不敵百官之情不相稽則農有餘日農不敵而有餘日則草必墾矣傳寫有奪誤耳

信則臣不敢爲邪

樾謹按臣當作官因官誤作宦又誤作臣耳下文申說此文曰上信而官不敢爲邪可證臣字之誤

民無所於食則必農

樾謹按民字衍文也上云則辟淫游食之民無所於食此云無所於食則必農兩文相承若有民字必并有辟淫游食之五字於文方足今無此五字故知亦無民字也下文云壹山澤則惡農慢惰倍欲之民無所於食無所於食則必農文與此同可證矣施氏先秦諸子本正無民字當據以訂正

愛子惰民不窺

諸子平議 商子

樾謹按此承上文而言亦當作愛子不惰食惰民不窳因有兩惰字寫者於上惰字下卽接寫民不窳遂并誤刪上不字耳

農不能喜酣醜

樾謹按詩采芑篇路車有醜毛傳曰醜赤貌字亦作艴瞻彼洛矣篇韎韐有醜白虎通爵篇引作韎韐有艴是也醜爲赤貌此以酣醜連文蓋謂酒醉而面赤矣

則誅愚亂農

樾謹按誅通作朱莊子庚桑楚篇人謂我朱愚卽此文誅愚矣大元童次七修侏侏范望注曰侏侏無所知也義與愚近作誅作朱並侏之假字說文金部銅鈍也亦聲近而義通

官屬少徵不煩

樾謹按徵上當補則字方與通篇文法一律

姦民無主則爲姦不勉爲姦不勉則姦民無樸本姦民無樸則農民不敗

樾謹按勉當爲免言爲姦者不得免也樸之言樸屬也考工記鄭注曰樸屬猶附著堅固貌也字通作僕詩旣醉篇景命有僕毛傳曰僕附也姦民無樸謂姦民無所附屬也本字衍文因讀者誤以樸爲根株故衍本字耳鄭宋本於姦民無樸下有樸根株也四字此乃舊解之誤入正文者本字之衍職此之

由。

皆作壹而得官爵農戰、

樾謹按皆作壹而得官爵當作皆從壹孔而得官爵下云民見上利之從壹空出也則作壹上利之從壹孔出卽承此文而言下云則作壹乃始言其效然則此文不得云作壹明矣要靡事商賈爲技藝皆以避農戰具備國之危也民以此爲教者其國必削

樾謹按具備國之危也六字乃衍文下云要靡事商賈爲技藝皆以避農戰民以此爲教則粟焉得無少而兵焉得無弱也兩文大略相同而無此六字故知此亦不當有矣

技藝之足以距口也

樾謹按距字無義乃餲字之誤莊子人閒世篇釋文引李云餲食也崔云字或作互或作餲然則餲卽餲之俗字足以餲口卽足以餲口也

國作一歲者十歲強作一十歲者百歲強修一百歲者千歲強

樾謹按作之一字於文未明第三句作修又一律且十歲強百歲強並無一字而云作一十歲者修一百歲者此兩一字亦殊嫌贅設矣反覆求之乃知此文承上句是以聖人作壹搏之也而言本云國作壹一歲者十歲強作壹十歲者百歲強作壹百歲者千歲強乃極言作壹之效也讀者誤謂壹一同

字而於作壹一歲句刪去壹字於下兩句又誤以壹十歲壹百歲連讀改壹爲一末句作字又誤爲修於是其義全失矣本篇作壹字屢見此文四言作壹乃一篇之大指也傳寫錯誤亟宜訂正煩言飾辭而章無用

樾謹按章乃竟字之誤竟猶終也言終歸無用也

興兵而伐必取必能有之去強

樾謹按取下當疊取字蓋有取而不能有者矣故曰取必能有之也斬令篇作兵出必取取必能有之當據補

國好力日以難攻好言日以易攻

樾謹按兩日字乃曰字之誤說民篇國好力曰以難攻國好言曰以易攻文與此同可據以訂正

治國能富者貧令貧者富則國多力

樾謹按此當作治國能令貧者富富者貧今本傳寫誤倒則能富者貧句文義不足矣且據上文云貧者使以刑則富富者使以賞則貧是貧者句宜在富者之前也說民篇治國之舉貴令貧者富富者貧與此正同可據訂

舉口數生者著死民者削

樾謹按民字衍文。此蓋言舉戶口之數。生者則著之。死者則削之也。襄二十七年左傳。仲尼使舉是禮也。釋文引沈注曰。舉謂紀錄之也。此舉字義與彼同。境內篇云。四境之內。丈夫女子皆有名於上者。著死者削。則又奪生字。當作生者著死者削。可與此文互訂。

輕者不止。則重者無從至矣。說民。

樾謹按至當作止。上文云。行刑重其輕者。輕者不生。則重者無從至矣。蓋謂民且不敢犯輕罪。自不敢犯重罪。故重者不至。卽去強篇所謂輕者不生。重者不來也。此云行刑重其重者。輕其輕者。輕者不止。則重者無從止矣。蓋謂民既敢於犯輕罪。亦必敢於犯重罪。故重者無從止也。乃涉上文而亦誤作至字。則與商子之意大謬矣。

國敵者必王。

樾謹按國下當補無字。去強篇作國無敵者。強必王。可證。

故王者刑於九而賞出一。

樾謹按此當作刑於九而賞於一。去強篇曰。王者刑九賞一。強國刑七賞三。削國刑五賞五。是刑九賞一。乃刑多賞少之意。非如農戰篇所云。利從壹孔出也。不當作出一明矣。下云。民之所欲萬而利之所出一。與此義本不相蒙。今作賞出一。蓋涉下文而誤。

山林居什一藪澤居什一谿谷流水居什一都邑蹊道居什四算地

樾謹按都邑蹊道下有闕文今據來民篇補云都邑蹊道居什一惡田居什一良田居什四非生之常也而爲之者名也

樾謹按生性古通用此生字當讀爲性上文曰求名失性之常

故民生則計利死則慮名利之所出不可不審也

樾謹按名下當疊名字蓋曰名利之所出不可不審也故下云利出於地則民盡力名出於戰則民致死正承此文而言古書遇重文止作二小畫識之傳寫奪去耳

故其農勉而戰戢也

樾謹按此戢非戢止之義當讀爲捷詩鴛鴦篇戢其左翼釋文引韓詩曰戢捷也蓋戢與捷聲近而義同下云戰戢則鄰危若以本字讀之義不可通矣

故天地設而民生當此之時也

語誤入此篇於上下文皆不屬當刪

親則別開塞

樾謹按當作親親則別傳寫奪一親字。

親親者以私爲道也而中正者使私無行也。

樾謹按中正當作立中因立與正形近而誤遂倒其文爲中正耳上文曰故賢者立中設無私而民曰仁此文承彼而言則當爲立中不當爲中正矣且立中者使私無行與上文立君者使賢無用兩文相對益知今本之非。

故以愛王天下者并刑力征諸侯者退德。

樾謹按并當讀爲屏謂屏除之也以愛則屏刑以力則退德兩文相對作并者假字。

故效於古者先得而防治於今者前刑而法。

樾謹按得當爲德德刑對文作得者古字通。

二者名貿實易。

樾謹按貿者侔之假字言其名相侔其實則相易也漢高彪碑貿昔蘊檀亦是假貿爲侔集韻曰貿又音侔。

此吾以殺刑之反於德而義合於暴也。

樾謹按殺乃效字之誤此吾以效刑之反於德猶言此吾以明刑之反於德也荀子正論篇故桀紂無

天下而湯武不弑君.由此效之也.楊倞注曰.效明也.蓋古語如此.事本不可不搏也.壹言.

樾謹按事猶立也.言立本不可不搏也.禮記郊特牲篇.信事人也.鄭注曰.事猶立也.是其義矣.字亦作傳.周官大宰職.以任百官.鄭注曰.任猶傳也.釋文曰.傳側吏反.猶立也.賈疏曰.東齊人物立地中爲傳.故國者其搏力也.以富國強兵也.

樾謹按國上有闕文.據上文云.夫聖人之治國也.能搏力能殺力.下文云.治國者貴民一則所闕者.當是治字.

下修令而不時移.

樾謹按令乃今字之誤.下修今.與上法古爲對文.下文曰.故聖人之爲國也.不法古.不修今.是其證.夫離朱見秋毫百步之外.而不能以明目易人.烏獲舉千鈞之重.而不能以多力易人.夫聖人之存體性.不可以易人.

樾謹按易者延也.詩皇矣篇.鄭箋曰.施猶易也.延也.是易與延同義也.離朱之明目.烏獲之多力.聖人之體性.皆不能延及於他人之身.故曰不可易也.

四戰之國.好舉興兵以距四鄰者.國危.兵守.

樾謹按舉衍字蓋卽與字之誤而衍者。

客不盡夷城客無從入。

樾謹按上客字衍文城字當在不字之上其文曰城不盡夷客無從入與下文城盡夷客若有從入相對爲義夷平也。

給從從之不治而燂之使客無得以助攻備。

樾謹按上從字下有闕文下從字當在不治之下治亦當爲給此文當云給從而口之不給從而燂之蓋承發梁撤屋而言所發之梁所撤之屋其材尙可作它用若其力有餘則取之而歸若其力不足則從而燂之無使爲敵用也給與不給以力之有餘不足言或兼時之緩急地之遠近也給治古通用爾雅釋天大歲在未曰協洽童子逢盛碑作協給是也上作給正字下作治假字上下文用字不同者古書往往有之至上句所闕字則不可以意補矣。

行治曲斷以五里斷者王以十里斷者強宿治者削斬令

樾謹按曲字無義疑由字之誤言行治由乎斷也宿治者削上尙有日治者王夜治者強八字當據去強說民二篇補

農宏姦勝則國必削

樾謹按宏字義不可通。乃飢字之誤。史記司馬相如傳。徼飢受詛。索隱曰。飢倦也。農飢姦勝。謂農夫倦殆而姦邪者勝也。凡從谷之字。隸變作姦。故文選子虛賦飢作姦。姦字闕壞。止存右旁。姦字因誤爲宏矣。去強篇農而姦勸。其兵弱國必削至亡。亦以農姦對文成義。姦勸猶姦勝也。其而字乃奐之壞字。奐弱也。

授官予爵出則祿不以功是無當也。

樾謹按此本云。授官予爵出祿不以功。則是無當也。傳寫者誤移則字於祿字之上。遂不可通。

國富而不戰偷生於內六蟲必弱。

樾謹按此當作國富而不戰。毒輸於內。六蟲生必弱。去強篇云。國強而不戰。毒輸於內。禮樂蟲官生必削。與此文略同。可證也。因奪毒字。而輸又誤作偷。遂移下句生字於上。非其本文矣。

六蟲曰禮樂曰詩書曰修善曰孝悌曰誠信曰貞廉曰仁義曰非兵曰羞戰國有十二者上無使農戰必貧至削。

樾謹按上言六蟲。下言十二者。而中所列凡九事。於數皆不合。疑禮樂詩書孝悌當爲六事。本作曰禮。曰樂。曰詩。曰書。曰修善。曰孝。曰悌。曰誠信。曰貞廉。曰仁義。曰非兵。曰羞戰。故總之爲十二也。然則何以稱六蟲。曰六蟲二字乃衍文也。六蟲之文。見去強篇。其文曰。農商官三者。國之常官也。三官者。生蟲官。

者六曰歲曰食曰玩曰好曰志曰行此說六蟲最得蓋歲也食也農之蟲也玩也好也商之蟲也志也行也官之蟲也去強篇又曰國有禮有樂有詩有書有善有修有孝有悌有廉有辯國有十者上無使戰必削至亡然則商子之意不以此爲六蟲明矣而去強篇又曰國用詩書禮樂孝弟善修治者敵至必削國不至必貧國不用八者治敵不敢至雖至必郤則又變十爲八農戰篇曰詩書禮樂善修仁廉辯慧國有十者上無使戰是其數雖亦爲十而所列十事又微有不同疑傳寫或增或減非必皆其本文所言之數各就其事言之耳實當從此文作十二者爲定且此言修善而彼分善修爲二於義亦未安也今定爲十二事而以六蟲二字爲衍文似得之矣

重刑少賞上愛民民死賞重賞輕刑上不愛民民不死賞

樾謹按死賞皆當作死上聲之誤也去強篇曰重罰輕賞則上愛民民死上重賞輕罰則上不愛民民不死上可證此文之誤

經者不至重者不來

樾謹按不至乃不生之誤當據去強篇訂

罪重刑輕刑至事生

樾謹按此本作重重輕輕刑至事生亦當據去強篇訂

力生強。強生威。威生德。德生力。

樾謹按此皆蒙力生強而言。乃又云德生力。於義難通。據去強篇云。刑生力。力生強。強生威。威生惠。惠生於力。與此文略同。惠卽德也。又據說民篇云。刑生力。力生強。強生威。威生德。德生於刑。亦與此文略同。刑卽力也。然則此文當作德生於力。

故不多惠言而剋其賞修權、

樾謹按不字衍文也。多惠言而剋其賞。乃口惠而實不至之意。故與數加嚴令而不致其刑。相對爲文。行賞賤祿。不稱其功。則戰士不用。

樾謹按賤當作賦。形近而誤。漢書哀帝紀。皆以賦貧民。師古注曰。賦給與也。

此其土之不足以生其民也。以有過秦民之不足以實其土也。來民、

樾謹按有過上不當有以字衍文也。此蓋言韓魏之土不足生其民。秦民不足以實其土。二者相較。則韓魏土之不足。殆有甚焉。故曰有過秦民之不足以實其土也。

意民之情。其所欲者田宅也。而晉之無有也。信秦之有餘也。必如此而民不西者。秦土戚而民苦也。

樾謹按信字必字絕句。承上言。韓魏之上不足生其民。則其田宅之無有也。信矣。秦之民不足實其土。則其田宅之有餘也。必矣。故曰晉之無有也。信秦之有餘也。必

今秦之以強者

樾謹按上言三晉之所以弱者此當言今秦之所以強者奪所字衍強字

天下有不服之國則王以此春闢其農夏食其食秋取其刈冬陳其寶以大武搖其本以廣文安其嗣
樾謹按闢當作違寶當作葆皆同聲假借字陳當作凍形近而誤也此數語見周書大武篇其文曰四時一春達其農二夏食其穀三秋取其刈四冬凍其葆孔晁注曰凍謂發露其葆聚商君所說卽本周書大武之文故曰以大武搖其本也又曰以廣文安其嗣今周書無廣文篇而文傳篇曰文王受命之九年時維暮春在鄗召太子發曰嗚呼我身老矣吾語汝我所保與我所守傳之子孫然則所謂以廣文安其嗣者豈卽此篇乎

而王何爲受爵而重復乎

樾謹接受乃愛字之誤愛爵而重復見上文

有能用之費此之半

樾謹按上之字衍文費此二字誤倒當云有能用此費之半

萬乘之國不敢蘇其兵中原賞刑

樾謹按荀子議兵篇蘇刃者死楊倞注曰蘇讀爲傃傃向也謂相向格鬪者此蘇字讀與彼同

昔湯封於贊茅。

樾謹按隱十一年左傳而與鄭人蘇忿生之田溫原絲樊隰城攢茅杜注攢茅在修武縣北此言湯封贊茅卽其地也漢書地里志河南郡偃師戶鄉殷湯所都臣瓚曰湯居毫今濟陰縣是也其地與修武不遠皇甫謐帝王世紀乃有三毫之說而謂湯都在南毫穀熟穀熟故城在今商丘縣則去修武絕遠與湯封贊茅之說不可通矣商子先秦古書足可依據湯都偃師即可以此爲證

故曰贊茅岐周之粟以賞天下之人不人得一勝

樾謹按勝讀爲升古字通用三輔黃圖曰御宿園出栗十五枚一勝大梨如五勝勝皆升之段字

周官之人知而謂之上者自免於罪

樾謹按周當爲同謂當爲謁皆字之誤

晉國之士稽焉皆懼曰

樾謹按稽猶同也尚書堯典曰若稽古正義引鄭注曰稽同也禮記儒行篇古人與稽鄭注曰稽猶合也合與同義亦相近稽焉皆懼猶云同然皆懼也

聖人非能通知萬物之要也故其治國舉要以致萬物

樾謹按非能當作惟能惟能知要故能舉要若作非能不可通矣斬令篇曰聖君知物之要故其治民

有至要足證此文非字之誤。

名尊地廣以至王者何故名卑地削以至於亡者戰罷者也。

樾謹按何故下奪戰勝者也四字亡者下奪何故二字當云名尊地廣以至王者何故戰勝者也名卑地削以至於亡者何故戰罷者也如此則文義方備下文云不勝而王不敗而亡者自古及今未嘗有也卽承此而言。

故興國而責之於兵。

樾謹按興乃舉字之誤言舉一國之人皆責之於兵也。

入其國觀其治兵用者強。

樾謹按兵當作民下云奚以知民之見用者也民之見戰也如餓狼之見肉則民用矣正承此文而言故知當作民用。

非其法亂也非法不用也。

樾謹按下非字當作其

國治或重。

樾謹按國下奪或重二字重下奪亂字當作國或重治或重亂下云是謂重治又云是謂重亂卽承此

而言下文云兵或重強或重弱正與此文一律可據訂正四境之內丈夫女子皆有名於上者著死者削境內

樾謹按此奪生字當作生者著死者削說見去強篇

國封尉短兵千人

樾謹按封字衍文蓋卽尉字之誤而衍者下文兩言國尉分地可證

吏自操及杖以上

樾謹按杖乃校字之誤上文曰軍爵自一級已下至小夫命曰校徒操出卽此所謂自操及校也彼文
出字疑當作士古書士出字多互誤

故爵上造就爲簪裹就爲不更故爵爲大夫

樾謹按就爲簪裹下當補故爲簪裹四字故爵爲大夫當作故爵不更就爲大夫
故爵大夫就爲公大夫就爲公乘就爲五大夫

樾謹按就爲公大夫下當補故爵公大夫五字就爲公乘下當補故爵公乘四字
就爲大庶長故大庶長就爲左更故四更也就爲大良造

樾謹按此當在上文故爵五大夫之下大庶長之大並衍文也漢書百官公卿表爵一級曰公士二上

造三簪裹四不更五大夫六官大夫七公大夫八公乘九五大夫十左庶長十一右庶長十二左更十三中更十四右更十五少上造十六大上造十七駟車庶長十八大庶長十九關內侯是大庶長之爵尊於左更乃云故大庶長就爲更左不可通矣故知大字衍文也此庶長兼左右庶長而言謂故爵五大夫者就爲左右庶長也左右庶長之上卽是左更故曰故庶長就爲左更於文正合其云故四更也就爲大良造此四字乃三字之誤古書三字每誤作四儀禮觀禮篇四享鄭注曰四當爲三古書作三四或皆積畫字相似由此誤也周官內宰疏引鄭注曰純四翟四當爲三古三四積畫是以三誤爲四然則三更之爲四更亦猶三享之爲四享三翟之爲四翟矣三更者并左更中更右更而數之也由左更中更右更而上之卽爲少上造大上造故曰故三更也就爲大良造大良造卽大上造也不言少良造者或文不備或大少良造亦猶左右庶長分之則爲二合之則爲一耳此書所言與表皆合足徵秦制之所自來而傳寫譌奪且多竄益遂不可讀

小夫死以上至大夫

欽謹按小夫字各本皆同而施氏先秦諸子本作小失非也上云軍爵目一級已下至小夫則當時自有小夫名目孫氏星衍校本反從施作失誤矣故國富於貧治重強弱民

樾謹按此有闕文去強篇云國富而貧治曰重富重富者強當據補農商官三者國之常食官也

樾謹按食衍字

法明省任力言息治者國治言息兵強

樾謹按法明下奪治字法明治省任力言息四字爲句承上文治衆國亂言多兵弱而言謂法明則治省任力則言息也治者國治當作治省國治省與者字形相似而誤耳此又承法明治省任力言息而言謂治省則國治言息則兵強也正與上文治衆國亂言多兵弱相對成義

民之所樂民強民強而強之兵重弱故民之所樂民強民強而弱之民重強

樾謹按此承上文政作民之所惡民弱政作民之所樂民強而言當云政作民之所惡民弱民弱而強之兵重弱政作民之所樂民強民強而弱之兵重強傳寫奪誤遂不可讀文中故字卽政字之形近而誤者

爲辯志者不貴外內

樾謹按志當讀爲智上文云爲辯智者貴是也列子湯問篇女志彊而氣弱張湛注曰志謂心智是志與智義亦得通

民之內事莫善於農

樾謹按善當作苦上云民之外事莫難於戰故輕法不可以使之此云民之內事莫苦於農故輕治不可以使之蓋惟民以戰爲難以農爲苦故輕法輕治不可使之也善與苦形近而誤耳下云故農之用力最苦可證此文之誤

法制不明而求明之行令也不可得也君臣

樾謹按下明字當爲民古每段萌爲甿史記三王世家加以姦巧邊萌索隱曰萌一作甿漢書霍去病傳及厥衆萌劉向傳民萌何以勸勉師古注並曰萌與甿同然則此文明字或亦當作萌

深淵者知千仞之深禁使

樾謹按上深字當作探言探淵而知其深也今誤作深淵者則於文義未足矣

今夫騶虞以相監不可事合而利異者也若使馬焉能言則騶虞無所逃其惡矣利異也

樾謹按毛傳以騶虞爲義獸而周官鍾師疏曰今詩韓魯說騶虞天子掌鳥獸官以此書證之則韓魯說亦古義也惟事合而利異當作事合而利同商君之意蓋以騶虞兩職事合利同不可使之相監恐其互相容隱也故必馬能言始無所逃惡下文云吏之與吏利合而惡同也是其明證也馬焉之焉當爲衍文卽馬字之誤而衍者或疑是說文焉鳥之本義然焉之與馬旣非一類合稱馬焉於古無徵殆

不可用。

此其執正使汚吏有資而成其姦險小人有資而施其巧詐慎法
樾謹按執當爲執乃古勢字也執字絕句正使二字屬下讀
夫以法相治以數相舉者不能相益訾言者不能相損

樾謹按以數相舉下奪譽字因譽舉字形相似故傳寫誤奪之耳下文云民見相譽無益又云見訾言
無損正承此而言故知當有譽字也

明書年月日時定分

樾謹按日知錄謂古無一日分十二時之說自漢以下曆法漸密於是以一日分爲十二時不知始於
何人至今不廢然此書已言年月日時則六國時已有此說矣意所謂時者尙是平旦鷄鳴之屬而非
今之所謂十二時歟管子立政篇乃發使者致令以布憲之日蚤宴之時亦言日兼言時

諸子平議卷二十一

韓非子

今秦出號令而行賞罰。有功無功相事也。初見秦。

樾謹按事者治也。高誘注呂氏春秋淮南內篇屢見。詩卷耳篇毛傳曰采采事采之也。正義引鄭志答張逸云事謂事事。一一用意之事。蓋事訓治故一一用意謂之事也。此言有功無功相事。正一一用意之義。謂分別其有功無功。不混淆也。秦策作不攻耳無相攻事也。與上下文義不屬。蓋後人不達事字之義。而臆改其功與攻。則古字通用。

令荆人得收亡國聚散民立社稷主置宗廟令率天下西面以與秦爲難。此固以失霸王之道一矣。

樾謹按秦策無稷字。讀廟字絕句是也。收亡國聚散民立社主置宗廟皆三字爲句。後人誤以令字上屬成四字句。遂于上句加稷字配之耳。置宗廟令義不可通。此言荆人置宗廟。非言其置令也。古宗廟亦未聞有令。足知其非矣。下文曰令魏氏反收亡國聚散民立社稷主置宗廟令此固以失霸王之道二矣。稷字亦衍文。令下亦當有率天下西面以與秦爲難十字。秦策闕此句。後人據以刪韓子而令字誤屬上讀。故得僅存耳。夫率天下以與秦爲難。故失霸王之道。若惟是收亡國聚散民立社主置宗廟。

則是魏之得猶未足以見秦之失也然則此句不可闕因一字之幸存而全句轉可據補也

趙危而荆狐疑

樾謹按秦策作趙危而荆孤盧氏文弨羣書拾補顧氏廣圻韓非子識誤並謂當從之然存韓篇云趙氏破膽荆人狐疑則狐疑字不誤盧顧說非

下不能盡其民力

樾謹按下當從秦策作上惟以上言故曰其民若以下言則但曰不能盡其力足矣盧氏拾補反以策爲非失之上文曰號令不治賞罰不信此正上之所以不能盡民力民力之不盡其故在上不在下當言上不能不當言下不能也

大王垂拱以須之

樾謹按秦策作大王拱手以須吳師道補曰韓作須之然則韓非異於國策者但句末多之字其拱手字必與國策同若作垂拱以須之則吳師道何以不及乎此必後人所改當依國策訂正

不能剋之也又不能反運罷而去

樾謹按運乃軍字之誤上云大王又并軍而至此云軍罷而去文義正相應蓋不能勝則宜退既不能剋又不能反故其軍至於罷病而後去也軍誤作運義不可通顧氏識誤斷運字爲句謂反當作及運

讀曰餌失之迂曲矣。

外者天下皆比意甚固。

樾謹按皆字衍文。蓋卽比字之誤而複者。秦策作外者天下比志甚固。無皆字。使人使荆重幣用事之臣。明趙之所以欺秦者。與魏質以安其心。從韓而伐趙。趙雖與齊爲一。不足患也。二國事畢。則轉可以移書定也。存韓

樾謹按轉字無義。趙用賢本作韓是也。此篇名存韓。本因秦貴臣之計。舉兵將伐韓。故爲是說。勸之釋韓而伐趙。趙齊事畢。而韓可移書定。正見韓之不必伐也。乃乾道本道藏本皆作轉。則字之誤久矣。趙本固多臆改。然亦當以文義求之。未必趙本皆非。古本皆是也。盧氏拾補顧氏識誤。並以則韓爲非。蓋以上文已云從韓而伐趙。此不必更言定韓耳。今按韓未聞其將伐趙。秦何得從韓以伐趙。且秦之伐趙。亦何必從韓。疑韓字是衍文。蓋旣使人使荆。又與魏質。則荆魏不與我爲難矣。於是從而伐趙。繼事之詞。明其事次第當如此。非從他國之謂也。後人不達其義。以爲旣言從。必有所從之國。而妄補韓字以實之。盧氏顧氏不知上韓字之衍。而疑下韓字之非誤矣。又下文云。韓秦強弱在今年耳。各本皆同。顧氏謂韓當作轉。尤誤。

詔以韓客之所上書。書言韓子之未可舉。

樾謹按子字衍文也。韓非因聞貴臣之計，舉兵將伐韓，故上此書言韓之未可舉也。誤衍子字，義不可通。乾道本道藏本皆同。惟趙用賢本無子字，亦當從之。

秦之有韓，若人之有腹心之病也。虛處則核然，若居濕地，著而不去，以極走則發矣。

樾謹按舊注讀虛處則核然五字爲句。訓核爲妨，謂喻秦虛心待韓，韓終爲妨。其說於文義未安。顧氏謂虛處平居也。則核然若居濕地，著而去十一字爲句。核苦也。以極走則發矣。走衍字極困也。視舊讀爲長。然平居不得謂之虛處。且走與處對文，則走字非衍也。今按此當以虛處則核然若居濕地爲句。虛乃衍字也。蓋卽處字之誤而複者著而不去爲句。以極走則發矣爲句。極猶亟也。古字通用。荀子賦篇出入甚極。又曰反覆甚極。楊倞注並曰極讀爲亟。是其證也。此言腹心之病附著不去，平居猶可亟走則發矣。亟走喻急也。舊注曰卒然而走。是正讀極爲亟也。下文今若有卒報之事。韓不可信也。報當讀爲赴疾之赴。禮記少儀篇毋報往喪服小記篇報葬者報虞。鄭注並曰報讀爲赴疾之赴。是也。若有卒報之事。與亟走之喻相應。顧氏訓極爲困。而刪走字未得其旨。

田明辜射難言

樾謹按舊注曰：非罪爲辜，射而殺之，此曲說也。辜射卽辜磔，磔從石聲，與射聲相近，故得通用。辜磔本疊韻字。荀子正論篇斬斷枯磔，以枯爲辜。此云辜射，又以射爲磔。古書每無定字，學者當以聲求之矣。

周禮掌戮殺王之親者辜之注曰謂磔之田明辜射卽此刑也字又作疋史記李斯傳十公主疋死於杜索隱曰疋與磔同古今字異耳

是故大臣之祿雖大不得藉威城市愛臣

樾謹按威字衍文也藉當讀爲籍詩韓奕篇實畝實籍唐石經作實畝實藉是其例矣漢書武帝紀籍吏民馬師古注曰籍者總入籍錄而取之卽此籍字之義管子輕重甲篇桓公欲藉於室屋欲藉於萬民欲藉於六畜欲藉於樹木與此正同言大臣之祿雖大而城市之地不得藉而取之也下云黨與雖衆不得臣士卒臣士卒與藉城市相對成文今涉上文是謂威淫及國家偏威而誤衍威字則文不成義矣舊注云市衆所聚恐其乘衆而生心也不解威字是舊本猶未衍也

虛則知實之情靜則知動者正主道

樾謹按下知字當作爲靜則爲動者正猶下文云不智而爲智者正也涉上句而誤作知於義不可通是以不言善應不約而善增言已應則執其契事已增則操其符

樾謹按道藏本趙用賢本不言下皆有而字當從之乾道本奪去則與下句不一律矣惟下句增字之義殊不可通兩增字疑皆會字之誤不言而善應語本老子不約而善會亦卽老子所謂善結無繩約而不可解也善會猶善結也會誤作曾因又誤爲增耳

此數物者險世之說也而先王之法所簡也有度

樾謹按險世之說本作險世所說說讀爲悅舊注曰險世所說邀取一時之利先王所簡必令百代常行是其所據本末誤

遠在千里外不敢易其辭勢在郎中不敢蔽善飾非

樾謹按勢當作摯國語楚語曰居寢有摯御之箴注曰摯近也摯在郎中與遠在千里外正相對成義
摯勢形近而誤或古字通也

法不信則君行危矣

樾謹按危讀爲詭呂氏春秋淫辭篇所言非所行也所行非所言也言行相詭不祥莫大焉與此意相近蓋法不信則君之所行前後違反故曰詭也作危者古字通耳漢書天文志司詭星出正西史記天官書詭作危淮南子說林篇尺寸雖齊必有詭文子上德篇詭作危並其證也舊注曰法不信則後不可行故君危也此未達假借之旨危當以君位言不當以君行言足知舊說之非矣
明主之所導制其臣者二柄而已矣二柄

樾謹按舊注訓導爲引此未達古語也導當爲道道者由也明主所道制其臣者猶言明主所由制其臣者古語每以道爲由本書孤儻篇曰法術之士奚道得進猶言奚由得進也呂氏春秋貴因篇孔子

道彌子瑕見釐夫人猶言由彌子瑕見釐夫人也晏子春秋諫上篇曰楚巫微導裔款以見景公亦言由裔款以見景公而其字作導可證此文所導之卽所由矣八姦篇云凡人臣之所道成姦者有八術義與此同

故刲殺擁蔽之主非失刑德而使臣用之而不危亡者則未嘗有也

樾謹按失刑德而使臣用之不當有非字非衍文

人主欲見則羣臣之情態得其資矣

樾謹按欲見當作見欲與上文見惡見好一例見惡見好卽自見其所欲矣下文曰豎刁易牙因君之欲以侵其君者也正承此而言主道篇曰君無見其所欲可證此文見欲之義

上有所長事乃不方揚搥

樾謹按舊注曰所長謂任材用物皆得其宜故事不一方而成此失其旨也上文曰使雞司夜令狸執鼠皆用其能上乃無事然則上固不必有所長矣上有所長是失其爲上之道事乃不方猶言無方也謂不得其方也下文曰矜而好能下之所欺辯惠好生下因其材上下易用國故不治皆承此而言

聽言之道溶若甚醉

樾謹按舊注曰溶閑漫之貌下文動之溶之注亦曰凡所舉動溶然閑暇顧氏謂不見所出今按溶若

甚醉此溶字當爲容言其容有似乎醉也下文動之溶之此溶字當爲榕說文手部榕動榕也動之溶之卽動之榕之也動榕亦作動容孟子盡心篇動容周旋中禮者是也疑古本兩溶字皆止作容一爲容貌之容一爲動容之容傳寫增水旁因失其義矣

若天若地是謂累解

樾謹按累解乃疊韻字古人常語也荀子富國篇則和調累解累解與和調並言可知其義楊倞注以爲嬰累解釋非也儒效篇解果其冠楊注引說苑蟹螺者宜禾爲證然則累解猶蟹螺矣古語雖不盡可通而累解二字平列則塉然無疑舊注曰君用意如天地則上因下考之累可解也其失與楊倞注荀子同

欲爲其地必適其賜

樾謹按呂氏春秋重己篇故聖人必先適欲高注曰適猶節也管子禁藏篇故聖人之制事也能節宮室適車輿以實藏是適與節同義必適其賜者必節其賜也舊注謂欲治其國必令賜與適宜失之下操度量以割其下

樾謹按此當作上操度量以割其下舊注云故上必當操度量以割斷其下也是其所據本末誤掘其根本木乃不神填其沟淵毋使水清

樾謹按顧氏以本字爲衍文是也下句澗字蓋亦衍文舊注云澗者水之停積水清鑒之者衆不釋澗字是舊本未衍也上云木數披黨與乃離此云掘其根本乃不神填其澗毋使水清皆上句三字下句四字今衍本字澗字非其舊也至趙本作木枝數披則更失之矣

凡此八者人臣之所以道成姦世主所以壅劫失其所有也八姦

樾謹按道字衍文也所以成姦所以壅劫兩文相對讀者見篇首云凡人臣之所道成姦者有八術誤以道成姦三字連讀故忘增入之不知所道成姦卽所由成姦也義與所以同此旣云所以卽不得復有道字矣

荀息伐虢之還反處三年興兵伐虞又克之十過

樾謹按伐虢下脫克字下云又克之正承此而言呂氏春秋權勳篇荀息伐虢克之還反伐虞又克之是其證

其脩士不能以貨賂事人恃其精潔而更不能以枉法爲治孤憤

樾謹按其脩士三字衍文也上文云其脩士且以精潔固身其智士且以治辯進業此云不能以貨賂事人則總蒙脩士智士爲文言其皆不能也恃其精潔當作恃其精潔治辯因衍其脩士三字則此文專屬脩士遂刪去治辯二字耳舊注云智士不重說似闕文也是其所據本已誤

其意有下也。然而不能已說者。因爲之飾其美。而少其不爲也。其心有高也。而實不能及。說者爲之舉其過。而見其惡。而多其不行也。說難。

樾謹按此兩文相對。言其意雖甚卑下。而有所不能已。則說者必爲之飾其美。反若以其不行而少之。如此乃見不能已之不足爲病矣。其意雖甚高尚。而有所不能及。則說者必爲之舉其過。而見其惡。反若以其不行而多之。如此乃見不能及之不足爲恥矣。不能已者。若犬馬聲色之好是也。爲之飾其美。若管子以是數者爲不害。霸是也不能及者。若堯舜之道仁義之說是也。爲之舉其過。而見其惡。若陳賈謂仁智周公未能盡是也。舊注所說皆未了。且此與上文彼有私急也。必以公義示而強之。本不相蒙。舊注必牽合爲說。宜其不可通矣。

此道所得親近不疑。而得盡辭也。

樾謹按上得字衍文也。道所當作所道。此所道親近不疑。猶曰此所由親近不疑。古書每以道爲由。說已見前矣。史記作此所以親近不疑。所道卽所以也。讀者不解道字。而誤倒之。又妄增入得字。遂至不可通矣。

夫有術者之爲人臣也。得效度數之言。上明主法。下困姦臣。以尊主安國者也。姦叛弑臣。樾謹按得字衍文。此論有術者之爲人臣。其道如此。非論得不得也。蓋涉下文度數之言。得效於前而

衍.

從是觀之.則聖人之治國也.固有使人不得不愛我之道.而不特人之以愛爲我也.

樾謹按不得不愛我.當作不得不爲我.涉下句而誤耳.下文曰.恃吾不可不爲者安矣.不可不爲.卽不得不爲也.又曰.明主者使天下不得不爲己視.天下不得不爲己聽.此使人不得不爲我之義也可據以訂正.

父之愛子也.猶可以而害也.

樾謹按以字衍文也.可而卽可以也.墨子尙賢篇曰.使天下之爲善者.可而勸也.爲暴者可而沮也.又曰.上可而利天.中可而利鬼.下可而利人.呂氏春秋功名篇曰.故當今之世.有仁人在焉.不可而不此務.有賢主不可而不此事.並其證也.此文本云.父之愛子也.猶可而害也.淺人不達古語.於而又增入以字.則不可通矣.

託於犀車良馬之上.

樾謹按漢書馮奉世傳注.引晉灼曰.犀堅也.然則犀車良馬.卽堅車良馬.吳子應變篇曰.車堅馬良.是其義也.顧云.犀字未詳.偶失考耳.

民信其相.下不能其上.主愛信之而弗能廢者.可亡也.亡徵.

樾謹按民下脫不字。民不信其相下。不能其上。兩文相對。民所不信。下所不能。而人主弗能廢。故曰可亡也。

變褊而心急。

樾謹按變當讀爲辯。說文心部。辯一曰急也。是與褊同義。作變者。聲近假借也。易文言傳。由辯之不早辯也。釋文曰。辯苟作變。孟子告子篇。萬鍾則不辨禮義而受之。音義引丁音曰。辨本作變。皆其例矣。故桃左春秋曰。備內。

樾謹按左疑兀字之誤。桃兀蓋卽櫺兀之異文。楚之櫺兀亦有春秋之名。楚語申叔時所謂教之春秋是也。故謂之櫺兀春秋矣。

少索資以事誣主。南面。

樾謹按誣字無義。疑誣字之誤。下文云。主誣而不察。因而多之。卽承此而言。蓋先少索資。而以事誣其主。主旣爲其所誣。乃因而多之也。

賞罰無紀。國雖大。兵弱者。地非其地。民非其民也。節邪。

樾謹按此言賞罰無紀。則國雖大。而兵必弱。所以然者。由地非其地。民成其民也。文義本甚分明。顧氏讀國雖大。逗兵句。謂與上文國雖小。富民雖寡。強一律。則兵之一字。殊不成義。而弱者二字屬下讀。於

義亦未安矣。

今人臣多立其私智。以法爲非者。是邪以智過法立智。如是者禁。

樾謹按邪字衍文。是以智過法立智七字爲句。言自以其智過公法立私智也。舊注曰。以此思之。則知凡官之情。皆欲過公法立私智也。疑其所據本作是以知過法立智。故其解如此。然不說邪字。則猶未衍也。今衍邪字。於義難通。顧氏於前後文句讀。一一訂正。而此句未了。由不知邪字之衍耳。明凌瀛初本。作以邪爲智。與舊注不合。非是。

根者。書之可謂柢也。解考。

樾謹按根上當有直字。上文云。樹木有曼根有直根。此云直根者。書之所謂柢也。柢也者。木之所以建生也。曼根者。木之所持生也。蓋承上文而分釋之。韓子之意。以老子所謂深根固柢者。根是曼根。柢是直根也。今奪直字。失其旨矣。

人無毛羽。不衣則不犯寒。

樾謹按犯寒上當有足以二字。言不衣則不足以犯寒也。下文曰。故聖人衣足以犯寒。是其證。

設炮烙。喻考。

樾謹按段氏玉裁謂炮烙本作炮格。史記索隱引鄒誕云。烙一音閣。楊倞注荀子議兵篇云。烙音古責。

反觀鄒楊所音皆是格字無疑鄭康成注周禮牛人云互若今屠家縣肉格意紂所爲亦相似段氏此說洵足訂正向來傳寫之誤惟炮格似有二義荀子議兵篇紂剗比干囚箕子爲炮格刑楊注引列女傳曰炮格爲膏銅柱加之炭上令有罪者行焉輒墜火中紂與妲己大笑此則炮格爲淫刑以逞之事是一義也若此文云紂爲肉圃設炮格登糟丘臨酒池則似爲飲食奢侈之事別爲一義蓋爲銅格布火其下欲食者於肉圃取肉置格上炮而食之也如此說方與肉圃糟丘酒池一類且因爲象箸而至此正見其由小至大箕子所以畏其卒而怖其始也若是炮格之刑則不特與肉圃諸事不類且與上文爲象箸事亦絕不相干矣呂氏春秋過理篇曰糟丘酒池肉圃爲格格卽炮格不言炮格而直曰爲格卽承肉圃之下是於肉圃中爲格也其爲炮肉之格明矣高注曰格以銅爲之布火其下以人置上人爛墮火而死夫糟丘酒池肉圃皆是飲食之地何故卽於其地炮炙人乎蓋古書說炮格者本有二義當各依本書說之學者但知有前一義不知有後一義古事之失傳久矣故冬耕之稼后稷不能羨也

樾謹按羨當作美字之誤也下文曰豐年大禾臧穫不能惡也美與惡相對

秦武王令甘茂擇所欲爲於僕與行事說林上

樾謹按事字衍文也下文曰公佩僕璽而爲行事是僕與行爲官名言佩僕之璽而爲行之事也讀者

誤以行事連讀遂於此文亦增事字矣。

子巧於相踶馬而拙於任在腫膝而不任拙於腫膝。說林下、

樾謹按此乾道本也。文錯誤不可讀。各本皆作子巧於相踶馬而拙於任腫膝。顧氏識誤從之。然上文云夫踶馬者舉後而任前。腫膝不可任也。是任膝者馬也。非相馬者也。安得云巧於相踶馬拙於任腫膝乎。疑韓子原文本作子巧於相踶馬而拙於在腫膝。在者察也。蓋徒知其爲踶馬而不能察知其腫膝之不可任。是巧於相踶馬拙於在腫膝也。乾道本在腫膝三字不誤。但在上又有任字。則因任與在形似。又涉上下文諸任字而誤衍耳。其下又有而不任拙於腫膝六字全無意義。則卽上句之複文。傳寫又錯誤。當刪去無疑。乃各本皆作而拙於任腫膝。則徒知乾道本之誤。而以意刪改之。仍無當也。君曰我愛之信答曰臣亦愛臣之信。

樾謹按上信字衍文也。君曰我愛之之者指鼎而言。君固愛鼎不愛信也。涉下句而衍信字。則義不可通。

因攢而縫用人

樾謹按攢字無義。當作簪。荀子賦篇。簪以爲父。楊倞注曰。簪形似箴而大。是簪亦箴類。故曰因簪而縫也。說文金部。鑄可以綴箸物者。簪卽鑄之叚字。亦或作攢。周易豫九四朋盍簪。京作攢。是也。古本韓子

當亦作摺傳寫因誤爲攢矣。

厚賞之使人爲賁諸也。婦人之拾蠶漁者之握鱠是以效之。內儲說上七術。

樾謹按是以效之當作以是效之效者明也是卽指婦人漁者而言謂厚賞之下可使人人爲賁諸以婦人之拾蠶漁者之握鱠明之也下文云鱠似蛇蠶似蠋人見蛇則驚駭見蠋則毛起然而婦人拾蠶漁者握鱠利之所在則忘其所惡皆爲孟賁是其義也荀子正論篇故桀紂無天下而湯武不弑君由此效之也楊注曰效明也與此文句法正同今誤作是以效之舊注曰此得利忘難之效也失其解矣臣請使王遇之遇。

樾謹按上遇字當作與上文云王何不試與之遇乎故此云臣請使王與之遇乾道本作遇之遇傳寫誤耳道藏本改下遇字爲乃字屬下讀趙本并刪乃字均非其舊行刑重其輕者輕者不至重者不來

樾謹按不至當作不生言犯輕罪者不得生則自無重罪也商子去強篇曰輕者不生重者不來是其證

采金之禁得而輒辜磔於市甚衆壅離其水也

樾謹按此言辜磔其人而棄尸於水水之中流爲積尸壅遏遂至分流是謂壅離其水極言辜磔者之

多也。舊注云。又設防禁遮擁。令人離其水也。據下文云。大罪莫重辜磔於市。猶不止者。不必得也。又曰。故不必得也。則雖辜磔。竊金不止。知必死則天下不爲也。並無設禁遮擁。令人離水之義。且設蓋遮擁。令人離水。而猶竊金不止。則是設禁之未善。與下文不必得。及知必死之意。不相應矣。顧曰。離讀爲離。此亦不得其解。而強爲之辭。

哀公懼自將衆輒救火者。

樾謹按。輒當爲趣者。字衍文。上文云。魯人燒積澤。所謂火田也。哀公實親在其閒。及火南倚將燒國。故哀公懼自將衆趣救火也。趣誤作輒。蓋以形似之。故又因下文三言救火者。而亦衍者字。於是其義愈晦。并輒字之誤。莫之能正矣。

因詐逐所愛者令走王知之。

樾謹按。此本作令王知之。走字衍文也。舊注於上經云。佯逐所愛。令君知而不疑。令君知卽令王知也。可證舊本之無走字。

昭侯以察左右之臣不割。

樾謹按。割字涉注文。割爪不誠而衍。顧氏已訂正矣。臣藏本作誠。顧謂誠不句絕。不否同字。此說非也。誠不當作不誠。注云。割爪不誠。則其所見本末倒也。下文云。子之以此知左右之不誠。信注云。僞報有

白馬者是不誠信正與此一律

靖郭君相齊與故人久語則故人富內儲說下六徵

欽謹按北齊書顏之推傳觀我生賦祇夜語之見忌寧懷刷之足恃皆本此書疑古本韓子久語作夕語古人朝見謂之朝夕見謂之夕

公叔相韓而有攻齊

欽謹按爾雅釋詁攻善也有讀爲又相韓而有攻齊謂相韓而又善齊也下文云翟璜魏王之臣也而善於韓其義相同藏本趙本改攻作功失之

犀首與張壽爲怨陳需新入不善犀首

欽謹按入字衍文也上文云季辛與爰騫相怨司馬喜新與季辛惡與此條情事相同文法亦一律此云陳需新不善犀首猶彼云司馬喜新與季辛惡也

能爲之諸侯乎

欽謹按爲字衍文也能之諸侯乎言能適諸侯乎左傳作能行乎是其證也

被王衣

欽謹按王當作玉三國志魏文帝紀注云舜承堯禪被珍裘玉衣猶云珍裘矣古人於美好之物皆曰

玉食言玉食。衣言玉衣。其義同也。此與下文之握玉環。本同作玉。後人不解而臆改耳。

先問鄧之豪傑良臣。辯智果敢之士。盡與姓名。

樾謹按與當作舉。周官師氏。王舉則從。注曰。故書舉爲與。是其例也。襄二十七年左傳。仲尼使舉是禮也。釋文引沈云。舉謂記錄之也。然則盡舉姓名爲悉記錄其姓名矣。

晉國之辭仕託者國之錘。外儲說左上。

樾謹按乾道本託誤作記。當從道藏本訂正。趙用賢本託下有慕字。則由誤讀下文而衍也。下文曰。晉國之辭仕託。慕叔向者國之錘矣。此於託字絕句。仕謂仕者。託謂託者。襄二十七年左傳。衛子鮮出奔晉。託於木門。終身不仕。然則古人自有仕與託之兩途。凡託於諸侯者。君必有以養之。觀孟子可見。故曰辭仕託。蓋仕可辭。託亦可辭也。慕叔向者自爲句。後人不達託字之義。誤以託慕連讀。遂於此文亦增入慕字耳。又錘字無義。疑古本止作垂。莊子逍遙遊篇。其翼若垂天之雲。崔譏曰。垂猶邊也。其大如天一面雲也。然則國之垂。猶云國之一面。與上文中车之民。弃田圃而隨文學者。邑之半。文義一律。國之垂。猶邑之半。垂亦半也。今加金作錘。則不可通矣。

請無以此爲稽也。

樾謹按稽字無義。疑當作指。漢書河閒獻王德傳。文約指明。注云。指謂意之所趨。若人以手指物也。字

亦作旨。孟子告子篇願問其旨是也。齊桓伐蔡意在蔡姬故管仲請無以此爲指也。稽從旨聲故得通借。禮記王制篇有旨無簡不聽卽尙書呂刑篇有稽無簡不聽之異文然則稽旨通用古有徵矣。道藏本改稽爲規非是。

傷者之母立泣。

樾謹按立字不當有蓋卽泣字之誤而衍者。

趙主父令工施鈎梯而緣播吾刻蹠人迹其上。

樾謹按蹠當作跡卽迹字也。迹籀文作速此變作蹠亦猶迹之變作跡矣。古本韓子當作刻人蹠其上。寫者依今字作迹而蹠字失不刪去遂誤倒在人字之上又誤其字作蹠也。以馬爲不進盡釋車而走。

樾謹按韓子古本當作以馬爲不盡句釋車而走不盡卽不進也。列子天瑞篇終進乎不知也。張湛注曰進當爲盡是進與盡古通用詩文王篇毛傳訓盡爲進師古注漢書高帝紀曰進字本作賈又作驥皆其例也。寫者依本字作進而又失刪盡字遂并失其讀矣。

曰信名信名則羣臣守職。

樾謹按曰信名之下當有信義信事四字蓋文公問安信箕鄭告以信名信義信事下乃一一申之也。

今奪之則文不備

跼危引之而逃之門下室中外儲說左

樾謹按舊注曰。跼者行步危。故曰跼危。此曲說也。危乃跪之省文。古謂跼足者爲跼跪。內儲說下篇門者跼跪請曰。是其證也。晏子春秋雜上篇。則跪擊其馬而反之。孫氏星衍曰。跪足也。此說得之。

秦韓攻魏昭卯西說而秦韓罷

樾謹按昭卯疑當作明卯。卽孟卯也。顯學篇云。魏任孟卯之辨。是也。又作芒卯。難三篇云。孰與曩之孟嘗芒卯。是也。明孟芒古音俱同。孟卯之爲明卯。猶孟津之爲盟津。芒卯之爲明卯。猶民甿之爲民萌。今作昭者。蓋與明形似義同。因而致誤。

吾父獨冬不失袴

樾謹按舊注曰。別足者不衣袴。雖終其冬夏。無所損失也。疑其所據本作終不失袴。故曰。雖終其冬夏。無所損失。今涉注文有冬字而誤終作冬。則不可通矣。別者既不衣袴。何有冬夏之別。安得獨於冬言不失歟。當據注訂正。

墾草仞邑

樾謹按仞當作剏。謂剏造其邑也。作仞者字之誤。舊注曰。仞入也。所食之邑。能入其租稅也。訓仞爲入。

未詳其義。新序載此事。正作叛邑。當據以訂正。

發廩粟以賦衆貧。散府餘財以賜孤寡。外儲說右上

樾謹按餘字衍文。散府財與發廩粟相對爲文。不當有餘字。涉下文倉無陳粟。府無餘財而衍。謳乎其已乎。苞乎其往歸田成子乎。

樾謹按已字當作芑。昭十二年左傳我有圃生之杞乎。從我者子乎。與此歌文義相似。史記田敬仲世家載此歌曰。嫗乎采芑歸乎田成子。字正作芑。惟此本以謳苞爲韻。芑子爲韻。史記作歸乎田成子。歸與謳則非韻矣。當以此爲正。

左右有禠子者。

樾謹按禠子卽蘭子也。禠與蘭音近。說文門部。闡妄入宮掖也。讀若闡卽其例也。列子說符篇。宋其蘭子者。釋文曰。凡人物不知生出者。謂之蘭也。是蘭子之蘭卽闡之引申義。故此書以禠爲之矣。

慎而言也。人且知女。

樾謹按知當作和字之誤也。此云慎而言也。人且和女。慎而行也。人且隨女。和與隨相爲韻。下文云。而有知見也。人且匿女。而無知見也。人且意女。女有知也。人且臧女。女無知也。人且行女。匿與意。臧與行。亦相爲韻也。若作人且知女。則首句失其韻矣。

左右引王之說之曰先告客以爲德

樾謹按引當作以曰當作日皆字之誤也隸書以字或作臥因誤爲引矣蓋因客說宣王宣王說而大息故左右以王之說之日先告客以爲德也

吾適勢與民相收若是吾適不愛而民因不爲我用也故遂絕愛道也

外儲說右

樾謹按道藏本作吾釋勢與民相收當從之上文云彼民所以爲我用者非以吾愛之爲我用者也以吾勢之爲我用者也是言君民之間本是以勢相制若釋勢而用愛則吾適有不愛民遂不爲我用矣故不如絕愛道爲得也文義本甚分明因釋適聲近又涉下句有適字故乾道本誤爲適勢顧氏謂適勢適愛相對非是

五苑之草著

樾謹按著字衍文也蓋涉下文今發五苑之蔬菜者而於草下衍者字又因草字及下蔬菜字皆從艸遂又誤者爲著耳舊注曰謂草木著地而生也殊爲曲說

造父方耨得有子父乘車過者

樾謹按得當作見因古得字作畧故得與見二字往往相混史記趙世家踰年歷歲未得一城趙策得作見留侯世家果見穀城山下黃石漢書見作得並其證也趙本改得爲時非是顧氏疑得上有闕文

亦失之。

延陵卓子乘蒼龍挑文之乘。

樾謹按挑當讀爲翟下文。一日延陵卓子乘蒼龍與翟文之乘注云馬有翟之文是也。挑從兆聲與翟聲相近故翟通作挑。尚書顧命篇王乃洮頰水鄭讀洮爲濯詩大東篇佻佻公子韓詩佻作嫖爾雅釋魚蜃小者珧衆家本珧作濯並其例也舊注不知挑卽翟之叚字而訓爲雕飾之誤矣。

矜僞不長蓋虛不久難一、

樾謹按矜字無義乃務字之誤言務爲詐僞不可以長也管子小稱篇作務僞不久蓋虛不長是其證是子言分謗也。

樾謹按此當作是鄒子之言非分謗也益謗也今脫六字則文義不明下文云故曰鄒子之言非分謗也益謗也正與此應可以據補。

且蹇叔處干而干亡難二、

樾謹按干卽虞也莊子刻意篇曰夫有干越之劍釋文引司馬云干吳也荀子勸學篇曰干越夷貉之子楊倞注曰干越猶言吳越淮南子原道篇曰干越生葛縵高誘注亦曰干吳也是吳有干名而虞與吳古同聲而通用桓十年左傳正義曰譜云虞姬姓也武王克商封虞仲之庶孫以爲虞仲之後處中

國爲西吳後世謂之虞公然則虞之始封本爲西吳蓋以別於荆蠻之吳因春秋經傳皆作虞而西吳之名廢矣漢書地理志河東郡大陽吳山在西上有吳城周武王封太伯後於此是爲虞公夫虞之故城謂之吳城是虞卽吳也吳得稱干則虞亦得稱干蹇叔處干卽處虞也顧云未詳故具論之

伊尹自以爲宰于湯百里奚自以爲虜于穆公

樾謹按兩以字皆衍文自由也言由爲宰以于湯由爲虜以于穆公也難一曰故伊尹以中國爲亂道爲宰于湯百里奚以秦爲亂道爲虜于穆公道亦由也與此一律

且夫物衆而智寡寡不勝衆智不足以徧知物故則因物以治物下衆而上寡寡不勝衆者言君不足以徧知臣也故因人以知人難三

樾謹按故則因物以治物故則二字無義趙本刪則字當從之惟此文有從舊注羼入者韓子原文當云且夫物衆而智寡寡不勝衆故因物以治物下衆而上寡寡不勝衆故因人以知人舊注於上句寡不勝衆云言智不足以徧知物也於下句寡不勝衆云言君不足以徧知臣也傳寫誤入正文而又有錯誤遂參差而不可讀矣

賢智未足以服衆而勢位足以缶賢者也難勢

樾謹按缶乃詬字之誤詬字闕壞而爲出字又因誤爲缶也上文云賢人而詬於不肖者則權輕位卑

也。此卽勢位足以謔賢者之說。趙用賢本作任賢者。乃不得其字而臆改。不可從也。夫勢者。非能必使賢者用已。而不肖者不用已也。

樾謹按兩已字皆當作人已之已。卽以勢而言。勢者人人得而用之。不能使賢者用我。而不肖者不用我。也。顧云已字當有誤。未詳。由不達古人語意耳。

若吾所言。謂人之所得勢也而已矣。

樾謹按勢當作設。上文云。此自然之勢也。非人之所得設也。故此曰。若吾所言。謂人之所得設也而已矣。設誤作勢。文不可通。顧氏因疑有缺文。非是。

先王有幸臣之意。然有大傷臣之實。問出、

樾謹按先王當作先生。卽謂堂谿公也。堂谿公諷韓子舍全遂之道。而肆危殆之行。故曰先生有幸臣之意。幸臣猶愛臣也。呂氏春秋至忠篇。王必幸臣與臣之母是也。韓子自謂不忍嚮貪鄙之爲。不敢傷仁智之行。若從堂谿公之言。則仁智之行傷矣。故曰然有大傷臣之實。此有字當讀爲又。

晉伯陽秦顚頡衛僑如說疑。

樾謹按伯陽乃舜七友之一。晉字衍文。顧氏識誤已及之矣。惟顚頡晉人。而係之秦。僑如魯人。而係之衛。爲不可曉。且其人亦非如下文所云。伏死窟穴者也。據下文云。若夫齊田桓宋子罕魯季孫意如晉。

僑如衛子南勁鄭太宰欣楚白公周單荼燕子之此九人者之爲其臣也皆朋黨比周以事其君云云疑魯季孫意如晉僑如當作晉顚頡魯僑如而傳寫誤入上文又誤移晉字於伯陽之上遂妄竄入秦字耳

此六人臣之弑其君者也

樾謹按上文自田成子以下凡八人不得言六六疑亦字之誤承上文舜逼堯禹逼舜湯放桀武王伐紂而言故云亦也

若夫轉身法易位全衆傅國最其病也

樾謹按法字衍文傅當爲傳上所謂破國殺身者以國君死社稷而言也故曰尙皆賢主也此所謂轉身易位全衆傅國者則晉靜公齊康公之類是矣以其不能死而反見屈於臣故曰最其病也趙本改傅爲傳正得其字惟不知法字之衍而刪去身字失之矣

名之所以成城池之所以廣者詭使

樾謹按顧云池當作地是也惟城地連文近於不辭城疑衍文名之所以成地之所以廣兩文相對不當有城字蓋卽成字之誤而衍者

狐蟲爲順辭於前者

樾謹按蟲乃蠱字之誤。春秋蟲牢。春秋繁露竹林篇作蠱牢。卽其例矣。狐蠱二字連文。見僖十五年左傳。

而士卒之逃事狀匿附託有威之門以避傋賦。

樾謹按狀匿卽藏匿也。狀與壯通。考工記稟氏凡鑄金之狀故書狀作壯。是也。壯與莊通。漢書古今人表柳壯。檀弓作柳莊。是也。而藏字說文所無。古書多以臧爲之。臧莊聲近。狀通作壯。壯又通作莊。則亦可通作臧矣。

是故決賢不肖愚知之美六反。

樾謹按美乃筭字之誤。上文云嚴愛之筭亦可決矣。此云決賢不肖愚知之筭。其文義正相似。作美者形近而誤耳。趙本改美爲分。未得其字。

明君之法揆也。治賊非治所揆也。所揆也者。是治死人也。

樾謹按此當作明主之法也。揆賊非治所揆也。治所揆也者。是治死人也。方與下文刑盜非治所刑也。治所刑也者。是治胥靡也。文法一律。揆賊之揆誤移在上句。因移下句治字以補之。義不可通矣。道藏本趙本但於所揆也者上加一治字。猶未盡得也。又按揆字未詳何義。據與刑盜對文。疑字當作殺。古字或以蔡爲之。尙書禹貢二百里蔡。鄭注曰。蔡之言殺。是蔡殺聲近義通。說文米部。臣鍇引左傳斃蔡。

叔今作蔡蔡叔亦其例也。蔡誤作葵傳寫者又以意改爲揆耳。

慈母之於弱子也。愛不可爲前。猶言無前於此者。正見其愛之至也。舊注曰。不可先以愛養之。非是。

醫曰詭。八經

樾謹按醫字無義。趙本作繫。亦非也。醫當作翳。翳者蔽也。下文易功而賞。見罪而罰。而詭乃止矣。易乃見字之誤。說本顧氏識誤。見功見罪。是不翳也不翳而詭乃止。可證翳曰詭之義。

卽邇以知其內。疏置以知其外。

樾謹按疏置當作置。疏與邇對。今作疏置。則不對矣。下文曰。倒言以嘗所疑。論反以得陰姦。論反當作反論。反論與倒言相對。並傳寫誤也。

事大未必有實。舉則圖而委效璽而請兵矣。五蠹

樾謹按舉則二字誤倒。道藏本作則舉。當從之。韓子原文。本作事大必有實。則舉圖而委效璽而請矣。未字兵字皆衍文也。言事大必有事大之實。非空言事大而已。舉圖而委效璽而請。皆其實也。所謂舉圖而委者。謂舉地圖而委之大國。故下文曰。獻圖則地削也。所謂效璽而請者。謂收百官之璽。效之大國。而請大國發之也。故下文曰。效璽則名卑也。外儲說右云。王因收吏璽。自三百石以上。皆效之子之。

子之大重此雖非以小事大然效璽之事則同效璽初非請兵淺人不得其解於請下增入兵字殊失本指而趙用賢本乃於上句委字之下增地字以配之謬矣下文曰救小未必有實則起兵而敵大矣未字亦衍文謂救小必有救小之實起兵敵大是其實也與此文正相對因涉下文救小未必能存句而衍未字遂於事大必有實句亦增未字淺人不詳文義率意增益往往如此

故事私門而完解舍解舍完則遠戰遠戰則安行貨賂而襲當塗者則求得求得則私安私安則利之所
在安得勿就

樾謹按解舍完三字衍文也事私門而完解舍則遠戰與行貨賂而襲當塗者則求得兩文相對不當衍此三字也求得則私私乃利字之誤遠戰則安求得則利與上文窮危相對安對危言利對窮言也安私安則利之所在當作安利之所在上云窮危之所在也民安得勿避此云安利之所在安得勿就兩文亦相對

其患御者積於私門

樾謹按患讀爲串詩皇矣篇串夷載路毛傳串習也釋文曰串本作患是其證也串御蓋謂近習進御者趙本竟改作近御失其字矣

今夫與人相善也無豐年旁入之利而獨以完給者非力則儉也與人相善也無饑餓疾疚禍罪之殃獨

以貧窮者非侈則壇也顯學、

樾謹按兩善字皆若字之誤與人相若也猶曰鈞是人也俗書若字作若善字作善兩形相似而誤不道仁義者故不聽學者之言

樾謹按者當作諸古字通用禮記郊特牲曰或諸遠人乎儀禮士虞禮注引作或者遠人乎是其證也廣雅釋言諸之也不道仁義諸故卽不道仁義之故與不聽學者之言兩句相對諸之互用古書多有禮記少儀篇申之而拖諸辟孟子滕文公篇注諸海注之江皆是也大戴記將軍文字篇道者孝弟說之以義而觀諸體者與諸並猶之也然則此文者字亦自可通并不必破爲諸矣顧氏以者字爲衍而以故字屬下讀則失其義

此页空白

諸子平議卷二十二

呂氏春秋一

乘鸞輶孟春紀

樾謹按鸞本作鑾。今作鸞者，後人依月令改之也。呂氏原文本作乘鑾輶。高誘注文本作鸞鳥在衡和在軾，鳴相應和，後世不能復致。鑄銅爲之飾以金，謂之鑾輶也。蓋高意鑄銅象鸞鳥形，故其字從金從鸞省。若正文作鸞，則不必有鑄銅飾金之說矣。明劉如寵本正作乘鑾輶，是其所據本不誤。惟因正文是鑾字，疑注文不當以鸞鳥爲說，遂改注文鸞鳥在衡作鑾，在鑣，則又失注意矣，不可從也。

還乃賞卿諸侯大夫於朝。

樾謹按高注曰：三公至尊，坐而論道，不嫌不賞，故但言卿諸侯大夫者也。據此則卿上無公字，畢氏沅曰：舊本卿上衍公字，乃後人據月令增入，而不知其與注不合，其說是也。然呂氏原文實有公字，其上文云：天子親率三公九卿諸侯大夫以迎春於東郊。下文云：率三公九卿諸侯大夫躬耕帝籍田。又云：反執爵于大寢。三公九卿諸侯大夫皆御，並以三公九卿對言，則此文亦必當有公字矣。若謂三公至尊，不嫌不賞，則執爵大寢，三公至尊，亦何嫌不預，而必及之乎？然則呂氏原文當與月令同，今奪公字。

者涉下文卿諸侯大夫九推而誤高氏所據本已無公字正高氏序所謂旣有脫誤者也不加是正而曲爲之說疏矣

夫水之性清土者扣之故不得清本生

樾謹按高注曰扣讀曰骨骨濁也此注必有錯誤下文曰人之性壽物者扣之故不得壽注曰扣亂也扣字旣見於前不應又注於後疑此文物者扣之本作物者滑之高注拍讀曰骨本作滑讀曰骨淮南原道篇混混滑滑高注曰滑讀曰骨也卽其例矣骨濁也當作滑濁也滑滑與混混同故有濁義

物也者所以養性也非所以性養也

樾謹按下句當作非以性養也涉上句而衍所字則義不可通注文有所字亦誤衍也

三者國有一焉無幸必亡

樾謹按無幸必亡乃到句也言其國必亡無可幸免也高注未得其義

一曙失之終身不復得重已

樾謹按高注曰曙明日也然一明日失之文義未安說文無曙字日部曙旦明也文選魏都賦注引作曙蓋曙卽暞之俗體耳一曙失之者一旦失之也旦明謂之曙故旦卽謂之曙矣夫弗知慎者是死生存亡可不可未始有別也

樾謹按此當作是死生存亡可不未始有別也。可不即可否也。死生存亡可不皆兩字相對。後人不知不爲否之段字。故又加可字耳。序意篇曰。若此則是非可不可無所遁矣。亦當作是非可不其誤正與此同。

壽長至常亦然。

樾謹按常乃當字之誤。壽長至三字連讀。下文高注曰。推行仁義。壽長自至。
大庖不豆。貴公。

樾謹按高注曰。但調和五味。使神人享之而已。不復自列簠簋籩豆也。若然。則不簠不簋不籩。無不可言。何獨言不豆乎。豆當讀爲剗。廣雅釋詁曰。剗。裂也。玉篇曰。小裂也。大庖不剗。言大庖但調和五味。不親爲宰割之事。與上句大匠不斷一律。古無剗字。故段豆爲之。亦或段用脰字。後漢書馬融傳。脰完瓶。王氏念孫讀脰爲剗。是也。

上丁命樂正入舞。仲春紀。

樾謹按孟春已有命樂正入學習舞之文。故月令於仲春止言命樂正習舞。不言入學。從省也。此不云習舞而云入舞。文義不足。疑呂氏原文本作入學習舞。傳寫奪學習二字耳。下云中丁又命樂正入學。習樂。又字承此而言。是則入學二字固不可省也。

耳雖欲聲目雖欲色鼻雖欲芬香口雖欲滋味害於生則止在四官者不欲利於生者則弗爲貴生

樾謹按高氏讀不欲利於生者則弗爲九字爲句而釋之曰則不治此四官之欲此注非也不欲字當屬上讀弗字疑衍文當曰在四官者不欲句利於生者則爲句言四官者雖不欲而利於生則爲之與上文耳目鼻口雖欲之而害於生則止正相對成誼故其下曰耳目鼻口不得擅行必有所制若如高注謂不治四官之欲則四官得以擅行大失呂氏本意矣當由誤衍弗字故失其讀並失其誼耳本生篇曰是故聖人之於聲色滋味也利於性則取之害於性則舍之義與此同害於性則舍之卽此所謂害於生則止也利於性則取之卽此所謂利於生則爲也廣雅釋詁曰取爲也然則取與爲字異而義同矣

顏闔守閭鹿布之衣而自飯牛

樾謹按鹿字乃麤字之誤莊子讓王篇作顏闔守陋閭苴布之衣而自飯牛釋文曰苴音麤本或作麤故使莊王功迹著乎竹帛傳乎後世情欲

故使莊王功迹著乎竹帛傳乎後世情欲
移置於前耳今訂正如左

世人之事君者皆以孫叔敖之遇荆莊王爲幸自有道論之則不然此荆國之幸荆莊王好周遊田獵

馳騁弋射歡樂無遺盡傳其境內之勞與諸侯之憂於孫叔敖孫叔敖日夜不息不得以便生爲故故使莊王功迹著乎竹帛傳乎後世功雖成乎外而生虧乎內耳不可以聽目不可以視口不可以食胷中大擾妄言想見臨死之上顛倒驚懼不知所爲用心如此豈不悲哉

中行寅染於黃藉秦高彊當染

樾謹按黃字衍文蓋卽寅字之誤而衍者墨子所染篇無黃字

不知要故也不知要故則所染不當

樾謹按下句故字涉上句而衍當云不知要則所染不當墨子所染篇作不知要者所染不當也無故字

帝王亦然

樾謹接上文舜禹湯武皆帝王也帝王之事已見上文何以又出此四字下文所言孔子墨子皆非帝王與此不相應且旣言帝王亦然而下卽繼之曰非獨國有染也兩句亦不相屬義殊可疑據墨子所染篇云非獨國有染也士亦有染疑此帝字爲衍文王乃士字之誤呂氏原文本云士亦然非獨國有染也蓋卽用墨子之意而倒其文耳下文言孔文墨子事而總之曰此二士者無爵位以顯人無賞祿以利人舉天下之顯榮者必稱此二士也士字正與此應因士誤爲王後人遂臆加帝字耳

缶鹽黃蠅聚之有酸功名、

樾謹按此當作缶鹽黃有酸蠅聚之有讀爲又言黃而又酸故蠅聚之也高注曰黃美也黃故能致酸酸故無致蠅可知有酸二字本在蠅聚之上矣當據以訂正

行不異亂雖信今民猶無走

樾謹按高注曰行不異亂雖欲信利民無有歸走也然正文本無利字且旣行不異亂矣又何信利民之有高注非也信疑倍字之誤上云今之世至寒矣至熱矣而民無走者取則行鈞也此云行不異亂雖倍今民猶無走言雖寒熱加倍於今之世民猶無可走也倍信形似而誤知士篇視若是者倍反戰國策作若是者信反卽其例

及其天年先已

樾謹按及字無義呂氏原文當作終其天年終古文止作久故誤爲及耳孫氏星衍云御覽作反則及之誤字

督聽則姦塞不皇

樾謹按皇讀爲惶謂姦邪閉塞不至惶惑也蜀志呂凱傳曰遠人惶惑是惶與惑同義字亦作遑後漢光武紀曰遑惑不知所之遑與皇古通用故此又作皇也高注曰姦軌塞斷於不皇皇暇也殊不成

義。

三王先教而後殺。故事莫功焉。

樾謹按高注曰：成王事之功無過於三王。此未得功字之義。國語齊語辨其功苦。韋注曰：功劳也。管子小匡篇辨其功苦。尹注曰：功謂堅美。荀子王制篇辨功苦。楊注曰：功謂器之精好者。是古以堅美精好者爲功。本書誣徒篇曰：從師苦而欲學之功也。亦以功苦對文。此功字義與彼同事。莫功焉。猶曰事莫善焉。正與上下文德莫盛焉。兵莫彊焉。同義。御覽引作功莫大焉。後人不知古義。而妄改耳。

事心乎自然之塗。論人。

樾謹按高注曰：事治也。於義未得。禮記郊特牲篇信事人也。鄭注曰：事猶立也。釋名釋言語曰：事傳也。傳立也。青徐人言立曰傳。然則事心乎自然之塗。猶曰立心乎自然之塗也。

哀之以驗其人。

樾謹按人當讀爲仁。言哀之以驗其仁愛之心也。高氏不知人爲仁之段字。乃曰人人可哀。不忍之也。斯曲說矣。

黃帝曰：帝無常處也。有處者乃無處也。以言不刑塞。圜道也。圜道、

樾謹按刑塞二字連文。刑塞與形倨同。莊子山木篇曰：君無形倨。注曰：形倨蹠礙之謂。然則不刑塞者，

不躡礙也。蓋引黃帝之言而釋之曰。帝無常處者。以言不躡礙也。是圜道也。應同篇引商箴而釋之曰。以言禍福人或召之也。慎大篇引周書而釋之曰。以言慎事也。文法並與此同。高注非是。

堯舜賢主也。皆以賢者爲後。不肖與其子孫。猶若立官必使之方。

樾謹按高注曰。以賢者爲後。謂禪位也。堯傳舜。舜傳禹。故曰不肖與其子孫也。方正不私邪之謂也。如高氏意。則謂堯舜傳賢而不傳子。猶立官之不私邪耳。大失呂氏之旨矣。本篇名曰圜道。其大旨以爲主執圓而臣處方。故上文曰。先王之立高官也。必使之方。此文立官必使之方。卽承上文而言。猶若者。猶然也。諫徒篇曰。雖不肖者。猶若勸之。蕩兵篇曰。中主猶若不能有其民。凡言猶若。並與猶然同義。此言堯舜不以天下傳之子孫。而其立官也。猶然必使之方。下文曰。今世之人主。皆欲世勿失矣。而與其子孫立官。不能使之方。以私欲亂之也。何哉。其所欲者之遠。而所知者之近也。此正見其與堯舜相反。堯舜不爲子孫計。而立官猶必使方。今世人主無不爲子孫計。而立官反不使方。故爲所欲遠而所知近也。又按高氏訓方爲正。亦未合。方與圜對。下文曰。百官各處其職治其事。所謂方也。正字之義。未足以盡之。

其性禮。其事視孟夏紀。

樾謹按畢氏沅曰。月令無此二句。此書前後亦無此例。當爲衍文。然既前後皆無此文。何由而衍。蓋五

行分配五常五事。自古有此說。竊疑呂氏原文每紀皆有之。後人據月令刪去。而孟夏紀尙存此二語。則刪之未盡者耳。正可藉以考見呂氏之舊。未可反以爲衍也。

不疾學而能爲魁士名人者。未之嘗有也。勸學

樾謹按高注曰。魁大之士。名德之人。其說名字之義。未得名亦大也。禮記禮器篇。因名山升中於天。鄭注曰。名猶大也。國語魯語。取名魚。韋注曰。名魚大魚也。然則名人猶大人也。正與魁士一律。安死篇曰。又視名丘大墓葬之厚者。此言魁士名人。猶彼言名丘大墓矣。高氏注戰國策秦策賂之名都曰。名大也。然則名之爲大。高氏固有此訓矣。乃此注以爲名德之人。殊失其誼。

慎過自用。不可證移。誣徒

樾謹按高注訓證爲諫。則其字當作証。說文言部。証諫也。戰國策齊策。士尉以証靖郭君。高注曰。証諫也。本書知士篇亦誤作證。是其例矣。畢氏校本於知士篇已改作証。而此文猶未訂正。偶未照耳。

見權親勢及有富厚者。

樾謹按親字衍文也。高注曰。見權勢及富厚者。可知正文本無親字。當據以訂正。

人之情惡異於己者。此師徒相與造怨尤也。

樾謹按兩句傳寫互易。此師徒相與造怨尤也。與上文此師徒相與異心也。文義相屬。人之情惡異於

已者與下文人之情不能親其所怨不能譽其所惡文義相屬當乙正故不能學者遇師則不中。

樾謹按中讀爲忠古字中忠通用漢張遷碑中睿於朝魏橫海將軍呂君碑君以中勇並段中爲忠是其證也遇師則不中言其事師不以忠誠也高注以不中爲不正非是

嗜欲不辟樂乃可務大樂

樾謹按辟讀爲僻謂不邪僻也高訓爲開非是

大樂君臣父子長少之所歡欣而說也

樾謹按大疑夫字之誤

先聖擇兩法

樾謹按高注曰擇棄也法用也則擇乃釋字之誤長見篇視釋天下者釋躉注亦訓釋爲棄是其證

世之人主多以珠玉戈劍爲寶愈多而民愈怨國人愈危身愈危累

樾謹按國人愈危句衍人字身愈危累句衍危字民愈怨國愈危身愈累皆三字句下文曰故樂愈侈而民愈鬱國愈亂主愈卑亦皆三字句是其例也今誤衍人字危字則不特句法參差且國人卽民也既言民又言國人於義複矣

失樂之情。其樂不樂。

樾謹按高注曰。非正樂。故曰不樂也。此注未得古義。古無一字兩讀之說。禮樂之樂。哀樂之樂。其讀同耳。其樂不樂者。言其所爲音樂不足喜樂也。上文曰。以此爲樂則不樂。又曰。凡古聖王之所爲貴樂者。爲其樂也。上樂字並禮樂字。下樂字並哀樂字。高氏以非正樂釋不樂。非其旨矣。

制乎嗜欲。制乎嗜欲無窮。則必失其天矣。

樾謹按下制乎二字衍文也。嗜欲無窮四字爲句。涉上句而衍制乎二字。則文不成義。勝理以治身則生全。以生全則壽長矣。適音

樾謹按下以字衍文。勝理以治身則生全。生全則壽長矣。若作以生全。則文不成義。下文勝理以治國則法立法。立則天下服矣。法立上無以字。是其證。

太小則志嫌。以嫌聽小。則耳不充。

樾謹按高注曰。嫌聽譬自嫌之嫌。此注必有誤。高注原文。當作嫌讀如自謙之謙。禮記大學篇。此之謂自謙。鄭注曰。謙讀爲慊。高意此嫌字與自謙之謙同。亦當讀爲慊。故云然也。孟子公孫丑篇。吾何慊乎哉。趙注曰。慊少也。大學篇正義曰。慊。不滿之貌。太小則志慊於義正合。

以危聽清。則耳谿極。

樾謹按高注曰谿虛極病也殊不成義谿疑斂字之誤其左旁谷字與溪字左旁谷字相似因而致誤也文選上林賦曰與其窮極倦飢郭注曰窮極倦飢疲憊者也是飢極義同並有病義乃之阮隃之陰古樂

樾謹按阮隃本作阮隃阮讀若昆說文繫傳自部阮代郡五阮關也從自元聲讀若昆是其證也阮字讀與昆同故即可借爲昆隃者侖之借字阮隃卽昆侖也因隃誤作隃而讀者又不知阮與昆古音相近故莫得其旨

有倕作爲鼙鼓鐘磬吹蒼管壠饋韜椎鍾

樾謹按吹字衍文也下文云或鼓鼙擊鐘磬吹蒼管箎卽承此文而言此言鼙鼓不言鼓鼙鼓言鐘磬不言擊鐘磬則芥上不得有吹字明矣蓋卽涉下文而衍

周文王處岐諸侯去殷三淫而翼文王

樾謹按高氏解三淫爲剖比干之心斷材士之股剝孕婦之胎先識覽殺三不辜注同然竊謂殺三不辜或如高氏之說若此云三淫恐注義尙有未安且如注義則三淫卽殺三不辜使易其文曰諸侯去殷殺三不辜而翼文王其可通乎三淫之文殆必有誤呂氏原文疑當作諸侯去殷王受而翼文王王與三形似易誤受誤作孚因又誤爲淫耳

土潤溽暑季夏紀

樾謹按暑字衍文也。高注曰：夏至後三十日大暑，節火王也。潤溽而潔重，又有時雨，然則潤溽下無暑字明矣。後人因注有大暑字，遂於正文羼入暑字，並禮記月令而亦誤矣。月令鄭注曰：潤溽謂塗溼也。是古本禮記無暑字。

以將陽氣

樾謹按詩樛木篇：福履將之。箋云：將扶助也。以將陽氣者，以扶助陽氣也。說文手部：將扶也。將與牀通。無留獄訟。以亟以故。

樾謹按高注曰：亟疾故事，然以疾以事義不可通。下以字乃爲字之誤。無留獄訟，以亟爲故。猶上文曰：無敢懈怠，以多爲務也。兩文正一律。

候人兮猗音初

樾謹按文選吳都賦注引此文無兮字，是也。猗卽兮字，不當並用。

涉漢梁敗

樾謹按左傳正義云：舊說皆言漢濱之人以膠膠船，故得水而壞。此言梁敗者，天子造舟爲梁，舟敗卽梁敗也。畢校疑其互異，非是。

四面不出周郊制樂

樾謹按上文曰東西南北不出國郊則此周郊亦國郊之誤韓詩外傳正作四面不出國郊舍行七星星一徙當七年

樾謹按下星字衍文也舍行七星故一徙當七年其中間不應有星字
寒暑則不當明理

樾謹按寒暑上當有其字方與上三句一律

人民淫爍不固

樾謹按下文云禽獸胎消不殖草木蘚小不滋五穀萎敗不成則此句是言男女不能生育季夏紀禾稼不育乃多女災是也高注曰不固不執正道失之

有若山之楫

樾謹按高注曰楫林木也然楫之爲林木古訓無徵楫疑攝字之誤說文木部攝木葉搖白也徐鍇曰謂木遇風而翻見葉背背多白故曰搖白也氣之形狀若風之翻動木葉故曰有若山之楫上文云有若水之波亦以水之播動者爲喻義正一律

有鬼投其陴

樾謹按高注曰：陴，脚也。音楊子愛軒一毛之軒。然陴不訓腳，亦不音軒。音訓均有可疑。以下文有螟集其國例之，則陴字仍當從城上女牆之本義說。文自部陴，城上女牆俾倪也。投其陴，集其國，文正一律。高讀殆非。

攻伐之與救守一實也。振亂、

樾謹按高注曰：攻伐欲陷人，救守欲完人。其實一也。然其實一也，謂之一實。義似未安。一實當作一貫。知化篇曰：雖知之與勿知，一貫也。過理篇曰：亡國之主一貫。是呂氏書多用一貫字。此文實字當亦貫字之誤耳。

自今單脣乾肺禁寒、

樾謹按自今乃自令之誤。畢校已及之矣。單字高注訓盡。然脣無可盡之理。殆非也。單當讀爲燁。省不從火耳。後漢泗水王歙傳注：燁，灼也。然則燁脣者，灼脣也。與乾字同義。順民篇：焦脣乾肺。此言燁猶彼言焦。

今不別其義與不義，而疾取救守，不義莫大焉。

樾謹按疾取救守義不可通。疑疾下奪攻伐二字當云：今不別其義與不義，而疾攻伐取救守，不義莫大焉。下文屢以攻伐救守對言，此可爲證。疾攻伐者，言深惡此攻伐之事也。安死篇曰：今多不先定其

是非而先疾鬪爭此惑之大者也。疾攻伐與疾鬪爭同誼。呂氏之意主乎攻伐而不取救守故以疾攻伐取救守爲不義。振亂篇曰今之世學者多非乎攻伐非攻伐而取救守取救守則鄉之所謂長有道而息無道賞有義而罰不義之術不行矣。文義與此相似此云疾攻伐取救守猶彼云非攻伐而取救守也。下文云故大亂天下者在於不論其義而疾取救守誤與此同高注訓疾爲爭其義迂曲矣。

故取攻伐者不可非。

樾謹按取者二字衍文也。此文本云故攻伐不可非。攻伐不可取。救守不可非。救守不可取。言攻伐與救守皆有是有非也。第一句衍取字者字則與下三句不一律而義亦不可通矣。

救守不可取。

樾謹按高注曰於義當守當救不可取而有之也。此注蓋有奪誤。當云於義不當守不當救不可取而有之也。上文攻伐不可取注曰於義不可攻不可伐故不可取是其例矣。惟高氏解取字爲取而有之殊失其旨不可取與不可非對文乃孔子奚取焉之取非謂取而有之也。畢氏沅校本不解前後文意又不知高注之奪誤反疑此五字爲衍文故具論之。

若令桀紂知必國亡身死殄無後類吾未知其厲爲無道之至於此也。吳王夫差智伯瑤知必國爲丘墟身爲刑戮吾未知其爲不善無道侵奪之至於此也。晉厲知必死於匠麗氏陳靈知必死於夏徵舒宋康

知必死於溫。吾未知其爲不善之至於此也。

樾謹按此文凡言吾未知者三。惟末句不誤。第一句第二句皆有衍字。蓋此文皆承上文而言。上文曰使夏桀殷紂無道。至於此者幸也。使吳夫差智伯瑤侵奪。至於此者幸也。使晉厲陳靈宋康不善。至於此者幸也。據此則第一句當云。吾未知其爲無道之至於此也。第二句當云。吾未知其爲侵奪之至於此也。今第一句衍厲字。第二句衍不善無道四字。則與上文不相應矣。

古之至兵民之重令也。論威

樾謹按古乃謂字之誤。涉下文故古之至兵句而誤也。謂之至兵四字爲句。乃結上之詞。當連上文讀之曰。凡軍欲其衆也。心欲其一也。三軍一心。則令可使無敵矣。令能無敵者。其兵之於天下也。亦無敵矣。謂之至兵。高氏本於此。下出注曰。至兵。至德君之兵也。令無不化。故謂之至兵也。今誤移注文於民之重令也。下乃改注文至兵爲至重。而文義俱乖矣。民之重令也。本與下文重乎天下。貴乎天子。一氣相屬。今誤斷之。則文不成義。非高氏之舊。當訂正。

晉文公造五兩之士五乘。簡選

樾謹按高注曰。兩技也。以技訓兩。未知所出。疑呂氏原文作五能之士。古能字或假而爲之。不屈篇曰。施而治農夫者也。注曰。而能也。是本書假而爲能之證。而兩形似。因誤爲兩矣。

能審因而加勝則不可窮矣。決勝。

樾謹按此本作能審因而加則勝不可窮矣。下云勝不可窮之謂神。卽承此言。今則勝二字傳寫誤倒。趙簡子有兩白驃而甚愛之。陽城胥渠處廣門之官夜款門而謁曰。主君之臣胥渠有疾。醫教之曰。得白驃之肝病則止。不得則死。愛士。

樾謹按高注曰。陽城姓胥渠名處猶病也。廣門邑名也。官小臣也。此注殊誤。當以陽城胥渠處廣門之官爲句。官館古同字。周易隨初九官有渝。蜀才本官作館。是其證也。陽城胥渠處廣門之官者。言陽城胥渠居於廣門之館也。夜款門而謁者。卽陽城胥渠。其曰主君之臣胥渠有疾。乃胥渠自通於謁者之詞。非他人代爲之請也。故董安于曰。諱胥渠也。期吾君驃。請卽刑也。若他人代請。則不得以此爲胥渠罪矣。高氏不知官爲古館字。而讀處字絕句。訓處爲病。古無此義。又以款門者爲廣門之小臣。益非當時事實。

天子乃厲服厲飭季秋紀

樾謹按厲飭本作廣飭。高注曰。是月天子尚武。乃服猛厲。其所佩之飾。以射禽也。猛厲下脫之服廣三字。本作乃服猛厲之服。廣其所佩之飾。以射禽也。淮南子時則篇。天子乃厲服廣飭。高注曰。天子尚武。乃服猛厲之服。廣其所佩之飾。以取禽是其明證也。廣字涉上文而誤作厲。而注文又有脫字。遂不可

復正矣。

於是翦其髮鄺其手順民

樾謹按鄺未詳何字畢校云李善注文選應休璉與廣川長書引此亦作鄺音鄺似當從磨得聲善又注劉孝標辨命論引此作磨恐是曆字之誤今按畢說是也呂氏原文本作曆後人皆曆爲鄺遂并正文曆字亦誤加乃旁而曆又誤作磨於是其字益非矣曆者櫼之假字說文木部櫼櫼撕裨指也韻會引繫傳曰謂以木柙十指而縛之也亦通作歷莊子天地篇罪人交臂歷指是也此云曆其手於義正合至精通篇刀若新鄺研高注曰鄺砥也其字宜是曆字之誤與此文全別手豈可言砥乎畢氏混而一之非是

上貢必適

樾謹按此本作貢士必適禮記射義疏引書傳曰古者諸侯之於天子也三年一貢士一適謂之好德再適謂之賢賢三適謂之有功又云貢士一不適謂之過再不適謂之敖三不適謂之誣然則貢士必適謂文王貢士於紂無不適也士誤作上又誤作上貢而義不可通矣

顏色愁悴不瞻者

樾謹按愁悴卽憔悴也說文禾部秋从禾爞省聲籀文作穠不省火部爞讀若焦是秋與焦聲相近漢

書律曆志曰秋鼗也古誼卽存乎聲秋之訓鼗亦秋與焦聲近之證也然則憔悴之爲愁悴正古人同聲段借之例

願一與吳徼天下之衷今吳越之國相與俱殘士大夫履肝肺同日而死孤與吳王接頸交臂而僨此孤之大願也

樾謹按徼天下之衷句衍下字畢校已及矣今吳越之國當作令吳越之國蓋言願令如此也作今者誤

客官爲寡人少來靜郭君乎知士

樾謹按少字衍文涉上文寡人少殊不知此而誤戰國策無少字

故子路揜雉而復釋之審已

樾謹按高注曰不欲天物故釋之此未得呂氏之旨下文曰子列子常射中矣請之於關尹子關尹子曰知子之所以中乎答曰弗知也關尹子曰未可子路之釋雉卽關尹子之意蓋揜襲而取之是未知所以取之也猶射中而未知所以中也雖足以得物而於己未審此子路之所以復釋之而呂氏引以證審己之義者也高注失之

君之賂以欲岑鼎也以免國也

樾謹按此當作君之賂以岑鼎也。欲以免國也。欲字誤移在上句。則文不忒。義畢曰。猶言賂以其所欲之岑鼎曲說也。

今夫攻者。砥厲五兵。侈衣美食。發且有日矣。所被伐者。不樂。非或聞之也。神者先告也。

樾謹按侈衣美食四字。當在所被伐者下。言攻者將發。而所被伐者。雖侈衣美食而不樂也。

夫葬所愛所重。而以生者之所甚欲。其以安之也。若之何哉。節喪

樾謹按生者之所甚欲。謂利也。珠玉國寶之類。豈非生者之所甚欲乎。而以之徇葬。其必不能安也明矣。下文曰。民之於利也。犯流矢。蹈白刃。涉血墊肝。以求之。卽承此而言。高注曰。甚欲欲厚葬也。則與下意不屬矣。

皆鄉里之所釜者。而逐之。安死。

樾謹按此句與上下文不屬。疑鄉里以下十字。乃後文撲擊遏奪下之錯簡。當云。君之不令。民父之不孝子。兄之不悌弟。皆憚耕稼採薪之勞。不冒官人事而祈美衣侈食之樂。智巧窮屈。無以爲之。於是乎聚羣多之徒。以深山廣澤林藪。撲擊遏奪鄉里之所釜齎者。而逐之。又視名丘大墓葬之厚者。求舍便居。以微拍之。如此則文義始順。戰國策秦策。蔡澤見逐於趙。而入韓魏。遇奪釜鬲於涂。此云撲擊遏奪鄉里之所釜齎者。而逐之。卽其事矣。若在上文。則義殊不可曉。

此言不知鄰類也。

樾謹按鄰字衍文也。此言不知類也。與孟子告子篇此之謂不知類。文義正同。鄰類形似。因譌致衍耳。聽言篇曰。乃不知類矣。達鬱篇曰。不知類耳。並無鄰字。足徵此文之衍。

其所非方其所是也。其所是方其所非也。

樾謹按兩方字並乃字之誤。言所非乃其所是。所是乃其所非也。故曰是非未定。高氏不知方字之誤。而訓爲比迂矣。

其主俗主也不足與舉異寶。

樾謹按舉字衍文也。此當云其主俗主也不足與今衍舉字者古與舉二字通用。周官師氏職曰王舉則從。故書舉爲與。史記呂后紀蒼天舉直徐廣曰舉一作與。是其證也。疑此文與字本或作舉傳寫誤合之。因爲不足與舉矣。高注訓舉爲謀非是。

五員過於吳。

樾謹按此當作五員適於吳。涉上文過於荆而誤耳。上文云因如吳過於荆蓋紀其所經歷故得言過若吳則其所如也。不得言過矣。高注曰過猶至也。當作適猶至也。莊子天地篇釋文引司馬注曰適至也。高氏訓適爲至。正與此同。足徵過字之誤。

天地至大矣至衆矣。將奚不有爲也。而無以爲爲矣。而無以爲之。

樾謹按而無以爲四字爲句。將奚不有爲也。而無以爲爲矣。言雖有爲而仍無爲也。高氏讀而無以爲爲矣六字爲句。則上下文皆不成義。

搏杖而揖之異用、

樾謹按搏杖卽扶杖也。專聲夫聲相近故義得通。釋名釋言語曰扶傅也。傅近之也是其例矣。無發蓋藏。無起大衆。以固而閉。發蓋藏起大衆。地氣且泄。仲冬紀

樾謹按以固而閉。本作以固天閉地。地氣且泄。本作陽氣且泄。音律篇曰黃鐘之月土事無作。慎無發蓋。以固天閉地。陽氣且泄。是其證也。月令作以固而閉。地氣且泄。乃奪陽字。又誤天字爲而字耳。後人據月令以改此文。幸音律篇未改。尙可訂正。說詳羣經平議。

兼用六物

樾謹按上文稌稻必齊。麴蘖必時。湛餧必潔。水泉必香。陶器必良。火齊必得。正是六物。故月令正義曰六物者。稌稻一。麴蘖二。湛熾三。水泉四。陶器五。火齊六也。其義明白。自可無疑。而高氏此注曰六物。稌稻麴蘖水火也。則與上文不合。疑高注本曰六物。稌稻麴蘖湛餧水泉陶器火齊也。傳寫有奪文耳。人時灌之。則惡之而日伐其根。至忠。

樾謹按日當作自字之誤也。此句自字與上句人字正相對。下文曰夫惡聞忠言乃自伐之精者也。卽承此言之足徵日伐之當作自伐矣。

王大怒不說。

樾謹按大怒不說於文似複而非複也。說之言解也。詩氓篇猶可說也。鄭箋曰說解也。禮記檀弓篇天下其孰能說之。鄭注曰說猶解也。然則大怒不說猶大怒不解耳。

殺身出生以徇之忠廉。

樾謹按高注曰出猶去去生必死也。然出生二字義甚迂曲。疑當作出身殺生以徇之。誠廉篇曰此二士者皆出身棄生以立其意亦以出身二字連文可證。

有妻之子而不可置妾之子當務。

樾謹按此當作有妻之子不可而置妾之子乃後人不解古義而妄改之也。不可而者不可以也。本書每有此例。功名篇曰故當今之世有仁人在焉不可而不此務。有賢主不可而不此事不屈篇曰惠子曰若王之言則施不可而聽矣。用民篇曰處次官執利勢不可而不察於此。凡言不可而者並與不可以同。

覓謹數犯我以義違我以禮長見。

樾謹按犯我以義違我以禮卽範我以義圍我以禮範圍作犯違皆假借字周易繫辭傳範圍天地之化釋文曰範馬張王肅本作犯圍本作違是其證矣遭乎亂世不爲苟在誠廉

樾謹按在字無義疑仕字之誤

與其竝乎周以漫吾身也不若避之以潔吾行

樾謹按竝字無義疑立字之誤

公孫宏敬諾不侵

樾謹按敬諾上本有曰字傳寫奪之耳戰國策正作公孫宏曰敬諾良人請問十二紀序意

樾謹按高注曰良人君子也此訓未得國語齊語曰十連爲鄉鄉有良人焉韋注曰賈侍中云良人鄉士也昭謂良人鄉大夫也呂氏所稱良人或亦此乎

嘗得學黃帝之所以誨顓頊矣爰有大圓在上大矩在下汝能法之爲民父母

樾謹按大圓四語皆黃帝之言爰卽曰字也尚書洪範篇土爰稼穡史記宋世家作土曰稼穡古爰曰通用爰有卽曰有耳

三者皆私設精則智無由公。

樾謹按精之言甚也。呂氏之意蓋謂目耳心三者皆爲私設。至其甚則智無由公矣。至忠篇曰。夫惡聞忠言乃自伐之精者也。注曰。精猶甚。勿躬篇曰。夫自爲人官。自蔽之精者也。注曰。精甚然則謂甚爲精。本書之恆言。畢氏疑精爲情失之矣。

諸子平議卷二十三

呂氏春秋二

秦之陽華有始覽

樾謹按高注曰陽華在鳳翔或曰在華陰西當以華陰之說爲是陽華與華陰其實一地皆從華山得名主乎山而言之則爲華山之陰故縣名華陰主乎地而言之則華山當其陽故數名陽華漢書地理志大原郡陽曲應劭曰河千里一曲當其陽故曰陽曲陽華之名猶陽曲也周禮之楊糸爾雅之楊跨並陽華之段音至周禮以楊糸爲冀州數亦猶以潁湛爲荊州浸波溠爲豫州浸同屬傳寫之訛郭璞注爾雅謂在扶風汧縣西則混於雍州之弦蒲高誘注淮南子謂在馮翊池陽則混於周之焦護並非也說詳羣經平議

南方曰巨風

樾謹按李善注文選木元虛海賦王子淵洞簫賦潘安仁河陽縣作詩引此並作凱風今作巨者疑豈之壞字也禮記孔子閒居篇表記篇釋文並曰凱本作豈是豈凱古通用豈風卽凱風也豈字闕壞止存下半因譌爲巨耳

代火者必將水。天且先見水氣勝。水氣勝故其色尙黑。其事則水。水氣至而不知數備。將徒于土。應同。樾謹按水氣勝。故其色尙黑。其事則水。此十二字當爲衍文。乃淺人不察文理。以上文之例增入。而不知其不可通也。當呂氏箸此書時。秦猶未并天下。所謂尙黑者。果何代乎。呂氏之意。以爲周以火德王。至今七百有餘歲。則火氣之衰久矣。其中間天已見水氣勝矣。但無人起而當之耳。故曰水氣至而不知數備。將徒于土。言後之有天下者。又當以土德王也。今增入故其色尙黑。其事則水。二語則與水氣至而不知文不相屬矣。厥後秦始皇有天下。推五德之運。以爲水德之始。此由其時不韋已死故也。若不韋猶在朝用事。則必以爲水數已備。秦得土德矣。

其室培濕聽言、

樾謹按淮南子齊俗篇。鑿培而遁之。高注曰。培屋後牆也。此培字當從彼訓。其室培者。其室之牆也。濕讀爲塈。廣雅釋詁。塈下也。其室培濕。謂其室牆卑下也。與下文其城郭庳正同一律。若依本字讀之。則不可通矣。

列近則持諫。將衆則罷怯。務本。

樾謹按持諫二字義不可通。疑持祿之誤。持祿言保其祿也。管子明法篇。小臣持祿養交。不以官爲事。晏子春秋問篇。仕者持祿游者養交。荀子臣道篇。偷合苟容。以持祿養交。皆古書言持祿之證。

武王欲及湯而不成。既足以王道矣。論大

樾謹按既足以王道文義未足。呂氏原文當作既足以王通達矣。務大篇曰。湯武欲繼禹而不成。既足以王通達矣。是其證也。荀子儒效篇通達之屬莫不從服。楊倞注曰。通達之屬謂舟車所至。人力所通之處也。荀子書屢言通達之屬。蓋古有此語。呂氏亦循用之耳。通與道字形相似。史記天官書氣來卑而循車通。漢書天文志作車道。是其形似易譌之證。此文通譌作道。又奪達字以致文不成義。當據務大篇文訂正。

地大則有常祥不庭岐母羣抵天翟不周。

樾謹按高氏於天翟下注曰。皆獸名也。不周二字屬下句讀。注曰。不周山在翟。然下文云。山大則有虎豹熊蹊。蛆水大則有蛟龍龜鼈鱣鮪。山大水大文正相對。不得有不周二字也。且山亦多矣。何獨舉不周山乎。不周二字當屬上。自常祥以至不周。皆山水名也。雖不盡可考。然卽不周之爲山名。已可例其餘矣。若從高注以常祥之屬皆爲獸名。則與下文言山複矣。山者獸之窟穴。故舉獸類以明其大。若地之所有。固不獨獸矣。言地大而專舉獸類。非理也。高氏失其義。因失其讀。殆不可從。

人主有奮而好獨者。本味。

樾謹按奮猶矜也。奮而好獨者。矜而好獨也。荀子子道篇奮於言者華。奮於行者伐。楊注曰。奮振矜也。

故古書每以奮矜連文。荀子正名篇曰。有兼聽之明。而無奮矜之容。墨子所染篇曰。其友皆好矜奮。淮南說林篇曰。呂望使老者奮。項託使嬰兒矜。

湯曰可對而爲乎。

樾謹按對字衍文也。可而爲乎猶曰可以爲乎。本書多有此例。去私篇曰。南陽無令。其誰可而爲之。可而即可以也。此因涉下文對曰而誤衍對字耳。

甘而不噭。

樾謹按噭者味之厚也。言甘而不失之過厚也。古或假膾爲之文。選七發甘脆肥膾注曰。膾厚之味也。是矣。說文無噭字。膾亦鹽之俗體。其訓爲腫血。非肥厚之義。然衣部。禮衣厚貌。酉部。釀厚酒也。衣厚謂之禮。酒厚謂之釀。然則味厚謂之噭。正合六書之例。未可因說文所無。而轉疑見于呂氏書者爲譌字也。畢氏沅疑爲噭字之誤。非是。

馬之美者。青龍之匹。遺風之乘。

樾謹按此論果之美。而忽及馬之美。殊爲不倫。疑此當蒙上文所以致之爲句。馬之美三字。乃衍文也。當云。所以致之者。青龍之匹。遺風之乘。蓋果之美者。皆不可以致遠。時日稍久。則味變矣。故必有青龍之匹。遺風之乘。然後可以致之也。後人不得其義。疑此二句言馬。與上文言果者不屬。因加馬之美三

字使自爲一類而不悟與本篇之旨全不相涉且上句所以致之四字亦無箸矣

道者止彼在己

樾謹按止彼在己誼不可通止疑亡字之誤亡彼在己言不在彼而在己也古書每以亡與在相對荀子正論篇曰然則鬪與不鬪亡於辱之與不辱也乃在於惡之與不惡也正名篇曰故治亂在於心之所可亡於情之所欲堯問篇曰吾所以得三士者亡於十人與三十人中乃在百人與千人之中淮南原道篇曰聖亡乎治人而在於得道樂亡於富貴而在於得和並其例也莊子田子方篇曰其在彼邪亡乎我在我邪亡乎彼與此文亡彼在己文法正同亡譌作止因失其旨矣

聖人之見時若步之與影不可離首時

樾謹按見當作尋尋古得字形與見相近因譌爲見史記趙世家踰年歷歲未得一城趙策得作見卽其例也又按聖字疑衍文呂氏之意泛言人之得時若步與影之不可離非專言聖人也涉下文聖人之所貴唯時而誤衍聖字

民之讐之若性戎夷胡貉巴越之民是以雖有厚賞嚴罰弗能禁義賞

樾謹按性字衍文也上文云民之安之若性此云民之讐之若戎夷胡貉巴越之民雖句法參差而意本相準因涉上文而衍性字則戎夷胡貉巴越之民八字贅矣

賞重則民移之。

按謹按高注曰。移猶歸此未得移字之義。禮記郊特牲篇順成之方其蜡乃通以移民也。鄭注曰。移之言羨也是移有羨義。賞重則民移之。言賞重則民欣羨之也。玉篇遼移也。移之爲羨猶遼之爲移矣。各一則不設長攻。

樾謹按廣雅釋詁設合也。尙書盤庚中篇各設中于乃心隸釋載漢石經設作翕爾雅釋詁翕合也是設與翕文異義同各一則不設者言各一則不合也。高注以爲不設攻戰則增出攻戰字矣。遇時雨天地也。

樾謹按地字衍文遇時雨天也。與上文遇湯武天也。遇桀紂天也。一律正呂氏引喻之旨也。地與也形相似因譌致衍耳。

人有爲人妻者人告其父母曰嫁不必生也衣器之物可外藏之以備不生遇合。

樾謹按高注曰不必生謂終死此解大誤不必生者謂不必生子也古者婦人無子則出蓋恐其以無子見出故令外藏衣器以備之而不知其適以盜竊見出也高注大非其旨矣淮南子氾論篇宋人有嫁子者告其子曰嫁未必成也有如出不可不私藏私藏而富其於以復嫁易大旨與此略同故嫫母執乎黃帝。

樾謹按高注曰黃帝說之然執無說義此注非也詩執競篇釋文引韓詩曰執服也執乎黃帝者服乎黃帝也白虎通三綱六紀篇婦服也以禮屈服也後漢書皇后紀注曰婦服也明其服事於人也皆可以解此文執字之義下文黃帝曰厲女德而弗忘與女正而弗衰雖惡奚傷方見黃帝說之之意若此文但言嫫母服事黃帝未以黃帝言也

客有進狀有惡其名言有惡狀

樾謹按客下涉下文而衍有字其下涉上文楚王怪其名句而衍名字句末狀字亦涉上文而衍呂氏原文本云客進句狀有惡句其言有惡句兩有字均讀爲又狀又惡其言又惡卽下文所謂惡足以駭人言足以喪國也因多衍字遂不可讀

一上一下以禾爲量必已

樾謹按以禾爲量殊爲無誼高氏引淮南繆稱篇禾三變之文以釋之亦曲說也禾當作和莊子山木篇一上一下以和爲量是其明證禾卽和之壞字

不衣芮溫

樾謹按高注曰芮絮也不解溫字殆卽以本字讀之非也溫讀爲縕禮記玉藻篇縕爲袍鄭注曰縕謂今縕及舊絮也是芮縕義同

子不耕於東海。吾不耕於西海也。吾馬何得不食子之禾。

樾謹按吾不二字衍文也。子不耕於東海。耕於西海也。此也字讀爲邪。古字通用。言東海西海非皆子所耕邪。吾馬何得不食子之禾乎。淮南子人閒篇作子耕於東海。至於西海。吾馬之失安得不食子之苗。其義更明。後人不達古書語意。臆加吾不二字使與上句相對而文義不可通矣。

紛紛分分。愾大覽。

樾謹按高注曰。紛紛。殺亂也。分分。恐恨也。然則分分當作忿忿。老子五十六章解其分。王弼注曰。除爭原也。顧歡本分作忿。卽其例矣。

若告我曠夏盡如詩。

樾謹按上文民心積怨皆曰。上天弗恤。夏命其卒。是有韻之詞。卽所謂詩也。湯誓所稱時日曷喪。予及女偕亡。亦是韻語。蓋當時民俗歌謡。有此言。故湯以爲盡如詩也。高注訓詩爲志於義轉迂。

親郭如夏。

樾謹按高注曰。郭讀如衣。今兗州人謂殷氏皆曰衣。言桀民親殷如夏氏也。高氏此注未得呂氏之意。蓋由正文錯誤耳。呂氏本文當作親夏如郭。言湯之親夏民無異於郭民也。故下文卽繼之曰。此之謂至公。簡選篇曰。親殷如周。視人如己。彼言親殷如周。可知此當言親夏如郭矣。其文誤到。因失其義耳。

靖箕子之宮。

樾謹按靖讀爲旌。旌箕子之宮。與下句羲商容之闔一律。靖從青聲。青從生聲。故旌字假
靖爲之。介立篇東方有士焉曰爰旌目。列子說符篇文亦同。而後漢書張衡傳注引列子作爰精目。然
則旌爲靖。猶旌爲精矣。高注曰。清淨其宮以異之。非是。

士過者趨。車過者下。

樾謹按士過者趨。當作徒過者趨。徒與車相對成義。晏子春秋諫篇曰。載過者馳。步過者趨。文義正與
此同。徒字或作辵。闕壞而止存土字。因誤爲士耳。

將斬岸堙谿以迎鐘櫂勸、

樾謹按斬當爲鑿。說文金部。鑿也。字亦作嶩。文選海賦。嶩陵巒而嶩鑿。注曰。鑿與嶩古字通。是鑿
有鑿義。言岸之高者。則鑿鑿之也。若作斬岸。則無義矣。

弗聽。有頃諫之。

樾謹按頃字衍文也。弗聽有諫之。有當讀爲又。言又諫之也。後人不知有爲又之假字。故妄加頃字耳。
昌國君將五國之兵以攻齊。

樾謹按戰國燕策曰。於是遂以樂毅爲上將軍。與秦楚三晉合謀以伐齊。然則所謂五國者。秦楚三晉

也。高注謂燕秦韓魏趙大誤。燕是本國不當更數。燕策又曰昌國君樂毅爲燕昭王合五國之兵。其語更明可知。五國之不數燕矣。

恩恩乎其心之堅固也。下賢

樾謹按高氏訓恩恩爲明貌然於下堅固義不相應殆非也。恩恩當作勿勿。禮記禮器篇祭義篇鄭注並曰勿勿猶勉勉也。大戴記曾子立事篇盧注同勉勉之義與堅固相應今誤作恩恩者因俗書恩字作忽或省作匆與勿字相似因而致誤耳。

迷乎其志氣之遠也。

樾謹按迷當讀爲彌。古字通用。左傳彌子瑕。大戴禮保博篇作迷子瑕。周官眠祲。七曰彌。鄭注曰故書彌作迷。並其證也。哀二十五十左傳以肥之得備彌甥也。杜注曰彌遠也。文選西京賦彌望廣豫薛綜注同。彌乎其志氣之遠義正相應若作迷則不可通矣。

堪士不可以驕恣屈也。報更

樾謹按高氏讀堪爲湛故曰堪。樂也。然非呂氏意也。堪之言克也。字通作戡。爾雅釋詁戡克也。釋言克能也。然則堪士猶能士也。士之有能者必不爲驕恣屈故曰不可以驕恣屈也。

其實人則甚不安之二者臣爲大王無取焉順說

樾謹按則字衍文也。人字乃又字之誤。其實又甚不安。與上文其名又甚不榮相對。之字屬下句。之二者猶言此二者與莊子之二蟲文法相同。先識篇曰。之二國者皆將亡。慎勢篇曰。之二臣者甚相憎也。皆可爲證。

時不可必成。其人事則不廣。不廣。

樾謹按廣讀爲曠。古廣曠字通。荀子王霸篇。人主胡不廣焉。解蔽篇。則廣焉能弃之矣。楊注並曰。廣讀爲曠。列子湯問篇。不思高林廣澤。釋文曰。廣一本作曠。並其證也。無義篇曰。以義動則無曠事矣。高注曰。曠廢也。此文廣字誼與彼同。言時不可必成。而人事則不可廢也。下文曰。若是而猶不全也。其天邪。人事則盡之矣。正見人事不曠之意。此篇卽以不廣名篇。蓋欲人以人事自盡。毋自曠廢也。高氏不知廣之爲曠。而釋之曰。廣博也。則此二句之義不可通。而於名篇之意亦失之矣。

公子糾外物則固難必。雖然管子之慮近之矣。

樾謹按公子糾三字涉上文而衍。高注曰。糾在外不可謂必得主。故曰固難必。則其所據本已衍。

朝要甲子之期。而紂爲禽貴因。

樾謹按此當作要期甲子之朝。而紂爲禽。高注曰。與諸侯要期以甲子之日。可證正文之本爲要期也。朝期二字形相似。又涉下文吾已令膠鬲以甲子之期報其主而誤耳。其下文曰。武王與周公旦明日

早要期則弗得也。亦以要期二字連文。

孔子道彌子瑕見釐夫人。

畢氏引梁仲子曰淮南泰族訓云孔子欲行王道東西南北七十說而無所偶故因衛夫人彌子瑕而欲通其道語義正合此文似有脫誤。

樾謹按梁氏誤以道字爲行道之道故疑有脫誤其實非也道者由也道彌子瑕見釐夫人者由彌子瑕見釐夫人也晏子春秋諫上篇曰楚巫微導裔款以見景公文法正與此同道導古通用其時已與先王之法虧矣察今

樾謹按高注曰虧毀也然如高注則但當曰其時先王之法虧矣不得曰其時已與也虧當爲詭聲之誤耳左傳齊公子無虧史記齊世家作無詭漢書古今人表亦作無詭是其證也詭之言異也文選西京賦豈不詭哉海賦詭色殊音注並曰詭異也其時已與先王之法詭矣猶曰其時已與先王之法異矣故其下曰世易時移變法宜矣蓋先王之法所以不可行者非法之毀乃時之異也注以本字釋之未得其旨

而佞進今之世當之矣。

樾謹按而佞進三字衍文也謹聽篇無當據刪。

若是而擊可大彊悔過

樾謹按注云一作若是而弗擊不可大彊此蓋校者之詞誤入注文然作若是而弗擊不可較今本爲勝當從之惟大彊二字義不可通今按若是而弗擊不可先軫之言已止於此大彊二字屬下句當作大臣彊請擊之襄公不得已而許之彊請與不得已正相應上文先軫言於襄公曰秦師不可不擊也臣請擊之若此文猶言臣請擊之則詞複矣今本卽涉上文而誤

都鄙有服樂成

樾謹按說文又部艮治也從又從日日事之制也然則服事之服字本作艮今經典皆作服而艮字廢矣日爲事之制故服亦爲制都鄙有服者都鄙有制也襄三年左傳杜注曰公卿大夫服不相踰則誤以爲車服之服此篇高注曰服法服也然都鄙有法服義不可通疑高氏原文曰服法也蓋服爲制故亦爲法淺人不知其義妄加服字耳故聽無事治事治之立也人主賢也

樾謹按聽無事治謂聽愚民之言必無事治也上文曰使鄭簡魯哀當民之誹讟也而因遂弗用則國必無功矣子產孔子必無能矣卽其義也故又曰事治之立也人主賢也高注殊未明了

孔子見之以細觀化遠也察微

樾謹按以細觀化遠也甚爲無義。高注曰見其治知其終故曰觀化遠也亦曲說耳。觀下蓋脫大以近觀四字化字當在遠字之下而化上又脫通於二字本作以細觀大以近觀遠通於化也何以明之淮南子齊俗篇載此事曰孔子之明以小知大以近知遠通於論者也故知此文當作以細觀大以近觀遠說苑政理篇亦載此事曰孔子可謂通於化矣此文有化字故知當作通於化也與淮南子字異而句法同。

郈氏介其雞季氏爲之金距

樾謹按此當從左傳作季氏介其雞郈氏爲之金距蓋爲金距更甚於介其雞故季氏不勝而怒也因歸郈氏之宮而益其宅

樾謹按歸讀爲壞禮記緇衣篇私惠不歸德鄭注曰歸或爲懷古懷壞同聲字亦通用襄十四年左傳王室之不壞服虔本壞作懷是其證也歸可爲懷故亦可爲壞矣

以魯恐不勝一季氏況於三季同惡

樾謹按高氏於同惡下出注云同惡昭公殆失其讀也此當於三季絕句言一季氏猶恐不勝況於三季乎同惡二字屬下固相助爲句同惡固相助言同惡之人固相輔助也昭十三年左傳曰同惡相求如市賈焉卽其義也惡如字

將奮於說以取少主也。去宥。

樾謹按高注曰。少主惠王也。此說非是。據下文云。人之老也。形益衰而智益盛。今惠王之老也。形與智皆衰邪。然則惠王是時已老矣。非少主也。蓋因惠王年老。有漢景帝疑周亞夫非少主臣之意。故唐姑果以此言譖謝子耳。

未失其所以爲士一。而王以爲臣。失其所以爲士一。而王不以爲臣。則嚮之所謂士者乃士乎。正名。

樾謹按上文云。雖見侮而不鬪。未失其四行也。未失其四行者。是未失其所以爲士一矣。然則此文失其所以爲士。上無所承。且於義亦不應有疑。呂氏原文本云。未失其所以爲士一。而王不以爲臣。則嚮之所謂士者乃士乎。今衍十二字。遂不可讀。

齊湣王周室之孟侯也。

樾謹按湣王二字衍文也。齊周室之孟侯也。乃推始封之齊而言。若湣王時。周室衰微。儕於列國。久無此稱矣。下文曰。太公之所以老也。桓公嘗以此霸矣。皆承齊字而言。若此句是齊湣王。則下二句便不可通。高氏作注時。已衍湣王二字。故有山頭井底之譏。其實非也。

分地則速。無所匿遲也。審分覽、

樾謹按遲字衍文也。上云公作則遲。有所匿其力也。此云分地則速。無所匿也。其文甚明。因涉上文而

衍遲字義不可通。高氏曲爲之說，非是。
奪其智能，多其教詔，而好自以。

樾謹按奪當作奮。形似致誤也。奮猶矜也。說見前本味篇。奮其智能，謂矜其智能。今誤作奪，義不可通。夫說以智通，而實以過悅。

樾謹按舊校云：過一作遇。此當以作遇者爲是。遇與愚古通用。詩巧言篇：遇犬獲之。釋文曰：遇，世讀作愚。莊子則陽篇：匿爲物而愚不識。釋文曰：愚本作遇，並其證也。愚字與上句智字正相對。玉篇：慞惑也。然則遇，慞猶愚惑也。說以智通，而實以愚慞。與下文譽以高賢，而充以卑下，贊以潔白，而隨以汙德，任以公法，而處以貪枉，用以勇敢，而堙以罷怯。諸句一律。下兩字與上兩字義皆相反。因借遇爲愚，又誤遇爲過，而其義始晦矣。

莫人不能全，乃備能也。

樾謹按莫人當爲真人。字之誤也。隸書真字作真。莫字作莫。二形相似，故往往致誤。史記高祖功臣侯者表：甘泉戴侯莫搖。漢表莫搖作真粘。新序雜事篇：黃帝學乎大真。路史疏仡紀曰：大真或作大莫。並其證也。真人不能全，乃備能也。蓋卽堯舜不偏物之意。高注不知莫字之誤，曲爲之說，大謬。故曰天無形而萬物以成。君守。

樾謹按曰乃畀字之誤。畀字闕壞。止存上半之曰。因誤爲曰矣。下文至精無象而萬物以化。高注曰。說與畀天同。則其所據本正作故畀天無形。

故善爲君者無識。

樾謹按無識當爲無職。周官職方氏脩華嶽碑作識方氏。是職與識古通用。善爲君者無職。其次無事。無職與無事義相近。若作無識。失其義矣。下文云人主好以已爲。則守職者舍職而阿主之爲矣。然則善爲君者無職。正以此也。高氏不知識之當爲職。乃曰物不可悉識。此曲說也。勿躬篇曰人主知能不能之可以君民也。則幽詭愚險之言無不職矣。無不職者無不識也。此借識爲職。彼借職爲識。正可互證。

故思慮自心傷也。智差自亡也。

樾謹按心字衍文。思慮自傷也。智差自亡也。兩句一律。注云思慮勞精神而亂於心。故自傷也。正以自傷二字連文可知。本無心字。因涉注文亂於心句而誤衍耳。差讀爲蹉。淮南子原道篇曰隅差智故。曲巧譌詐。此云智差。卽彼云偶蹉智故也。故與思慮相對。注曰差過也。用智過差。極其情欲。以自消亡。未得其義。

奮能自殃。其有處自狂也。

樾謹按此當作奮能自殃也。有處自狂也。與上句思慮自傷也。智差自亡也。兩句正一律也。字秦刻石文作芑。其字古鐘鼎文或止作芑。兩形微似。因而致誤。

謁孔子而進食。孔子佯爲不見之任數。

樾謹按孔子佯爲不見之七字。當在上文選閒食熟之上。呂氏本文蓋云。孔子望見顏回。攬其餽中而食之。孔子佯爲不見之。選閒食熟。謁孔子而進食。孔子起曰。今者夢見先君。食潔而後饋。今到其文。則義不可通。李善注文選君子行。因并刪此七字矣。

故善爲君者。矜服性命之情。而百官已治矣。勿躬。

樾謹按矜字義不可通。疑務字之誤。

不好淫學流說知度。

樾謹按流說卽游說也。流游義得相通。漢書項籍傳必居上游。注曰。游卽流也。韋元成傳。德盛而游廣。注曰。游亦流也。匡謬正俗曰。旂者旌旗之旂。訓與旒同。然則從旂從旒之字本得通用。荀子勸學篇。昔者瓠巴鼓瑟而流魚出聽。流魚卽游魚也。游說之爲流說。猶游魚之爲流魚矣。

蒙厚純樸以事其上。

樾謹按蒙與厚同義。詩長發篇爲下國駿厖。毛傳曰。厖厚也。荀子榮辱篇引作爲下國駿蒙。楊注曰。蒙

讀爲厖厚也。此云蒙厚純樸以事其上。蒙亦當讀爲厖。厖厚爲一義。純樸爲一義。以不知爲道。以柰何爲實。知度。

樾謹按舊校云。實一作寶。與淮南主術篇合。當從之。高注曰。以不知爲貴。因循長養。不戾自然之性。故以不可柰何爲實也。實亦寶字之誤。惟正文但言柰何。而注文增出不可。恐非其旨。柰何卽如何也。昭十二年公羊傳注曰。如猶柰也。是柰與如同義。旣以不知爲道。則遇事必曰如何如何。故以如何爲寶也。孔子曰。不曰如之何如之何者。吾末如之何也已矣。可證此義。下文堯曰。若何而爲及日月之所燭。舜曰。若何而服四荒之外。禹曰。若何而治青北化九陽。奇怪之屬。引三聖人言。皆有若何二字。若何卽柰何也。以柰何爲寶之義。呂氏自申明之如此。足見高注之非。

此页空白

諸子平議卷二十四

呂氏春秋三

待其功而後知其舜也。是市人之知聖也。審應。

樾謹按上文云未有功而知其聖也是堯之知舜也。然則此文亦當云待其功而後知其聖也是市人之知舜也。聖舜二字傳寫互易。

王射之重言、

樾謹按高注曰使王射不動不鳴何意也。是以王射之三字爲成公賈之言殆非也。此三字當連下曰字爲句。王射之曰有鳥止於南方之阜。其三年不動。將以定志意也。其不飛。將以長羽翼也。其不鳴。將以覽民則也。皆王射之之言。若如高注。則曰字上又當有王字矣。

昔吾所亡者紡緝也。今子之衣禪緝也。以禪緝當紡緝子豈不得哉。淫辭。

樾謹按紡與禪對。紡猶複也。紡字從方。方之本義爲兩舟相並。其字亦或作舫。衣之複者謂之紡。猶舟之並者謂之舫矣。故計其禪與紡而因以爲得耳。

罪不善善者故爲不畏。

樾謹按此本作罪不善善者故爲畏故讀爲胡墨子尙賢中篇故不察尙賢爲政之本也一本故作胡下文曰胡不察尙賢爲政之本也是上文故字乃胡之假字管子侈靡篇公將有行故不送公亦以故爲胡並其證也故爲畏卽胡爲畏言所罪者止是不善者則善者胡爲畏也後人不知故與胡通而疑故爲畏三字文不成義遂臆加不字失其旨矣楊倞注荀子解蔽篇引論衡正作善者胡爲畏

以示諸民人

樾謹按舊校云民人一作良人當從之良人見序意篇蓋當時有此名目高彼注曰君子也非是說見前

豎子操蕉火而鉅不屈

樾謹按蕉當作焦求人篇十日出而焦火不息是其證也字亦作燭舉難篇燭火甚盛蓋燭焦聲近通用莊子逍遙遊篇日月出矣而燭火不息釋文曰燭本作燋儀禮士喪禮楚焞置于燋注曰燋炬也所以然火者也禮記少儀篇執燭抱燋注曰未爇曰燋是其字本作燋說文火部燋所以然持火也求人篇作焦者從省此篇作蕉則段字耳

寡人寧以臧爲司徒無用印應言

樾謹按高注曰臧亦魏臣此恐不然若臧實有其人則魏王已有爲司徒之人矣何以下文又曰願大

王之更以他人詔之也乎此臧乃臧獲之臧方言曰荆淮海岱雜齊之閒罵奴曰臧是也寧以臧爲司徒無用印乃極言印之不可用故下文起賈謂孟印曰公甚賤於公之主也蓋視之不如臧獲賤之至矣若臧亦魏臣則何賤之有乎

以絳帑安邑令負牛書與秦猶乃善牛也印雖不肖獨不如牛乎

樾謹按此當作令牛負書與秦高注曰言王使負牛持絳帑安邑之書致之於秦秦猶善牛亦當作使牛負持正文注文牛字並當在負字之上蓋言王以地與秦則雖使一牛負持其書以往秦猶將善視此牛也故曰印雖不肖獨不如牛乎今牛負字到義不可通畢氏沅曰負牛當亦是魏臣在孟印之下誤矣

令二輕臣也令臣責印雖賢固能乎

樾謹按令二兩字義不可通疑今王兩字之誤言王令三將軍爲臣先曰視印如身是重臣也今王輕臣也令臣責印雖賢固能乎因涉上下文並有令字故誤今爲令因又誤王爲二耳高注曰二疑也臣見疑則不重矣此注亦有誤高注本云輕疑也臣見疑則不重矣蓋高氏以疑訓輕又以其義未足故加下句以申明之今作二疑也乃後人以既誤之正文改不誤之注文耳又高氏於令臣責下注曰令秦責臣此注亦誤當云令臣責秦言王旣輕臣日後秦復有隙臣不能復責之也今到其文曰令秦責

臣則失其義矣。古書錯誤所在多有。學者宜悉心考正之。又況於弱魏王之令乎。

樾謹按乎字衍文。又況於弱四字爲句。當連上文讀之。曰。魏雖強。猶不能責。無責又況於弱。魏王之令四字。屬下文讀。當云。魏王之令。孟卯爲司徒。以棄其責。則拙也。今衍乎字。遂失其讀。并失其義。中非獨弦也。而弦爲弓中之具也。具備。

樾謹按弓字衍文也。無弦則必不能中。故弦爲中之具。今衍弓字。則文不成義矣。

吾子胡不位之。離俗覽

樾謹按之字衍文也。高注曰。何不位天子之位也。則所據本正作胡不位。卻而自歿。

樾謹按歿當爲刎。一切經音義引字略曰。斷首曰刎。又曰。刎古文歿同。荀子彊國篇。是猶欲壽而歛頸也。楊倞注曰。歛當爲刎。蓋古無刎字。古人每借歛爲刎。此又作歿者。歿卽歛之或作體也。高義篇。歿頭乎王廷。歿亦當爲刎。

澹乎四海上德。

樾謹按高注曰。澹之也。之乃足字之誤。古書每以澹爲贍足之贍。漢書食貨志。司馬遷傳。東方朔傳。趙

充國傳師古注並曰。澹古瞻字。是其證也。畢校本謂澹憺義同。疑是妄也。之誤非是。君利勢也。次官也。處次官執利勢不可而不察於此用民。

樾謹按次官二字義不可通。疑當作大官。蓋大誤作欠。因誤作次矣。貴公篇曰。夫相大官也。處大官者不欲小察。可以爲證。

知其能力之不足也。則以爲繼矣。以爲繼知。則上又從而罪之。適威。

樾謹按畢校云。則以爲繼矣。以爲繼知。當作則難以爲繼矣。難以爲繼。脫兩難字。下知字衍。今按畢謂下知字衍是也。謂脫兩難字非也。爲當讀作僞。古字通用。知其能力之不足也。則以僞繼矣。以僞繼則上又從而罪之。文義甚明。莊子則陽篇亦有此文。大略相同。正作民知力竭。則以僞繼之。可證明此文之義。

子陽極也好嚴。有過而折弓者。恐必死。遂應猘狗而弑子陽極也。

樾謹按子陽好嚴四字爲句中間不得有極也二字。蓋涉下句而衍。

冬之德寒不信。其地不剛。地不剛。則凍閉不開。貴信。

樾謹按冬之德寒則凍閉不開。固其所也。何以反是不信之。故此說殊不可通。孟冬紀曰。孟冬行春令。則凍閉不密。疑此文開字亦密字之誤。高注曰。不開氣不通也。其所據本已誤矣。

管仲可謂能因物矣。以辱爲榮。以窮爲通。雖失乎前。可謂後得之矣。物固不可全也。

樾謹按物固不可全也六字與上文不屬。疑此篇之文止於可謂後得之矣。言管仲失乎前而得乎後。其意已足。物固不可全也。乃下舉難篇之起句。當云物固不可全也。以全舉人固難。物之精也。人傷堯以不慈之名。舜以卑父之號。禹以貪位之意。湯武以放弑之謀。五伯以侵奪之事。由此觀之。物豈可全哉。物豈可全。正與物不可全相應。傳寫者誤繫於上篇之尾耳。

故君子責人則以人。舉難。

樾謹按下人字當讀作仁。責人則以仁。與下文自責則以義。正相對。

疏賤者知親習者不知。理無自然。自然而斷相過。

樾謹按理無自然下。奪理無二字。蓋言疏賤者知而親習者不知。此理之所無由然也。理之所無由然而以之斷其孰爲相則過矣。今奪二字文義未足。

君道何如利而物利章。恃君覽。

樾謹按章字衍文。文物當爲勿。尙書立政篇時則勿有閒之。論衡譴告篇作時則物有閒之。莊子天道篇。中心物愷。釋文曰。物本亦作勿。是古字本通也。君道何如利而勿利。言君人之道宜何如乎。務在利民而勿以自利而已。貴公篇曰。伯禽將行。請所以治魯周公曰。利而勿利也。此可爲證。下文曰。德衰世亂。

然後天子利天下國君利國官長利官此國之所以遞興遞廢也亂難之所以時作也然則君道以利而勿利爲貴正呂氏此篇之旨矣

謂子有志則然矣謂子智則不然

樾謹按下然字衍文不讀爲否則然則否相對爲文後人不知不爲否之限字故又加然字耳戰國策正作謂子智則否

今而後知吾先君周公之不若太公望封之知也

長利

樾謹按太公望下不當有封字涉下文太公望封於營丘而誤衍耳

子嘗見兩蛟繞船能兩活者乎

知分

樾謹按兩活無義兩疑而字之誤本在能字之上其文曰子嘗見兩蛟繞船而能活者乎兩而形似又涉上文兩蛟字而誤後人因移之能字之下耳

嬰且可以回而求福乎子惟之矣

知分

樾謹按高注曰惟宜也義不可通呂氏原文當作子推之矣晏子春秋雜上篇曰嬰且可以回而求福乎曲刃鉤之直兵推之嬰不革矣呂氏此文蓋卽本晏子春秋而省其詞子推之矣卽所謂直兵推之晏子謂持直兵者曰子推之矣正見其勇於死義若謂崔子曰子惟之矣轉失當時語氣矣推與惟形

似因而致誤耳。

四上之志。

樾謹按高注曰。四上謂君也。卿大夫士與君爲四。四者之中。君處其上。故曰四上之志。其說四上義甚迂迴。且下文所言亦非君之志也。四上疑當作匹士。皆字之誤耳。禮記禮器篇。匹士太牢而祭謂之攘。此匹士二字之證。下文云爲之天下弗能禁矣。釋之天下弗能使矣。又云生不足以使之。則利曷足以使之矣。死不足以禁之。則害曷足以禁之矣。正所謂匹夫不可奪志者。然則四上爲匹士之誤無疑也。寡人與仲父爲樂。將幾之。達鬱。

樾謹按幾與既通。周易歸妹六五中孚六四月幾望。釋文並曰。荀本幾作既。既之言終也。將既之者。將終之也。畢氏疑是幾何。非是。

比獸之角能以爲城。舉其尾能以爲旌。行論

樾謹按兩能字皆當讀爲而。

莫敢諫若非弗欲也。驕恣

樾謹按此當作莫敢諫者。非弗欲也。言羣臣莫敢諫者。非不欲諫。乃未得進言之道耳。故下文曰春居之所以欲之與人同。其所以入之與人異。今本著作若以形似致誤耳。

共伯和修其行好賢仁而海內皆以來爲稽矣開春

樾謹按以爲二字衍文也而海內皆來稽矣與上文而鳳皇聖人皆來至矣文法一律稽之言同也詩元鳥篇正義引尚書緯曰曰若稽古帝堯稽同也鄭注堯典亦曰稽同也是稽有同義故韓子主道篇曰保吾所以往而稽同之禮記儒行篇古人與稽鄭注曰稽猶合也合亦同也海內皆來稽言海內皆來同也因衍以爲二字高注乃曰皆以來附爲稽遲失之矣

先君必欲一見羣臣百姓也天故使鑾水見之

樾謹按天字誤戰國魏策論衡死僞篇並作夫當從之夫字屬上句讀

弊生事精察賢

樾謹按說苑政理篇作弊性事情當從之爾雅釋詁事勤也勤勞也然則事亦猶勞也言弊其性勞其情也生與性精與情古字並通

十人者其言不義也期賢

樾謹按其言當作言其十人者言其不義也謂言伐衛之不義其卽指伐衛之事而言

民相連而從之審爲

樾謹按高注曰連結也民相與結儕隨之此說連字未得其義連當讀爲輦周官鄉師注曰故書輦作

連鄭司農曰連讀爲輦又巾車職曰連車組輶釋文曰連本亦作輦是連輦古通用管子海王篇行服連輶輶者亦假連爲輦是其證相連而從之者言相輦而從之也人挽車爲輦莊十二年左傳以乘車輶其母又襄十年傳輶重如役皆是莊子讓王篇亦載此事司馬彪曰連讀曰輦得之矣

與諸侯約爲高葆禱於王路疑似

樾輩按禱字不可通當讀爲墻說文土部墻保也連言之則曰保墻九章算術今有方塙墻是也塙墻卽保墻之異文此作葆禱者或古文假借或聲近而誤也王路者大路也廣雅釋詁王大也如大父母稱王父母鮒大者謂之王鮒皆其例也爲高葆禱於王路猶云爲高塙墻於大路御覽引此文葆作堡蓋易以今字無下四字則由不達而臆刪之

不可知則知無安君無樂親矣壹行

樾謹按下知字衍文不可知則無安君無樂親矣不當於則下更出知字上文曰不可知則君臣父子兄弟朋友夫妻之際敗矣是其例也

威利敵而憂苦民行可知者王威利無敵而以行不知者亡

樾謹按威利敵當作威利無敵上云故賢主必使其威利無敵故以禁則必止以勸則必爲此承上文而言不當云威利敵也蓋同是威利無敵而王與亡異則以所行者有可知有不可知耳今奪無字義

不可通又按以行不知者亡當作以行不可知者亡可知不可知相對爲文下云小弱而不可知則強大疑之卽承此而言本篇不可知之文凡七見無作不知者

士義可知故也則期爲必矣

樾謹按故二字涉上文易知故也而衍此言士之義苟可知則必爲人所期會矣不當有故二字故賢者所惡於物無惡於無處

樾謹按王氏引之經義述聞曰處之爲居爲止常訓也而又爲審度爲察書傳具有其義所引證凡七事王說是也此文云無惡於無處者謂無惡於無辨也篇首先王所惡無惡於不可知卽其義也高注未得其旨

北至人正之國夏海之窮求人

樾謹按高注曰今正北極之國也畢云注首今正與正文人正不知孰是今按皆誤字也當作令正淮南子時則篇作北至令正之谷是也又按夏海當作夏晦故高注曰夏海大冥也淮南子正作夏晦高注曰夏大也晦冥也與此正同海字雖亦有晦義然使正文是海字則高氏以夏海爲地名足矣何必定訓爲大冥乎

未死而言死不論以雖知之與勿知同知化

樾謹按論當作諭字之誤也。言未死而言死，則人不諭也。不諭謂不知也。以雖知之，與勿知同，以讀爲已，已者已然也。一字爲句，言已然之後，雖知之，與勿知同矣。篇末曰：夫患未至，則不可告也。患既至，雖知之無及矣。故夫差之知慙於子胥也，不若勿知，正其義也。高注未明。

肉圃爲格過理

樾謹按高注曰：格以銅爲之，布火其下，以人置上，人爛墮火而死，笑之以爲樂。畢氏沅曰：炮格各書俱訛作炮烙，得此可以正之。今按畢說本段氏玉裁詢足訂向來傳寫之誤。惟炮格似有二義。荀子議兵篇，紂剖比干囚箕子爲炮格刑。此則淫刑以逞之事，如高氏所說是也。韓非子喻老篇云：紂爲肉圃，設炮格登糟丘，臨酒池，則似爲飲食奢侈之事。蓋取肉置格上，炮而食之也。此云肉圃爲格，可知格即在肉圃中，其爲飲食事無疑矣。高注非是說詳韓非子。

雕柱而桔諸侯

樾謹按此卽後世鞶韁之戲所自始。高注曰：雕畫高柱，施桔槔於其端，舉諸侯而上下之。所說正得其義。蓋此與上文糟丘酒池肉圃爲格皆飲食遊戲之事。玉篇革部：鞶韁繩戲也。

不可以直言，則過無道聞，而善無自至矣。壅塞。

樾謹按高氏解過無道聞曰：其過成以無道遠聞，此說迂曲，且與下句不一律。道之言由也，從也，過無

道聞言過無由聞與善無自至義同當賞篇曰民無道知天民以四時寒暑日月星辰之行知天又曰人臣亦無道知主人臣以賞罰爵祿之所加知主慎小篇曰輕小物則上無道知下下無道知上凡言無道者並猶言無由也高注失之

此戴氏之所以絕也

樾謹按此卽上文齊滅宋之事戴氏爲宋公族孟子書有戴盈之戴不勝韓非子內儲說有戴驥爲宋太宰蓋皆戴公之後世執國柄時人習見戴氏爲宋公族遂相沿以宋爲戴氏故曰此戴氏之所以絕也乃結上文齊攻宋事非別一事也高注未達此旨

凡說之行也道不智聽智從自非受是也

畢校本曰道謂有道也自字疑衍

樾謹按畢以自爲衍字是也以道爲有道則失之道者由也道不智聽智者由不智聽智也由不智聽智從非受是文義一律言說之所以得行者以人主能由不智而聽智從非而受是也從下衍自字者從與自同義疑一本作從一本作自而傳寫誤合之也畢以道字屬上句讀而釋爲有道失其旨矣然則子事非子之事也不苟

樾謹按子事非子之事言子所事者非子之事也下文今子爲非子之事是其誼矣畢氏疑上子字爲

衍文非是

鍾況然有音自知

樾謹按況讀爲錞說文金部錞鐘聲也此作況者古字通用尙書秦誓篇我皇多有之公羊傳作而況乎我多有之況之爲錞猶況之爲皇矣

故復右主然之罪而賜菌改官大夫當賞

樾謹按高注曰復反也反其罪不復罪也若然獻公於右主然僅不治其罪而於菌改則賜之官大夫之爵未見其能用賞罰也下文云凡賞非以愛之也罰非以惡之也用觀歸也所歸善雖惡之賞所歸不善雖愛之罰是獻公必賞右主然而罰菌改於下文之義方合疑右主然菌改傳寫互易呂氏原文本作故復菌改之罪而賜右主然官大夫復之言報也見周官宰夫職注復菌改之罪卽報困改之罪說文牽部報當罪人也卽此文復字之義也後人見上文皆先言右主然後言菌改遂互易之以順上文之序然正文言復而注文言不復其義正相反足知非呂氏之旨矣且下云賜守塞者人米二十石夫守塞者卽助右主然守塞之人也故承賜右主然句而言若如今本作菌改則菌改乃內獻公者何有守塞之人乎是故賜守塞者與賜右主然兩文必相接其傳寫之誤易更可見矣

養由基尹儒皆六藝之人也博志

樾謹按明李瀚本六藝作文藝畢刻從之謂與下篇合其實非也養由基善射尹儒善御射與御皆六藝之事則作六藝爲是下貴當篇曰故賢主之時見文藝之人也非特具之而已也所以就大務也文藝亦當作六藝此承上善相人者而言亦藝術事也今作文藝者字之誤耳反據此以改上篇謬矣賢良又有死之臣蒙耻似順

樾謹按又有死三字衍文也賢良之臣蒙耻文義甚明疑有死二字本在下文其文云今越人起師臣與之戰戰而敗敗而有死賢良盡死不死者不敢入於國蓋戰而敗敗而有死卽上文所謂戰請必敗敗請必死也有讀爲又敗而又死此謂完子自死也完子爲將而死則賢良莫敢不死其或不死亦必畏罪而不敢入國矣所以不敢入國正以主將先死之故若無此句但曰戰而敗則賢良之死者固死矣其不死者何不敢入之有未足以盡國中之賢良也有死二字羼入上文因并敗而二字刪去之矣至有死卽又死又有二字不當疊用蓋讀者因此有字讀當作又旁注又字因而致衍耳小方大方之類也小馬大馬之類也別類

樾謹按小方大方義不可通方疑犬字之誤因篆文相似而誤也犬馬義正一例高氏無注以犬字不煩更釋也若作小方大方則不容無注矣

高陽應將爲室家匠對曰未可也別類

樾謹按此當於家字絕句。書梓材篇。若作室家。詩縣篇。俾立室家。皆以室家連文。此云將爲室家。亦猶是也。高氏於室字絕句云。家匠家臣也。失之。

德行尊理而羞用巧衛。士容論。

樾謹按衛當作盬。乃假借字。或壞字也。哀二十四年左傳。是盬言也。正義引服虔曰。盬。僞不信也。然則巧盬。猶云巧僞。高注謂羞以巧媚自榮衛。非是。

竈突決上棟焚_{務大}

樾謹按此本作上焚棟。傳寫誤倒。諭大篇作竈突決則火上焚棟。是其證。

民農則其產復。其產復則重徙_{上農}

樾謹按兩復字並當作後字之誤也。後與厚古通用。釋名釋言語曰。厚後也。莊子列禦寇篇注曰。靜而怯乃厚其身耳。釋文曰。元嘉本厚作後。是其證也。民農則其產厚也。其產厚故重徙

矣。御覽兩後字並作厚。正得其義。但字仍當作後。以仍古書假借之舊。辯士篇曰。必厚其鞶。又曰。其鞶而後之。亦厚後通用之證。

農不敢行賈。不敢爲異事。

樾謹按此當以農不敢行賈爲句。言農恆爲農。不敢爲商也。行賈者商也。僖三十二年左傳。鄭商人弦

高杜注曰。商行賈也。高氏以農不敢行爲句。而釋之曰。守其疆畝失之矣。不敢爲異事。亦以農言。若如高注以賈言。則非所謂野禁也。

奪之以水事。是謂籥喪以繼樂。四鄰來虛。

樾謹按籥字義不可通。疑當作淪。莊子知北遊篇。釋文。瀟潰也。瀟卽淪之異文。奪之以水事。正與潰義相應。蓋淪變作瀟。又省作籥。又誤作籥耳。四鄰來虛。當作四鄰來虐。亦字之誤。虐與淪樂爲韻。若作虛。則失其韻矣。

子能以窾爲突乎。子能藏其惡而揖之以陰乎。任地。

樾謹按下文土處爲韻。淫風爲韻。堅均爲韻。糠疆爲韻。獨此二句無韻。疑突乃窾字之誤。窾與陰正爲韻。高注曰。窾容汗下也。突理出豐高也。是以窾爲突。猶以下爲高。然下文諸句並不從相反取義。不必定如高氏之說。且諸句之意。皆不甚可解。而韻則確有可憑。突字之誤。殆無疑也。

人肥必以澤。

樾謹按高注曰。人肥則顏色潤澤。此大誤也。通篇皆言耕種事。不當此句獨言人之顏色。且此句與下文人耨必以旱。正相對。然則澤者。雨澤也。非謂顏色潤澤也。肥疑耜字之誤。上文曰。是以六尺之耜。所以成畝也。其博八寸。所以成畛也。耨柄尺。此其度也。其耨六寸。所以間稼也。以耜耨並言。則此文人耜

必以澤人耨必以旱亦承上而以耜耨並言可知矣。耜謂耕也。耨謂芸也。言耕宜雨。耘宜旱也。耜字從目肥字從口篆文相似。又涉上文地可使肥而誤耳。

寒則雕熱則脩辯士

樾謹按高注曰脩長也於義未得詩中谷有蓽篇嘆其脩矣毛傳曰脩且乾也釋名釋飲食曰脩脩縮也乾燥而縮也。熱則脩者言熱則乾縮也正與寒則雕同義。

衡行必得縱行必術

樾謹按術讀爲遂春秋文十二年秦伯使術來聘左穀並同公羊作遂禮記學記篇術有序鄭注曰術當爲遂是術與遂古通用衡行必得縱行必遂言衡縱皆必順其性也。

樹燒不欲專生而族居

樾謹按高注曰專獨也於誼未得專讀爲搏史記秦始皇紀搏心壹志索隱曰搏古專字周易繫辭傳其靜也專釋文曰專陸作搏昭二十一年左傳若琴瑟之專一釋文曰專本作搏是專與搏古同字而通用管子霸言篇不搏不聽見本篇夫搏國不在敦古尹注並曰搏聚也又內業篇搏氣如神注曰搏謂結聚也然則不欲專生者不欲聚生也與族居同義若訓專爲獨則與族居義反矣下文曰燒而專居則多死蓋以專生族居義同故省文言專居專居者聚居也猶族居也如高注則不可通矣。

穗鉅而芳奪審時

樾謹按高注曰奪或作奮非也此當以作奪者爲是奪者脫之本字說文奮部奪手持隹失之也故引申之爲脫失字後人借作斂而本義晦矣後漢書李膺傳豈可以漏奪名籍苟安而已漏奪卽今人言漏脫也此文芳字當讀爲房房者柎也山海經西山經員葉而白柎郭注曰今江東呼草木子房爲柎是也穗鉅而房奪言穗雖大而其房必脫落也因借芳爲房而後人又昧於奪之本義遂不得其解而誤以爲芳鄭舊發致有作奮之本不可從也

搏米而薄糠

樾謹按搏之言圜也考工記梓人搏身而鴻廬人刺兵搏弓人紓而搏廉鄭注並曰搏圜也楚辭橘頌篇圓果搏兮王注曰搏圜也楚人名圓爲搏然則搏米而薄糠與上文其粟圓而薄糠文義正同下文曰大菽則圓小菽則搏亦以圓搏並言

如此者不益

樾謹按益字無誼高注曰益息也亦不可曉益疑當作嗌方言曰嗌噎也秦晉或曰嗌又曰噎然則不嗌者言食之不噎也呂氏秦人故言秦耳舊校云益一作蒜蒜者莽之誤也說文口部曰莽籀文嗌字然則呂氏原文之作嗌固無疑矣

此页空白

諸子平議卷二十五

春秋繁露一

三者不得則諸侯之得殆貶矣。此楚靈所以稱子而討也。

楚莊王

穢謹按楚靈稱子而討。疑若得之矣。然齊桓不予以專地而封。晉文不予以專殺而討。以三君者之賢。而不得焉。則凡諸侯之得之者。殆非所以爲褒。而適所以爲貶也。故曰。諸侯之得。殆貶矣。明王道焜本注曰。殆恐是不待未達斯旨。

春秋之辭多所況。是文約而法明也。

穢謹按況字絕句。言春秋之辭多以況譬而見。此其所以文約而法明也。凌氏疇注本讀是字絕句失之。

人臣之行。貶主之位。亂國之臣。雖不篡殺。其罪皆宜死。

穢謹按亂國之臣。當作亂主之國。此蒙人臣之行爲文。五句一氣相屬。

春秋曰。晉伐鮮虞。奚惡乎晉而同夷狄也。

穢謹按自此至是其所以窮也。當在竹林篇鄭伐許一節之前。彼文云。春秋曰。鄭伐許。奚惡於鄭而夷

狄之也。中閒亦有問者曰云云。與此文一律。故知兩文必相次也。董子原書當以春秋分十二世以爲三等節爲首篇。其篇名卽曰繁露。今書稱春秋繁露者。以首篇之名目其全書也。傳寫者誤取楚莊王及晉伐鮮虞二節列于其前。遂以楚莊王題篇。并繁露之名而失之矣。然則楚莊王節宜在何處。曰此固不可考。然晉伐鮮虞節在竹林篇。則楚莊王節或亦當在竹林篇。蓋與晉伐鮮虞節本相次也。今本竹林篇逢丑父及鄭伐許兩節相次。古本此兩節之間。當有楚莊王及晉伐鮮虞兩節。晉伐鮮虞與鄭伐許。固以類相從。而楚莊王節以楚莊毅陳夏徵舒。靈王殺齊慶封相提並論。逢丑父節以丑父欺晉。祭仲許宋相提並論。是二事亦以類相從也。然則此兩節之當廁于其間。無疑矣。傳寫者升此兩節於篇首。必非其舊。雖未敢率議遷逐。然不可不知其誤也。盧氏文弨注引錢說。以爲後人掇拾綴緝所致。蓋已見及此。但未知爲竹林篇之錯簡耳。

宋伯姬恐不禮而死於火。齊桓公疑信而虧其地。

樾謹按疑下亦當有不字。疑亦猶恐也。禮記雜記五十不致毀。六十不毀。七十飲酒食肉。皆爲疑死。鄭注曰。疑猶恐也。大戴記曾子立事篇。君子見善恐不得與焉。見不善恐其及己焉。是故君字疑以終身。然則疑與恐同矣。此文上言恐不禮。下言疑不信。文異而義同。傳寫奪不字。義不了矣。如何與同姓而殘賤遇我。

樾謹按與當作以古字通用。

視其溫辭。

樾謹按溫當讀爲蘊古字通也蘊辭謂蘊蓄之辭卽上所謂微其辭者。

然而介以一言曰王者必改制。

樾謹按襄三十一年左傳介于大國杜注曰介猶閒也故古語以閒介連文孟子盡心篇山徑之蹊閒介文選長笛賦閒介無蹊卽用孟子文是也介以一言猶閒以一言蓋春秋之於世事善復古譏易常欲其法先王而或且出一言以介之曰王者必改制此介字卽吾無閒然之閒玉林篇溴梁之盟信在大夫而春秋刺之爲其奪君尊也平在大夫亦奪君尊而春秋大之此所閒也即可說此介字矣凌注曰介因也失之。

今天大顯己物襲所代而率與同。

樾謹按己字絕句物當爲勿尙書立政篇時則勿有閒之論衡譴告篇作時則物有閒之莊子天道篇中心物愷釋文物本亦作勿是古字通也此承上文受命之君天所大顯而言謂天旣大顯己於所代之國本不相襲而已不能改制大率與同則非天意矣。

其有繼周之弊故若此也玉杯

樾謹按有猶爲也。言春秋所以貴志好誠者爲繼周之弊。故若此也。爲有一聲之轉爲可訓。有亦可訓爲見王氏引之經傳釋詞。

五其比。

樾謹按五當爲伍。古字通。昭九年左傳屠蒯。禮記檀弓篇作杜蕡。是也。凡非經所本有之義。皆謂之贅。

屠其贅。

樾謹按屠當爲杜。古字通。昭九年左傳屠蒯。禮記檀弓篇作杜蕡。是也。凡非經所本有之義。皆謂之贅。爲春秋者宜杜塞之。則聖人之大義不爲羣言淆亂矣。

今夫天子踰年卽位。諸侯於封內三年稱子。皆不在經也。而操之與在經無以異。非無其辨也。有所見而經安受其贅也。故能以比貫類以辨付贅者。大得之矣。

樾謹按文九年公羊傳曰。未稱王。何以知其卽位。以諸侯之踰年卽位。亦知天子之踰年卽位也。以天子三年然後稱王。亦知諸侯於其封內三年稱子也。夫經書公卽位。則諸侯踰年卽位見矣。而天子踰年卽位。于經無見也。武氏子毛伯不稱使。則天子三年然後稱王見矣。而魯十二公無有三年稱子於其封內。看是諸侯於其封內三年稱子。于經無見也。凡此皆所謂贅也。而學者操其說。與實在經者無異。然而其中固有辨也。何也。必於經實有所見。然後引而申之。觸類而長之。而經亦安然而受之也。蓋

予此言必有爲而發當時若公孫宏以曲學阿世其所學春秋雜說必有附益于師說之外者故以此辨之與

書曰厥辟不辟去厥祇

樾謹按此今文尙書也祇者病也易復初九无祇悔鄭注曰祇病也說文广部疒病也祇與疒通攷意而觀指則春秋之所惡者不任德而任力驅民而殘賊之其所好者設而勿用仁義以服之也竹林樾謹按其所好者設五字當爲衍文

術修之義也

樾謹按術當讀爲適爾雅釋詁釋文引孫炎云適古述字述與術通述適同字則術適亦同字矣匡謬正俗引逸禮記曰知天文者冠鵠鵠字音聿亦有術音故禮之衣服圖及蔡邕獨斷謂爲術氏冠以顏說推之術通作鵠則亦通作適矣爾雅訓適爲自適修之義卽自修之義正與上文雷同之義相對成文詩文王篇聿修厥德疑三家詩有作適修而訓爲自者董子此言卽本詩文耳

故按春秋而適往事

樾謹按詩殷武篇勿予禡適釋文引韓詩曰適數也適爲責數之數亦可爲計數之數按春秋而適往事猶云數往事矣

春秋以薄恩且施失其子心。

樾謹按恩字絕句施失二字連文下文云子施失恩於親是其證也施讀爲弛古字通用禮記樂記篇庶民弛政釋文曰弛廢也然則弛失其子心者廢失其子心也下文施失恩亦謂廢失恩以本字讀之則不得其解矣

故君子爲之諱不居正之謂避其後也亂移之宋督以成善志玉英

樾謹按不居正之謂及也字並衍文此本云故君子爲之諱句避其後亂移之宋督以成善志今衍此六字則文義不屬矣下文云棄之則棄善志也取之則害王法疑不居正之謂也六字當在此下王道篇云春秋嘉義氣焉故皆見之復正之謂也與此文法一律

至於卽取乎莒以之爲同居

樾謹按同居二字無義疑司君之誤司君者嗣君也尙書高宗彤日篇王司敬民史記殷本紀作王嗣敬民是嗣與司古通用

或請焉或怒焉者何精華

樾謹按怒當作攻攻誤爲奴因誤爲怒矣上文曰大旱雩祭而請雨大水鳴鼓而攻社此承上文而言不得改爲怒也下文曰故鳴鼓而攻之亦不云怒足知其誤

不救陳之患而責陳不離

樾謹按周易否九四疇離祉九家注曰離附也責陳不離者責陳不附也本或作納乃不得其義而妄改之

故去其位辭徒言君之子而已

樾謹按位當作正字之誤也上文曰奚齊避此正辭而稱君之子是其證

剔孕婦見其化王道

樾謹按見字當作觀乃壞字也呂氏春秋過理篇作剖孕婦而觀其化可據以訂正

立適以長不以賢以貴不以長

樾謹按以貴上當據公羊隱元年傳補立子二字

楚公子比魯而立而不免於死

樾謹按此本作楚公子比魯而立而不免於誅絕今誅絕二字傳寫誤入下文淺人遂臆補死字耳下文云齊桓晉文擅封致天子誅絕繼絕存亡侵伐會同常爲本立按擅封是一事致天子是一事繼絕存亡是一事其間不得有誅絕二字明是上文奪去誤著於此也

恩衛葆

樾謹按莊六年經齊人來歸衛寶惟左氏經作衛俘而傳亦作衛寶杜預注曰公羊穀梁經傳皆言衛寶此傳亦言寶唯此經言俘疑經誤然公羊傳文曰此衛寶也則齊人曷爲來歸之衛人歸之也其文雖是寶其義則皆可通何休解詁曰寶者玉物之凡名於是始定爲寶玉字矣董子固傳公羊之學者而此篇有恩衛葆之文葆之與寶固得通用然葆從保聲保從采省采卽古文字也則葆之與俘亦得通用若是衛寶不得言恩其下又言以正固固之平也則其爲俘因明矣竊謂字當作寶義當爲俘何休所解未達斯旨

閔公妬其言曰此虜也爾虜焉知魯侯之美惡乎致萬怒搏閔公絕脰

樾謹按莊十二年公羊傳作爾虜焉故魯侯之美惡乎至傳文故字蓋知字之誤此文致字當從傳作至古字通也爾虜焉知四字爲句魯侯之美惡乎至七字爲句惡音烏至猶甚也說詳羣經平議

自內出外無亡不行自外至者無主不止

樾謹按宣三年公羊傳王者則曷爲必以其祖配自內出者無匹不行自外至者無主不止此卽用彼傳文而有譌字然彼傳論祭祀配食之禮與此論虞公貪財全不相當未詳其旨

乾谿有物女水盡則女兒見水滿則不見

樾謹按漢書郊祀志有物曰蛇注曰物謂鬼神也東平思王字傳或明鬼神信物怪注曰物亦鬼然則

乾谿有物女者殆亦鬼神之類。

匹馬隻輪無反者。

樾謹按僖三十三年公羊傳。匹馬隻輪無反者。釋文曰。一本作易輪。董仲舒云。車皆不還。故不得易輪轍。然則董子原文必作易輪。今作隻者。後人所改也。惟不易輪轍之義。殊爲迂曲。而董子所見傳文如此。必當有說。今按易者。析之假字。析易疊韻。故蝘蜓名蜥蜴。而詩節南山篇。胡爲虺蜴。說文虫部引作胡爲虺蜥。然則易之通作析。猶蜴之通作蜥矣。說文木部析破木也。其字亦或作枅。張遷碑。陽氣厥枅是也。又或作枅。魯峻碑。枅薪弗荷是也。枅枅並從片。則析輪猶片輪也。與馬之稱匹。正同一律。較隻輪之文爲優矣。

觀乎潞子知無輔自詛之敗。

樾謹按詛當讀爲作。言無輔而自作也。詩蕩篇。侯作侯祝。釋文曰。作本作詛。蓋作詛雙聲。古得通用耳。傳曰。諸侯相聚而盟。君子修國曰此將率爲也哉。盟會要

樾謹按修國二字。當在也哉之上。君子曰。此將率爲修國也哉。言將相率而修治其國也。上文曰。以爲本於見天下之所以致患。其意欲以除天下之患。夫諸侯相聚而盟。固欲相率而修治其國。其意本以除天下之患。而天下之所以致患。即在於此。此春秋所以善胥命也。修國二字誤倒在上。則文不可通。

論賢才之義。

樾謹按義者宜也。論賢才之義，卽論賢才之宜，言各有所宜也。

故元者爲萬物之本，而人之元在焉。安在乎，乃在乎天地之前，重政。

樾謹按乃在乎三字衍文也。安在乎天地之前，言不必在天地之前也。易曰：有天地然後有萬物。聖人之言，未有及天地之前者。有物混成，先天地生，此老氏之旨，非聖人之言也。下文曰：故春正月者，承天地之所爲也。繼天之所爲而終之也。其道相與其功持業，安容言及天地之元？天地之元，奚爲於此？此正申說安在乎天地之前之意，可證此三字是衍文矣。

安容言乃天地之元。

樾謹按乃是及字之誤。聚珍本曰：乃他本作及，當從之。

夫能通古今，別然不然，乃能服此也。服制矣。

樾謹按下，然字衍文也。此以通古今，別然不爲對文。玉篇士部引傳曰：通古今，辯然不謂之士，是其證也。後人不知然不卽然否，而於不下又加然字，失之矣。荀子哀公篇：情性者，所以理然不取舍也。大戴記哀公問五義篇，作所以理然不然取舍者也。蓋亦後人所增，失與此同。

是故春秋之道，以元之深，正天之端，二端。

樾謹按深字無義據隱元年公羊傳注曰故春秋以元之氣正天之端疑此文深字亦氣字之誤深字左旁之突隸書或作宋與氣相似氣誤作宋因誤作深矣當據何劭公注訂正故予先言春秋詳已而略人俞序

樾謹按下文有故子夏言故子池言則此文予字必子字之誤子先未知何人殆亦七十子之弟子歟此篇所稱引皆七十子之微言惜多奪誤難以盡通耳

任羣賢所以爲受成離合根

樾謹按此本作任羣賢以受成所爲二字涉上下文而衍

分障險阻立元神

樾謹按淮南子覽冥篇曰上天之誅也雖在曠虛幽閒遼遠隱匿重襲石室界障險阻無所逃之亦明矣文義與此略同則此文分字疑介字之誤介與畛通以爲名定實考功名

樾謹按爲字衍文以名定實與上句以多除少相對

其先比二三分以爲上中下以考進退

樾謹按比二皆衍文比卽先字之誤二卽三字之誤皆因誤致衍者也

以爲一最。

樾謹按當作以一爲最。與下文五爲中。九爲殿。一律順數四而相復。三代改制質文、

樾謹按此言五帝不得言四而相復。其上當有闕文。

然則其略說柰何。曰。三正以黑統初。正日月朔于營室。斗建寅。

樾謹按三正以黑統初。謂三正以黑統爲始也。初下有闕文。當據下文補正。黑統柰何。曰。正黑統者。厤十一字。

是月不殺。

樾謹按凌氏注云。王者養微。故懷任新產之月。雖有罪。法所不刑。此誤以是月二字屬上爲義也。上云。法不刑有懷任新產者。其義已足。無取申說。下云。法不刑有身懷任。又云。法不刑有身重懷藏以養微。夫旣以養微說之。則是月不殺。不連上事明矣。今按是月不殺。與下文聽朔廢刑。發德相次。是月謂晦日也。僖十六年經曰。是月六鵠退飛過宋都。公羊傳以爲晦日。其明證矣。凌氏以公羊說董子書。抑何不達此旨。

用纖施舞。

樾謹按此卽所謂旄舞也。周官樂師有旄舞。鄭司農注曰。旄舞者。犧牛之尾。又春官序官旄人。鄭注曰。旄。旄牛尾。舞者所持以指麾。此稱爲纖施者。據周書王會篇。樓煩以星施。孔晁注曰。施所以爲旄羽珥。然則纖施舞之卽旄舞明矣。魯公子尾字施父亦可爲證。

四法修於所故。祖於先帝。故四法如四時然。

樾謹按四法卽上文所謂主天法商而王。主地法夏而王。主天法質而王。主地法文而王也。盧注引錢云。四法卽夫子所以答顏淵者。殊失其旨。

吾聞聖王所取儀金天之大經。官制象天。

樾謹按金字無義。下文云。何謂天之大經。又云。三而一成。天之大經也。不言金天。此金字乃法字之誤。言聖人所取者。無不儀法乎。天之大經也。法古文作金。因誤作金矣。

一陽而三春。非自三之時與。

樾謹按王道焜本作一陽而三者。當從之。陽卽春也。董子原文。本作一春而三者。非自三之時與。晉人避諱。改春爲陽。若春秋之稱陽秋矣。校正者不知一陽之卽一春。而反疑三者之爲三春。易其文曰。一陽而三春不可通矣。

是故以其三爲選。

樾謹按依下文當作是故其以三爲選。

以十端四選。

樾謹按上云是故以四選率之此當云以十端率之四選二字涉上而誤。

以三公之勞率之。

樾謹按勞當讀爲僚僚從寮聲與勞聲相近臚亦從寮聲而或體作營從勞省聲卽其例也昭七年左傳隸臣僚服注曰僚勞也是僚之與勞聲近而義通。

子猶安敢擅以所重受於天者予他人也堯舜湯武

樾謹按此有闕文當云子猶不敢擅以所重受於父者與他人堯舜安敢擅以所重受於天者與他人也。

舟車甲器有禁服制

樾謹按甲乃申字之誤申與陳通詩大雅文王篇陳錫哉周商頌烈祖篇申錫無疆陳錫申錫一也說詳羣經平議申器卽陳器定四年穀梁傳徒陳器范注曰陳器樂縣也是也管子立政篇正作舟車陳器

天子分左右五等三百六十三人法天一歲之數爵國

樾謹按下文天子有三公九卿二十七大夫八十一元士三百四十三下士合之適得三百六十三人凌引天官疏天官總攝三百六十官未得其旨

通佐十上卿與下卿而二百二十人

樾謹按十乃七字之誤據下文云有七上卿有通作又三公九卿外又有七上卿卽所謂通佐也故知十上卿當爲七上卿矣二百二十人當作二百八十人聚珍本云下二他本作六六與八形似而誤今本作二十則後人依旣誤之下文改之也說詳後

諸侯大國四軍

樾謹按諸經皆言大國三軍無言四軍者凌氏注云考小司徒注百里之國凡四都一都之田稅入于王古者計夫出稅有稅則有夫以其奉公家也故不言四軍而言三軍其實暗中有一軍也凌氏此注雖似合下文一軍以奉公家之說然奉公家非奉王家也則與小司徒注所稱稅入于王者本非一事未可援以爲說今以本文考之四軍實當爲三軍下文曰大國十六萬口而立口軍三又曰定率得十六萬口三分之則各五萬三千三百三十三口爲大缺一字軍三此公侯也然則以十六萬口三分之而爲三軍不得更立一軍矣其下又曰天子地方千里爲方百里者百亦三分除其一定得田方百里者六十六與方十里者六十六定率得千六百萬口九分之各得百七十七萬七千七百七十七口爲

京口軍九三。京口軍以奉王家。然則天子九軍。以三軍奉王家。大國三軍。以一軍奉公家。皆與數適合。奉王家之三軍。卽在九軍之中。則奉公家之一軍。亦卽在三軍之中。不得有四軍也。古三四字皆積畫。往往致誤。儀禮觀禮四享。鄭注曰。四當爲三。古書作三四。或皆積畫字相似。由此誤也。周官內宰疏引鄭注曰。純四。狃四。當爲三。古三四積畫。是以三誤爲四。並其證。

方十里爲方百里者百。得二千四百口。

樾謹按。上百字衍文也。方十里之地。不得有方百里者百。而方百里者百。則不止二千四百口。故知其誤。當云方十里爲方里者百。

得良田方十里者六十六。與方里六十六。

樾謹按。凌氏注曰。與上十字。當在方字之下。里字之下。當有者字。此大誤也。與上十字乃衍文耳。董子原文本云。得良田方十里者六十六。與方里者六十六。蓋方百里之地。爲方十里者百。三分去一。應除去方十里者三十三。得方十里者六十六。餘一箇方里之地。三分去一。應除去方里者三十三。得方里者六十六。餘一箇方里之地。除之不盡。姑舉大數耳。下文言天子地方千里。得田方百里者六十六。與方十里者六十六。然則大國地方百里。爲方十里者六十六。方里者六十六。其數甚明。凌氏何猶未達乎。

有七上卿.二十一下卿.六十三元士.百二十九下士.

樾謹按三七二十一.二十一而三之得六十三.爲元士之數.六十三而三之.當得一百八十九.爲下士之數.今乃云百二十九下士.文之誤也.於是上文言通佐二百八十人.亦改爲二百二十人矣.

王后置一太傅太母.

樾謹按下太字疑衍文.蓋尊之曰太傅母.不當分之爲太傅太母也.

士入仕宿衛天子者.比下士.下士者.如上士之下數.

樾謹按下文言大國次國.並云士宿衛公者.比上卿者有三人.下卿六人.比上下士者.如上下之數.則此文亦當云士入仕宿衛天子者.比上卿者有三人.下卿六人.比上下士者.如上下之數.傳寫奪誤.士宿衛公者.比公者.比上卿者有三人.下卿六人.

樾謹按比公者三字衍文.

故伯七十里.七七四十九.三分除其一.定得田方十里者二十八.與方十里者六十六.

樾謹按當作方十里者三十二.與方里者六十六.蓋方七十里之地.爲方十里者四十九.三分去一.應除去方十里者十六.得方十里者三十二.餘一箇方十里之地.三分去一.應除去方里者三十三.得方里者六十六.餘一箇方里之地.除之不盡.今作方十里者二十八.方十里者六十六.失其數矣.

故子男方五十里.五五二十五爲方十里者六十六.

樾謹按當作方十里者十六.與方里者六十六.蓋方五十里之地爲方十里者二十五.三分除一應除去方十里者八.得方十里者十六.餘一箇方十里之地.三分去一應除去方里者三十三.得方里者十六.餘一箇方里之地.除之不盡.今作方十里者六十六.傳寫奪誤耳.

故附庸字者.地方三十里.三三而九.三分而除其一定得田方十里者六十.

樾謹按當作方十里者六.蓋方三十里之地爲方十里者九.三分除一應得方十里者六.傳寫誤衍二字.

稱名善者.地方半字君之地.九半四分除其一定得田方十里者三.

樾謹按善衍字.蓋卽者字之誤而衍也.上云附庸字者方三十里.名者方二十里.而此云稱名者地方半字君之地.則止方十五里.與上文不符.九半之文.亦不可曉.據云.四分除一.定得田方十里者三.則適是方二十里之地.蓋方二十里之地爲方十里者四.四分除一.則方十里者三矣.然則所云半字君之地者.必誤也.

下四半三半二十五.三分除其一定得田方十里者一.與方里者五十.

樾謹按文譌難讀.據云.三分除其一定得田方十里者一.與方里者五十.則是方十五里之地.蓋方十

五里之地爲方五里者九.三分除一.則爲方五里者六.并四箇方五里之地.作爲方十里者一.則餘兩箇方五里之地.各爲方里者二十五.并之爲五十矣.上云附庸字者.方三十里.名者方二十里.人氏者方十五里.則此所說者必是附庸稱人氏之制.上文所謂半字君之地者.宜移之於此矣.

仁義發第二十九

樾謹按發乃法字之誤.篇中云.是故春秋爲仁義法.仁之法在愛人.不在愛我.義之法在正我.不在正人.是其證也.

未致豫備之則美之.

樾謹按致當讀爲至.

凡此六者以仁治人義治我.

樾謹按上文春秋刺上之過.而矜下之苦.小惡在外弗舉.在我書而誹之.並無六者.則此六字當爲衍文.

且論已見之而人不察.

樾謹按論卽謂論語也.言此所說者在論語已有明文.而人顧不之察也.下文引君子攻其惡.不攻人之惡.居上不寬.爲禮不敬.皆論語文可證.必仁且智篇曰.論之所謂不知人也者.恐不知別此等也.論

亦卽是論語所謂不知人者卽患不知人是矣。

絕世無復殘類滅宗亡國是也必仁且智

樾謹按無復當爲無後字之誤也亡國下有闕文據上文云福及子孫德加萬民湯武是也則此當云桀紂是也。

諸子平議卷二十六

春秋繁露二

今人有大義而甚無利身之養

樾謹按當作大有義而甚無利與下文人甚有利而大無義相對

泰伯至德之侔天地也上帝爲之廢適易姓而子之讓其至德海內懷歸之觀德

樾謹按讓字衍文上帝爲之廢適易姓而子之謂天與之也其至德海內懷歸之謂人歸之也中閒不得有讓字

魯桓卽位十三年齊宋衛燕舉師而東紀鄭與魯戮力而報之後其日以魯不得遍避紀侯與鄭厲公也
樾謹按上下文有避齊桓也避楚莊也之文則此文避紀侯與鄭厲公也八字爲句遍乃偏字之誤偏誤作偏因爲遍矣偏者偏戰也春秋之例詐戰月偏戰日桓十年公羊傳注曰偏一面也結日定地各居一面然則魯不得偏者言不得獨當一面也是時齊宋衛燕伐我魯不能獨當與紀鄭戮力然後結日定地各居一面與之偏戰偏戰然後得書日故經書曰公會紀侯鄭伯己巳及齊侯宋公衛侯燕人戰傳曰曷爲後日恃外也其恃外奈何得紀侯鄭伯然後能爲日也是可知魯不得紀鄭之助不能爲

日不能爲日者.但能詐戰.而不能偏戰之謂也.故曰魯不能偏也.
號其大全.暝也者.名其別離分散也.深察名號、

樾謹按此本作號其大全.名其別離分散也.故下文曰.號凡而略.名詳而且正.承此而言.暝也者三字.當在上文.按上文云.士者事也.民者暝也.士不及化.可使守事.從上而已.此下當有暝也者云云.乃釋民者暝也之義.傳寫奪之.又誤著在後耳.

是故王意不普大皇.

樾謹按大下奪而字.

詰其名實觀其離合則是非之情不可以相讕也.

樾謹按此下當接春秋辨物之理至五石六鵠之辭是也.六十三字下有脫簡在玉英篇.其文曰.是故治國之端在正名.至非子路之所能見.三十六字深察名號篇至此已畢.篇首云.治天下之端在審辨大辨大之端.在深察名號.末云.是故治國之端在正名.首末正相應也.今定其文如左.

詰其名實觀其離合則是非之情不可以相讕已.春秋辨物之理以正其名.名物如其真.不失秋毫之末.故名實石則後其五言退鵠則先其六.聖人之謹於正名如此.君子於其言無所苟而已.五石六鵠之辭是也是故治國之端在正名.名之正興五世.五傳之外.美惡乃形.可謂得其真矣.非子路之所能

見。

今世闡於性言之者不同。胡不試反性之名。性之名非生與。如其生之自然之資。謂之性。性者質也。詰性之質於善之名。能中之與。既不能中矣。而尙謂之質善。何哉。性之名不得離質。離質如毛。則非性矣。不可不察也。

樾謹按此下當接柵衆惡於內云云。自此以下。卽爲實性上篇。董子論性。必反求諸性之名。故曰性之名。非生與。論心必反求諸心之名。故曰心之爲名柵也。蓋古人言義理。不離乎聲音訓詁。卽孔子正名之義。實性篇與深察名號篇。所以相次也。後人因兩篇之文。有相近者。遂將篇首今世闡於性云云。誤羼入深察名號篇春秋辨物之理一節之上。而兩篇遂不可分矣。今定此爲實性上篇。而孔子曰名不正則言不順以下。則爲實性下篇。庶不失董子之舊乎。

柵衆惡於內。弗使得發於外者。心也。

樾謹按王道焜本注曰。柵疑柵。如甚切。柵也。然柵不訓柵。說文木部。柵弱貌。則柵仍柵字之訓耳。非其旨也。今按柵者衣柵也。柵有禁禦之義。釋名釋衣服曰。柵禁也。交于前。所以禁禦風寒也。柵亦有任制之義。釋名釋喪制曰。小要又謂之柵。柵任也。任制際會使不解也。任制與禁禦其義相通。柵衆惡於內。弗使得發於外。正取任制之義。下文曰。天有陰陽禁。身有情欲柵。柵禁對文。然則柵卽禁也。亦猶柵卽

襟也。原注所訓未達其旨。

聖人以爲無王之世不教之名民莫能當善。

樾謹按名衍字。

土者火之子。五行莫貴於土。土之於四時無所命者。不與火分功名。木名春。火名夏。金名秋。水名冬。忠臣之義。孝子之行。取之土。土者五行最貴者也。其義不可以加矣。五聲莫貴於宮。五味莫美於甘。五色莫貴於黃。此謂孝者地之義也。五行對。

樾謹按河閒獻王以夫孝天之經地之義爲問。董子以天有五行對天之經矣。又對地之義曰。地出雲爲雨。起氣爲風。風雨者地之所爲。地不敢有其功名。必上之於天命。若從天命者。故曰天風天雨也。莫曰地風地雨也。勤勞在地。名一歸於天。非至有義。其孰能行此。故下事上。如地事天也。可謂大忠矣。以下卽當云。此謂孝者地之義也。乃又有此土者火之子也。八十二字。夫上文旣以五行爲天之經矣。豈此又以五行爲地之義乎。反覆推求。此八十二字。乃五行之義篇脫簡誤羼於此耳。今訂正如左。五行之主土氣也。猶五味之有甘肥也。不得不成。土者火之子也。五行莫貴於土。土之於四時無所命者。不與火分功名。木名春。火名夏。金名秋。水名冬。忠臣之義。孝子之行。取之土。土者五行最貴者也。其義不可以加矣。五聲莫貴於宮。五味莫美於甘。五色莫貴於黃。是故聖人之行。莫貴於忠。土德之爲也。

人官之大者不名所職相其是矣天官之大者不名所生土是矣

天之大數畢於十旬旬天地之閒十而畢舉旬生長之功十而畢成

陽尊陰卑

樾謹按上旬字衍文天地陰陽篇云天地陰陽木火土金水九與人而十者天之數畢也是天之數非以旬計安得言十旬乎下兩旬字乃剏字之誤剏者周匝之本字也基義篇同而畢於十又誤作畢有十

安所加以不在

樾謹按以猶而也說詳王氏引之經傳釋詞安所加以不在猶云何所加而在故下文云在上下在大小在強弱在賢不肖在善惡歷舉所在以明之也

冬出居上置之空處也

樾謹按處乃虛字之誤上文曰陰常居空虛是也漢書董仲舒傳陰常居大冬而積於空虛不用之處亦作空虛可證

然而主好惡喜怒乃天之春夏秋冬也王道通三

樾謹按當作人主之好惡喜怒下文云然則人主之好惡喜怒乃天之煖清寒暑也可證

生溉其樂以養死溉其哀以藏

樾謹按溉讀爲既。既盡也。

天無怒氣亦何以清而秋就殺。天辨在人。

樾謹按就當讀爲曾。史記魯世家考公曾索隱引系本作就是也。大元元文直曾相勅范望注曰曾殺是曾與殺同義。

以出入相損益。以多少相溉濟也。陰陽終始。

樾謹按溉濟卽既濟。損益既濟皆易卦名。

故清漂之於歲也。若酸鹹之於味也。陰陽義。

樾謹按清漂同義。不得以酸鹹爲比。據煖燠孰多篇云。非薰也不能有育。非漂也不能有熟。又云。薰與漂其日孰多。皆以薰漂相對爲義。疑此亦當云。故薰漂之於歲也。若酸鹹之於味也。淺人罕見薰漂。故誤改耳。

上所右而上所左也。陰陽出入上下、

樾謹按當作上所右而下所左也。下文云。以此見天之夏右陽而左陰也。上其所右下其所左與此文同可證。

以其有餘徐來不暴辛也。基義。

樾謹按有餘二字衍文。餘卽徐之誤而衍者。旣衍餘字。因又增入有字耳。上文云。天之氣徐。乍寒乍暑。故寒不凍暑不暘。並無有餘之義。故知其誤。

首僉員人副天數

樾謹按僉讀爲頶。說文頁部。頶大頭也。詩魚藻篇。有頶其首。毛傳曰。頶大首貌。並合僉員之義。木者君之官也。夫木者農也。五行相勝

樾謹按下文云。土者君之官也。蓋土居中央。于五行最尊。故爲君之官。此乃云木者君之官也。義不可通。當爲衍文。

司營爲神

樾謹按宣三年左傳。使民知神姦。是神與姦同類。上云。司農爲奸。此云。司營爲神。則神亦不美之名。故與司馬爲讒。司徒爲賊。司寇爲亂。一律矣。

士卒不使

樾謹按不使謂不從也。爾雅釋詁。使從也。

比相生而問相勝也。五行相生

樾謹按問乃閒字之誤。比相生。若春木生夏火是也。閒相勝。若秋金勝春木是也。

鳳凰高翔五行順逆

樾謹按上文恩及羽蟲則曰鳳凰翔此文咎及羽蟲則曰鳳凰高翔豈以高卑爲恩咎之別乎殆不然矣高翔當作不翔宣元年公羊傳注曰摘巢毀卵則鳳凰不翔是其證

木干金則地動治亂五行

樾謹按當作木干火則地動

惡者不出五行變教

樾謹按出乃黜之假字

隱武行文

樾謹按隱讀爲偃漢書古今人表徐隱王師古注曰卽偃王也是隱偃古通用

故王者爲民治則不可以不明準繩不可以不正五行五事

樾謹按則下有闕文或於民字絕句治爲法字之誤法則不可以不明準繩不可以不正二語相對周

官太宰曰灋則以馭其官

從作乂言王者言可從明正從行而天下治矣

樾謹按明正乃則臣二字之誤當作王者言可從則臣從行而天下治矣尚書洪範正義引鄭注曰君

言從則臣職治與此義相近。

此十物者皆奇而可怪郊語、

樾謹按上文有八物無十物也蓋由淺人誤分蠶珥絲於室而絃絕於堂禾實於野而粟缺於倉爲四事耳其誤顯然不可不正。

言不必立校。

樾謹按校讀爲效謂不必立有效驗也。

問爲而爲之。

樾謹按當作問其所爲而爲之奪其所二字。

率由舊章者先聖人之故文章也率由各有修從之也。

樾謹按各字乃者字之誤修字乃循字之誤循誤爲脩因誤爲修矣此引詩而釋之舊章者先聖人之故文章也率由者有循從之也有與又通本書借有爲又者不可勝舉循字解率字之義從字解由字之義言舉先聖人之故文章又循而從之是謂率由舊章也。

祭而地神者春秋譏之。

樾謹按當作不祭天神而祭地神者春秋譏之蓋卽僖三十一年傳譏不郊而望也。

今爲其天子而闕然無祭於天.天何必善之.

樾謹按郊語郊義郊祭郊祀四篇實止一篇殆由後人欲取足崇文總目八十二篇之數以意妄分之耳.其文多錯亂.盧注訂正已多.上文今郊事天之義此聖人故以下文脫當云此古聖人文章之最重者也.盧以郊祭篇故古之聖王文章之最重者也接之文氣一貫於是自篇首至此文始可讀然至此處天何必善之下接所聞曰天下和平云云仍有脫誤今考定其文合四篇爲一錄之如左.

今爲其天子而闕然無祭天何必善之春秋之義國有大喪者止宗廟之祭而不止郊祭不敢以父母之喪廢事天地之禮也父母之喪至哀痛悲苦也尚不敢廢郊也孰足以廢郊者故其在禮亦曰喪者不祭惟祭天爲越喪而行事夫古之畏敬天而重天郊如此甚也今羣臣學士不探察曰萬民多貧或頗饑寒足郊乎是何言之誤天子父母事天而子孫畜萬民民未偏飽無用祭天者是猶子孫未得食無用食父母也言莫逆於是其去禮遠也先貴而後賤孰貴於天子天子不可不祭天也無異人之不可不食父爲人子而不事父者天下莫能以爲可今爲天之子而不事天何以異是是故天子每至歲首必先郊祭以享天乃敢爲地行子禮也每將興師必先郊祭告天乃敢征伐行子之道也文王受天命而王天下先郊乃敢行事而興師伐崇其詩曰芃芃棫樸薪之槱之濟濟辟王左右趨之濟濟辟王左右奉璋奉璋載鞶髦士攸宜此郊辭也其下曰泮彼涇舟烝徒楫之周王于邁六師及之此伐辭

也其下曰文王受命有此武功旣伐于崇作邑于豐以此辭者見文王受命則郊郊乃伐崇伐崇之時何遽平乎已受命而王必先祭天乃行王事文王之伐崇是也詩云濟濟辟王左右奉璋奉璋莪莪士攸宜此文王之郊也其下之辭曰溥彼涇舟烝徒楫之周王于邁六師及之此文王之伐崇也上言奉璋下言伐崇以是見文王之先郊而後伐也文王受命則郊郊乃伐崇崇國之民方困於暴亂之君未得被聖人德澤而文王已郊矣安在德澤未洽者不可以郊乎所聞曰天下和平則災害不生今災害生見天下未和平也天下所未和平者天子之教化不行也詩曰有覺德行四國順之覺者著也王者有明著之德行於世則四方莫不響應風化善於彼矣故曰悅有慶賞嚴於刑罰疾于法令周宣王時天下旱歲惡甚王憂之其詩曰倬彼雲漢昭回于天王曰嗚呼何辜今之人天降喪亂饑饉薦臻靡神不舉靡愛斯牲珪璧旣卒甯莫我聽旱旣太甚蘊隆蟲蟲不殄禋祀自郊徂宮上下奠瘞靡神不宗后稷不克上帝不臨耗射下土甯丁我躬宣王自以爲不能乎后稷不中乎上帝故有此災有此災愈恐懼而謹事天天若不予以家者是家安得立爲天子立爲天子者天予以家天予以家者天使是家天使是家者是天之所予也天之所使也天已予之天已使之其閒不可以接天何哉故春秋凡議郊未嘗譏君德不成于郊也及不郊而祭山川失祭之敍逆於禮故必譏之以此觀之不祭天者乃不可祭小神也郊因先卜不吉不敢郊百神之祭不卜而郊卜郊祭最大也春秋譏喪祭不譏喪郊郊不辟

喪喪尙不辟.況他物.春秋之法.王者歲一祭天於郊.四祭於宗廟.宗廟因於四時之易.郊因於新歲之初.聖人有以起之.其於祭不可不親也.天者百神之君也.王者之所最尊也.以最尊天之故.故易始歲更紀.卽以其初郊.郊必以正月上辛者.言以所最尊.首一歲之事.每更紀者.以郊郊祭首之.先貴之義.尊天之道也.郊祝曰.皇上帝.照臨下土.集地之靈.降甘風雨.庶物羣生.各得其所.靡今靡古.維予一人.某敬拜皇天之祐.夫不自爲言.而爲庶物羣生言.以人心庶天無尤也.天無尤焉.而辭順恭宜可喜也.右郊祀九句.九句者陽數也.

按郊祀之辭.舊有脫誤.今從盧校本.

今羣臣學士不探察.

樾謹按探乃深字之誤.

天已予之.天已使之.其閒不可以接天何哉.

樾謹按其閒當作其家.上文曰.天若不予以家者.是家安得立爲天子.立爲天子者.天予以家.天予以家者.天便是家.故此云天已予之.天已使之其家.不可以接天何哉.以文義求之.當作其家無疑.

每更紀者.以郊郊祭首之.

樾謹按此本作每更紀者.以郊祭首之.涉上文卽以其初郊.郊必以正月.而誤疊郊字耳.

父者子之天也。天者父之天也。順命。

樾謹按當作祖者父之天也。故下文曰。天者萬物之祖。州國人民。

樾謹按民乃氏字之誤。莊十年公羊傳曰。州不若國。國不若氏。氏不若人。臣不奉君父。

樾謹按當作臣不奉君命。

或以鷙當鳩。鷙非鳩。可用否。郊事對。

樾謹按此本作或以鷙當鳩。鳩當鷙。可用否。故仲舒對曰。鷙非鳩。鳩非鷙也。又曰。柰何以鳩當鷙。鷙當鳩。可證此文之誤。

搔而不可從繞。執贊。

樾謹按從衍字。繞者撓之段字。搔而不可撓。卽荀子法行篇所謂折而不撓也。漢書枚乘傳。足可搔而絕。然則搔與折義亦相近。

暘有似於聖人者。

樾謹按聖人下當疊聖人二字。下所說皆聖人之德也。至暘亦取百草之心。始說暘之似聖人。然則此

當作聖人者明矣。上文云：雁乃有類於長者。長者在民上，亦疊長者二字。正與此一律也。

山則龍從嵒崔嵬巍。山川頌。

樾謹按此本作山則龍從嵒嵬。說苑雜言篇作夫山龍從累嵬。卽本此文可證也。因傳寫之本不同，或作龍從崔嵬，或作龍從崔嵬而後人誤合之。於是作嵒崔嵬巍矣。一聲之字不應疊用，其誤可知。上林賦於是乎崇山巒巒龍從崔嵬亦本此文並可爲證。

不遺小問。

樾謹按聞乃閒字之誤。說苑雜言篇正作不遺小閒。

丈夫五人齋三日服黃衣而舞之。老者五人亦齋三日衣黃衣而立之。求雨。

樾謹按聚珍本云：他本無老者二字。今以文義求之，無此二字者是也。據下文冬求雨用老者六人，則季夏之月不得亦用老者一也。且上文於春云：小童八人皆齋三日服青衣而舞之。田嗇夫亦齋三日服青衣而立之。於夏云：壯者七人皆齋三日服赤衣而舞之。司空嗇夫亦齋三日服赤衣而立之。於秋云：鰥者九人皆齋三日服白衣而舞之。司馬亦齋三日衣白衣而立之。於冬云：老者六人皆齋三日衣黑衣而舞之。尉亦齋三日服黑衣而立之。是舞之者或小童或壯者或鰥者或老者皆擇用明閒之人而立之者或田嗇夫或司空嗇夫或司馬或尉皆在官之人也。此乃用丈夫五人舞之。老者五人立之。

於義不合二也。然則此文宜如何。曰。此文直云五人亦齋三日衣黃衣而立之所謂五人非如丈夫五人以數計也。五人乃當時有此名目。其字本作伍。漢書酷吏尹賞傳乃部戶曹掾史與鄉吏亭長里正父老伍人是伍人與亭長里正同類。此所使衣黃衣而立之者即其人也。作五者古字通耳。後人不達其義。謂五人是以數計。則五人之上不得無文。臆加老者字而古制失矣。

夏之所受初也。祭義。

樾謹接受初當作初受。傳寫誤倒。

夏約故曰約。

樾謹按此本作初受故曰約。即承夏之所初受而言。與始生故曰祠。先成故曰嘗。畢熟故曰烝。皆承上而言者一律。因上文初受誤作受初。於是此文亦作受初。而今本作夏約者。即受初之誤。受之與夏初之與約字形皆相似也。

天有兩和以成二中。循天之道。

樾謹按兩和謂春分秋分。二中謂冬至夏至。

是故和東方生而西方成。東方和生。北方之所起前而西方和成。南方之所養長起之不至於和之所不能生。養長之不至於和之所不能成。

樾謹按此節多衍字。今正之曰。是故東方生而西方成。東方和生。北方之所起。西方和成。南方之所養。起之不至於和之所逗。不能生養之不至於和之所逗。不能成。

天地先盛壯而後施精。故其精固。

樾謹按地誤字。盛壯而後施精。以天言不以地言也。下文曰。地氣盛壯而後化。故其化良。則此文天地必天氣之誤。

天地之經。生至東方之中。而所生大養。至西方之中。而所養大成。

樾謹按生衍字。蓋卽至字之誤而衍者。

鶴之所以壽者。無宛氣於中。是故食冰。蠬之所以壽者。好引其末。是故氣四越。

樾謹按凌注以是故食冰四字屬下爲義非也。蠬無食冰之說。於義無取。且鶴之所以壽者。蠬之所以壽者。兩文相對。是故食冰是故氣四越。兩文亦相對。則食冰自屬鶴矣。董子原文。疑作是故食不冰。冰者。疑之正字。說文於冰篆下出重文。凝曰。俗冰從疑。是也。食不凝謂所食不凝滯也。蓋中無宛氣。故食不凝滯。此鶴之所以壽也。相鶴經謂大喉以吐。故修頸以納新。是矣。淺人但知冰爲冰凍字。誤刪不字。遂失其義。

氣不傷於以盛通。而傷於不時天并。

樾謹按天并二字無義疑當作弃天弃與并字相似傳寫又誤倒耳下文曰不與陽陰俱往來謂之不時恣其欲而不顧天數謂之天并夫不顧天數正弃天之謂可知其誤矣

冬避重潔

樾謹按潔爲沴潔字說文本作濕而今經傳相承皆以濕爲燥溼之溼然則此言重潔卽重溼也以潔爲溼猶經傳之以濕爲溼矣李翕析里橋酈閣頌釋散關之漸潔潔卽溼也與此正同說詳王氏念孫漢隸拾遺

是故當百物大生之時羣物皆生而此物獨死可食者告其味之便於人也其不可食者告殺穢除害之不待秋也當物之大枯之時羣物皆死如此物獨生

樾謹按如此物獨生卽而此物獨生也惟其文傳寫錯誤今正之曰是故當百物大生之時羣物皆生而此物獨死不可食者告殺穢除害之不待秋也當物之大枯之時羣物皆死如此物獨生可食者告其味之便於人也

故貴爵而臣國所以爲仁也天地之行

樾謹按此皆承上文而言上文云高其位所以爲尊也下其施所以爲仁也則此文貴爵下奪所以爲尊也五字

聖人何其貴者。起於天至於人而畢。天地陰陽、

樾謹按聖衍字也。此明人貴於物之義。上文曰。天地陰陽木火土金水九。與人而十。是起於天畢於人也。此人之所以貴也。但言人貴。非言聖人貴。聖字之衍明矣。物者。投所貴之端。而不在其中。

樾謹按投字無義。疑數字之誤。

受其治者不能辭其終。天道施、

樾謹按治乃始之誤。

諸子平議卷二十七

賈子一

東割膏腴之地北收要害之郡過秦上

樾謹按史記無北字是也文選有北字而李善注引李斯上書曰惠王用張儀之計西并巴蜀南取漢中東據成皋之險割膏腴之壤亦無北字蓋要害之郡卽指成皋之險在東不在北則北字衍文也合縱締交相與爲一

樾謹按明吉府本作相舉爲一舉與古通用作舉者必古本也

良將勁弩守要害之處

樾謹按吉府本守上有而字疑勁弩上闕一字下句云信臣精卒陳利兵而誰何此句良將與信臣精卒對勁弩與利兵對必更有一字方與陳字對也此字偶闕後人誤以良將勁弩四字對信臣精卒四字遂覺而字無謂輒刪去之矣吉府本有而字猶可推尋其迹然所闕者何字無可據補也

俛起阡陌之中

樾謹按俛當從始皇本紀作俛字誤作俛而陳涉世家遂作俛仰矣阡陌亦當從史記作什伯十人爲

諸子平議 賈子一

五四三

什百人爲伯以軍法言卽上文所謂行伍之閒也。

然秦以區區之地致萬乘之勢序八州而朝同列。

樾謹按致字衍文萬乘當從史記作千乘區區之地言其地之小也與序八州相對千乘之勢言其勢之弱也與朝同列相對序者次第之也陳涉世家作抑蓋字之誤因而始皇本紀又誤爲招矣。

二世不行此術而重以無道壞宗廟與民更始作阿房之宮過秦中

樾謹按與民更始四字當在不行此術句下

故先王者見終始之變

樾謹按此本作故先生觀終始之變覩字誤分爲者見二字亦猶禮記祭義篇分覩字爲閒見二字矣循津關過秦下

樾謹按潭本循作修是也修通作脩因誤作循耳

案土息民以待其弊

樾謹按案土無義案當從史記作安士乃土字之誤吉府本正作士言安息其士民以待諸侯之弊也臣故曰時且過矣上弗蚤圖疑且歲閒所不欲焉宗首

樾謹按閒乃閒字之誤疑猶恐也禮記雜記篇皆爲疑死鄭注曰疑猶恐也是矣且猶將也淮南時則

篇雷且發聲高誘注曰且猶將也是矣疑且歲聞所不欲焉猶曰恐將歲聞所不欲焉上文云今或親弟謀爲東帝親兄之子西嚮而擊今吳又見告矣聞所不欲卽指此等事而言蓋謂不蚤圖之則此等事恐無歲不聞也聞與閒形似致誤儀禮士虞禮篇鄭注曰不言養禮畢於尸聞嫌又曰此記更從死起異人之聞其義或殊兩聞字今皆誤作閒辯見羣經平議此文聞誤作閒正與彼同盧氏文弨不能訂正反謂此十九字不成文理而刪去之謬矣匈奴篇云疑將一材而出奇厚贊以責漢此云疑且猶彼云疑將可以互證

且謂天何權不甚奇而數制人豈可得也

樾謹按吉府本建本並有此十六字在豈有異秦之季世乎句下當從之且謂天何四字爲句天卽天時也上云時且過矣上弗蚤圖故此曰且謂天何權不甚奇而數制人八字爲句奇之言奇羨也奇羸也史記貨殖傳曰時有奇羨漢書食貨志曰操其奇羸是其義也言漢與諸侯王比權量力亦不甚奇羸而欲諸侯王數數受其制豈可得也此乃賈子原文班固刪去之而後人依漢書以刪賈子故潭本無此十六字盧氏謂其不成文理從潭本削去是讀漢書非治賈子也臣聞之自禹以下五百歲而湯起數甯

樾謹按漢書射獵之娛與安危之機孰急也卽接使爲治勞知慮苦身體云云文氣融合今以臣聞之

自禹以下至又將誰須也一段橫隔其中殊不可通若移在篇首臣竊惟事勢之上則文理俱順矣蓋由後人依漢書刪去此段而校補者又不當其處耳

自武王已下過五百歲矣聖王不起何憖矣

樾謹按憖字難通明吉府本作何怪矣當從之怪猶異也言何其異也蓋過五百歲而聖王不作可怪異之甚也作憖者形似而誤

臣觀寬大知通竊曰是以摻亂業握危勢

樾謹按是當爲足下文食穀之法固百以是盧校曰是當爲足正與此同誤因諸侯附親軌道致忠而信上耳

樾謹按自此以下凡用因字耳字者十其句法皆同班固刪改以入漢書大失賈子之真當以此書爲正後人習讀漢書不覩賈子原文故亦無襲用此句法者或反以爲誤失之

因觀成之廟爲天下太宗承太祖與天下漢長亡極耳

因觀成之廟爲天下太宗承天下太祖與漢長亡極耳天下二字誤在漢上義不可通子生而立其身以子夫將何失藩傷

樾謹按立字絕句其身以子句當有闕文蓋謂奪之其身以與其子也盧校謂當作其身而天子將何

失非是。

若與臣下相殘。與骨肉相飲茹。天下雖危。無傷也。則莫如循今之故而勿變。以前觀之。其國最大者反最先藩彊。

樾謹按盧校本刪此四十一字。非也。此與上文欲令天下之治安。天子之無憂。莫如衆建諸侯而少其力。反覆相明。其云以前觀之。其國最大者反最先。則又起下文也。上文大都篇曰。昔楚靈王問范無宇曰。我欲大城陳蔡葉與不羹。與此句正相接。蓋賈子原文本是一篇也。後人割而分之。盧氏遂疑其語氣不了矣。

臣聞大都疑國。大臣疑主。亂之謀也。大都。

樾謹按謀當爲媒。古字通用。權重篇曰。亂媒日長。是其證也。審微篇曰。故明者之惑奸由也。蚤其除亂謀也。遠謀亦當爲媒。奸言由亂言媒語意相近。

以皇帝所在宮法論之。等齊。

樾謹按建本作皇帝在所宮法論之。非也。上句云。諸侯王所在之宮。衛織履躋夷。則此句當作皇帝所在宮明矣。兩所在字正相應也。盧校本反從建本作在所。殊誤。

諸侯之言曰。令令儀令言是也。

樾謹按明吉府本作諸侯之言曰令儀之言是也儀之言句雖不可解必是古本如此後人因上文天子之言曰令甲令乙是也遂臆改之曰令儀令言是也使與上文一律然令儀令言亦仍不可解當從古本而闕疑。

是以高下異則名號異則權力異則事勢異則旗章異則符瑞異則禮寵異則秩祿異則冠履異則衣帶異則環佩異則車馬異則妻妾異則澤厚異則宮室異則牀席異則器皿異則飲食異則祭祀異則死喪異服疑、

樾謹按名號異下當疊名號異三字本云是以高下異則名號異名號異則權力異以下諸句皆同古書遇疊句多省不書止於字下加二小畫識之傳寫奪去耳建本於則死喪異下又加則字是誤於則字絕句矣。

其苦之甚矣其欲有卒也類良有所至逋走而歸諸侯殆不少矣益壞、

樾謹按卒乃立字之誤其欲有立也類良有七字爲句蓋言吏民苦屬漢欲有所立者多有也類乃語詞良猶甚也良有卽甚有也漢書作其苦屬漢而欲得王至甚卽本此文而潤色之耳屬遠篇云甚苦屬漢而欲王類至甚也逋遁而歸諸侯類不少矣可與此篇互證所至二字屬下句讀、

今所恃者代淮陽二國耳皇太子亦恃之、

樾謹按恃之下脫二國耳三字皇太子亦恃之二國耳謂亦恃此二國耳之猶此也上文曰陛下所恃以爲藩捍者以代淮陽耳又曰唯皇太子之所恃者亦以之二國耳與此文相同可證

天子無可以徼倖之權五美

樾謹按天子當作天下吉府本不誤

於是齊悼惠王之子孫王之分地盡而止

樾謹按此本作於是齊悼惠王之子孫各以次受其祖之分地下文云趙幽王楚元王之子孫亦各依次受其祖之分地卽承此而言可據訂也又按漢書盡而止上有地字此亦當有傳寫奪之特賴其尙幼倫緩之數也制不定

樾謹按倫乃偷字之誤緩乃緩字之誤偷緩者言苟緩之而已建木誤作倫緩其字形尙相近潭本作倫緩則彌遠矣

所排擊所剝割皆象理也

樾謹按此當從漢書作皆衆理解也象卽衆字之誤

周襄王出逃伯闔審微

樾謹按周襄王出居於鄭左傳以爲避大叔帶也而此以爲逃伯闔乃古事相傳之異宜表出之以廣

異聞闕卽闕之俗字。

其中罪者聞命而自弛階級、

樾謹按弛讀爲纚說文系部纚繫纚也聞命而自繚者聞命而自繫也故下曰上不使人頸斃而加也據說文弛或作號與纚同聲故得通用師古注漢書曰弛廢也自廢而死無論自廢而死不得但謂之自弛且與下文大罪之聞命自裁何別乎

慮非顧行也俗激、

樾謹按慮猶無慮也古人常語慮非顧行也謂大氏非顧行也建本慮下衍念字乃淺人不得其義而妄增下云盜者慮探柱下之金掇寢戶之簾亦言其大氏如此也潭本作利亦淺人改之

攻擊奪者爲賢貴人善突盜者爲忻時變、

樾謹按攻當作工貴人並衍文貴卽賢字之誤而衍者因又衍人字耳忻乃折字之誤故潭本作折折與折尤相似也善突盜者爲折折讀爲哲古字通用尙書呂刑篇折民惟刑墨子尙賢中篇作哲民惟刑是也爲哲與爲賢同意下云諸侯設諂而相飭設輶而相紹者爲知知亦哲也諸侯二字未詳疑衍字

今俗侈靡以出相驕出倫踰等以富過其事相競

樾謹按下出字衍文。倫踰等三字，卽在上出字之下。本作今俗侈靡。以出倫踰等相驕。以富過其事相競。傳寫脫倫踰等三字。補者誤箸句下。又衍一出字耳。

民不爲奸而貧爲里母也。

樾謹按母當作侮。言爲里人所輕侮也。下云廉吏釋官而歸爲邑笑。語意相近。夫雕文刻鏤。周用之物繁多。瑰瑋。

樾謹按周疑害字之誤。害用者害於用也。下文云黼黻文繡纂組害女工。

作之宜一日。今十日不輕能成。用一歲。今半歲而弊。作之費日。挾巧用之易弊。不耕而多食農人之食。是天下之所以困貧而不足也。

樾謹按用一歲當作用之宜一歲。與作之宜一日。相對爲文。作之費日。用之易弊。兩文亦相對。其中閒不當有挾巧二字。此二字當在不耕而多食之上。謂其挾巧伎而不耕作。反多食農人之食也。

是使天下公得冒主而夫人務侈也。

樾謹按公得冒主者。謂顯然得冒主也。漢書吳王濞傳。公卽山鑄錢。胡建傳。公穿軍垣。以求賈利。師古注並曰。公謂顯然爲之也。是其義也。夫人務侈。謂人人務侈也。襄八年左傳。夫人愁痛。杜注曰。夫人猶人人也。是其義也。

曰爲大夫治可也。若爲大亂豈若其小孽產子。

樾謹按建本如此。潭本無夫字。然夫字非衍文。但當移在曰字之上。其文云。夫曰爲大句治句可也。句若爲大句亂句。豈若其小。蓋此因獻計者類曰無動爲大耳。故以此破之。無動是一說。爲大又是一說。上文云。夫無動而可以振天下之敗者何等也。乃破無動之說也。此云。夫曰爲大治可也。若爲大亂。豈若其小。乃破爲大之說也。賈子以爲獻計者但知爲大耳。爲大而治誠可也。爲大而亂。則豈若爲其小乎。文義甚明。盧本刪去此十五字。則上文有無動爲大兩說。此但破無動一說。於文爲不備矣。

進計者猶曰無爲。

樾謹按上文云。獻計者類曰無動爲大耳。夫無動而可以振天下之敗者何等也。夫曰爲大治可也。若爲大亂。豈若其小。蓋舉獻計者之說。而一一破之也。此文當云。進計者猶曰無動爲大方與上文相應。乃云進計者猶曰無爲。則既遺爲大一說。而上云無動。此云無爲。亦殊不合矣。蓋賈子原文。本作無動爲大班。固刪削。遂成此誤。不可不正也。

所謂禁游宦諸侯及無得出馬關者。壹通。

樾謹按所謂卽所爲也。古書謂爲字多通。呂氏春秋恃君篇。凡吾所爲爲此者。趙策作所謂。史記蕭相國世家。上所爲數問君者。漢書作所謂。此文用所謂。正賈子之原文。盧校云。本作所謂。誤今改正。則失

之矣。上文云所謂建武關函谷臨晉關者所謂亦所爲也。盧氏何不改乎。

天子都長安而以淮南東南邊爲奉地。

樾謹按自此至陛下柰何久不正此與前段罷關意不相承當合下屬遠篇爲一蓋壹通篇之文至害兼覆之義不便而止天子都長安以下卽爲屬遠篇傳寫者誤割之非賈子之舊矣故陳勝一動而天下不振屬遠

樾謹按不字衍文天下振者言天下爲之振動也今衍不字非其意矣

行中道而衣行勝已羸弊矣彊提荷弊衣而至慮非假貸自詣非有以所聞也

樾謹按盧校疑行勝當作行縢已得之矣自詣當從潭本作自儲吉府本作自諸諸卽儲之假字也以所聞三字涉下竊以所聞句而衍慮非假貸自儲非有也言大氐非假貸自儲則無有也非有猶無有耳渾篇曰死而非補猶死而無補也可證此非字之義

竊以所聞縣令丞相歸休者慮非甚彊也不見得從者

樾謹按盧氏以丞相二字連讀大誤也此以縣令丞連讀相歸休者連讀見字衍文卽得字之誤而衍者古得字作辱闕壞而爲見字校者注得字於下傳寫誤合之遂成見得二字矣此言道路遼遠人不願往縣令丞之歸休者大氐非彊有力卽不得從者耳

六七諸公皆無恙親疏危亂

樾謹按六七下又言諸不辭甚矣諸公當作公諸諸讀爲者古字通用爾雅釋魚龜俯者靈仰者謝前弇諸果後弇諸獵諸卽者字也禮記郊特牲篇或諸遠人乎士虞禮注作或者遠人乎是其證也六七公諸皆無恙猶言六七公者皆無恙後人不達其義涉下文屢言諸公因誤倒之耳漢書正作六七公者可證

慮無不宰制而天子自爲者

樾謹按白虎通諫諍篇曰宰制也故此以宰制連文漢書作帝制則與天子自爲復矣誰與領諸侯此所謂親也者

樾謹按漢書作誰與領此此卽指諸侯而言班固所改也又刪此所謂親也者六字然此句上應臣請試言其親者下起故疏必危親必亂似未可刪盧校從漢書削去則不如讀漢書矣故禹水九年湯旱七年甚也野無青草憂民

樾謹按甚也卽甚者屬下爲義猶曰甚者野無青草也禮記檀弓篇古者冠縮縫今也衡縫論語陽貨篇古者民有三疾今也或是之無也並上言古者下言今也是也與者同未櫓年富人不貸貧民且飢

樾謹按年當從潭本作耳吉府本同此言豐歲特未收穫耳然其困已若此上弗自憂將以誰偷

樾謹按偷讀爲輸荀子脩身篇偷儒轉脫楊倞注曰偷當爲輸是其例也言上弗自憂則此憂無可委輸也

中國乘其歲而富彊解縣

樾謹按歲乃威字之誤此說匈奴事與歲無涉

此其示武昧利之時也匈奴

樾謹按昧利猶貪利也漢書匈奴傳贊昧利不顧師古曰昧貪也

愛人之狀好人之技人道信爲大操帝義也

樾謹按師古注漢書本傳引此曰愛人之狀好人之技仁道也信爲大操常義也此文人道下奪也字仁人古通帝常形似然上文曰妨害帝義則帝字不誤

匈奴之使至者若大降者也

樾謹按匈奴之使至者是一事大降者是一事若猶及也猶言匈奴之使至者及大降者也禮記內則篇父母有婢子若庶子庶孫與此若字同義下文曰降者之傑也若使者至也又曰陛下之所召幸若

所以約致也。並與此同。

美哉臘炙肉。

樾謹按炙肉二字衍文也。臘卽炙之異文。炙從肉從火。此變從火爲從煮。則以義而兼聲矣。故炙亦作燶。顏氏家訓曰。火旁作庶爲炙是也。庶與煮同聲。周官庶氏注曰。庶讀如藥煮之煮。然則臘從煮聲。猶燶從庶聲矣。讀者以臘卽炙肉之炙。故注炙肉二字於下。以識之。傳寫誤合之正文耳。美哉臘具醯醢。皆三字爲句。今衍炙肉二字。則與下句不倫矣。

上使樂府幸假之但樂。

樾謹按但乃具字之誤。具誤爲俱。因誤爲但矣。下文云。上幸令官助之。具假之樂。與此同義。彼分言之。則曰助之具假之樂。此合言之。則曰假之具樂矣。具謂器具。樂爲鼓樂。非一事也。

陛下必時有所富。

樾謹按富當從建本作官。盧校依他本作富。非是。官者館之古文。說詳余所著字義載疑保傳篇云。學者所學之官也。師古注漢書曰。官謂官舍。官舍卽館舍也。此云時有所官。猶云時有所館。下文云。必令此有高堂邃宇。善廚處。大囷京廩。有編馬庫。有陣車。並就館舍言。可證下文又曰。於來降者。上必時時而有所召。幸拊循。而後得入官。益知此文作富者之誤矣。

皆過其故王慮出其單于或時時賜此而爲家耳。

樾謹按王乃土字之誤屬上讀言皆過其故土也。慮出其單于或六字爲句或讀爲域說文戈部或邦也從口從戈以守一一地也重文域曰或又從土是或本域之正字也出其單于或者出其單于之邦域也慮與無慮同猶大氏也言大氏出其單于之邦域時時賜此而爲家也。

上乃幸自御此薄

樾謹按薄讀爲博謂博戲也莊十二年公羊傳與閔公傳釋文曰博字書作簿然則此作薄者疑簿之誤矣上文或薄或揜義與此同

具帶服賓餘

樾謹按賓餘卽史記匈奴傳所謂比余也餘余同聲古字通用周官委人職凡其余聚以待頒賜鄭注曰余當爲餘是也賓與比亦一聲之轉白虎通封禪篇賓連者木名也其狀連累相承然則賓連卽比連也說文目部引詩國步斯贖今詩桑柔篇作國步斯頻鄭箋云頻猶比也蓋頻比一聲之轉贖頻亦一聲之轉賓得通比猶贖得通頻也國語齊語夫管夷吾射寡人中鉤是以濱於死管子勢篇曰動靜者比於死比於死卽濱於死也並可爲賓餘卽比余之證

衆欲無來恐或軒之

樾謹按軒乃撕字之誤。文選長楊賦。麾城撕邑。李善注引蒼頡曰。撕拍取也。恐或撕之言。恐爲人所取。方與上句若虎在後一律。漢書楊雄傳作撕。卽撕之誤。此作軒。又撕之壞字矣。

大每一關屠沽者賣飯食者。美臚炙臘者。每物各一二百人。

樾謹按大字不誤。潭本作夫。非也。大猶言大率也。數甯篇曰。故聖王之起大以五百爲紀。與此大字正同。

闔閭富。故然使專諸刺吳王僚。燕太子丹富。故然使荆軻殺秦王政。准難。

樾謹按此本云闔閭富。句然故使專諸刺吳王僚。燕太子丹富。句然故使荆軻殺秦王政。然故猶是故也。禮記少儀篇曰。然故上無怨而下遠罪也。管子任法篇曰。然故諱杵習士聞識博學之人不可亂也。荀子大畧篇曰。然故民不困財。韓子難三曰。然故忠臣盡忠於公。諸書並以然故連文。說見王氏引之經傳釋詞。此文兩言然故。正與彼同。今作故然。則不可通矣。

今陛下將尊不億之人。

樾謹按不億猶不逞也。襄二十四年左傳不可億逞。是億與逞同義。

或稱春秋而爲之聳善而抑惡。以革勸其心。傳職。

樾謹按革者戒也。文選三國名臣序贊訓革千載。李善引蒼頡篇曰。革。戒也。革勸卽戒勸。國語楚語正

作以戒勸其心。

德言以揚之。

樾謹按楚語作德音以揚之疑此言字誤。

天子不姻於親戚。

樾謹按古人稱父母爲親戚昭二十年左傳親戚爲戮不可以莫之報也韓詩外傳親戚旣沒雖欲孝誰爲孝並其證也此本作天子不恩於親戚後人不達親戚之義故易以姻字耳大戴記保傅篇作天子無恩於父母父母卽親戚也。

天子居處燕私安所易。

樾謹按此本作安而易與下句樂而湛相對爲文隸書所字或作所見魏孔羨碑與而字相似因致誤耳大戴記保傅篇作安如易如卽而也。

夜漏屏人而數。

樾謹按數者說也詩擊鼓篇與子成說毛傳曰說數也說爲數故數亦爲說禮記儒行篇遽數之不能終其物正義曰數說也蓋稱說者必一一數之故數與說其義得通隱十二年穀梁傳曰惄言同時也累數皆至也范甯注曰累數總言之也然則累數卽累說也屏人而數猶屏人而言盧校未得數字之

義故疑其有脫文矣。

左臆右臆連語。

樾謹按臆讀爲十萬曰億之億左億右億極言其數之多也。

提石之者猶未有止。

樾謹按史記絳侯周勃世家以冒絮提文帝索隱引蕭該曰提猶擲也廣雅釋詁石擿也此提石二字之義。

以時巡循輔佐。

樾謹按巡乃順字之假借巡順並從川聲古通用也循乃脩字之誤循脩二字隸書相似往往致誤荀子王制篇曰以時順脩楊注曰謂不失其時而順之脩之可據訂正盧校云循卽巡字後人妄增猶未得也。

審詩商命禁邪言息淫聲。

樾謹按命字上奪脩憲二字審詩商脩憲命禁邪言息淫聲皆三字爲句荀子王制篇作脩憲命審詩商禁淫聲是其證也。

諸子平議卷二十八

賈子二

虞人翼五祀以待一發所以復中也禮

樾謹按復乃優字之誤言優假尊者使之易中也上文云所以優飽也文義正同今誤作復義不可通既云以待一發則無再發之事又何復中之有

禮者所以節義而沒不還

樾謹按還乃還字之誤小爾雅廣詁沒無也方言曰還及也沒不還者無不及也故下所說皆逮下之事

不出穎羅

樾謹按穎讀爲絅大元元瑩篇禍福絅羅正以絅羅二字連文可證也絅從圭聲穎從頃聲而得相通者說文珪讀若回卽其例矣禮記祭義篇故君子頃步而弗敢忘孝也鄭注曰頃當爲跔聲之誤也然則絅之通作穎猶跔通作頃矣

魚肉不入廟門

樾謹按魚肉之義未詳。肉疑育之壞字。育下從肉。闕其上半。則爲肉字矣。魯語曰。鳥獸成水蟲孕水虞。於是禁置罿設罿鄂。以實廟庖。卽魚育不入廟門之義。

攫齧搏擊之獸鮮。毒蟲猛劙之蟲密。毒山不蕃草木少。薄矣。鑠乎大仁之化也。

樾謹按盧校本於鮮字密字絕句是矣。惟未解密字之義。密讀爲伏。古人書伏字或作處。或作宓。故伏義氏漢書五行志作處。古今人表作宓。密與處宓同聲。故亦得通作伏矣。毒山句不可曉。疑毒字衍文。蓋卽涉上句而衍者。薄矣二字傳寫誤倒。賈子原文云。山不蕃草木少矣。言山之不蕃草木者少也。又云。薄鑠乎大仁之化也。薄鑠連文。猶言灼爍也。古音灼與暴近。墨子親士篇靈龜近灼。神蛇近暴。以灼暴爲韻。是其證也。而薄與暴聲相同。匡謬正俗七引山海圖讚曰。暴有薄音。漢書宣帝紀注曰。薄亦暴也。並其證也。是故薄鑠卽灼爍也。凡形況之辭。本無定字。亦無定義。在以聲求之而已。爾雅釋詁。昆劉暴樂也。柔柔篇毛傳作暴爍。卽此文薄鑠也。暴爍本希疏之義。而因有光明之義。凡樹木茂密則幽。希疏則明也。因又變其字爲灼爍。說文新附。灼爍光也許書無灼爍。而有均璣。實則皆後出字耳。

漻然濶然憂以湫容經。

樾謹按此當從潭木作憂以下。湫卽濶之異文。不當重出。

喪紀之容。恸然惄然若不還。

樾謹按還亦當爲還與禮篇沒不還同誤若不還者若不及也下云言若不足喪紀之言也不足猶不及也

身似不則

樾謹按不則之義不可曉或改爲側字亦非也身自不宜傾側豈但似之而已乎則當讀爲卽禮記王制篇必卽天倫鄭注曰卽或爲則是古字通用故廣雅釋言曰則卽也身似不則者身似不卽也言其身若不往就之者然故下句曰從容而任

旄如灌絲

樾謹按淮南墜形篇多旄犀高誘注曰旄讀近綱繆之繆急氣言乃得之此文旄字當從彼讀方合如灌絲之義

隨前以舉

樾謹按隨乃鬷之假字隨從隋聲與妥聲相近儀禮士虞禮注曰今文墮爲綏特牲饋食禮注曰墮與接讀同並其證也古無鬷字故以隨爲之說詳羣經平議周易執其隨下此云隨前以舉與下句項衡以下相對爲文言拜之時其鬷必前以舉其項必衡以下也益知隨之爲鬷假字矣故能宗揖其國

樾謹按揖與輯通宗疑安字之誤安輯之文史傳屢見漢書段會宗傳使安輯烏孫孫寶傳蠻夷安輯西域傳可安輯安輯之王莽傳安輯海內並其證也

審乎明王

樾謹按淮南子本經篇審于符者高誘注曰審明也審乎明王正以審乎爲形況之辭審乎所以擬其明也潭本審作沈非是

故威勝德則愬德勝威則施

樾謹按愬當讀爲慤周書世俘篇凡慤國九十有九國孔晁注曰慤惡也威勝德則惡矣故曰慤也施者弛之假字言德勝威則廢弛也

是法廢而威不立也春秋

樾謹按此下有非所聞也四字盧校以爲不類原文而去之此大誤也論衡福虛篇載此事云念譴之而不行其罪乎是廢法而威不立也非所以使國人聞之也然則此文亦必與彼同但奪去以使國人之五字耳當據論衡補

惠王之後而蛭出故其久病心腹之積皆愈

樾謹按故字衍文論衡福虛篇作及久患心腹之積皆愈無故字

故天之視聽不可謂不察。

樾謹按視聽乃親德之誤。論衡作故天之親德也。可謂不察乎。是其證也。上云臣聞皇天無親惟德是輔。故此云天之親德卽承上文爲說也。廣雅釋詁察至也。不可謂不察者不可謂不至也。後人不達察字之義。疑與天之親德意不相承。遂以形似之字易之。而爲天之視聽矣。

寇挾城堞矣。

樾謹按挾讀爲接。儀禮鄉射禮兼挾乘矢。大射儀挾乘矢。鄭注並曰古文挾皆作接。小而生大必伯於天下。

樾謹按戰國策作小而生巨。當從之。古占驗之辭必有韻。巨與下爲韻。大與下則非韻矣。當據國策訂正。

昔楚莊王卽位自靜三年先醒

樾謹按靜讀爲靖。古字通用。尚書堯典篇靜言庸違。漢書王尊傳作靖言庸違。是其證也。爾雅釋詁靖謀也。自靖者自謀也。韓詩外傳載此文。作昔者楚莊王謀事而居。雖與此不同。然彼謀字卽此靜字之義。

天下服而□御耳彊

樾謹按上句云上下調而無尤下句云四境靜而無虞則此句所闕亦必是無字矣御讀爲悟御從卽聲卽從午聲悟從吾聲吾從五聲故御與悟聲近而得通說文金部鑒或作鋟卽其例也天下服而無悟者天下服而無逆也說文午部悟逆也後人不解御字以無御不可通而闕之又或妄補在字更失之矣

飲腑水

樾謹按腑卽腐字移下半肉字於古旁耳呂氏春秋盡數篇流水不腐然則腐水謂淤積之水楚辭離世篇淹芳芷於腐井兮王逸注曰腐臭也卽此所謂腐水矣

請婦人爲妾丈夫爲臣百世名寶因閒官爲積

樾謹按官乃館之古文說詳匈奴篇閒官卽閒館謂館舍之空虛者上林賦靈固燕於閒館是也此言請以越國百世之名寶因吳國館舍之空虛者而以爲積故曰因閒館爲積也

稱善累德

樾謹按稱讀爲辱說文蓐部辱并舉也并舉亦有積累之義故與累德對文

范蠡負室而歸五湖

樾謹按潭本作負石而蹈五湖吉府本同當從之蓋此文言越之君臣皆不善終以明誣神而逆人則

天必敗其事也。下文曰：大夫種繫領謝室，渠如處車裂回泉，句踐不樂憂悲，荐至內崩則死。然則范蠡負石蹈湖，亦是言其不得其死。非如蔡澤所謂超然避世，長爲陶朱者也。呂氏春秋悔過篇故箕子窮于商，范蠡流于江，意與此近。古事相傳往往不同，卽如子胥爲夫差所殺，其事甚箸。此云子胥見事之不可爲也，何籠而自投水然？則說范蠡事豈必如世所傳乎？

天之處高，其聽卑；其牧芒，其視察。

樾謹按牧乃狀字之誤。言天之處雖高，而其聽則甚卑。其狀雖若芒芒，然而其視則甚察也。寡人朝飢時酒二醞。諭誠

樾謹按說文角部，俎，小鱗也。醞卽俎字，變從角者，而從酉耳。說文以爲小鱗，實卽鱗之異文。鱗之爲俎，猶鱗之爲鮓也。

大夫國士畜我。

樾謹按大字衍文也。上云：夫衆人畜我。此云：夫國士畜我。兩文正同。古人書大夫字，或止於夫下，積二畫，如嶧山碑御史夫二臣德是也。故往往相亂。晏子春秋問篇，晏子聘於魯，魯昭公問曰：夫儼然辱臨，是誤大夫爲夫也。此云大夫國士畜我，是誤夫爲大夫也。雖屬錯譌，而尙可見古書之真。別本有作是以者，則後人率意妄改耳。盧校反謂建本譌非也。又階級篇作國士遇我，此作畜我，義通。盧氏必從別

本作遇我亦失之拘矣。

翟窶國也惡見此臺也退讓、

樾謹按見當作尋古得字也與見相似往往致譌史記趙世家踰年歷歲未得一城趙策得作見亦尋字之譌。

文王有志爲臺令近境之民聞之者裹糧而至君道、

樾謹按民聞之者民自聞之也非文王令之聞之也於義殊不可通潭本作令近規之民聞之者躉裹而至吉府本同據此則當於規之絕句近乃匠字之誤于祿字書所載如匝作迺匝作迺陋作陋凡從匚之字每變而爲匱然則匠之誤作近亦猶是矣此言文王有志爲臺令匠氏規度之而民之聞之者已裹糧而至矣詩曰經始靈臺經之營之此卽所謂令匠規之者蓋古詩說也因匠誤作近遂改規字爲境字以合之其句讀舛而義亦全失矣。

榆鉸陂雜芷若蠩虱視益口笑

勸學

樾謹按此皆以三字爲句榆鉸陂未詳疑榆字讀若司馬相如傳榆紵縞之榆榆之言引也陂乃陂段字此句蓋言衣服之美耳雜芷若者芷若皆香草也列子周穆王篇雜芷若以滿之正以雜芷若連文故知此當以三字爲句也蠩虱視義不可通蠩疑望之段字虱則風之誤字言望風而視也益口笑者

益讀爲翳。堯典之益。秦本紀作翳。是其例也。方言曰。翳掩也。翳口笑也。此數句惟第一句之義。尙當闕疑。以下三句皆明白矣。盧校本疑榆鋏卽陝輸。因以榆鋏陂雜爲句。芷若蛩虱爲句。無理殊甚。不可從也。

昔者南榮趺醜聖道之忘乎己。

樾謹按忘當爲亡。亡乎己者。不在乎己也。古人謂不在爲亡。禮記祭法篇。諸侯在其地則祭之。亡其地則不祭。荀子正論篇。然則鬪與不鬪邪。亡於辱之與不辱也。乃在於惡之與不惡也。正名篇。故治亂在於心之所可。亡於情之所欲。淮南子原道篇。聖亡乎治人。而在於得道。樂亡於富貴。而在於得和。諸書並以亡與在對。是亡猶不在也。後人不達亡字之義。加心作忘。轉不可通矣。

鏡儀而居。道術

樾謹按儀讀爲俄。詩賓之初筵篇。側弁之俄。傳曰。俄。傾貌廣雅釋詁曰。俄。衰也。凡人置鏡必稍傾衰之。然後可以自鑒。故曰鏡俄而居也。

反友爲齧。

樾謹按齧字無攷。說文齒部。齧。缺齒也。讀若權。疑卽此字。蓋相齧齧之意。放理潔靜謂之行。反行爲汙。

樾謹按隱三年左傳服注曰水不流謂之汙字亦作洿一切經音義八引三蒼曰停水曰洿是汙爲停積之水故反行爲汙也

行歸而過謂之順

樾謹按過當作和古書和字或以高爲之淮南子說山篇高氏之璧高誘注曰高古和字是也賈子原本作高後人不識因改爲過矣和與順義正相應

六理無不生也六術

樾謹按無字絕句言無此六理則不生也

以與詩書易春秋禮樂六者之術

樾謹按與乃興字之誤

是故先王設爲昭穆三廟以禁其亂何爲三廟上室爲昭中室爲穆下室爲孫嗣令子各以其次上下更居

樾謹按此所謂廟非廟祧之廟也呂氏春秋慎勢篇曰古之王者擇天下之中而立國擇國之中而立宮擇宮之中而立廟是王者所居謂之廟也此三廟卽所謂三寢莊三十二年公羊傳何休注曰天子諸侯皆有三寢一曰高寢二曰路寢三曰小寢父居高寢子居路寢孫從王父母妻從夫寢夫人居小

寢其說略同而謂孫從王父母似不若此書所說之善矣。

數加於少而度出於居。

樾謹按此本作數加於少而度出於小言數之多者由少而加度之大者從小而出也下文曰數度之始�於微細有形之物莫細於豪是故立一豪以爲度始此正度出於小之證建本作數加於小蓋卽下句之小字誤移至上句耳於是下句遂不得其字妄加居字以足句校者雖知上句之當作少而不知移小字於下句則終無以得其義也。

德生理通之以六德之畢離狀六德者德之有六理理離狀也道德說

樾謹按盧校本改畢作華而說以周官形方氏華離之地恐未足據其於離字絕句尤誤據下文故曰如膏謂之德德生理通之以六德之畢離狀則狀字當屬上讀此云理離狀也亦離狀連文不得於離字絕句明矣理離狀卽畢離狀蓋畢誤作里又誤作理耳

未變者道之頌也

樾謹按未字乃夫字之誤

易者察人之精德之理與弗循而占其吉凶

樾謹按精乃循字之誤察人之循德之理與弗循十字爲句下文云春秋者守往事之合德之理與不

合句法與此一律。因循字誤作精。盧校遂於弗字絕句。下句亦讀至不字絕句。殊失之矣。

故國以爲力。君以爲力。吏以爲力。大政上

樾謹按此下有闕文。以上文例之可見。

知善而弗行。謂之不明。知惡而弗改。必受天殃。

樾謹按謂之不明句。當在知惡而弗改下。

至於子孫而衰。則士民皆曰。何君子之道衰也。數也。

樾謹按衰也當作遲也。此云何君子之道衰之數也。下云何天誅之遲也。兩文相對。數之言促速也。禮記曾子問篇。不知其已之遲數。鄭注曰。數讀爲速。此以數與遲對。正與彼同。亦當讀爲速。下文曰。故堯舜禹湯之治天下也。所謂明君也。士民樂之。皆卽位百年然後崩。士民猶以爲大數也。桀紂所謂暴亂之君也。士民苦之。皆卽位數十年而滅。士民猶以爲大久也。久數對文。可知數字之義。即可證此句之誤。

故爲人君者。其出令也。其如聲。士民學之。其如響。曲折而從君。其如景矣。

樾謹按曲折而從君。上有闕文。當有如形一喻。然後如景句。乃有所承。蓋聲響一喻。形景一喻。不可并而爲一下。文曰。君鄉善於此。則佚佚然。協民皆鄉善於彼矣。猶景之象形也。君爲惡於此。則嗶嗶然。協

民皆爲惡於彼矣。猶響之應聲也。以後證前。知此文將言如景。必先言如形。其有闢文明矣。信道而不爲國家必空。大政下。

樾謹按信疑倍字之誤。

故苟上好之。其下必化之。此道之政也。

樾謹按此道之政也。文不可通。當作此道之謂也。傳寫誤耳。上文云。故勸之其上者。由其下而上睹矣。此道之謂也。與此文法一律。

故國也者。行之綱。然後國臧也。

樾謹按行下本有政字。上云。臣忠君明。此之謂政之綱也。此云故國也者。行政之綱。然後國臧也。兩文相承。今奪政字。則文不成義矣。

故古聖王君子不素距人。以此爲明察也。國之治政在諸侯大夫。士察之理在其與徒。

樾謹按察也二字誤倒。侯字衍文。士察二字亦誤倒。本云。故古聖王君子不素距人。以此爲明也。察國之治。句政在諸大夫。察士之理。在其與徒。下文云。君必擇其臣。卽所謂察國之治政在諸大夫也。惟國之治在諸大夫。故君必擇其臣也。又云。臣必擇其所與。卽所謂察士之理在其與徒也。惟士之理在其與徒。故臣必擇其所與也。舊校本作察國之治。在夫諸侯。察士之理。在其與徒。下句得之上句。猶未得。

又按上句所謂政在諸大夫者此政非政令之政乃是語詞猶言正在於此也下文政有命國無君也政有命國無吏也政有命國無人也又云故政謂此國無君也故政謂此國無吏也故政謂此國無人也諸政字並同論語述而篇正唯弟子不能學也即此文政字

分人而不譁者其惟道矣脩政語

樾謹按譁讀爲剗說文刀部剗減也字或作撙管子五輔篇整齊撙詘以避刑戮又或作縛荀子不苟篇不能則恭敬縛紬以畏人撙詘縛紬並卽剗減之義而引申之字異而義同也分人而不譁者謂雖分以與人而其數不爲之減也盧解以譁沓釋之則與分人之義不相應矣吉府本譁字下注云音撙故播之於天下而不忘者其惟道矣

樾謹按忘讀爲亡大元交次四往來熏熏得亡之門范望注曰亡猶絕也播之於天下而不亡謂播之於天下而不絕也詩有女同車篇德音不忘謂德音不絕也國語周語令聞不忘謂令聞不絕也其義並同若以本字讀之則胥失之矣

學黃帝之道而賞之

樾謹按賞讀爲償廣雅釋言償復也

帝譽曰緣道者之辭而與爲道已緣巧者之事而學爲巧已行仁者之操而與爲仁已故節仁之器以脩

其躬而身專其美矣。故士緣黃帝之道而明之。學帝顓頊之道而行之。而天下亦平矣。帝譽曰。德莫高於博愛人。而政莫高於博利人。故政莫大於信治。莫大於仁。吾慎此而已矣。

樾謹按故士緣黃帝之道至天下亦平矣二十五字皆衍文也。上文載帝顓頊之言云。故上緣黃帝之道而行之。學黃帝之道而賞之。加而弗損。天下亦平矣。此文涉彼而衍。又改下句黃帝爲顓頊。以實其爲帝譽之言。盧氏校親疏危亂篇云。傭書小人。唯欲篇幅稍溢。利多得金。其知言乎。困學紀聞卷二引此書曰。帝譽曰。緣巧者之事而學爲巧。行仁者之操而與爲仁也。故節仁之器以脩其財。而身專其美矣。德莫高於博愛人。而政莫高於博利人。故政莫大於信治。莫大於仁。吾慎此而已矣。是王厚齋所見本無此數語。且兩條合爲一條。亦無下帝譽曰三字也。或疑王氏所引不備。未足爲據。則固不然。如下文有兩湯曰。王氏引之。則云湯曰又曰。未嘗并爲一談也。若此有兩帝譽曰。則亦當云帝譽曰又曰。何以并而一之乎。

故吾詳取之以敬也。

樾謹按困學記聞引此無詳字。當據刪。

粥子曰。唯攻守而勝乎。同器脩政語下、

樾謹按盧棟別本作戰乎。當從之上文周武王問守而必存。攻而必得。戰而必勝。則吾爲此柰何。故粥

子告以攻守戰三者同器也。攻守而戰乎。猶大政上篇云。明君而君子乎。賈子自有此文法。言攻守與戰也。三者並舉。以而字連屬之。又用乎字爲語詞耳。上下文粥子之對並曰。唯疑此文。唯下亦當有疑字。

上下之人等其志矣。

樾謹按禮記樂記篇。然後立之樂等。鄭注曰。等差也。周官司勳職。以等其功。鄭注曰。等猶差也。然則等其志矣。謂其志有等差也。與上文賢不肖之人別其行矣。一義非齊等之謂。

賓禮贈賄同是禮而從禮容語下。

樾謹按是當爲視。釋名釋姿容曰。視是也。視與是義本相通。故古書或假是爲視。荀子解蔽篇。是其庭可以搏鼠。楊倞注曰。是蓋當爲視。此其證也。國語周語載此事曰。賓禮贈餞。視其上而從之。此言是彼言視文異而義同矣。

命者制令也。基者經也。勢也。

樾謹按制令當爲制度。蓋訓命爲制度。訓基爲經。故下文曰。經制度。卽釋基命之義。後人不達其意。疑命當訓令。遂改爲制令。然詔令稱制。三代未聞制令二字。義不相連。賈子述叔向之言。不當以制令連文也。至基之訓勢。未聞其義。直當爲衍文耳。

太宰持斗而御戶右胎教

樾謹按斗大戴記保博篇作升。盧辯注曰：升所以斟。孔氏廣森補注以士冠禮注勾尊升所以斟酒說之。然穆天子傳佐者承斗而哭。郭璞注曰：斗斟水杓也。御覽七百六十二引通俗文曰：木瓢爲斗。則斗亦未始不可以斟。盧氏所據大戴記其作升作斗未可知也。且下文云：荷斗而不敢煎調。則並非斟酒之物。孔氏謂持升卽持勺。義亦未安。今按斗與豆音近而易誤。考工記梓人一獻而三酬。則一豆矣。鄭注曰：豆當爲斗。又云飲一豆酒。注曰：一豆酒又聲之誤。當爲斗。並其證也。疑此文本作太宰持豆而御戶右詩生民篇印盛于豆。毛傳曰：木曰豆。豆薦菹醢也。大戴記曾子事父母篇執觴觚杯豆而不醉。盧注曰：豆醬器。則與下文不敢煎調文義正合。因豆斗聲近而誤豆爲斗。又因斗升形似而誤斗爲升。均非本字耳。

正之禮者王太子無羞臣領臣之子也。故爲領臣之子也。身朝王者妻朝后之子朝王太子是謂臣之子也。

樾謹按羞臣領三字及故謂領臣之子也七字並疑衍文。此本云正之禮者王太子句無臣之子也。身朝王者妻朝后句之子朝王太子句是謂臣之子也。蓋以上文所說諸禮惟王太子得行之人臣之子皆無是也。故曰正之禮者王太子無臣之子也。正之禮者猶云正其禮者之猶其也。呂氏春秋音初篇。

之子是必大吉。高誘訓之爲其是也。此下云云。又申說臣之子之義。謂其身朝王者。其妻必朝后。其子必朝王太子。是乃所謂臣之子也。因多衍字。故文譌難讀耳。

威王以齊彊於天下而簡公以殺於檀臺

樾謹按威王在簡公之後。不應先言威王之彊。而後言簡公之殺。與上下文皆不一律矣。大戴記文與此同。惟說苑尊賢篇作威王以齊強於天下。而湣王以弑死於廟梁。則與上下文一律。或賈子原文也。無宜治之民。

樾謹按上云無常安之國。則此當云無恆治之民。恆與宜相似而誤。說苑尊賢篇。正作恆字。當據訂正。使天下之俗失明尊敬而不讓。立後義。

樾謹按俗字絕句。明疑所字之誤。失所尊敬而不讓七字爲句。盧校於失字絕句。而解明尊敬爲明知所當尊敬。義未安也。吉府本作失開尊敬。尤誤。

諸子平議卷二十九

淮南內篇一

神與化游以撫四方原道

樾謹按撫讀爲撫說文巾部撫覆也古書或以撫爲之荀子宥坐篇勇力撫世守之以怯楊倞注曰撫掩也掩卽覆也此云以撫四方猶言以覆四方上文云舒之幌於六合高誘注曰幌覆也幌幌同義撫者段字耳高注撫安也失之

神託於秋毫之末而大宇宙之總

樾謹按大下疑脫於字謂神雖託於秋毫之末而視宇宙之總合更大也今脫於字文義未明遂兮洞兮

樾謹按遂讀爲邃離騷經閨中旣邃遠兮招魂篇高堂邃宇王逸注並曰邃深也洞亦深也文選西京賦赴洞穴薛綜注曰洞穴深且通也是洞有通義亦有深義遂兮洞兮皆言其深也方與上句幽兮冥兮意義相稱高注曰洞達也非是

扶搖摵抱羊角而上

樾謹按此當作揜扶搖抱羊角而上。讀者因淮南書多以揜抱連文。高氏此注又曰。揜抱引戾也。故移揜字於下。使揜抱連文以合於高注。不知高注自總釋二字之義耳。非正文必相連也。扶搖也。羊角也。皆風也。莊子逍遙遊篇。搏扶搖而上者九萬里。釋文引司馬云。上行風謂之扶搖。又曰。搏扶搖羊角而上者九萬里。司馬云。風曲上行若羊角。是其義也。揜扶搖抱羊角而上。猶云搏扶搖羊角而上。今作扶搖揜抱羊角。則義不可通矣。

軌道要之柄。而游於無窮之地。

樾謹按既言要又言柄。於義未安。當作軌道之柄。而游於無窮之地。文子道原篇。作軌道之要觀。無窮之地也。彼言要。此言柄。彼言觀。此言游。文異而義同。後人據文子以讀此文。遂有改柄爲要者。傳寫兩存其字。又誤入上文耳。又按地下亦當有也字。蓋此是答問之辭。若無也字。則與上文何也不相應矣。

當據文子補。

人生而靜。天之性也。感而後動。性之害也。

樾謹按害乃容字之誤。禮記樂記作性之欲也。欲亦容字之誤。史記樂書作性之頑也。徐廣曰。頑音容。蓋古本樂記字本作容。故徐廣讀頑爲容也。靜性爲韻。動容爲韻。作欲作害。則皆失其韻矣。且上言動下言容。容亦動也。說文手部。榕。動榕也。容卽榕之叚字。亦或作溶。韓子楊搢篇曰。動之溶之。是也。感而

後動卽是性之動故曰性之容也作欲作害則皆失其義矣史記作頌徐廣又何據而讀爲容乎故知此與禮記並誤也說詳羣經平議是故鞭噬狗策蹏馬而欲教之雖伊尹造父弗能化

樾謹按伊尹不聞以善御名何得與造父並稱伊尹疑當作尹儒呂氏春秋博志篇尹儒學御三年夢受秋駕於其師卽其人也傳寫脫儒字後人臆補伊字於尹字之上耳道應篇作尹需

夫井魚不可與語大拘於隘也夏蟲不可與語寒篤於時也曲士不可與語至道拘於俗束於教也

樾謹按大字泛而無指義不可通疑本作夫井魚不可與語大海拘於隘也夏蟲不可與語寒雪篤於時也曲士不可與語至道拘於俗束於教也曰大海曰寒雪曰至道皆二字爲文與莊子秋水篇不同彼云井鼃不可以語於海者拘於虛也夏蟲不可以語於冰者篤於時也曲士不可以語於道者束於教也曰海曰冰曰道皆一字爲文古人屬辭必相稱如此高注於次句曰言蟬蜩不知寒雪也則其所據本正有雪字若正文但言寒不言雪則高注何以橫加雪字乎卽謂增字以足句何不據莊子加冰字而必加雪字乎此句既有雪字則上句亦有海字可知不然次句曰語寒雪三句曰語至道而首句獨曰語大文不相稱且寒以雪言至以道言大以何物言乎文又不備矣梁張綰文曰井魚之不識巨海夏蟲之不見冬冰巨海卽大海也

藏於不敢。

樾謹按文子道原篇作藏於不取當從之卽所謂百姓足君孰與不足也取與敢形似而誤授萬物而無所前後。

樾謹按授上當有稟字上文曰稟授無形又曰布施稟授而不益貧下文曰稟授於外而以自飾也並以稟授連文是其證也文子道原篇作稟授萬物而無所先後當據補。

味者甘立而五味亭矣。

樾謹按說文高部亭民所安定也是亭有定義故文選謝靈運初去郡詩注引蒼頡曰亭定也亦通作停釋名釋言語曰停定也定於所在也五味亭矣猶曰五味定矣文子道原篇字正作定可證也高注曰亭成也於義轉迂。

憂悲者德之失也。

樾謹按上云喜怒者道之邪也下云好憎者心之過也喜之與怒好之與憎皆二字相反此云憂悲則非其義矣憂悲當作憂樂下文云心不憂樂德之至也卽承此文而言精神篇曰夫悲樂者德之邪也與此文異義同悲卽憂也當由別本從彼作悲樂而傳寫誤合之轉脫樂字耳。

豈必處京臺章華。

樾謹按京臺卽強臺也。戰國策魏策楚王登強臺而望崩山是也。強字籀文作蠶。從彊得聲與京聲相近。竈或作麋。鱣或作鯨。皆其例也。故強臺亦稱京臺矣。強臺見道應篇而文選應璩與滿寵書注引作京臺。此京臺卽強臺之明證。

此其爲樂也。炎炎赫赫。恍然若有所誘慕。

樾謹按高注曰。恍然猶惕然。此說非也。下文解車休馬罷酒徹樂之後。方云忽然若有所喪。悵然若有所亡。則此時不得遽云惕然也。若已惕然。又何樂之有乎。恍當讀爲誼。說文言部。誼誘也。下言有所誘慕。故上言誼然。義正相應。作恍者段字耳。

夫內不開於中而強學問者。不入於耳而不著於心。

樾謹按不入於耳句衍不字。言雖入耳而不著於心也。不字涉上下句而誤衍。

此齊民之所爲形植。黎累憂悲而不得志也。

樾謹按王氏念孫據文選江淹上建平王書注訂黎累爲黎黑是也。惟未說植字之義。植當讀爲殖。管子地員篇。五殖之狀甚澤以疏離坼以臞墻。是殖有臞瘠之義。形殖謂形體臞瘠也。蓋卽從脂膏殖敗之義而引申之耳。

今夫狂者之不能避水火之難。而越溝瀆之險者。

樾謹按不能當作能不傳寫誤倒。

夫精神氣志者靜而日充者以壯躁而日耗者以老。

樾謹按下兩者字皆衍文。日充以壯。日耗以老。猶言日充而壯。日耗而老也。有者字則文不成義。文子九守篇正無兩者字。

一範人之形而猶喜。倣真。

樾謹按範卽犯之段字。周易繁辭傳。範圍天地之化而不過。釋文曰。範圍馬王肅張作犯違。是範犯古字通也。莊子大宗師篇正作特犯人之形而猶喜之。又曰。今一犯人之形而曰人耳人耳皆其證也。高注曰。範猶遇也。遭也。此說得之。郭象注莊子曰。人形乃是萬化之一遇耳。是亦以遇釋犯也。高注又曰。一說範法也。言物一法效人形而猶喜也。則望文生訓失之泥矣。

其道可以大美興而難以算計舉也。

樾謹按美當作筭。隸書策字也。史記五帝紀。迎日推策。晉灼曰。策數也。是大筭卽大數也。興亦舉也。言止可以大數舉也。筭與美形似而誤。大戴記易本命篇。此乾坤之筭。盧辯注曰。三百六十。乾坤之筭。而今正文筭字亦誤作美。是其證也。高注曰。言天地萬物。但可以大美興而育之。是其所據本已誤。中徒倚無形之域。而和以天地者乎。

樾謹按和以天地義不可通地疑倪字之誤莊子齊物論篇曰和之以天倪休于天鈞而不穢

樾謹按高注曰穢敗也天鈞北極之地積寒之野休之輒敗唯體道能不敗也此說天鈞之義殊爲無據莊子齊物論篇曰是以聖人和之以是非而休乎天鈞郭象注曰莫之偏任故付之自均而止也釋文引崔譏曰鈞陶鈞也淮南休乎天鈞之文卽本莊子義亦當與彼同謂休乎自然之陶鈞故不敗也他書無以積寒之地爲天鈞者足徵高注之非矣

其所居神者臺簡以游太清

樾謹按高注曰臺猶持也以持訓臺蓋以聲爲訓釋名釋宮室曰臺持也築土堅高能自勝持也是其證也方言曰臺支也支與持義同錢氏坫謂臺當作臺古文握字然臺之訓持自是古訓不必疑其字誤也莊子庚桑楚篇曰靈臺者有持而不知其所持而不可持者也是亦以臺爲持故釋文曰靈臺謂心有靈智能任持也然則臺簡卽持簡猶靈臺卽靈持矣

譬若周雲之龍蒼遼巢彭湧而爲雨

樾謹按高注曰周雲密雨雲也然密雨之雲謂之周雲甚爲未安殆失之矣周當讀爲朝詩汝墳篇如調飢毛傳曰調朝也周之爲朝猶調之爲朝也朝雲爲雨卽詩所謂朝濟于西崇朝其雨也鄭箋云

朝有升氣於西方終其朝則雨氣應自然升氣卽雲也文選高唐賦王問玉曰此何氣也玉對曰所謂朝雲者也即可說此周雲之義

茫然彷佯于塵埃之外而消搖于無事之業

樾謹按廣雅釋詁業始也無事之業謂無事之始也文子精神篇作無事之際乃淺人不得其義而臆改九守篇亦作無事之業

華藻鑄鮮

樾謹按高注曰華藻華文也鑄今之金尊也鮮明好也此說於鑄字之義未得鑄鮮連文若是金尊則與鮮字不屬矣陳氏壽祺左海經辨說以說文金部之鑄鱗謂鮮當爲鱗然鑄鱗自是鐘上橫木之飾此言犧尊非所施也今按鑄從專聲專猶敷也謂以金敷布其上也古者以金飾物謂之鑄史記禮書注金薄璆龍索隱引劉氏曰薄猶飾也薄卽鑄之段字也鮮讀爲獻禮記月令篇天子乃鮮羔開冰注曰鮮當爲獻是其證也明堂位篇周獻豆注曰獻疏刻之然則鑄獻謂疏刻而以金飾之也畫爲華藻之形疏刻而金飾之是爲華藻鑄獻

不知耳目之宣而遊于精神之和

樾謹按宣當作宜字之誤也莊子德充符篇夫若然者且不知耳目之所宜而遊心乎德之和卽淮南

所本文子精誠篇作知九竅四肢之宜而游乎精神之和字正作宜但知上脫不字耳夫世之所以喪性命有衰漸以然所由來久矣

樾謹按衰乃等衰之衰上文自伏羲氏而歷數之以至于周室之衰每降而愈下故曰有衰漸以與其有說也不若尙羊物之終始也而條達有無之際

樾謹按終始下衍也字不若尙羊物之終始而條達有無之際兩句一氣相屬今衍也字則文義隔絕矣

人莫鑑於流沫而鑑於止水者以其靜也

樾謹按高注曰沫雨潦上沫起覆甌也又說山篇人莫鑑于沫雨而鑑于澄水者以其休止不蕩也注曰沫雨雨潦上覆甌也沫雨或作流潦今按此當以流潦爲正流潦卽行潦也詩洞酌篇毛傳曰行潦流潦也孟子公孫丑篇趙注曰行潦道旁流潦也是其義也流潦與止水正相對爲文莊子德充符篇人莫鑑於流水而鑑於止水流潦猶流水也文子九守篇亦作流潦可知古本如此矣高本作流沫者疑流泉之誤隸書泉字或作涼楊君石門頌平阿涼泥是也古本作流潦別本作流泉義初不異涼與沫相似因誤爲沫矣高據誤本作注而以雨潦上沫起覆甌說之蓋謂是水中浮漚耳其說迂曲而說山篇之沫雨則又涉高注而誤因高注沫雨二字相連淺人妄謂是舉正文而釋之遂改正文流沫作

沫雨又於注文雨下加雨字以從既改之正文斯爲謬矣王氏念孫謂當作流雨流雨之文殊不成義不可從也文選江賦注引作流漿卽說文泉部鑿字之異文許君云泉水也此正可爲別本作流泉之證

莫窺形於生鐵而窺於明鏡者以觀其易也

樾謹按太平御覽服用部方術部引此文並無覩字是覩爲衍文以其易也與上句以其靜也正相對惟易字於義無取疑明字之誤明字從日從月而易字據說文引祕書說日月爲易象陰陽也則亦從日從月故明誤爲易耳

能有名譽者必無以趨行求者也

樾謹按趨乃越字之誤越之言逸也躡也越行猶言過行也謂不以過甚之行求名譽也文子九守篇作能有名譽者必不以越行求之是其證

勢利不能誘也辯者不者說也聲色不能淫也美者不能濫也智者不能動也勇者不能恐也

樾謹按聲色句移在辯者句前則勢利聲色以類相從辯者美者智者勇者亦以類相從矣文子九守篇正如此可據以訂正

夫化生者不死而化物者不化

樾謹按化生當作生生。涉下句而誤。精神篇曰：故生生者未嘗死也。其所生則死矣。化物者未嘗化也。其所化則化矣。是其證也。

橫局天地之間而不窕

樾謹按高注曰：局猶閉也。則與橫字之義不貫矣。儀禮士冠禮鄭注曰：局所以扛鼎。考工記匠人注曰：大局牛鼎之局長三尺。小局腳鼎之局長二尺。是局者橫木以扛鼎者也。宣十二年左傳服注曰：局橫木校輪閒。一曰車前橫木也。是凡橫木皆謂之局。故以橫局並言。

蟻噉膚而知不能平

樾謹按知猶志也。禮記緇衣篇爲上可望而知也。爲下可述而志也。鄭注曰：志猶知也。是知與志義通。知不能平者平定也。謂志不能定也。與上句蜂蠭螫指而神不能澹。高注曰：澹定也。義正一律。太平御覽蟲豸部引作性不能平。恐後人不達知字之義而臆改。未足爲據。王氏念孫謂性猶體也。此恐不然。神也志也。皆就在內者而言。故下文曰：夫憂患之來。擾人心也。直蜂蠭之螫毒。而蟻噉之慘怛也。言擾人心不言擾人體。則此不當以體言矣。

雖欲勿稟其可得邪。

樾謹按國語晉語將稟命焉。楚語是無所稟命也。韋注並曰：稟受也。此言萬物之來。擢拔吾性。擣取吾

情吾雖欲勿受之而不可得也。高注曰：稟猶動用也。於辭意未合且稟字亦無動用之義。

東北曰變天。天文。

樾謹按周易說卦傳，艮，東北之卦也。萬物之所成終而成始也。正義曰：東北在寅丑之間，丑爲前歲之末，寅爲後歲之初，則是萬物之所成終而所成始也。東北變天之義，亦取諸此。以其居終始之交，故以變名。高注以萬物萌芽說之，尚未盡變字之義。

景風至則爵有位，賞有功。

樾謹按既云有位，又何爵焉？爵有位之文，殊不可通。位，疑德字之誤。有德有功，相對爲文。草書德字作涉，與位相似，故德誤爲位耳。白虎通義八風篇，正作爵有德封有功，可據以訂正。

何謂五官？東方爲田，南方爲司馬，西方爲理，北方爲司空，中央爲都。

樾謹按都上疑脫官字。官都者，官之都總也。蓋以二字爲官名。管子問篇曰：問五官有度制。官都其有常斷，今事之稽也。何待此？五官有官都之墻證。又揆度篇云：自言能爲司馬者，殺其身以釁其鼓；自言能治田土者，殺其身以釁其社；自言能爲官者，劓以爲門父，故無敢姦能誣祿。至於君者矣。故相任寅爲官都。按司馬及治田土，即此東方南方之官也。然則官都亦即此五官之一矣。

太微者太一之庭也。

樾謹按下文曰紫宮者太一之居也然則太一自在紫宮不在太微此太一乃天子二字之誤太平御覽引天官星占曰紫宮太一坐也太微之宮天子之庭五帝之坐也是其明證。

天阿者羣神之闕也。

樾謹按高注曰闕猶門也然開元占經甘氏中官占引甘氏曰天阿一星在昴西以察山林之妖變也則非門闕之謂北堂書鈔太平御覽引此並作天河然天河非星也徧考書傳無以天河爲星名者今按天河當作兩河史記天官書曰鉞北北河南南河兩河天闕是其證也天字篆文作天與兩字相似故兩誤爲天矣。

日冬至則水從之日夏至則火從之故五月火正而水漏十一月水正而陰勝。

樾謹按此文有錯誤冬至水王夏至火王豈得但曰水從之火從之一也火正與水漏有二義水正與陰勝則止一義耳兩文不稱二也且連下文讀之曰陽氣爲火陰氣爲水水勝故夏至溼火勝故冬至燥夫冬至水從之夏至火從之則夏至何以溼冬至何以燥乎前後不相應三也今按日冬至則水從之日夏至則火從之水火二字當互易冬至一陽生故日冬至而火從之也夏至一陰生故日夏至而水從之也五月火正而水漏正說夏至水從之之義言五月火方用事而水氣已滲漏也十一月水正

而陰勝陰乃火字之誤。勝字當讀爲升。勝升古通用。謂十一月水方用事。而火氣已上升也。正說冬至火從之之義。如此則與下文一貫矣。

二陰一陽成氣二二陽一陰成氣三

樾謹按陽之數以三而奇。陰之數以二而偶。所謂參天兩地也。周書武順篇曰。男生而成三。女生而成兩。是其義也。二陰一陽。則二二如四。一三如三。其數七。除五生數。則得成數二。所謂二陰一陽成氣二也。二陽一陰。則二三如六。一二如二。其數八。除五生數。則得成數三。所謂二陽一陰成氣三也。高注未得其解。此陰陽之數。卽易少陽少陰之數。說詳羣經平議。

以至于仲春二月之夕。乃收其藏而閉其塞。

樾謹按高注曰。收斂其所藏而閉之。然二月非收斂之時。義不可通。太平御覽時序部引作乃布收其藏而閉其寒。引高注作收斂其所藏而出布之。是今本脫布字。然布收連文。義亦未安。收疑放字之誤。尚書洛誥篇。乃惟孺子頒。說文支部作乃惟孺子斂。是布斂卽布頒。猶言頒布也。上文云。至秋三月。地氣下藏。故至二月乃布頒之也。高氏據誤本作注。後人以布收異義。不得連文。遂以布爲衍字。而削之矣。

太陰治春。則欲行柔惠溫涼。

樾謹按溫涼異義不得連文涼當作良聲之誤也。

南方曰巨風地形、

樾謹按巨乃豈之壞字。豈讀爲愷。高注云。一曰愷風。愷正字。豈借字。巨誤字耳。說詳呂氏春秋。其高萬一千里。百一十四步二尺六寸。

樾謹按萬一千里言城之高。則百一十四步二尺六寸當言城之厚。然其數奇零。疑有脫誤。旁有四百四十門。門間四里。里間九純。純丈五尺。

樾謹按門閒四里。言每門相距之數也。里閒九純。義不可通。疑本作門九純。言門之廣也。門誤爲閒。後人遂妄加里字耳。

自東北方曰大澤。曰無通。

樾謹按此當作自東北方曰無通曰大澤。方與下文東方曰大渚。曰少海。東南方曰具區。曰元澤。南方曰大夢。曰浩澤。西南方曰渚資。曰丹澤。西方曰九區。曰泉澤。西北方曰大夏。曰海澤。北方曰大冥。曰寒澤。文義一律。蓋無通也。大渚也。具區也。大夢也。渚資也。九區也。大夏也。大冥也。所謂八殯也。大澤也。少海也。元澤也。浩澤也。丹澤也。泉澤也。海澤也。寒澤也。所謂八澤也。故下文總之曰。凡八殯八澤之雲。是雨九州。今無通大澤。傳寫誤倒。則先澤而後殯。與下不一律矣。高注大澤無通。皆數名也。本作無通數。

名也蓋無通是藪大澤是澤澤名已顯故不必注藪名未顯故必注之因無通大澤傳寫誤倒遂增大澤於無通之上而以爲皆藪名矣其注少海曰東方多水故曰少海亦澤名也上注無澤名之文而此云亦者亦大澤也大澤是澤名少海亦是澤名特因東方多水故從大稱而曰海耳實亦澤也故言亦也卽此可見大澤與少海同所八澤之數然則大澤不應在無通之上其證一矣下文浩澤注曰浩亦大也上注無大文而此云亦者亦大澤也大澤以大得名浩澤亦以大得名故言亦也卽此可見大澤與浩澤同在八澤之數然則大澤不應在無通之上其證二矣

是故堅土人剛弱土人肥

樾謹按下文墟土人大沙土人細息土人美耗土人醜大與細對美與醜對剛與肥則不對矣肥當作胞廣雅釋詁脆弱也脆卽胞之俗體堅土人剛弱土人胞正相對成義家語執轡篇作堅土之人剛弱土之人柔柔亦胞也

食土者無心而慧

樾謹按高注曰蚯蚓之屬是也然蚯蚓之屬何慧之有大戴記易本命篇作無心而不息盧辨注曰蚯蚓之屬不氣息也此文慧字疑亦不息二字之誤

其人面未僂修頸

樾謹按高注曰末猶脊也然則末僂者謂其脊句僂也末上不當有面字疑是衍文又按莊子外物篇末僂而後耳釋文引李云末上謂頭前也蓋訓末爲上又以上爲頭故以末僂爲頭前此說末字之義較合說文木部木上爲末故人亦以上爲末矣

汝出弗其流合於濟

樾謹按說文水部汝水出琅琊朱虛東泰山東入濰又曰桑欽說汝水出泰山萊蕪西南入泲是汝水有二一入濰一入泲泲卽濟也高注曰弗其山在北海朱虛縣東是誤以入濰之汝說入濟之汝王氏讀書襍志已辯正矣惟弗其之名未能塙指漢書地理志曰泰山郡萊蕪有原山禹貢汶水出西南入泲今原山在山東泰安府萊蕪縣東北七十里亦名馬耳山弗其二字疑卽馬耳之誤弗與馬其與耳字形皆相似

變生海人

樾謹按下文又曰凡寃者生於庶人兩寃字皆肢字之誤史記司馬相如傳躬腠胝無肢韋昭曰肢戚中小毛也漢書相如傳注引孟康曰肢毳膚皮也然則凡肢者生於庶人與下凡羽者生於庶鳥凡毛者生於庶獸凡鱗者生於庶魚凡介者生於庶龜一律人以肢言猶鳥獸魚龜以羽毛鱗介言也其字本從肉傳寫誤從穴後人以從穴之字多上形下聲因變爲寃矣管子侈靡篇有鴟字卽鷩字之誤墨

子備城門篇有臘字卽竇字之誤說見本書彼蓋先誤穴爲肉後人以從肉之字多左形右聲因變爲鵠爲臘與此正可互證也道藏本作凡容者生於庶人則與竇生海人不相應卽與下文羽毛鱗介不一律矣又按竇生海人竇下脫一字說詳下條

介鱗生蛟龍

樾謹按蛟龍乃鱗蟲非介蟲也不當兼言介上文羽嘉生飛龍毛犧生應龍下文介潭生先龍曰羽嘉曰毛犧曰介潭是羽毛介各有一字以配之使成二名則此文鱗下亦當有一字傳寫脫去又涉下文介潭而誤衍介字耳以此推之上文竇生海人竇下亦必脫一字矣

孟春行夏令則風雨不時時則

樾謹按月令作雨水不時是也仲春之月始雨水則孟春之月而雨水卽爲雨水不時矣漢太初以後更改氣名以雨水爲正月中則正月雨水不復爲異於是改雨水不時爲風雨不時非淮南之舊矣呂氏春秋孟春紀亦作風雨不時並太初以後人所追改

草木早落

樾謹按月令作草木蚤落呂氏春秋作草木早槁此早字卽早字之誤
令滂入材葦

樾謹按高注曰：滂人掌池澤官也。然池澤之官不聞謂之滂人。高注非也。滂人當作榜人。月令命漁師伐蛟。鄭注曰：今月令漁師爲榜人。文選司馬相如子虛賦：榜人歌。張揖曰：榜船也。月令曰：命榜人。榜人船長也。張所據月令卽鄭君所謂今月令船長之義，亦必月令舊說也。淮南書用榜人字正本月令。高氏以爲掌池澤官。蓋據月令作命澤人納材革。故云然耳。非榜人之本義也。後人因高注池澤之文。疑榜字從木無義。改榜爲滂而古義湮矣。

大禱祭于公社。

樾謹按月令作大割祠于公社。割者祠字之誤也。祠之與禱猶帽之與幘說文分禱祠爲二字，非是。阮氏積古齋鐘鼎款識所錄無專鼎銘有勑字，釋爲割字。然其文云用勑眉壽萬年，則非割字也。此字當讀爲祠。其左旁乃周字。蓋假周爲祠，而右旁又作刀。翁氏方綱以爲持刀立戈之類。古鐘鼎文往往有之，不足異也。用禱眉壽萬年，卽用禱眉壽萬年也。說詳余所著金石瑣談。月令大割祠之文，甚爲無義。以此鼎文證之，疑本亦作勑。學者不識古文，故誤以爲割字耳。淮南作禱，可證月令之誤。余著羣經平議，未見及此，故於此詳之。

春行夏令泄。

樾謹按下云：冬行春令泄，不當重複。且上文云：仲春始出，季春大出，則春日發泄，不足爲咎也。管子幼

官篇作春行夏政閽當從之蓋發泄太過故奄然而息也方言及廣雅並曰奄息也閽與奄通因脫閼字而寫者以泄字補之殊非其義高注曰象盛陽發泄也是其所據本已誤夫下文冬行春令泄高注曰象春氣布散發泄也然則布散發泄自是春氣所固然豈行夏令所致乎卽此可知其非矣

直而不爭

樾謹按爭讀爲絳儀禮士喪禮鄭注曰絳屈也江汚之間謂縗收繩索爲絳故此曰繩之爲度也直而不絳

自古及今不可移匡

樾謹按移之言廸也說文走部廸衰行也移亦有衰義禮記玉藻篇手足毋移正義曰移謂靡廸搖動也是其證也匡與輒通說文車部輒車戾也考工記輪雖敝不匡匡卽輒字不移匡言不衰曲也

諸子平議卷三十

淮南內篇二

陽侯之波逆流而擊覽冥、

樾謹按高注曰。陽侯。陽陵國侯也。然陽陵自是漢侯國。史記高祖功臣侯表有陽陵侯傅寬。是也。高注以說古之陽侯。殆失之矣。春秋閔二年齊人遷陽。杜注曰。國名。正義曰。世本無陽國。不知何姓。杜世族譜土地名闕。不知所在。古之陽侯。當卽此陽國之侯。水經沂水南逕陽都縣故城東。縣故陽國城。是其所在矣。

直偶於人形。

樾謹按偶與寓通。言特寄寓於人之形耳。高注曰。外直偶與人同形。則增出同字矣。

觀九鑽一。

樾謹按高注曰。九謂九天。一龜也。此說迂曲。九一皆以數言也。數始於一而極於九。至十則復爲一矣。素問三部九候論曰。天地之至數。始於一。終於九焉。是其義也。故古人之言。凡至少者。以一言之。如孟子一杯水一鉤金是也。至多者。以九言之。如公羊傳叛者九國是也。觀九鑽一。言所觀覽者多。而所鑽

擊者少也。精神篇曰：能知一則無一之不知也。不能知一則無一之能知也。是其義知不能論。

樾謹按論者知也。說山篇以小明大以近論遠。高注曰：論知也。此論字不訓爲知。蓋以正文已有知字故耳。不知正文知字當讀爲智。知不能論謂智者不能知也。說文心部：愉欲知之貌。論與愉通。下文曰：心意之論不足以定是非。論亦知也。

然以掌握之中引類於太極之上而水火可立致者陰陽同氣相動也。

樾謹按高氏注太極之上曰：太極天地始形之時也。上猶初也。此說殊失其義。周易繫辭傳易有太極。釋文曰：太極天也。然則太極之上言天之上也。上文曰：夫陽燧取火於日方諸取露於月。此云取類於太極之上而水火可立致。卽以取火於日取露於月而言。日月麗乎天故曰太極之上也。注以爲天地始形之初則與上義不相屬矣。

其得之乃失之其失之非乃得之也。

樾謹按非上脫未始二字非下衍乃字。本作其失之未始非得之也。故高注曰：自謂得道乃失道者也。自謂失道未必不得道也。各依正文爲說耳。文子精神篇曰：其得之也乃失之也。其失之也乃得之也。雖用淮南文然意同而字句固小異矣。不得據彼改此而轉與高注不合也。

左右若鞭。

樾謹按鞭當讀爲纏。說文糸部。纏交枲也。段氏玉裁曰。謂以枲二股交繩之也。交絲爲辯。交枲爲纏。此云左右若纏。言如枲之交繩也。左右若纏。周旋若環。兩句一律。高以本字讀之。故所列二說皆非。

黃雲絡。

樾謹按此當作絡黃雲。方與上下文句法一律。高注曰。黃雲之氣絡其車。正說絡黃雲之義。猶下注曰白螭導在於前。是說正文前白螭之義。奔蛇騰蛇也。從在於後。是說正文後奔蛇之義。非正文作白螭。前奔蛇後也。後人因注文絡字在黃雲之下。輒改正文作黃雲絡以合之。謬矣。

羣臣準上意而懷當。

樾謹按高注曰。準望懷思當合也。取合上意。不復以道正諫也。然懷當二字。甚爲不辭。高注亦曲說耳。懷當乃壞常之誤。言羣臣皆準上意而敗壞其典常也。文子上禮篇作羣臣推上意而壞常。是其明證。猶不聽其樂。

樾謹按高注曰。樂崩故不復聽田獵之樂。是此樂字是喜樂字而非音樂字。乃言不聽於義未安聽疑德字之誤。家語本命篇効匹夫之聽。王注曰。聽宜爲德。是其例也。德與得通。不德其樂。即不得其樂。言雖田獵而不得其樂也。正與上句喪不盡其哀文義一律。後人不知德爲得之假字。遂臆改爲聽耳。

相攜於道奮首於路。

樾謹按高注曰奮首民疲於役頓仆於路僅能搖頭耳此說極爲迂曲淮南原文本作奮於首路首猶嚮也漢書司馬遷傳北首爭死敵師古曰首嚮也是其義也相攜於道奮於首路言不得已自奮勉而嚮路也兵略篇曰百姓之隨逮肆刑挽輶首路死者一旦不知千萬之數正以首路連文可證此篇之誤。

潦水不泄瀆養極望旬月不雨則涸而枯澤受瀆而無源者。

樾謹按者當作也澤字絕句如而古通用涸而枯澤者涸如枯澤也此言潦水雖瀆養極望然旬月不雨則涸如枯澤矣所以然者以其受瀆而無源也與上文河九折注於海而流不絕者昆侖之輸也正相對成義句末也字誤作者則文義轉似不了矣。

古未有天地之時惟像無形精神。

樾謹按惟乃惘字之誤隸書罔字或作罟故惘與惟相似而誤也惘像卽罔象也文選思元賦穢汨寥戾沛以罔象兮亦作象罔莊子天地篇乃使象罔象罔得之是也罔象乃疊韻字與下文湧濛鴻洞一律皆無形之象故曰罔象無形今作惟像無形義不可通乃高注訓惟爲思則其誤久矣。

天有四時五行九解。

樾謹按高注九解有三說。當以八方中央之義爲塙。天文篇天有九野。中央曰鈞天。東方曰蒼天。東北曰變天。北方曰元天。西北方曰幽天。西方曰顥天。西南方曰朱天。南方曰炎天。東南方曰陽天。卽此九解矣。解者分也。謂分周天三百六十五度四分度之一而爲九也。人之耳目曷能久熏勞而不息乎。

樾謹按熏當爲勳。勳勞二字連文。古人常語。主乎勳而言之。則勞亦勳也。禮記明堂位篇成王以周公爲有勳勞於天下。言有勳於天下也。主乎勞而言之。則勳亦勞也。此文曰曷能久勳勞而不息乎。言不能久勞而不息也。文子九守篇作何能久燻而不息。蓋由後人不達古語而改之。

故事有求之於四海之外而不能遇。或守之於形骸之內而不見也。

樾謹按守當作得。言求之於四海之外而不能遇者。或得之於形骸之內也。求與得文義相應。下文曰。故所求多者所得少。正承此而言。今作守之。失其義矣。一切經音義一引衛宏古文官書曰。導得二字同體。導與守相似。故誤爲守耳。

夫惟能無以生爲者。則所以脩得生也。

樾謹按脩得生。本作得脩生。得脩生者得長生也。淮南以父諱長。故變長言脩耳。文子九守篇正作得長生。是其證。今作脩得生。則文不成義矣。高注曰。無以生爲者。輕利害之鄉。除情性之欲。則長得生矣。

長得生亦當作得長生後人依旣倒之正文而改之耳。以死生爲一化。以萬物爲一方。

樾謹按文子九守篇作以千生爲一化。當從之。言生之數雖有千而以爲一也。以千生爲一化。以萬物爲一方。兩文相儼。而意亦相準。若作死生。則不類矣。且以死生爲一化。義亦未安。當據文子訂正。此精神之所以能登假於道也。是故真人之所游。

樾謹按是故真人之所游。本作是真人之游也。乃結上之辭。文子九守篇亦有此文。大略相同。結之曰此真人之遊也。乃其明證也。下文曰。若吹响呼吸。吐故納新。熊經鳥伸。鳧浴鶻躍。鷗視虎顧。是養形之人也。不以滑心高注。曰是非真人之道也。若如今本作是故真人之所游。則下文云云。皆爲真人之道矣。其謬殊甚。不可不正。

使神滔蕩而不失其充。

樾謹按充當作元。元者本也。謂不失其本也。文子九守篇作使精神暢達而不失於元。與此不同。雖不必據彼改此。而元字之義。自較充字爲長。高注曰。充實也。是其所據本已誤。

子求行年五十有四。而病僵僂。脊管高於頂。脇下迫頤。兩脾在上。燭營指天。匍匐自闕於井。曰。偉哉造化者。其以我爲此拘拘邪。

樾謹按子求當作子來字之誤也。子來事見莊子大宗師篇。其文曰：子祀子輿子犁子來四人相與友。又曰：俄而子輿有病。子祀往問之曰：偉哉夫造物者將以予爲此拘拘也。曲僂發背上有五管。顧隱於齊肩高於頂。句贅指天。又曰：俄而子來有病。喘喘然將死。淮南所見莊子其子輿有病。子來有病兩文。蓋與今本互易。故以僂僂之病屬之子來也。莊子釋文引崔譏云：淮南作子永抱樸子博喻篇亦云子永歎天倫之偉。顧氏千里以作永爲是。誠知其當爲子來。則求與永並屬形似之誤。求固非而永亦未是也。說互詳莊子。

行快而便於物。本經。

樾謹按快當爲決。周易文言傳鄭注謂古書傳作立心與水相近。決快相亂。正由此矣。說文水部。決。流。也是決有行義。上句曰發動而成於文。發亦動也。此云行決而便於物。決亦行也。

元元至燭而運照。

樾謹按高注曰：元天也。元氣也。分兩字爲兩義。殊不可通。疑正文及注均誤。正文本曰：元光至燭而運照。注文本曰：元天也。光氣也。倣真篇曰：弊其元光而求知之於耳目。此元光二字見於本書者。高彼注曰：元光內明也。一曰：元天也。然則此曰元天也。正與彼注同。疑彼亦有光氣也三字。而今脫之也。

蓄棟穢聚塙畝。

樾謹按高注曰茂草曰菑木聚曰榛積之於疆畝此注殊失其義菑者殺草之名爾雅釋地田一歲曰菑孫炎曰菑始災殺其草木也榛穢連文其義相同漢書楊雄傳注曰榛榛梗穢貌是也菑榛穢聚埒畝皆三字爲句言榛穢之區皆災殺之而集成埒畝也下云芟野莢長苗秀是此四句皆言治田之事菑榛穢故芟野莢聚埒畝故長苗秀也下文曰草木之句萌銜華戴實而死者不可勝數正見殺草之多若從高注則與下文不貫矣

撩櫛棗題雕琢刻鏤喬枝菱阿夫容芰荷

樾謹按高注曰阿曲屋不說菱字之義疑高氏所據本菱字作凌言撩櫛棗題之上雕刻樹木故其喬枝上凌於曲阿也凌字之義易明故不煩訓釋後人因下句言芰荷遂改凌作菱以配之則義不可通矣

故聖人者由近知遠而萬殊爲一古之人同氣於天地與一世而優游

樾謹按古之人三字衍文也四句一氣相屬皆蒙故聖人者爲文若有古之人三字則文義不貫矣此文本云故聖人者由近而知遠以萬殊爲一同句氣蒸於天地與一世而優游今本而字脫去校者誤補於遠字之下遂誤刪以字一同與萬殊本相對爲文今衍古之人三字遂以同字下屬而誤刪蒸字皆非其舊文子下德篇作聖人由近以知遠以萬里爲一同蒸乎天地宜據以訂正彼云由近以知

遠卽由近而知遠也。以萬里爲一同。卽以萬殊爲一同也。彼云炁蒸乎天地。故知此脫蒸字。鬼上文云。氣乃上蒸。卽此蒸字之義也。

故德之所總。道弗能害也。

樾謹按總字無義。乃利字之誤。利古文作𠂇。總俗作惣。其上平相似。因而致誤。周書大匡篇。及其利害。今本利亦誤作總。是其證也。德之所利。道弗能害。利與害義相應。高注曰。總一。也是其所據本已誤矣。九嬰大風。

樾謹按高注曰。大風。風伯也。能壞人屋舍。此下當有一曰鷙鳥四字。而今脫之。文選劉孝標辨命論注引高誘曰。大風鷙鳥。是其證也。下文繳大風於青丘之澤。注曰。羿于青丘之澤繳遮使不爲害也。一曰。以繳繫矢射殺之。繳遮之說以風言也。繳射之說以鳥言也。

堯乃使羿誅鼈齒於疇華之野。殺九嬰於凶水之上。繳大風於青丘之澤。

樾謹按王氏念孫謂疇華之野。野本作澤。青丘之澤。澤本作野。引北堂書鈔太平御覽爲證。然劉孝標辨命論曰。鑿齒奮於華野。華野者疇華之野也。若本作疇華之澤。何不曰華澤而曰華野乎。然則古本自作疇華之野。青丘之澤。類書所引。殆未足據。

燎焚天下之財。

樾謹按天下之財不當言燎焚。燎焚當作燎聚。古人書聚字或作煦。漢書古今人表煦子師古注曰煦聚字也。俗書焚字作焚。兩形相似而誤。聚誤爲焚。自然改燎爲燎矣。廣詁釋詁。燎取也。聚與取古字通。周易萃彖傳。聚以正也。釋文曰。聚苟作取。漢書五行志。內取茲爲禽。師古曰。取讀如禮記聚麀之聚。並其證也。燎聚卽燎取。謂燎取天下之財也。

地愛其平。

樾謹按詩黍苗篇。原隰旣平。毛傳曰。土治曰平。此平字之義也。高注曰。平正也。未得其旨。

抑減怒瀨以揚激波。

樾謹按高注曰。減怒水也。減旣爲怒水。何以又云怒瀨乎。高說非也。減者逆也。言抑而逆之。以揚其波也。莊子天下篇。其風竈然。郭注曰。逆風所動之聲。水逆謂之減。猶顧逆謂之竈。

樂斯動。動斯蹈。蹈斯蕩蕩斯歌。歌斯舞。歌舞節則禽獸跳矣。

樾謹按歌舞節則禽獸跳矣。本作舞則禽獸跳矣。與下文動則手足不靜。發怒則有所釋憾矣。文義一律。律歌字節字皆衍文也。下文曰。故鐘鼓管簫干鍼羽旄。所以飾喜也。是此時所謂舞者。尙未有干鍼羽旄之飾。不過手之舞之足之蹈之而已。其去禽獸跳踉無幾也。今衍歌字節字義不可通。王氏念孫謂當作歌舞無節。不知節與不節。尙非所論於此也。

言爲文章行爲儀表於天下主術

樾謹按於天下三字衍文也涉高注曰爲天下人所法則也故誤衍此三字

昔孫叔敖恬臥而郢人無所害其鋒

樾謹按害字無義王氏念孫謂是用字之誤然用與害字形不似無緣致誤也害蓋容字之誤容亦用也釋名釋姿容曰容用也合事宜之用也是其義也無所容其鋒卽無所用其鋒老子曰兵無所容其刃此淮南所本也

木擊折轉水戾破舟不怨木石而罪巧拙者

樾謹按水戾破舟當作石戾破舟故云不怨木石今作水戾則下句石字無著矣巧字疑功字之誤功與工通周官肆師職凡師不功故書功爲工是也不罪木石而罪工拙工卽工人之工言不罪木石而罪作舟車者之拙也高注曰罪御者刺舟者之巧拙也是其所據本已誤

任輕者易權

樾謹按文子下德篇作任輕易勸也勸字之義視權字爲長言任輕則易舉故人皆相勸而爲之也高注曰權謀也其所據本已誤

夫乘衆人之智則無不任也用衆人之力則無不勝也

樾謹按無不任也。富作無不聖也。上文曰。文王智而好問。故聖。武王勇而好問。故勝。此卽承上文而言。說文耳部。聖通也。無不聖。卽無不通也。後人不達聖字之義。疑無不聖也。於文難通。故臆改爲任字。不知任卽勝也。勇當言勝。智當言聖。若亦言任。則與勝義複。而無以爲智勇之別矣。

是以勇者盡於軍。

樾謹按此下當有智者云云。而今闕之。下文云。爲智者務於巧詐。爲勇者務於鬪爭。亦以智勇並舉。是其證也。

不隨南畝。

樾謹按脩務篇隨山栢木注曰。隨循也。不隨南畝者。不循南畝也。王氏念孫以隨爲脩字之誤。非大羹不和。

樾謹按高注曰。不致五味。疑本作大羹不致。故高注云然。桓二年左傳曰。大羹不致。杜注亦曰。不致五味。卽本諸此。

舉天下而以爲社稷。非有利焉。

樾謹按此本作以爲社稷。非有利焉。言皆以爲社稷。而非自以爲利也。涉下文舉天下而傳之舜句衍此四字當刪。

縣法者法不法也。設賞者賞當賞也。

樾謹按設賞者賞當賞也七字疑衍文下文法定之後中程者賞缺繩者誅卽承縣法者法不法也而言文子上義篇正作縣法者法不法也法定之後中繩者賞缺繩者誅可據以訂正王氏念孫謂上句當作縣罰者罰不法也與下句對若然何不竟改爲罰當罰與下句不尤對乎

夫寸生於標標生於日日生於形形生於景此度之本也

樾謹按王氏引之以標爲標字之誤標與秒同其說是也惟標生於日義不可通疑本作寸生於標標生於形形生於景景生於日與下文樂生於音音生於律律生於風文義一律言度之本生於日聲之宗生於風也傳寫錯亂其文耳

景桓公臣管晏位尊也

樾謹按此本作桓景臣管晏言桓臣管景臣晏也因傳寫誤作桓公後人遂加景字於桓字之上先景後桓與管晏不相當而景桓公臣管晏與上文衛君役子路句法又參差不一律足知其非矣故握劍鋒以離北宮子司馬蒯蕡不使應敵操其觚招其末則庸人能以制勝

樾謹按王氏念孫謂離是雖字之誤使上應有可字皆是也疑握劍鋒以之下有脫文則尙未盡得此當於鋒字絕句操其觚招其末之下更無它文則握劍鋒下亦不必更有何字矣以字本在雖字之下

其文曰。故握劍鋒雖以北宮子司馬蒯蕡不可使應敵。因雖字誤作離。遂移以字於上。使成句耳。

中田之獲卒歲之收。

樾謹按既言之獲。又言之收。重複無謂。疑本作中田卒歲之收。無之獲二字。故文子上仁篇作中田之收。蓋省卒歲二字耳。若使本作中田之獲。卒歲之收。而文子省其一句。則何不曰中田之獲。而必變獲言收乎。

處靜持中。

樾謹按文子微明篇作處靜以持躁。當從之。靜躁對文。與上文得要以應衆。執約以治廣。文義一律。凡此六反者。不可不察也。

樾謹按高注曰。六反謂孔墨萇宏孟賁吳起張儀也。其行相反。故曰六反。此注大謬。上文雖有此六人。然非舉以相較。萇宏孟賁不過謂孔子之智勇過此二人耳。初非言其相反也。六反者。卽上文所謂心欲小而志欲大。智欲員而行欲方。能欲多而事欲鮮也。小與大反。員與方反。多與鮮反。是謂六反。衆愚人之所見者寡。事可權者多。愚之所權者少。此愚者之所多患。

樾謹按此有脫誤。當云物之可備者衆。愚人之所備者寡。事之可權者多。愚人之所權者少。此愚者之所以多患也。下文曰。物之可備者智者盡備之。可權者盡權之。此智者所以寡患也。與此文反覆相明。

是其證也。衆上脫物之可備者五字。王氏念孫遂欲以衆字屬上句讀。然上文云。物之若耕織者。始初甚勞。終必利也。其文義已足。必綴衆字於句末。轉爲不詞矣。

治國上使不得與焉。

樾謹按高注曰。使不得與亡傷之危。是上術也。此蓋屬上文讀之。然文義迂迴。不可從也。此當屬下文。讀之下文曰。孝於父母。弟於兄嫂。信於朋友。不得上令而可得爲也。釋己之所得爲。而責于其所不得。制悖矣。是不得可得兩文。反覆相明。疑治國下脫非字。本云。治國非上。使不得與焉。蓋上文言國無義。雖大必亡。人無善志。雖勇必傷。此言國之有義無義。乃治國之事。治國之事。非上使。我爲之。我不得與焉。若人之有善無善。則在我而已。故曰。不得上令而可得爲也。上令即上使也。不得上令而可得爲。正與非上使不得與相對。高所據本已脫非字。故失其解矣。

故上世體道而不德。中世守德而弗壞也。末世繩繩乎。惟恐失仁義。

樾謹按文子微明篇。作中世守德而不懷。此文壞字亦懷字之誤。懷即懷來之懷。言中世守德。未知仁義之爲美。猶無意乎懷來之也。字誤作壞。失其旨矣。

凡行戴情。雖過無怨。不戴其情。雖忠來惡。

樾謹按高注曰。戴心所感也。此未得戴字之義。戴當讀爲載。釋名釋委容曰。戴載也。載之於頭也。是戴

載聲近義通。下文曰：其載情一也。施人則異矣。可證此文戴之當爲載矣。下文又曰：義載乎宜之。謂君子亦與此載字同。

蓋力優而克不能及也。

樾謹按高注曰：克猶能也。則是克不能及爲能不能及矣。於義難通。王氏念孫以能爲衍字。然力優而克不及。義亦未安。今按此文蓋有錯誤。此注亦後人竄入。非高氏原文也。克當作惠。及當作及。皆以形似而誤。惠者惠之古文。與德字通。及者服之本字也。古書服字每作及。而傳寫多誤爲及。尙書呂刑篇。何度非及。大戴記王言篇。及其明德也。及並及字之誤。說詳羣經平議。此文本云：蓋力優而惠不能及也。高注於上文注曰：力能殺虎而德不能服之。本當注於此句之下。德不能服四字。卽本正文。因惠誤作克。及誤作及。遂移注於上文。又竄入克猶能也四字爲此句之注。而文義俱晦矣。

喜憎議而治亂分矣。

樾謹按高注曰：下有喜議而國治。有憎議而國亂也。此未得議字之旨。議當讀爲儀。周易繫辭傳議之而後言。釋文曰：議陸姚桓元荀柔之本作儀。國語鄭語伯翳能議百物。漢書地理志議作儀。是議儀古通用。廣雅釋詁：儀見也。喜憎儀謂喜憎見也。淑真篇是非無所形。高注曰：形見也。儀與形同。故廣雅形與儀並訓。見齊俗篇曰：是非形則百姓眩矣。此云喜憎儀而治亂分矣。句法一律。乃諸書多以形爲見。

少以儀爲見而此又假議爲之其義益晦宜表出之以存古訓也

故戎兵以大知小人以小知大

樾謹按戎兵以器言猶曰器以大知小人以小知大耳兵器有大小如考工記所載弓劍劍首有上制中制下制是也知上制如干則等而下之皆可知矣故曰戎兵以大知小高氏以湯武說上句堯舜說下句殊非其旨

羊羹不斟而宋國危

樾謹按方言曰斟益也凡相益而又少謂之不斟然則羊羹不斟謂羹少也上句魯酒薄而郿鄆圍酒薄羹少其事正相類宣二年左傳其御羊斟不與羊斟目是人名此云羊羹不斟自謂羹少必并爲一談則皆失之矣

夜行暝目而前其手事有所至而明有不害

樾謹按至當作宜害當作容皆字之誤也容用也說見主術篇容與庸通莊子胠篋篇容成氏六韜大明篇作庸成氏庸爲用故容亦爲用也夜行者不用目而用手是事之宜也故曰事有所宜而明有不容也說林篇曰夜行者掩目而前其手涉水者解其馬載之舟事有所宜而有所不施可證此文至字之誤不施亦即不用也

雍門子以哭見孟嘗君。涕流沾纓。

樾謹按孟嘗君下當更有孟嘗君三字。而今脫之。覽冥篇曰。昔雍門子以哭見於孟嘗君。已而陳辭通意。撫心發聲。孟嘗君爲之增歎歎咷。流涕狼戾不可止。彼文再言孟嘗君。故知此亦當同。不然則涕流沾纓。仍屬雍門子而不屬孟嘗君。不見其感人之至矣。

其衣致緩而無文。其兵戈銖而無刃。齊俗、

樾謹按文子道原篇作其衣緩而無文。其兵鈍而無刃。故王氏念孫謂致與戈皆衍文。其說是也。高解銖字曰。楚人謂刃頓爲銖。是銖與無刃一意也。緩與無文。則非一意矣。疑緩當爲緩。緩者縵之假字也。說文系部。縵。縵無文。國語晉語曰。乘縵不舉。韋注曰。縵。車無文也。是凡無文者皆謂之縵。故曰其衣縵而無文。正與其兵銖而無刃同義。縵與緩古音相同。得以通用。廣雅釋詁慢謾並訓緩。故緩亦通作縵也。後人不知緩爲縵之假字。因其言衣輒改作緩似是而實非矣。

山處者木。

樾謹按木乃采之壞字。謂采樵也。山處者采。與上句水處者漁。下句谷處者牧。陸處者農。一律漁也。采也。牧也。農也。皆言其事也。若作山處者木。則上句當云水處者魚矣。文子自然篇作林處者採。可據以訂正。說林篇漁者走淵。木者走山。木亦當爲采。

涕之出於目。

穀謹按莊氏達吉曰。太平御覽引此目作鼻。疑是此說非也。周易萃上六。齎咨涕洟。釋文引鄭注曰。自目曰涕。白鼻曰洟。然則涕出乎目。非出乎鼻。不得據御覽之誤字。以改淮南之不誤者也。

雖之夷狄徒倮之國。

穀謹按廣雅釋詁。徒。袒也。徒倮猶袒倮。徒與袒一聲之轉。呂氏春秋異用篇。非徒網鳥也。高注曰。徒猶但也。袒與但同。

絹以綺繡。

穀謹按絹當爲羃。漢書司馬相如傳。羃要裏。師古注曰。羃謂羅繫之也。文選上林賦李善注引聲類曰。絹係取也。羃以綺繡。謂以綺繡繫之作絹者。省不從网耳。太平御覽皇王部引作飾以綺繡。殆由不得其義而臆改也。

故天之圓也。不得規。地之方也。不得矩。

穀謹按兩得字皆當爲中。周官師氏掌國中失之事故。書中爲得。是其例也。文子自然篇正作天圓不中規。地方不中矩。

趺衽宮璧。

樾謹按跌衽宮壁於文未明高注曰跌衽至平公衣衽中宮壁疑本作跌衽中壁跌猶越也言越過平公之衽而中於壁也今作宮壁卽涉注而誤。

常欲在於虛則有不能爲虛矣若夫不爲虛而自虛者此所慕而不能致也。

樾謹按此言欲爲虛則不能爲虛若夫不爲虛而自虛則又慕之而不能致也蓋性之自然非可勉強故慕之而不能致文子道德篇作此所欲而無不致也於義不可通王氏念孫反據以訂正淮南殊爲失之。

秦王之時或人薦子利不足也

樾謹按或人卽國人也說文戈部或邦也匚部國邦也或國古通用

諸子平議卷三十一

淮南內篇三

可以窈可以明道應

樾謹按窈讀爲幽故與明相對禮記玉藻篇再命赤軺幽衡鄭注曰幽讀爲黝窈之通作黝也

若以石投水中何如

樾謹按中字衍文列子說符篇呂氏春秋精諭篇並作若以石投水

惠子爲惠王爲國法已成而示諸先生先生皆善之

樾謹按先生乃長老有德者之稱惠子爲國法而示諸先生乃就正有道之意呂氏春秋淫辭篇先生皆作民人舊校云一作良人此當以良人爲是序意篇良人請問十二紀高注曰良人君子也然則諸良人卽諸先生也若是民人則惠子豈能一一示之且使民人皆以爲善則其可行也必矣下文翟煎何以云善而不可行乎王氏念孫反以民人爲是而欲改淮南以從之誤矣

飄風暴雨日中不須臾

樾謹按飄風暴雨下脫不終朝三字老子曰飄風不終朝驟雨不終日是其義也日中不須臾乃日中則仄之義今脫不終朝三字則若飄風暴雨亦不須臾者失其義矣列子說符篇正作飄風暴雨不終朝日中不須臾可據以訂正呂氏春秋慎大篇亦脫不終朝三字異哉歌者非常人也

樾謹按呂氏春秋舉難篇歌者上有之字當從之之猶是也之歌者即是歌者也無之字則文不備新序襍事篇作此歌者此亦猶是也

寡人得立宗廟社稷

樾謹按立字無義疑主字之誤

輪扁曰其人在焉

樾謹按焉猶乎也儀禮喪服傳曰野人曰父母何算焉禮記檀弓篇曰子何觀焉論語子路篇曰又何加焉皆是也詳見王氏經傳釋詞其人在焉猶曰其人在乎故桓公告之曰已死矣莊子天道篇作聖人在乎與此文異而義同

夫國家之安危百姓之治亂在君行賞罰

樾謹按君字衍文涉下文君自行之而衍此但言行賞罰下乃分別言之曰夫爵賞賜予民之所好也

君自行之殺戮刑罰民之所怨也臣請當之若此文有君字則下文不可通矣

王壽負書而行見徐馮於周

樾謹按韓非子喻老篇周下有塗字是也行而見之則必在道塗之間故曰見徐馮於周塗周塗猶周道也

爭者人之所本也

樾謹按本字無義乃去字之誤下文始人之所本逆之至也說苑指武篇作殆人所棄逆之至也彼作棄此作去文異而義同惟始字亦不可通說苑作殆尤爲無義始乃治字之誤吳起欲砥礪甲兵故屈子以爲治人所去言取人之所去者而治之也文子下德篇作治人之亂逆之至也治字不誤可據以訂正

差須夫子也

樾謹按此本作嗟句須夫子也嗟乃歎辭說苑指武篇作嘻且待夫子也是其證也嗟字闕壞高注遂以差須連讀而釋之曰猶意須也失之甚矣

周伯昌行仁義而善謀

樾謹按行字衍文也下云太子發勇敢而善謀中子旦恭儉而知時若此句有行字則與下兩句不一

律矣。蓋涉上文與之競行而衍。

元玉百工大貝百朋。

樾謹按高注曰。三玉爲一工也。五貝爲一朋也。然三玉爲一工。它無所見。疑本作元玉百珏。注本作二玉爲一珏也。說文珏部。二玉相合爲一珏。是也。莊十八年左傳。賜玉五縠。僖三十年傳。納玉於王。與晉侯皆十縠。襄十八年傳。獻子以朱絲係玉二縠。國語魯語。行玉二十縠。穆天子傳。於是載玉萬縠。杜預韋昭郭璞注並以雙玉說之。縠卽珏之或體。是古人用玉率以珏計。未聞其以工計也。蓋珏字闕壞而爲工。後人因改爲工。又改高注二玉爲三玉。以別異於珏耳。至朋之訓。五貝本詩菁菁者莪篇鄭箋。然正義曰。五貝者。漢書食貨志以爲大貝壯貝。幺貝小貝不成貝爲五也。言爲朋者。爲小貝以上四種。各二貝爲一朋。而不成者不成朋。鄭因經廣解之。言有五種之貝。貝中以相與爲朋。非總五貝爲一朋也。然則高氏泥鄭箋五貝之說。以注此文。殊非矯詰。古者實以二貝爲一朋。周易損六五十朋之龜。李鼎祚集解引崔憬曰。雙貝曰朋。得之矣。詩七月篇朋酒斯饗。毛傳曰。兩樽曰朋。貝以兩爲朋。猶樽以兩爲朋也。此云元玉百珏。大貝百朋。珏也朋也。皆以兩計。元玉百珏者。玉二百也。大貝百朋者。貝二百也。其數正相當矣。

是以犯敵能威。

樾謹按威乃威字之誤。威讀爲滅。言能滅之也。呂氏春秋悔過篇正作滅。又按呂氏春秋此句下有去之能速四字。高注曰。故進能滅敵。去之能速也。此文無此四字。則於文爲不備。疑寫者脫去之。

盧敖仰而視之。弗見。乃止駕。止杼治。悖若有喪也。

樾謹按王氏念孫謂止杼治之止。乃心字之誤。是也。杼治之義。高注曰。楚人謂恨不得爲杼治也。其實杼治卽不怡也。不怡二字。本於虞書。古人習用之。國語晉語曰。主色不怡。太史公報任少卿書曰。聽朝不怡。此言心不怡。非必楚語。因聲誤而爲杼治。其義始晦矣。論衡道虛篇作乃止喜。句心不怠。卽乃止駕。心不怡也。喜者嘉字之誤。駕之假字也。怠者怡之假字也。

嘗有如此而得活者乎。

樾謹按嘗下脫見字。下文對曰。未嘗見也。嘗見字與此相應。呂氏春秋知分篇作子嘗見有兩蛟繞船能兩活者乎。正有見字能兩活當作而能活。說見呂氏春秋。

棄劍而已。

樾謹按已乃人己之己。己上當有全字。呂氏秋春正作棄劍而全己。

孔子聞之曰。夫善載腐肉朽骨棄劍者。飲非之謂乎。

樾謹按載當作哉。聲之誤也。哉下脫不以二字。呂氏春秋正作夫善哉。不以腐肉朽骨而棄劍者。其次

非之謂乎。

故大人之行不掩以繩。

樾謹按掩字無義。高注曰：掩猶揮也。義亦未詳。掩乃扶字之誤。管子宙合篇曰：千里之路，不可扶以繩。是其證也。下文此所謂箒子梟飛而維繩者。王氏念孫引陳觀樓說。謂當作此箒子。所謂鳥飛而準繩者。按鳥飛準繩。本管子宙合篇。其曰：千里之路，不可扶以繩。萬家之都不可平以準。卽說鳥飛準繩之義也。然則此云大人之行不扶以繩。亦本管子掩字之誤無疑矣。宙合篇又曰：夫繩扶撥以爲正。卽此扶字之義。因扶字闕壞。止存扶形。淺人遂以意補成掩字耳。

道全爲無用之事。煩擾之教。

樾謹按全乃令字之誤。令猶使也。道與導同。謂導使爲無用之事。煩擾之教也。

於是乃去其朞而載之木。

樾謹按高注曰：朞被髮也。木鷺鳥冠也。知天文者冠鷺。王氏引之以木爲朞字之誤。朞卽鷺字也。引匡謬正俗鷺字音聿。亦有術音。蔡氏獨斷謂爲術氏冠爲證。其說洵確不可易矣。惟未說朞字之義。朞當爲鍪。鍪者兜鍪也。說文兜部。兜兜鍪首鎧也。從省言之。則止曰鍪。氾論篇古者有鍪而縗領。高注曰：鍪頭著兜鍪帽是也。去其鍪而載之朞。謂去其首鎧而戴之鷺鳥之冠。正與解其劍而帶之笏文義一律。

作瞽者段字耳。高注以被髮說之。夫被髮豈可言去足知其非矣。

夏后氏祭於闔。殷人祭於陽。周人祭於日出以朝。

樾謹按高注首句曰：於室中中夜祭之也。二句曰：於堂上日平旦祭也。三句曰：於日出時祭於庭中。朝者庭也。所說皆未得其義。此文本禮記祭義篇。其文曰：郊之祭大報天而主日。配以月。夏后氏祭其闔。殷人祭其陽。周人祭日以朝及闔。鄭注曰：闔，昏時也。陽讀爲曰雨曰暘之暘，謂日中時也。朝，日出時也。夏后氏大事以昏。殷人大事以日中。周人大事以日出。亦謂此郊祭也。以朝及闔，謂終日有事。正義曰：此郊之祭一經止明郊祭之禮。郊之祭者，謂夏正郊天。然則此文所說本屬郊祭。郊祭必爲壇，初非廟祭。有何室中堂上庭中之分乎？祭於闔者，於中夜時祭也。祭於陽者，於日中時祭也。祭於日出，即是祭以朝。朝者日出也。因周人尚文，郊祭終日有事，日出而祭，及闔而畢，故曰以朝及闔。淮南引此文不連及闔二字者，意在明三代之祭不同。若言闔則疑與夏同，且周人初非有取於闔，直以禮繁不得不及闔耳。檀弓篇止言大事以日出，其無取於闔明矣。故淮南省此二字也。高氏誤以朝爲庭中，遂并上文亦以室中堂上言之，與祭義不合，不可從也。

有奉持於文王洞洞屬屬而將不能恐失之。

樾謹按而將不能恐失之，義不可通。高注曰：而將不能勝之，恐失之慎之至也。疑本文作而將不能勝

之而與如古通用。謂如將不能勝之也。恐失之三字。高氏自解如不能勝之義。此三字誤入正文。而轉脫去勝之二字。於是文不成義矣。

古者人醕工龐商樸女重。

樾謹按重本作童。大戴記王言篇。民敦工璞商慤女憧。卽淮南所本也。童與憧通。今作重者。形聲相似。而誤。

和者陰陽調。日夜分而生物。春分而生。秋分而成。

樾謹按下言春分而生。上言日夜分而生物。文義重複。且春分秋分。皆日夜分也。日夜分而生物。於秋分而成。義亦不合。文子上仁篇作和者陰陽調。日夜分。故萬物春分而生。秋分而成。然則此亦當同上。而生二字。乃故萬之誤。

國之所以存者道德也。

樾謹按德當爲得字之誤也。文子上仁篇正作得。國之所以存者道得也。與下句家之所以亡者理塞也。正同一律。高注曰。理道也。然則道理一也。得則存。塞則亡矣。高注此句曰。道德施行。民悅其化。故國存也。蓋以道德本屬恆言。故加德字以足句。非正文本作道德也。下文曰。存在得道。而不在於大也。亡在失道。而不在於小也。正與此文相應。疑此塞字亦卽失字之誤。故高氏無注矣。

湯武救罪之不給何謀之敢當

樾謹按當字無義羣書治要作慮然謀卽慮也何謀之敢慮義亦難通當疑蓄字之誤言救罪且不給不暇更蓄他謀也

昔楚恭王戰於陰陵潘延養由基黃衰微公孫丙相與篡之

樾謹按高解相與篡之句曰四子楚大夫篡晉取恭王夫上文並無恭王見禽於晉之事卽云相與篡之於文不備據戰於陰陵下有高注曰恭王與晉厲戰於陰陵呂錡射恭王中目因而禽之疑此二十字是正文本在昔楚二字之下因此二十字誤作注文後人遂於昔楚下補恭王戰於陰陵六字耳

玉工眩玉之似碧盧者

樾謹按上云劙工惑劙之似莫邪者莫邪是良劙之名則碧盧亦必是美玉之名地形篇碧樹瑤樹在其北高注曰碧青玉也是其義也下文云閭主亂於姦臣小人之疑君子者然則莫邪碧盧是喻君子非喻小人高注曰碧盧或云碱砾失之

薛燭庸子見若狐甲於劙而利鈍識矣

樾謹按狐甲之義不可曉狐疑爪字之誤荀子大略篇爭利如蚤甲而喪其掌楊注曰蚤與爪同此爪甲連文之證若爪甲者言其小也言燭庸子之於劙止見若爪甲者而已識其利鈍矣下文曰曳兒易

牙淄澑之水合者嘗一哈水而甘苦知矣。一哈言其少也。與此文正一律。

故達道之人不苟得不讓福。

樾謹按讓當爲攘。詮言篇不能使福必來。信已之不攘也。高注曰：攘，卻也。此云不攘福。義與彼同。不貪無用則不以欲用害性。詮言。

樾謹按下用字衍文。文子符言篇作不貪無用。卽不以欲害性是其證。

故治未固於不亂而事爲治者必危。行未固於無非而急求名者必剄。

樾謹按襄二十七年公羊傳我卽死女能固納公乎。秦策王固不能行也。何休高誘注並曰：固必也。治未固於不亂。行未固於無非。言爲治未必不亂。爲行未必無非也。下文曰：爲義之不能相固。威之不能相必也。是可知固必同義。高此注以尙未牢固說之。其義轉迂。

故常無禍不常有福。常無罪不常有功。

樾謹按常與尙通。史記衛綱傳劖尙盛。漢書尙作常。漢書賈誼傳尙憚以危爲安。賈子宗首篇尙作常。並其證。

其智也。告之者至然後覺其動也。使之者至然後覺其爲也。

樾謹按使之者至上。當有其能也。三字上文云：有智而無爲。與無智者同道。有能而無事。與無能者同

德下文云有智若無智有能若無能皆以智能對舉故知此亦當然

然而守重寶者必關戶而全封

樾謹按全字無義乃璽字之誤國語魯語迫而予之璽書草注曰璽封書也此璽封二字之證時則篇曰固封璽封璽與璽封同五音集韻曰璽俗作全與全字形相似故誤爲全矣汜論篇盜管金高注曰金印封所以爲信金亦璽字之誤說見王氏讀書櫟志彼璽誤爲金此璽誤爲全其誤正同雖有聖賢之寶不遇暴亂之世可以全身而未可以霸王也

樾謹按寶字無義疑當作資荀子性惡篇離其資楊注曰資材也謂雖有聖賢之材也質與寶形似而誤

一身之身既數變矣

樾謹按上身字當作人汜論篇曰故一人之身而三變者所以應時矣文義與此同

此四者耳目鼻口不知所取去心爲之制各得其所

樾謹按鼻字衍文也上文云目好色耳好聲口好味接而說之不知利害嗜慾也食之不甯於體聽之不合於道視之不便於性三關交爭以義爲制者心也然則此承上文而言亦當止言耳目口不當兼言鼻今衍鼻字者蓋後人據文子符言篇增入不知彼文上言目好色耳好聲鼻好香口好味故下言

耳目鼻口此文上言目好色耳好聲口好味故下止言耳目口兩文不同未可據彼以增此也聖人內藏不爲物先倡

樾謹按先字衍文先卽倡也言倡不必言先文子上德篇正作不爲物唱無先字智遽於事

樾謹按遽讀爲劇說文力部勞劇也然則劇亦勞也劇於事謂勞於事也遽劇古通用公羊宣六年傳釋文曰劇本作遽

不能爲御者不可以爲僕無害於爲佐

樾謹按高注曰佐君位也則正文及注佐字均當作左禮記曲禮篇正義曰車行則有三人君在左僕人中央勇士在右是左爲君位也今加人旁作佐則失其旨矣

行成獸止成文

樾謹按成獸之文殊不成義高注曲爲之說非也獸疑獻字之誤隸書獸或作獸有桐柏廟碑形與獻似故獻或誤爲獸周官庖人職賓客之禽獻注曰獻古文爲獸杜子春云當爲獻是其例也論語八佾篇文獻不足故也文獻對文自有所本行成獻止成文者獻賢也言行則成賢善止則成文采也字誤作獸則不可通矣

其作始簡者。其終本必調。

樾謹按王氏念孫以本爲卒字之誤。其說是矣。惟調之言和也合也。與簡字之義殊不相應。調當作綢。玉篇多部綢。丁么切。多也。大也。其作始簡者。其終卒必綢。言始於少而終於多也。莊子人閒世篇曰。其作始也簡。其將畢也必巨。巨者大也。大與多義相近。故玉篇綢訓多亦訓大。且其字亦或從大作竚也。故神制則形從。形勝則神窮。

樾謹按文子符言篇作故神制形則從。形勝神則窮。當從之。此申明上文神貴於形之義。言可使神制形。不可使形勝神也。觀高注則其所據本已誤。

故不得不中絕。兵略

樾謹按此當作故人得不中絕。言聖人勃然而起。夷險除穢。故人類不至於中絕也。今作不得不中絕。於義難通。文子上義篇亦然。則其誤久矣。

夫畜池魚者必去鴟鴞。養禽獸者必去豺狼。

樾謹按主術篇。夫華騮綠耳。一日而至千里。然其使之搏兔。不如豺狼。太平御覽獸部引作狼契。王氏引之曰。狼契皆犬名也。廣雅曰。狼狽狂狽。犬屬也。玉篇猰公八切。猰犬也。猰與契通。犬能搏兔而馬不能。故曰不如狼契。說見讀書錄志。今以其說推之。此文豺狼亦當作狼契。蓋鴟鴞能食魚。狼契能搏獸。

故偏獺不可與池魚並畜而狼契不可與禽獸同養若豺狼本非人之所養又何待言去乎此於義不可通且獺與契爲韻若作豺狼則於韻亦不可協矣蓋由後人習聞豺狼罕聞狼契故率意更改皆非其舊

此天之所以誅也此民之所以仇也

樾謹按兩以字皆衍文呂氏春秋懷寵篇作若此者天之所誅也人之所讎也無兩以字文子上義篇同

有逆天之道帥民之賊者

樾謹按帥字義不可通呂氏春秋作衛是也當由衛誤作衛因改爲帥耳

是故至於伏尸流血相支以日

樾謹按相支以日甚爲無義文子上義篇作相交於前當從之交與支形似而誤交誤爲支因改於前爲以日使成文義耳

凡物有朕唯道無朕

樾謹按高注曰言萬物可朕也而道不可朕也則正文及注文朕字皆勝字之誤故以可不可言若是朕字則但當言有無不當言可不可也文子自然篇作夫物有勝唯道無勝當據以訂正

察行陳解贖之數。

樾謹按解贖當爲解續。解之言解散也。續之言連續也。解續猶言分合。下文曰出入解續是其證。博則能禽缺。

樾謹按博與缺義不相應。與上文靜則能應躁。後則能應先。數則能勝疏。不一律矣。博當作搏。字之誤也。說文手部。搏。圓也。故與缺相對爲文。太元中次六曰。月闕其搏。月之有闕有搏。卽此文搏缺對文之證。

是故處於堂上之陰。而知日月之次序。見瓶中大冰。而知天下之寒暑。

樾謹按於字衍文也。處堂上之陰者。謂察堂上之陰也。兵略篇曰。相地形處次舍。是處與相同義。主術篇曰。援白黑而示之。則不處焉。不處猶不察也。蓋物居其所謂之處。使物各得其所。亦謂之處。國語魯語曰。夫仁者講功。而知者處物是也。故處卽有辨別之義。後人不達。而妄加於字。處於堂上之陰。於義殊不可通。且處堂上之陰。本與見瓶中之冰相對。今增於字。則句法亦參差不齊矣。

典凝如冬。

樾謹按高注曰。典常凝正也。此未得典字之義。典讀爲頤典之典。考工記。軻人是故軻欲頤典。鄭注曰。頤典堅刃貌。然則典凝猶堅凝也。與上句漱滌如秋一律。若訓典爲常。則失其義矣。

故將必與卒同甘苦俟饑寒。

樾謹按俟字義不可通乃併字之誤併與并通廣雅釋詁并同也併饑寒與同甘苦一律。

魄曰言者獨何爲者吾將反吾宗矣說山。

樾謹按吾將反吾宗矣上當有魂曰二字此乃魂之言也吾將反吾宗者魂欲反其宗也故下文曰魄反顧魂忽然不見惟反其宗所以不見也高解反吾宗曰魂將反于無形則其所據本正有魂曰二字不然何知其是魂而非魄乎。

鸚鵡能言而不可使長。

樾謹按藝文類聚鳥部太平御覽羽族部引此並作不可使長言當從之高注曰長主也又曰不知所以長言下注又曰不能自爲長主之言則未得長字之義長主也則長猶典也不可使長言猶曰不可使典言謂不可使典主教令也。

獸不可以虛氣召也。

樾謹按氣當作器莊子人閒世篇氣息茀然釋文曰向本作憩器云器氣也是器氣聲近義通大戴記文王官人篇其氣寬以柔逸周書官人篇氣作器此古書以器爲氣之證獸不可以虛器召猶上句云魚不可以無餌釣也文子上德篇正作獸不可以空器召。

保者不敢畜噬狗。

樾謹按高注曰保城郭居也然以居城郭者謂之保者義殊未安此保字乃阿保之保禮記內則篇其次爲保母是也保者不敢畜噬狗恐其驚孺子也上句云亡者不敢夜揭炬亡者保者皆以事言非以地言

小馬非大馬之類也小知非大知之類也

樾謹按上非字衍文也本作小馬大馬之類也小知非大知之類也言馬則小大同類知則大小迥殊正以馬之類明知之不類也孟子告子篇然則犬之性猶牛之性牛之性猶人之性與亦以物之同見人之不同與此語意相近呂氏春秋別類篇曰小方大方之類也小馬大馬之類也小智非大智之類也卽淮南所本後人不達其旨誤謂兩句一律於上句亦增非字失之矣然觀高注曰小馬不可以進道致千里故不得與大馬同類小知不可以治世長民故不得與大知同類則其所據本已衍非字

見卯而求晨夜

樾謹按晨當作辰淺人誤謂與夜對文故加日作晨不知非其義也辰者時也詩東方未明篇不能辰夜毛傳曰辰時也正義曰不能時節此夜之漏刻然則辰夜卽時夜也莊子齊物論篇正作見卯而求時夜蓋皆本於毛詩淮南用其文莊子用其義耳

見一葉落而知歲之將莫。睹瓶中之冰而知天下之寒。

樾謹按寒下當有暑字。兵略篇曰：是故處堂上之陰而知日月之次序。見瓶中之冰而知天下之寒暑。彼以暑與序爲韻。此以暑與莫爲韻。今刪暑字。則失其韻矣。上文曰：嘗一鬱肉知一鑊之味。縣羽與炭而知燥溼之氣。味氣爲韻。則此文亦必有韻可知。當據兵略篇補。

孫叔敖制冠浣衣。

樾謹按制疑刷字之誤。爾雅釋詁：刷，清也。故與浣衣對文。

祭之日而言狗生。

樾謹按生當作胜。說文肉部：胜，犬膏臭也。狗胜猶言狗臭。

爲醫之不能自治其病。病而不就藥則勃矣。

樾謹按藥當讀爲癢。說文广部：癢，治也。或作療。古每以藥爲之。詩板篇：不可救藥。韓詩外傳：不可救療。毛用假字。韓用正字也。病而不就藥謂不就其療治。申鑒俗嫌篇曰：藥者療也。

諸子平議卷三十二

淮南內篇四

曹氏之裂布說林

樾謹按高注曰楚人名布爲曹今俗間以始織布繫著其旁謂之曹布然則高氏所據本疑無氏字若有氏字則曹是人之氏族何得以布言之乎今有氏字者蓋涉下文夏后氏之璜而衍非高本之舊也惟高注義亦未安若從前一說則曹卽布之異名言曹不必更言布若從後一說則當以曹布連文不當曰曹之裂布也曹疑當讀爲襍廣雅釋器曰襍襍也玉篇巾部曰襍藉也襍卽襍之異文又衣部曰襍小兒衣也然則襍者疑是小兒承藉茵屨之布故亦謂之襍襍猶席也漢書宣帝紀注引李奇曰緣小兒大藉也卽其類也襍之裂布者說文衣部裂縉餘也字通作烈爾雅釋詁烈餘也裂布卽餘布言承藉小兒其四邊所有之餘布也是其爲物至賤然而竦者貴之正上文時有所合之意

鳥飛反鄉兔走歸窟狐死首丘將翔水各哀其所生

樾謹按文子上德篇作各依其所生也哀與依古聲同此作哀者卽依之假字耳高注曰哀猶愛也非是

大匠不斲.大豆不具.大勇不鬪.

樾謹按大匠大勇皆以人言而大豆獨以器言且大豆不具義亦難通殆非也淮南原文本作大庖不豆呂氏春秋貴公篇曰大匠不斲大庖不豆大勇不鬪卽淮南所本高氏彼注曰但調和五味使神人享之而已不復自列簠簋籩豆也疑高氏此注亦與彼同今但存豆簠簋籩豆之器七字蓋後人刪改之以合於既誤之正文非其舊也又按豆者剗之段字廣雅釋詁剗裂也大庖不剗謂不自割裂與不斲不鬪一律說詳呂氏春秋

任動者車鳴也

樾謹按高注曰任者輦也詩曰我任我輦此說失之黍苗篇我任我輦我車我牛毛傳曰任者輦者車者牛者鄭箋曰有負任者有輓輦者有將車者有牽牛者是毛鄭皆以任輦爲二事若曰任者輦也亦將曰車者牛也其可通乎今按此任卽所謂任木也考工記軻人曰凡任木任正者十分其軻之長以其一爲之圍衡任者五分其長以其一爲之圍鄭康成說任正衡任未得其義宋戴侗六書故曰任正者軻也衡任者軸也近世學者程氏瑤田則謂必在輿下者始足當任木之名隧深四尺四寸軻在四尺四寸下者任正也車廣六尺六寸軸在六尺六寸下者衡任也金氏榜則謂凡任木縱者皆名任正橫者皆名衡任任正者軻也伏兔也衡任者軸也衡也其說皆本戴氏而推之可以說此文任動車鳴

之義。

使但吹竽。使氏厭竅。雖中節而不可聽。

樾謹按高注曰。但古不知吹人。此殆望文生訓。且既不知吹矣。又何能中節乎。文子上德篇作使倡吹。等使工搃竅。然則但氏二字乃倡工之誤。倡也工也。特爲異名以別之。明非一人。實則同義。蓋倡與工雖善吹竽。然必自吹之而自厭之。若一人吹竽。一人厭竅。則雖中節而不可聽矣。韓子外儲說右篇曰。田連成竅。天下善鼓瑟者也。然而田連鼓上成竅。攢下而不能成曲。此意卽淮南所本。倡也工也。猶曰。田連也成竅也。彼舉其人以實之。此則不舉其人耳。倡字闕壞而成但字。隸書工或作互。氏或作互。二形相似。故工誤作氏。高據誤本作注。曲爲之說失之矣。

颶狃之捷來乍。

樾謹按高注訓乍爲暫疾。而以疾擊取之。申明其義。此曲說也。乍與作通。當讀爲斲爾雅釋器。魚曰斲。之禮記內則篇作魚。曰作之。卽其例也。成二年公羊疏引樊光曰。斲砍也。砍乃斫之俗字。斫者擊也。狃。猶之捷來斲。謂見斫擊也。方與上句虎豹之文來射文義一律。繆稱篇曰。狃狃之捷來。摺高注曰。摺刺。刺擊義亦相近也。

穀立三十幅。各盡其力。不得相害。使一輻獨八。眾輻皆棄。豈能致千里哉。

樾謹按文子上德篇作轂虛而中立是此文轂下脫虛而中三字一輻文字作一軸亦當從之蓋一軸在轂中三十輻在轂外若一軸獨八而三十輻皆棄卽不成爲輪矣故不可以致千里也

蘇秦步曰何故趨曰何趨馳

樾謹按此當作蘇秦步曰何步趨曰何趨馳曰何馳因首句高注有何故二字遂誤正文何步爲何故而馳下又脫曰何馳三字則文不成義矣

的者獲提提者射

樾謹按高注曰的明也爲衆所見故獲提提安也王氏念孫謂的的提提皆明也引管子白心篇爲善乎無提提爲證其說得之矣惟未說獲字之義今按的的猶提提也獲猶射也兩句實止一意儀禮鄉射禮篇者獲坐而獲鄭注曰射者中則大言獲是古謂射中爲獲上句言獲下句言射變文以成辭耳

扶之與提謝之與讓故之與先諾之與已也之與矣相去千里

樾謹按故之與先本作得之與失草書得字作乃故字作抜兩形相似隸書失字或作失先字或作先兩形亦相似因誤得爲故誤失爲先耳之與矣三字衍文也蓋校者見淮南舊本有得之與失句因補注於諾之與已也下而傳寫又脫得字且誤失爲矣耳文子上德篇正作扶之與提謝之與讓得之與

失諾之與已相去千里可據以訂正。

待利而後拯溺人亦必以利溺人矣。

樾謹按以字衍文高注曰利溺人者利人之溺得其利也則其所據本無以字。

聖人處於陰衆人處於陽聖人行於水衆人行於霜。

樾謹按四語相對成文且陽霜爲韻非有脫誤文選洛神賦注引作聖足行於水無迹也衆生行於霜有迹也太平御覽天部引作聖人行於水無迹衆人行於霜有迹也是許叔重注引者并注文舉之使其意明顯耳王氏念孫欲據以增入正文然則處於陰處於陽下又將增入何語乎足知其非矣。

寅丘無壑泉原不溥。

樾謹按寅丘謂大丘也方言夤大也廣雅釋詁同寅卽夤之假字言丘雖大而無壑則泉原不溥也下文曰尋常之壑灌千頃之澤尋常言其小則寅丘必言其大矣高注以爲汙潦水名非是。

摵和切適。

樾謹按高注曰摵轉也轉其和更作急調然則正文疑當作摵和適切切者急切也適猶之也往也言轉其和平之音而適於急切之調也。

尾生之信不如隨牛之誕。

樾謹按高注曰：隨牛弦高矯君命爲誕以存國。然隨牛未知何人。據人間篇注曰：蹇他弦高之黨未聞其有隨牛也。隨牛疑當作隨生。卽謂漢初之隨何也。生猶先生也。史記儒林傳索隱曰：自漢已來儒者皆號生。亦先生省字呼之耳。然則稱隨何爲隨生。乃漢時常語也。隨何爲漢初辯士。故曰尾生之信不如隨生之誕。陸士衡漢高祖功臣頌曰：隨何辯達。因資於敵。紓漢披楚。唯生之績。此卽隨何稱生之證。發一端散無竟。周八極。總一筦。謂之心人間。

樾謹按總一筦三字當在周八極之上。蓋言發於一端而散於無竟。總於一筦而周於八極。猶下文所云執一而應萬也。兩句誤倒失其義矣。

歸而封孫叔敖辭而不受病疽將死。

樾謹按諸書無言孫叔敖以病疽死者。疽乃广且二字之誤。病將二字皆衍文也。說文广部：广，痼也。人有疾痛，象倚著之形。是古疾病字止作广。其從矢之疾，蓋疾速字而非疾病字也。後人以疾爲广，疾行而广廢矣。广且舛也。其事亦見列子說符篇。呂氏春秋異寶篇並作疾將死。將猶且也。彼作疾此作广。古今字耳。因广且二字誤合爲疽字。後人乃於上加病字。下加將字。失之矣。

楚國之俗功臣二世而爵祿。惟孫叔敖獨存。

樾謹按二世而爵祿文義未完疑本作二世而奪祿下文曰夫孫叔敖之請有寢之丘沙石之地所以累世不奪也奪字卽承此而言因奪與爵草書相似又以文在祿上故奪誤爲爵耳夫所謂孫叔敖獨存者存其寢丘之地也祿也非爵也不當兼言爵韓子喻老篇作楚邦之法祿臣再世而收地亦言祿不言爵則爵字之誤無疑矣

魯君聞陽虎失

樾謹按失當讀爲逸荀子哀公篇其馬將失楊注曰失讀爲逸是其證也桓八年左傳隨侯逸杜注曰逸逃也陽虎逸卽陽虎逃古字逸與佚通故亦通作失

智伯求地於魏宣子宣子弗欲與之

樾謹按弗欲與之本作欲弗與之下文求地而弗與卽承此而言戰國趙策作魏桓子欲勿與虞之與虢相恃而勢也若假之道虢朝亡而虞夕從之矣

樾謹按勢字義不可通疑本作相恃而存也呂氏春秋權勳篇曰夫虢之不亡也恃虞虞之不亡也亦恃虢也若假之道則虢朝亡而虞夕從之矣卽淮南所本虢不亡恃虞虞不亡恃虢故曰相恃而存也今本誤作勢者蓋因呂氏春秋此文之上有虞虢之勢是也句韓子十過篇亦有虞虢之勢正是也句疑淮南不當無此句因以意竄改非其舊矣

此吉祥以饗鬼神。

樾謹按吉祥下脫也字列子說符篇論衡福虛篇並作此吉祥也當據補。

近塞上之人有善術者。

樾謹按近謂近時也此蓋淮南舉近事言之故曰近非連塞字爲義也班孟堅幽通賦北叟頗識其倚伏卽用此事而云北叟者以下文言胡人大入塞故知是北方之塞耳乃顏師古注漢書敍傳引此文作北塞上之人蓋涉正文北叟而誤非顏注之舊是以李善注文選幽通賦止云塞上之人若使本作北塞則正宜引之以證北叟之義安得刪去之惟其是近字故可有可無也後漢書蔡邕傳得北叟之後福李賢注曰北叟塞上叟也但言塞上不言北塞上然則淮南子原文不作北塞明甚而蓺文類聚太平御覽引此文並作北塞上之人則爲漢書注所誤王氏念孫反據以訂正淮南謬矣下文近塞之人死者十九則當作塞上之人漢書後漢書注文選注及諸類書所引無作近塞者可知近字之非然亦無作北塞者又可見此文作北塞上之誤矣

無害子之慮無中於策謀無益於國然而心調於君有義行也。

樾謹按調當爲周楚辭離騷雖不周於今之人兮王逸注曰周合也心周於君謂心合於君也作調者古字通用文子微明篇正作心周於君

以詐僞遇人雖愈利後無復。

樾謹按愈當爲愉。古偷字也。周官大司徒職以俗教安則民不愉。釋文云。愉音偷。是其證也。愉利卽偷利。謂雖偷取利。而後不可復也。呂氏春秋義賞篇曰。雖今偷可。後將無復。

至其日之夜。

樾謹按其當作期。謂所期之日之夜也。韓子十過篇正作至於期日之夜。

佞人得志。是使晉國之武舍仁而後佞。

樾謹按後字義不可通。乃從字之誤。佞人得志。故晉國之士皆舍仁而從佞也。晉國之武。卽晉國之士。淮南一書通謂士爲武。

陳成常果攻宰予於廷中。而弑簡公於朝。

樾謹按攻乃殺字之誤。殺宰予弑簡公。君臣異辭。其實一也。下文曰廷殺宰予。是其明證。

郿公作難。

樾謹按郿昭伯魯大夫。不得稱郿公。乃郿氏之誤。上文云郿氏介其雞。是其明證也。今作郿公者。涉下文魯昭公出走而誤。又按魯昭公出走句。王氏念孫謂衍公字。以上下文皆四字句故也。然上文云簡公遇殺。身死無後。疑此文本作昭公。昭公不稱魯。猶簡公不稱齊。後人誤加魯字。遂致句法參差。而王

氏乃議刪公字失之矣。

西屬流沙北擊遼水東結朝鮮。

樾謹按擊字無義疑馨字之誤爾雅釋詁馨盡也言北盡遼水也史記作起臨洮至遼東至卽有盡義哀公默然深念憤然自反

樾謹按憤然非自反之貌憤疑墮字之誤周易繫辭傳夫坤墮然示人簡矣虞注曰墮安也馬注曰柔貌皆與自反之義合上文孔子讀易至損益未嘗不憤然而歎王氏念孫謂憤然當作噴然此誤墮爲憤猶彼誤噴爲憤皆形似而誤古書從賁從貴之字往往相亂詳見讀書櫟志

武王蔭喝人於樾下

樾謹按注曰樾下衆樹之虛也此注未得精神篇曰當此之時得祐樾下則脫然而喜矣注曰楚人樹上大本小如車蓋狀爲越言多蔭也越讀經無重越之越也此注得之越樾古同字而前後異說疑有許高之異繆稱齊俗道應詮言兵略人間泰族要略八篇標目下無因以題篇四字與它篇不同或許注也因無墮證故不別言之

子發盤罪威王而出奔

樾謹按盤罪二字甚爲無義盤疑本作服服古字作𦥑與般字相似往往致誤爾雅釋詁服宜貫公事

也。釋文曰：服又作般。荀子賦篇：讒人服矣。楊注曰：服本或作般，並其證也。服誤爲般，因又誤爲盤耳。服者負之假字。考工記車人注：鄭司農曰：服讀爲負，是負服一聲之轉。古得通用。服罪威王而出奔，言其負罪而出奔也。高注曰：盤辟也是其所據本已誤。

禹沐浴露雨櫛扶風脩務

樾謹按：浴字衍文。王氏念孫已訂正矣。扶字疑卽疾字之誤。隸書疾字或作疾。見圉令趙君碑。扶字作扶。見桐柏廟碑。兩形相似，故誤耳。莊子天下篇：禹沐浴甚雨櫛疾風。卽淮南所本。

夫地勢水東流人必事焉。然後水潦得谷行。

樾謹按：高注曰：水勢雖東流人必事而通之，使得循谷而行也。然循谷而行謂之谷行，甚爲不辭。且水注谿曰谷。水之東流豈必循谷而行乎？於義亦不可通。谷疑沿字之誤。沿字缺壞，止存右畔之呂，因誤爲谷矣。荀子禮論篇榮辱篇：楊倞注並曰：沿循也。然則沿行者循行也。高注本作循沿而行，蓋以循訓沿耳。又下文說申包胥事曰：於是乃羸糧跣足跋涉谷行。夫申包胥自楚至秦，非必行於谷中，且其下說所經歷之地曰：峭山曰深谿，曰川水曰津關，乃獨以谷行二字冠之，則於文轉爲不備矣。谷亦沿字之誤。沿亦循也。申包胥恐爲吳軍所得，不敢從正路循沿邊際而行，故曰沿行。楚策載此事曰：於是羸糧潛行，是其義也。

憤於中則應於外故在所以感

樾謹按感下本有之矣二字傳寫脫之則文義未完文子精誠篇正足故在所以感之矣世俗廢衰而非學者多人性各有所脩短若魚之躍若鶴之駿此自然者不可損益

樾謹按非學者多下有闕文或是言字或是曰字未敢臆補蓋人性各有所脩短云云乃世俗非學者之說意謂人性之自然者非學所能損益也下文吾以爲不然則淮南自爲破之之說使未嘗鼓瑟者

樾謹按瑟當作琴上文云然而搏琴撫弦此與相應不容異文

然而莫能至焉者偷慢懈惰多不暇日之故

樾謹按不字衍文多暇日者謂其人偷慢惰懈而不學故多暇日也今衍不字失其指矣荀子脩身篇曰其爲人也多暇日者其出入也不遠矣卽淮南所本

此所謂名可彊立者

樾

樾謹按彊立本作務立上文名可務立功可彊成高注曰務事也然則此亦當言務立今作彊立者乃後人據文子精誠篇改之不知彼上文云名可強立功可強成與此文本不相同不得據彼以改此也戰而身死卒勝民治全我社稷可以庶幾乎

樾謹按治字衍文。本作卒勝民全。此時但求民之全。不當計其治不治也。後人誤以全字屬下句讀。故妄增治字耳。楚策作社稷。其庶幾乎。無全字。然則此全字上屬無疑。

申包胥竭筋力以赴嚴敵。伏尸流血。不過一卒之才。不如約身卑辭。求救於諸侯。

樾謹按竭筋力以下。皆申包胥之言也。申包胥下當有曰吾二字。而今脫之。楚策曰棼冒勃蘇曰吾被堅執銳赴強敵而死。此猶一卒也。不若奔諸侯。是其明證。

琴或撥刺枉撓闊解漏越。而稱以楚莊之琴。側室爭鼓之。

樾謹按側室二字無義。高注曰。側室或作廟堂也。廟堂亦無義。疑淮南原文本作則。尙士爭鼓之。尙與上通。尙士卽上士也。考工記桃氏爲劍。弓人爲弓。並有上士服之之文。故此言琴。亦曰上士鼓之也。上文曰。今劍或絕側羸文。齧缺卷鉢。而稱以頃襄之劍。則貴人爭帶之。兩文相對。此曰則上士爭鼓之。猶彼曰則貴人爭帶之也。因假尙爲上。而尙士二字誤合爲堂字。淺人因改則字爲廟字。高所據或本是也。又因古本實是則字。遂改堂字爲室字。而加人旁於則字之左。使成側字。高所據本是也。皆非淮南之舊。

藜藿之生蠻蠻然。日加數寸。不可以爲櫨棟。

樾謹按高注曰。櫨屋也。然則正文及注文並當作廬。漢書食貨志注曰。廬。田中屋也。故高注訓廬爲屋。

以爲廬棟猶曰以爲屋棟說山篇曰郢人有買屋棟者彼云屋棟此云廬棟其義一也因棟字從木遂并廬字而亦誤從木作櫨櫨者柱上析也若是櫨字何得以屋訓之本經篇標株櫨櫨高注曰櫨柱上柎卽梁上短柱也然則高氏非不知柱上柎之義何以於此篇必變其說乎且以文義言之日加數寸言其長也屋棟之木必取其長若櫨則短柱耳以方木爲之其形如斗故亦謂之斗拱非必長木乃可爲之何取於日加數寸者乎

一言聲然大動天下泰族

樾謹按聲然二字文不成義聲當作磬涉上文四海之內寂然無聲而誤也周書太子晉篇師曠磬然又稱曰孔注曰磬然自嚴整也是其義也下文故聖人者懷天心聲然能動化天下者也聲然亦磬然之誤能讀爲而

奚仲不能旅魯般不能造

樾謹按旅字無義疑放字之誤廣雅釋詁放效也言天地所生者雖奚仲不能放效之雖魯般不能造作之也高注曰旅部旅也其所據本已誤

故聖人懷天氣抱地心

樾謹按文子精誠篇作懷天心抱地氣是也上文云故聖人者懷天心則此文亦當作懷天心矣懷天

心之文既與文子同則下句亦當作抱地氣矣傳寫誤耳上文故聖人者懷天心下疑亦當有抱地氣三字今闕此句文義不備

巢枝穴藏

樾謹按枝乃歧字之誤巢歧穴藏相對成義史記梁孝王世家索隱引通俗文曰高置立歧棚曰歧閣卽此歧字之義巢高故言歧穴深故言藏

乃澄列金木水火土之性故立父子之親而成家

樾謹按故立當從文子上禮篇作以立王氏念孫已訂正矣惟木水二字傳寫誤倒當作水木蓋金水木火土相生之序故本之以立父子之親也

故勇者可令進鬪而不可令持牢重者可令埴固而不可令凌敵貪者可令進取而不可令守職廉者可令守分而不可令進取信者可令持約而不可令應變五者相反聖人兼用而財使之

樾謹按勇者當作輕者上文云故用兵者或輕或重或貪或廉此四者相反而不可一無也輕者欲發重者欲止貪者欲取廉者不利非其有然則此承上文而言亦當以輕重貪廉對舉其本作輕者明矣淺人不尋上下文理見有進鬪之文妄改爲勇者非其舊也又按上言四者而下言五者義亦可疑且輕與重反貪與廉反所謂四者相反也信則與何者相反乎乃云五者相反義不可通疑信者可令持

約而不可令應變十二字。淺人竄入淮南本無此句。五者亦作四者。與上文相應。因竄入信者句。遂改四爲五以合之。而不悟其不可通耳。

小見不達必簡。

樾謹按小上當有道字。因涉上句小覩破道。兩道字適相連。寫者之於上句道字下作二小畫以識之。而遂脫去也。見乃則字之誤。則字闕壞。止存左旁之貝。因誤爲見矣。達下當更有達字。亦因止作二小畫而脫去也。其文本曰。道小則不達。達必簡。文子上仁篇作道小必不通。通則必簡。與此文小異而義同。若如今本。則不成文理矣。

故不言而信。不施而仁。不怒而威。是以天心動化者也。

樾謹按天心動化。本作無心動化。因無字作无。故誤爲天耳。文子上仁篇。亦作天心。誤與此同。而精誠篇曰。一言而大動天下。是以无心動化者也。无字不誤。可據以訂正上仁篇。即可以正淮南子矣。

夫欲治之主不世出。而可與興治之臣不萬一。

樾謹按興字衍文。蓋卽與字之誤而衍者。高誘注呂氏春秋觀世篇引此文曰。欲治之君不世出。可與治之臣不萬一。是其明證。文子下德篇亦無興字。乘衰而流。

樾謹按衰乃等衰之衰。水之從高流下必有次第。故曰乘衰而流。高注訓衰爲下。未得。王氏引之因以衰爲衰之誤字。更非矣。

故百川並流不注海者不爲川谷。

樾謹按既云百川。則不得又云不爲川。川字衍文也。後人因下句云不爲君子。故妄增川字。使字數相當耳。文子上義篇。正作不注海者不爲谷。

使人左據天下之圖而右刎喉。

樾謹按刎下當有其字。文子上義篇作左手據天下之圖。而右手刎其喉。

天下大利也。比之身則小。身之重也。比之義則輕。

樾謹按身之重也。本作身。句所重也。與天下句大利也。一律涉上下句兩言比之而誤。文子上義篇作身之所重也。比之仁義則輕。所字不誤。之字亦涉上下句而衍。

昭王奔隨。百姓父兄攜幼扶老而隨之。乃相率而爲致勇之寇。皆方面奮臂而爲之鬪。

樾謹按乃相率而爲致勇之寇。文不成義。當作乃相率爲勇而致之寇。與下句相對。致如致師之致寇。卽謂吳人也。言致死於吳也。下文曰。各致其死。卻吳兵復楚地。是其義也。王氏念孫改爲相率致勇而爲之寇。然百姓卻敵。初非爲寇。於義不可通矣。

天地之間無所繫戾。

樾謹按繫戾當爲擊戾。主術篇曲得其宜。無所擊戾是也。擊戾猶拂戾也。擊者，轂之戾字。說見荀子脩身篇。

故因其患則造其備。

樾謹按因乃困字之誤。言困於患難則造作其備也。與下句犯其難則得其便一律。

又況知應無方而不窮哉。犯大難而不懼。見煩繆而不惑。晏然自得其爲樂也。豈直一說之快哉。

樾謹按知應無方而不窮哉句。衍知字哉。應無方而不窮。犯大難而不懼。見煩繆而不惑。三句一律。皆蒙又況二字爲文。因涉上文欲知高下。欲知輕重。欲知遠近。而誤衍知字。則與下二句不一律。遂於句末加哉字。使自爲句。而文義隔絕矣。

根深則本固。

樾謹按根卽本也。不得云根深則本固。本乃末字之誤。上文云草木洪者爲本。而殺者爲末。是也。後人習於根本之說。遂妄改爲本字。失其義矣。根深則末固。與下句基美則上甯一律。說文木部曰。木上曰末。然則末卽木之上也。末固上甯。文異而義同。王氏念孫據上文猶城之有基木之有根。謂本當作木。然則下句上字亦當作城字矣。下句不言城。知此句亦不言木。王說非也。

師曠曰此亡國之樂也大息而撫之。

樾謹按撫下脫止字本作大息而撫止之史記樂書作師曠撫而止之韓非子十過篇作師曠撫止之論衡紀妖篇作曠撫而止之並有止字是其證

故事有鑿一孔而生百隙樹一物而生萬葉者

樾謹按生百隙本作開百隙涉下句而誤也

下文曰所鑿不足以爲便而所開足以爲敗是其證

懼爲人之惛惛然弗能知也要略

樾謹按爲字涉下句多爲之辭博爲之說而衍本作懼人之惛惛然弗能知也與下文又恐人之離本就末也一律衍一爲字則文不成義

發號施令以時教期

樾謹按期當讀爲基宣二年左傳楚人基之杜注曰基教也文選西京賦人基之謀薛綜注曰基教也是基與教同義故曰以時教基

標舉終始之壇也

樾謹按高注曰壇場也然終始不當以壇場言此注未得其義壇當讀爲壇說文女部壇一曰傳也精神篇以不同形相壇也高注曰壇傳也終始之壇卽終始之傳作壇者段字也

一盃酒白蠅漬其中。

樾謹按酒白二字文不成義。疑本作白酒。而傳寫誤倒之。周官酒正職鄭注曰。昔酒今之曾久白酒。然則白酒正漢時常語。藝文類聚碟器部引此白作甘。蓋因已倒爲酒白。故臆改爲甘字。一盃酒甘亦於義不安。未足據也。

諸子平議卷三十三

楊子太元

火魁頤水包貞中

樾謹按諸家本皆作大魁頤。溫公從王涯本作火魁頤。與水包貞對文是也。惟魁字義當從范望訓藏。周次三吉凶之魁。積次七魁而顏而元告篇神之魁也。范並曰。魁藏也。魁之訓藏。他書所無。而范注屢見。必有所受之說。文衣部裏袖也。一曰藏也。訓魁爲藏。蓋讀魁爲裏。魁裏並從鬼聲。故得通也。說文包部。包象人裹妊。是則裏與包同義。故曰火裏頤水包貞。漢書外戚傳晉灼注曰。包藏也。是裏包皆藏也。測曰。會會之包。任臣則也。言包不言裏。以其義同耳。因段魁爲裏。學者但知有魁首之義。而范注遂莫之從矣。

拔車山淵殼

樾謹按山疑出字之誤。言拔其車而出之於淵也。范望注雖亦有山字。然曰民溺於世。惟大位能濟之也。則其所據本必作拔車出淵。若作山淵。則淵可言溺。山不可言溺也。注中山字。或後人竄入。非其舊耳。次六測曰。將車入虛道不得也。拔車出淵。與將車入虛文正相對。

將其車入于丘虛。

樾謹按丘字衍文也。次七出險登丘或牽之牛。范注曰：火生土故爲丘。彼丘字有注。此丘字無注。知所見本無丘字也。因注云：將車入險在於丘虛之中。故後人於經文增入丘字。不知注有丘字以足句耳。其下云：車以喻君。君而隨臣。臣道不正。猶入虛也。是可爲經文無丘字之證。測曰：將車入虛道不得也。亦無丘字。增次七丘貞。范注亦曰：火生土故言丘可。和七有丘象。六無丘象矣。且以義言之。次五曰：拔車出淵。次六曰：將其車入于虛。次七曰：出險登丘。蓋由淵而虛而丘。經文固自有次第也。今出淵誤作山淵。入于虛誤作入于丘虛。全失其義矣。

閑于遠篠或寢之廬閑。

樾謹按范本作遠除。王涯宋惟幹本作遠篠。溫公從宋衷陸續本作遠篠。然止字體之小異。古文以聲爲主。不足爲異同也。惟范訓遠除爲不能俯者。王訓遠篠爲傳舍。則皆失之。方言曰：簾。宋魏之間或謂之籩。苗其麤者謂之籩篠。上文次六閑黃埃。席金第。王曰：埃古雉字。謂城也。第竇也。此云閑于遠篠。或寢之廬。廬則非黃埃之固。遠篠則非金第之安。兩贊之義正相反。然則遠篠當從方言訓簾矣。

赤臭播關。

樾謹按王曰：赤臭者陰陽交爭殺傷之象也。播於遠關之外。然播于遠關之外。而但曰播關似爲不辭。

燔疑當作燔。或字之誤。或聲同而借也。干次八日。赤舌燒城。此云赤臭燔。關兩文相近。燔猶燒也。關猶城也。

閑門以終虛。

樾謹按終衍文也。測曰。閑門以虛終不可實也。贊辭終字卽涉測辭而衍。

眇于謙少。

樾謹按范注曰。眇微也。溫公同。然測曰。不見謙也。則是以不見解眇字。當爲眇能視之眇。易釋文。眇盲也。

少持滿今盛後傾。

樾謹按持疑恃字之誤。惟其以滿自恃。故今盛而後傾也。若作持滿。則與持盈同。詩鳩鷺篇序曰。能持盈守成。國語越語曰。夫國家之事。有持盈有定傾。不當反以致傾危也。

女不女其心予。

樾謹按予猶我也。女子從人者也。今其心惟知有我。斯不女矣。所以覆夫謂也。范注曰。予我也。得其旨矣。又曰。我謂五也。則未必然。溫公謂予與與同非是。

殺生相午戾。

樾謹按范本作相矢。然其注云。矢乖也。則疑矢乃失字之誤。因其下云。射兕東南而矢西北。故乖。後人遂改失爲矢。不知范引次五之文以說此。贊射兕東南而矢西北正見乖失之意。今改經作相矢。改注文作矢乖也。不可通矣。必非范本之舊。諸家本作相午。違悟之與乖失義亦不甚遠耳。

思登于天。谷在于淵上。

樾謹按谷當作谷字之誤也。谷者郤之借字。古文以聲爲主。郤從谷聲。故卽以谷爲之。廣雅釋言。郤退也。郤入於淵。猶退入於淵也。思登天而退入淵。正由上無根之故。今字譌作谷。失其義矣。

陽扶物如鑽乎堅干。

樾謹按范王本作陽氣扶物而鑽乎堅。溫公從二宋陸本。然諸首辭多言陽氣者。如中首曰。陽氣潛萌于黃宮。周首曰。陽氣周神而反乎始。礪首曰。陽氣微動。閏首曰。陽氣閑於陰。皆是也。范王本作陽氣。未始不可從。至如與而古書通用。二宋陸本作如鑽乎堅。卽而鑽乎堅也。增首云。日宣而殖。二宋陸本亦作如。溫公於彼不從。於此從之。何歟。

蚩蚩于丘。餡或錫之坏。

樾謹按丘餡未詳何義。范注曰。丘聚也。餡。美食也。溫公曰。丘以喻高大。餡。餳也。以喻甘美。其義皆似未安。丘餡疑甌瓿之借音。說文瓦部。甌瓿謂之瓿。是也。甌從區聲。禮詎曲禮篇鄭注曰。嫌名謂聲音相近。

若禹與雨丘與區也是古音丘與區同故丘可讀爲甌至飴之與餗並從台聲義更可通矣范曰未成瓦曰坏溫公說同所求者甌餗而或錫之以未成瓦之坏故測曰蚩蚩之干錫不好也坏之與甌餗實爲同類之物但不好耳若釋飴爲美食爲餗則與坏絕遠矣豈楊子屬辭之旨乎

四馬就括羨

樾謹按括當讀爲膚說文广部膚芻橐之藏也軸折衡拐則車不可行故四馬反而就膚也膚從會聲括從昏聲兩聲相近話籀文作諺卽其例也詩車輶篇德音來括毛傳曰括會也括之訓會亦以聲近而義通儀禮士喪禮髻用組鄭注曰古文髻皆爲括尚書禹貢篇柵榦柏史記集解引鄭注曰柏葉松身曰括爾雅釋木篇則曰檜柏葉松身然則以括爲膚猶以括爲髻以榦爲檜矣

迷腹達目以道不明也達

樾謹按范本如此溫公從之宋陸本作以不道明似於義爲長蓋必達於腹而後達於目此明之以道者也今迷腹而達目則明不以道矣是謂以不道明范本誤

大圈閼閼小圈交之交

樾謹按管子幼官篇強國爲圈弱國爲屬然則范望訓圈爲國正得其解大圈小圈猶大國小國謂小國交於大國也王曰圈者穀羞之器溫公謂圈養畜閑也並與交之之義未合

不禍禍僕天活我僕

樾謹按測曰禍不禍非厥說也疑贊辭亦當作禍不禍范注曰近比於九秋氣將降禍不爲禍正釋禍不禍之義是范氏作注時經文未倒也下云故言不禍禍則後人據已倒之經文而改之進以高明其道迂也進

樾謹按迂大也蓋卽訏之假字爾雅釋詁訏大也字亦作盱周易豫六三盱豫釋文引王肅注曰盱大也又或作于書大傳名曰朱于鄭注曰于大也蓋于盱訏迂並聲近而義通禮記文王世子篇況迂其身以善其君乎正義曰迂猶廣也大也是其義矣進以高明故其道大范注以迂遠釋之非是

動之丘陵失澤朋

樾謹按范注曰朋類也此未得朋字之義古朋字與崩通史記齊太公世家隰朋集解引徐廣曰朋或作崩周易復彖辭朋來无咎漢書五行志引作崩來無咎並其證也此贊朋字當讀作崩言高以下爲基其下無澤則丘陵不能成其高而致崩壞矣測曰動之丘陵失下危也以失下危明失澤朋之義可知朋之當爲崩矣

柔嬰兒于號三日不嗄夷

樾謹按二宋陸王本嗄作喎溫公從范本作嗄然實以作喎爲長蓋此贊三句柔一字爲句喎與柔韻

若作嘆失其韻矣。玉篇口部嘆於求切。老子曰終日號而不嘆。嘆氣逆也。而今本老子亦皆作嘆。惟傅奕本作歎。尙爲近之。

或飫之徒。

樾謹按王曰徒猶空也。或飫者食徒空爾也。此說於義未安。溫公謂雖有美食不能食。適足飫其徒屬而已。然按之經文亦未允。協測曰食不足嘉也。豈謂有美食而不能食乎。徒蓋塗之假字。或飫之塗。卽所謂疇爾而與之行道之人不受者。故曰食不足嘉也。列子天瑞篇食于道徒者。道徒卽道塗。故釋文曰徒道旁也。以徒爲塗。正與此同。

臂膊脛如爭。

樾謹按王小宋本脛作脰。然脰爲鳥胃。於此殊非所施。溫公從大宋范陸本作脛。言臂大如脰不可使也。然脰如乃形容之詞。與下句股腳膾如一律。若以脰如爲如脰。則下句膾如當爲如膾。溫公曰膾音噴。肉脹起也。然則兩句不一律矣。脰當訓直。漢書楊惲傳注。脰脰直貌是也。臂膊脰如。言其不能屈伸也。爾雅釋詁。頸直也。禮記曲禮篇。鮮魚曰牷。祭鄭注曰。牷直也。脰與頸牷聲並相近。

丈人扶孤豎子提壺事。

樾謹按王曰。丈夫有扶持孤弱之事。然居次七曰。老夫攢車。少女提壺。與此贊辭義相近。攢車與提壺

並實指一事言。則扶孤與提壺亦當如之。若謂扶持孤弱之事。則虛實不倫矣。孤疑弧字之誤。國語晉語。侏儒扶盧。韋注曰。扶援也。然則扶弧者。援弧也。孟子告子篇。思援弓繳而射之。是其義也。丈人扶弧。小子提壺。弧壺對文。與周易睽上九。先張之弧。後說之壺。相似。大元本準周易。楊子所見周易。蓋與京馬鄭王本同也。

懷威滿虛毅

樾謹按范注曰。虛空也。雖威而消。故曰滿虛。然次三曰戴威滿頭。句法與此同。若訓虛爲空。則與滿成兩義。以次三之文例之。殆非然也。淮南子淑真篇。虛室生白。高注曰。虛心也。蓋虛訓空。故亦訓孔竅。淮南子汜論篇。若循虛而出入。注曰。虛孔竅也。訓孔竅故亦訓心矣。史記吳起傳。批亢擣虛。猶言批其亢。擣其心也。管子心術篇。心者智之舍也。淮南子詮言篇。虛者道之舍也。是虛與心義相近。更以本經證之。斷初一曰。斷心滅斧。失初一曰。刺虛滅刃。滅刃與滅斧同。則刺虛與斷心同矣。此云懷威滿虛。猶云懷威滿心。與戴威滿頭一律。盛次三懷利滿胷。次五何福滿肩。末一字皆屬形體。更可證矣。

不田而穀。穀于揀祿。

樾謹按宋陸王本。揀作棟。溫公從范本作揀。言剛果所施。施于擇祿而已。然揀祿之文。義殊未安。范望注云。五爲天子家性。穀穀然自亢。處高食祿。故不田也。是范氏並無揀擇之說。尋繹其意。所謂自亢者。

正釋棟字之義。周書作雉篇孔晁注曰重亢重棟也是棟與亢同。范氏所據本必亦作棟故以亢字釋棟字又以處高申明之見經文所謂毅于棟祿者棟則高亢之意祿則但知食祿之謂也若是揀字則注何以不及而所謂自亢與處高者何指乎次五毅于棟柱卽承此贊而言毅于棟祿處高食祿而已毅于棟柱則處高而有榰柱之功不徒食祿也兩贊意本相承後人不達因棟祿連文他書罕見遂妄改爲揀字非范本之舊溫公從之誤也。

蹠戰嗜嗜若熊若螭衆

樾謹按蹠卽虞字說文豕部虞鬪相𠂇不解也從豕虎豕虎之鬪不相捨是虞之本義爲兩獸相鬪老子曰猛獸不據鹽鐵論曰虎兕相據並卽虞字也彼從手作據此從足作蹠皆古文借字耳蹠戰卽以熊螭言溫公謂蹠當作劇非是。

其志資戚親

樾謹按范注曰資用也二爲平人未仕於世志在親戚骨肉王曰資取也戚親也其志惟取於相親附也此二說並非經義初一曰其志齟齬此曰其志資戚文法正同資戚與齟齬並雙聲字也資讀爲咨周易略例不諮于闔釋文諮本作資是其例也資戚猶咨戚訓用訓取分資戚爲二義胥失之矣。

準繩不甫法

樾謹謹范注曰甫始也然準繩不始甚爲不辭溫公訓爲美義亦未合甫當讀爲專說文寸部專布也昭三年左傳寡君使虎布之杜注曰布陳也然則準繩不專猶言準繩不陳禮記經解篇繩墨誠陳是其義矣

幽遇神及師夢遇

樾謹按范注師衆也此未得其解也衆次七師孕唁之哭且噴范曰師盲者也嘗次三師或導射范曰師爲瞽者也此贊師字亦當同之蓋所遇者神已爲幽矣而又見夢於無目之人幽益甚也

兌人遇雨

樾謹按易繫辭傳潤之以風雨又曰上棟下宇以待風雨虞注並曰兌爲雨然則兌本有雨象蓋雨者水氣兌爲澤故爲雨也兌人言處川澤之人以兌人而遇雨故測曰還自賊也范注以兌爲巫說之雖亦用易義然非楊子之旨

陽蓬其外大

樾謹按范本蓬作逢溫公從二宋陸王本作蓬宋曰蓬猶盛也其實逢亦盛也禮記儒行篇衣逢掖之衣鄭注曰逢猶大也荀子非十二子篇其衣逢楊倞注曰逢大也逢訓大則亦卽與盛同義矣蓋逢與豐通淮南天文篇五穀豐昌史記天官書豐作逢是其證也訓大訓盛皆豐字之義是故作逢者豐之

假字作蓬者。逢之異文。溫公疑逢無盛義。必作其葉蓬蓬之蓬。始得訓盛。是猶未達乎古訓也。雉之不祿而鷄蠶穀文。

樾謹按宋陸本而下有不字。蓋卽而字之誤而衍者。王本無而字。則更非矣。溫公從范本。是爲得之。惟未解蠶字之義。方言蠶餘也。秦晉之間。炊薪不盡曰蠶。廣雅釋詁亦曰蠶餘也。雉之不祿而雞蠶穀言。雉不祿而雞有餘穀也。

子序不序永

樾謹按上序字疑衍文。蓋卽子字之誤而衍者。王云子而不居子之次序。則祭祀賓客長無主矣。疑王涯所據本正作子不序。而溫公不言有異同。蓋寫者改從旣衍之本矣。居次三長幼序。子克父。宋陸王本並同。而范本作長幼序。序誤亦類此。

決欲招寇積

樾謹按王本決作快。當從之。方言。逞曉挾苦。快也。自關而東。或曰曉。或曰逞。自關而西。曰快。然則快欲猶逞欲也。逞欲故招寇矣。諸家作決。乃字之誤。溫公從之。非是。

前尸後喪沈

樾謹按尸當訓陳。言前雖陳列之後。終喪失也。故測曰。終以貪敗也。王曰。危亡之道。相繼而至。故前尸

後喪未得其旨

爾儀而悲坎我西階內

樾謹按范注曰坎憂也親迎之道婦升西階有代親之義故悲也然坎我西階甚爲不辭且旣言悲不必更言憂矣范說非也坎乃次字之誤次者卽也說文塗古文作壘是次卽古音相同尙書康誥勿庸以次女封荀子致士篇宥坐篇並引作勿庸以卽是次與卽通用也次我西階者卽我西階也范引婦升西階爲說是矣

睭提明晦

樾謹按睭當從小宋音眇云一目盲也范云睭目不明也意亦與眇同眇從目少聲睭從目肖聲少與肖並從小聲其聲同也本或誤從日王涯以爲古宵字然宵何以從日乎殆不然矣提字之義自來莫得其解王云提明白照提明謂燭之類其說至爲鄙陋提當爲眴說文目部眴迎視也睭眴明謂眇而視明正周易眇能視之義范本明下有德字因測而誤溫公已正之

天禍以他第

樾謹按他古字作佗說文人部佗負何也負何故有加義詩小弁篇予之佗矣傳曰佗加也字亦作扠易訟上九終朝三褫之鄭本作扠云三加之也佗扠字異義同然則天禍以他猶曰天禍以加故測曰

逢不幸也。范注以爲不偶天禍。非是。王曰。咎非他作。亦於文義未合。

車纍馬攢。行可鄰也。止、

樾謹按大戴記子張問入官篇。故不先以身。雖行必鄰也。盧注訓鄰爲鄰。蓋鄰者。遴之假字。說文。辠部。遴。行難也。行難則宜。止而不行。故亦得訓鄰。此云行可鄰也。謂其行可以鄰退也。范注謂止於鄰里。失之矣。

弓善反弓惡反止、

樾謹按范注云。善反詩云四矢反兮。言反其故處也。惡反者。不善發則偏然反也。此注非是。弓善反弓惡反。言弓善者亦反。弓惡者亦反。與下文善馬很惡馬。很義正一律。不曰善弓惡弓。而曰弓善弓惡。故與下文錯綜其辭。見文法之變。亦猶論語迅雷風烈。楚辭吉日兮辰良之比耳。善惡以弓言。不以反言。注以善反惡反爲說。則兩反字義異矣。

成微改改未成而殆成、

樾謹按殆當讀爲怠。詩元鳥篇受命不殆。鄭箋云。受天命而行之不解殆。論語爲政篇思而不學則殆。何晏注曰。徒使人精神疲殆。解殆與疲殆。其字並當作怠。而作殆者古字通也。此贊言成之尙微。而改之又改。則未及其成而先已解怠矣。故測曰。不能自遂也。王以危殆釋之。非是。

羈角之吾勤

樾謹按吾當讀爲牙。後漢書崔駰傳注童牙謂幼小也是其義也。牙吾古同聲故得通用。猶驕吾之或爲驕牙矣。管子海王篇吾子食鹽二升少半。尹注曰吾子謂小男小女也。與此吾字義同。王曰吾者吾吾然無所歸之貌。此未得其義而曲爲之說。

闕也皆合二而密也。成用一元錯。

樾謹接成乃咸字之誤。咸用一與皆合二相對爲文。范注曰二氣協和而成一是其所據本已誤矣。親附疏割犯血。

樾謹按血與疏對文則血是親近之意。猶言骨肉也。

疑者提之元攤

樾謹按范注曰提猶正也。然提無正義。且於文亦未合。提當爲題。說文見部題顯也。從見是聲。疑者題之謂使之明顯也。提亦從是聲。故得通用耳。

纖也入巖

樾謹按巖字無義。當讀爲巖。說文大部巖空大也。玉篇大部巖空也。空與孔同。謂其纖細者可入乎孔穴之中也。

榆漏率刻元瑩

樾謹按范注曰。榆猶寫也。則榆當讀爲榆。說文手部。榆引也。榆訓引故得訓寫作榆者。假字或字之譌也。

噴情也。抽理也。瑩事也。昭君子之道也。

樾謹按上云。陰陽所以抽噴也。從橫所以瑩理也。明晦所以昭事也。此當云抽噴也。瑩理也。昭事也。方與上合。今抽噴誤作噴情。情字蓋卽噴字之誤而衍者。於是移抽字以易下句瑩字。而瑩理誤作抽理矣。又移瑩字以易下句昭字。而昭事誤作瑩事矣。至昭字無下句可易。因置之下句之首。楊子原文本作抽噴也。瑩理也。昭事也。君子之道也。今作昭君子之道也。此昭字卽昭事之昭。其致誤之由。尙歷歷可指耳。

爲猛元數

樾謹按許翰曰。唐人避諱書多改虎爲猛。此字疑當作虎。而未有本證定。然范注曰。金堅剛也。則晉時已作猛矣。非唐人改也。又按以虎爲猛。楊子書固自有之。養次七。小子牽象。婦人徵猛。君子養病。范注曰。婦人謂四三爲虎。而四在前。故徵猛。然則以虎爲猛亦非自唐人避諱始也。若謂彼文正避唐諱而改。則固不然。象猛養三字爲韻。若本文作虎。則非韻矣。故知不然也。

爲大哆。

樾謹按許翰曰丁宋無此一句今考范望本此句無注是范本亦無此一句也當刪
辰辰未戌丑

樾謹按許曰多作辰戌丑未今從丁宋本然范注曰辰取其延長未取其冥昧戌取其悉丑之言畜
也是亦以辰未戌丑爲次今作辰戌丑未寫者誤耳非范本之舊

二爲方沮

樾謹按沮與且通婁壽碑榮且溺之耦耕且卽沮也方沮當爲方且廣雅釋詁方始也莊子庚桑楚篇
與物且者釋文且始也是方且並有始義一爲規模二爲方且言規模旣定始爲之也范注謂將有事
而自止非是

蒙南方也夏也物之修長也皆可得而戴也元文

樾謹按許昂黃伯思本均作載范注曰枝葉已成蒙覆於上皆可叢載者是范本亦作載然叢載自是
兩義蒙則叢也而非載也不當并爲一談而以叢載說蒙字之義也章簪丁謂郭元亨本並作戴戴與
蒙義合自以作戴爲長

福則有膊禍則有形之謂直

樾謹按𦨇字無義乃端之假字𦨇從耑聲端從耑聲兩聲相近禮記雜記篇載以轎車注云轎或作樽史記屈原賈誼傳何足控搏索隱云本作控揣文選長笛賦冬雪揣封乎其枝注曰揣與團古字通並專耑聲近之證𦨇之爲端猶樽之爲轎搏之爲揣團之爲揣也福則有𦨇猶云福則有端正與禍則有形文義一律

日月相解星辰不相觸元搃

樾謹按解與觸同義御覽八百三十引風俗通曰解者角也廣雅釋言曰角觸也然則相解猶相角相角猶相觸也日月歲十二會故相解星辰不相干犯故不相觸解與觸變文以成句耳其義一也范曰解量也非是

輿物旁震元圖

樾謹按丁謂本輿作與是也下文云與物時行正與此句一律涉上文百卉權輿下文天地輿新故誤作輿耳

南征不利遇崩光

樾謹按章晉本作遇乎崩光宋惟幹本遇於崩光並非也范注曰陽而南征與陰相遇光明崩毀故不利然則遇崩光謂相遇而崩毀其光若作遇乎崩光或作遇於崩光均不可通矣讀者因此篇多四字

爲句故妄增之然下文曰天地人功咸曾貞亦七字句
天甸其道

樾謹按詩信南山篇維禹甸之周官稍人注引作維禹匱之是甸與匱通古田陳同聲甸通作匱亦猶齊陳氏之爲田氏也說文支部匱列也今經典皆以陳爲之天甸其道者天陳其道也范注曰甸之言挺也言天挺立其道於上未得其義

歲寧悉而年病元告

樾謹按日躔黃道一周歷春夏秋冬四時共三百六十五日有奇是爲一歲月離白道一周歷朔弦望晦復追及日而合朔十二合朔共三百五十四日有奇是爲一年歲與年較多十一日弱所謂氣盈也年與歲較少十一日弱所謂朔虛也歲寧悉卽氣盈之謂年病卽朔虛之謂寧乃語詞諸本或作能能亦語詞也悉者盡也自立春至大寒而歲實始盡然正月朔日立春至十二月晦日尙未至大寒是年病也病者病其不足也於是三年必置閏焉故下文曰十九年七閏天之償也范注曰一歲之數足則年安不足則病混歲年而一之然則足與不足於何見之乎

諸子平議卷三十四

楊子法言一

羿逢蒙分其弓學行

樾謹按分字之義不可通。當讀爲焚。文十一年左傳獲僑如之弟焚如。史記魯世家作棼。如爾雅釋天。焚輪謂之積。釋文作棼。曰本或作焚。然則分之通作焚。猶棼之通作焚也。羿逢蒙焚其弓。正與下文良舍其策。般投其斧一律。

川有瀆山有嶽高而且大者衆人所不能踰也。

樾謹按李軌注曰。言諸賢之有妙蘡。猶百川之有四瀆。衆山之有五嶽。而川可度。嶽可登。高而且大者。惟聖人之道。如天不可升也。宋咸曰。觀正文之意。當云高而且大者。衆人所不能踰也。脫其不字矣。何以明之。或人問般羿周孔之名。如一楊以川有瀆山有嶽而對之。是謂般羿之徒。猶川山周孔之道。猶嶽瀆。自然小大不同。高低有異矣。故下篇亦云。仲尼之道。猶四瀆也。由是詳之。楊之旨皆以嶽瀆比聖人明矣。注不能辨。但依誤文以爲之解。反謂聖人之道。如天不可升。且正文安有如天之說哉。吳祕曰。周孔顏子之道。如山川之有嶽瀆。豈曰處一而已。羿逢蒙良般之蘡。如山川高而且大者。甚衆人所能

踰也。今按正文初無如天之說。李氏增益其義。誠非楊子雅意。然宋著作謂其依誤文爲解。則非然也。李云。高而且大者。惟聖人之道。如天不可升也。則其所據本作高而且大者。衆人所不能踰也。明矣。使無不字。何以有天不可升之說哉。推尋李意。直以論語有他人丘陵。仲尼日月之說。疑嶽瀆未足擬聖人之高大。故必極之於天。然後見人之不能踰也。以是言之。李本當有不字。宋氏糾之。反爲疏矣。惟吳司封本實無不字。故云羿逢蒙良般之蘗。如山川高而且大者。甚衆人所能踰也。音義謂俗本脫不字。殆指此而言然也。字古通作邪。荀子正名篇。其求物也。養生也。粥壽也。楊倞注曰。也。皆當爲邪。問之辭。今依此讀之。衆人所能踰也。猶曰衆人所能踰邪。雖無不字。其旨亦同。疑楊子原文本如此。其有不字者。乃後人不達古語。而臆加之音義所斥爲俗本者。轉是古本矣。

桐子之命也。

樾謹按桐者。侗之假字。法言序云。天降生民。倥侗顓蒙。卽此桐子之桐。序用正字。經用假字耳。李注曰。桐洞也。桐子洞然。未有所知之時。夫洞有通達之義。故淮南子原道篇。遂兮洞兮。高誘注曰。洞達也。此乃云洞然。未有所知。義不可通。疑注文洞字。卽侗字之誤。注本云。桐侗也。侗子侗然。未有所知之時。蓋不破經字。而卽以訓詁明假借用毛傳例也。莊子山木篇。侗乎其無識。正李注所本矣。宋著作以經文桐字爲誤。又譏李氏依誤文訓爲洞。恐皆失之。至吳司封以桐子爲太甲。則不達假借之旨。務穿鑿而。

喜新奇宋以後說經者多此類矣

或曰顏徒易乎曰晞之則是曰昔顏嘗晞夫子矣正考甫常晞尹吉甫矣公子奚斯常晞正考甫矣不欲晞則已矣如欲晞孰禦焉

樾謹按晞之則是上已有曰字而其下又有曰字明世德堂本遂將上曰字刪去然晞之則是明是楊子應語不得以爲或人問也以文義求之上曰字不當刪下曰字當在正考甫句上因或人問顏徒易乎故應之曰晞之則是昔顏嘗晞夫子矣又恐或人聞此疑夫子大聖非人所能晞故又曰正考甫嘗晞尹吉甫矣公子奚斯嘗晞正考甫矣不欲晞則已矣如欲晞孰禦焉古人之文往往有一人之辭而亦加曰字以別之者若禮記檀弓篇公瞿然失席曰是寡人之罪也曰寡人嘗學斷斯獄矣哀十六年左傳乞曰不可得也曰市南有熊宜僚者若得之可以當五百人矣論語憲問篇子曰若臧武仲之知公綽之不欲卞莊子之勇冉求之藝文之以禮樂亦可以爲成人矣曰今之成人者何必然微子篇齊景公待孔子曰若季氏則吾不能以季孟之間待之曰吾老矣不能用也皆加曰字以別更端之語此文亦猶是耳不然楊子之意自以顏晞夫子爲主至正考甫公子奚斯不過泛舉之以小見大以淺見深若其閒無曰字以別之則顏之晞夫子正考甫之晞尹吉甫公子奚斯之晞正考甫直是一律而論漫無主賓之辨矣

吾不覩參辰之相比也。是以君子貴遷善遷善者聖人之徒與。

樾謹按君子貴遷善與參辰之不相比意不相承下文云百川學海而至于海丘陵學山不至於山是故惡夫畫也頻頻之黨甚於鷁斯亦賊夫糧食而已矣頻頻之黨與惡畫之義亦不相承疑此兩節傳寫互誤楊子蓋因參辰之不相比而戒人之黨比游晏故曰頻頻之黨甚於鷁斯廣雅釋訓曰頻頻比也李軌注亦以黨比游晏釋之則與參辰之不相比意正一貫矣至君子貴遷善乃申明惡畫之義遷善是不畫也兩節傳寫互易而其義皆不可通今訂正如左。

吾不覩參辰之相比也頻頻之黨甚於鷁斯亦賊夫糧食而已矣。

百川學海而至於海丘陵學山不至於山是故惡夫畫也是以君子貴遷善遷善者聖人之徒與。

吾聞先生相與言則以仁與義市井相與言則以財與利如其富如其富。

樾謹按如其富言如何其以富也重言之者深疾之之辭此句法本於論語之如其仁如其仁孔安國注云誰如管仲之仁增字解經頗非經旨以楊子之意推之則如其仁者不許之也孔子於管仲但許其事功之盛而未嘗予之以仁故其意若曰論管仲者但以事功論之足矣如何其以仁也如何其以仁也卽下章民到於今受其賜可謂推許之至而於仁字固不及也非楊子此文則孔子之意不見矣吾子篇或問屈原智乎曰如玉如瑩爰見丹青如其智如其智此與孔子之論管仲正可互明蓋若

管仲者論其事功可也不必論其仁也若屈原者論其志節可也不必論其智也楊子以法言擬論語正在此等處吳秘注曰如何其智如何其智非智也卽所以說論語之如其仁矣

使我紓朱懷金其樂不可量已

樾謹按不字衍文已當從世德堂本作也邪古字通其樂可量也猶云其樂可量邪與上文衆人所能踰也文法一律學者不達古語妄增不字又改也字爲已字失其舊矣文選鮑明遠擬古詩李善注引此文正作使我紓朱懷金其樂可量也當據以訂正

有教立道無心仲尼有學術業無心顏淵

樾謹按術當讀爲述禮記祭義篇結諸心形諸色而術省之鄭注曰術當爲述韓勅後碑其術韓君德政張表碑方伯術職樊敏碑臣子褒術並以術爲述皆其證也述業與立道正相對有教立道作者之謂聖也有學述業述者之謂明也又按音義曰天復本心作止當從之言立道不止則爲仲尼述業不止則爲顏淵也李宋吳本並作心於義難通溫公從之非是

或問蒼蠅紅紫曰明視吾子

樾謹按蒼蠅當以聲言此乃與紅紫並以色言義似可疑李注曰蒼蠅閒於白黑夫蒼蠅則何閒於黑白之有疑楊子原文本作蒼驥驥與蒼皆色也周易說卦傳震爲龍虞翻本龍作驥云驥蒼色字亦通

作旄文選思元賦尉尨眉而郎潛兮舊注曰旄蒼也是蒼驃同義故得連文廣雅釋器蒼青也故亦曰青驃史記匈奴傳其西方盡白馬東方盡青驃北方盡烏驃南方盡駢馬然則李注所稱閒於白黑其卽本史記爲說與

如玉如瑩爰見丹青

樾謹按宋龔鼎臣東原錄曰嘉祐中予在國子監與監長錢象先進學官校定李軌注楊子法言後數年乃於唐人類書中見如玉如瑩一義惜其未改正也或問屈原智乎曰如玉加瑩爰見丹青軌注曰夫智者達天命如玉加瑩磨而不磷往日不知其誤遂改軌注以就文義爾以上皆龔說今按華嚴經音義引倉頡篇曰瑩治也爾雅釋鳥篇釋文曰瑩磨瑩也如玉加瑩爰見丹青言屈原之放逐猶玉加磨瑩而成文采也說文玉部引逸論語曰如玉之瑩然則楊子此文自有所本今作如玉如瑩不可通矣當據龔說訂正

足言足容德之藻矣

樾謹按學行篇曰吾未見好斧藻其德若斧藻其稟者也然則德之藻矣自是美之之辭容猶用也釋名釋姿容曰容用也字亦通作庸莊子胠篋篇容成氏六韜大明篇作庸成氏是也庸亦用也足言足容謂既足以言之又足以用之斯其言非空言乃德之藻飾也李注曰足言夸毗之辭足容威施之面

言皆藻飾之僞非篤實之真恐非楊子之意今試連上文讀之或問君子尙辭乎曰君子事之爲尙事勝辭則伉辭勝事則賦事辭稱則經然則足言足容所謂事辭稱者正申明君子事之爲尙也上文並未言及容儀烏得分言容而二之乎

升東嶽而知衆山之峛崺也況介丘乎

樾謹按廣雅釋詁介獨也此介字當訓獨與衆山相對爲義

多聞則守之以約多見則守之以卓

樾謹按卓亦約也莊子大宗師篇彼特以天爲父而身猶愛之而况其卓乎郭象注曰卓者獨化之謂也是卓有獨義說苑君道篇踔然獨立踔與卓同多聞則守之以約多見則守之以卓並謂聞見宜多而所守宜少也蓋卓與約本疊韻字莊子逍遙游篇淖約若處子文選上林賦便嬛綽約此云守之以約守之以卓亦猶淖約綽約之比變文以成辭初無異義也溫公注曰約謂擇其精要卓謂取其高遠強爲區別未達古人用字之法矣

熒魂曠枯糟孽曠沈修身

樾謹按熒魂以喻輕清之氣糟孽以喻重濁之質糟者酒之滓孽者米之皮也其輕清者日以枯其重濁者日以沈斯盲矣柳宗元注以糟爲精之誤而訓孽爲目精之表殆失其旨李注曰孽孰也義亦未

安。

簾瓢捽茹。

樾謹按捽讀爲啐。禮記雜記篇主人之酢也。嗜之衆賓兄弟則皆啐之。鄭注曰。嗜啐皆嘗也。嗜至齒啐入口。

仁以人之間道。

樾謹按禮記中庸篇。仁者人也。鄭注曰。人也。讀如相人偶之人。以人意相存問之。言仁以人之當從此讀咸曰。有仁則人必歸之。光曰。仁者人道之常。均未達古義。

佗則荅。

樾謹按咸曰。荅當爲蒙字之誤也。然荅與蒙雖並從艸。其下絕不相似。安得致誤。祕曰。荅荅耳也。荅耳徒有其名而無聆聞之實。然上文言惟聖人爲可以開明。此當從目取喻。不當從耳取喻也。光曰。荅音聆。闕蓋於二說皆未安。故闕其義。今按荅當讀爲答。說文竹部。答車答也。釋名釋車曰。答橫在車前織竹作之。孔荅荅也。此言惟聖人爲可以開明。其佗則如車答然所見者小矣。

閉之閼然不覩牆之裏。

樾謹按此卽所謂不得其門而入。不見宗廟之美。百官之富者。上句云。開之廓然。見四海。言聖道之大

也此云閉之閼然不覩牆之裏言聖道之深也李注云不開聖卷喻無所見非楊子之意祕曰自背之道不見數仞之內光曰不學牆面皆仍李注之誤夫智用不用益不益則不贅虧矣

樾謹按宋吳二說皆未解贅虧之義溫公謂有餘曰贅不足曰虧是也惟疑不爲衍字非也凡物用之則虧益之則贅知者以不用爲用以不益爲益用而不用是不虧也益而不益是不贅也故曰夫智用不用益不益則不贅虧矣文義甚明亦無衍字舊說均失之

或問太古塗民耳目

樾謹按塗當讀爲斂說文丹部𦥑篆下引周書惟其斂丹𦥑今書梓材篇作惟其塗丹𦥑是塗與斂通也說文支部斂閉也從支度聲讀若杜經典卽以杜爲之尙書柴誓篇杜乃擾周官雍氏注引作斂乃擾是也斂民耳目者謂閉塞民之耳目也若以今字書之當云杜民耳目矣

若牛羊用人則狐狸螻螻不臘臘也與

樾謹按李注曰臘八月旦也今河東俗奉之以爲大節祭祀先人也臘臘也見禮記是但釋臘臘二字之義而於狐狸螻螻未有發明咸曰臘猶也冬則獵取百獸故狐狸至是死矣呂氏春秋曰南呂之月蟄蟲入穴故螻螻至是絕矣夫以申韓刑名如牛羊之用人則人之生也何可久乎其趨死猶狐狸螻

螻不過乎膾臘之候矣。此說亦殊不可通。正文言狐狸螻不言人如狐狸螻不可通一也。正文言不膾臘也歟。若謂不過乎膾臘之候。當云不膾臘矣。如左傳云虞不臘矣。於義方合。詠歎之文。非所施也。不可通二也。且冬日雖獵取百獸。然狐狸之類不應便絕。而云不過此候。不可通三也。尋楊子之意。直以申韓之法行。則人死者多屍相枕籍。狐狸螻得饜其肉。如人遇膾臘有酒食醉飽之樂。故曰狐狸螻不膾臘也。與正與上文牛羊用人相應。以人爲牛羊。則食之者必狐狸螻也。自來未達此旨。如申韓。如申韓。

樾謹按兩言如申韓。謂如何其用申韓也。與學行篇如其富如其富。吾子篇如其智如其智。淵騫篇如其寢如其寢。同義祕曰。豈如申韓之法。光曰。如申韓者何足爲法。皆未達楊子語意。

請問之。問神。

樾謹按之當作心。隸書相似而誤也。上文或問神曰心。故或人又請問心也。音義曰。天復本作請聞之。蓋旣誤心爲之。因又改問爲聞。以就其義。溫公從之。非是。

聖人以不手爲聖人。

樾謹按李軌注曰。手者桎梏之屬。義甚淺陋。咸曰。手當爲干。聖人雖爲紂囚。然終不干其刑。祕曰。手持也。執也。雖以非禮見囚。終不能執而戮之。此二說亦未安。旣見幽囚。安得云不干其刑。亦安得云終不

能執也。光曰。手謂人所提攜指使。枉己之道。而隨人左右也。如此說。則與羑里之間不相應矣。今按手當爲午。成二年公羊傳。曹公子手釋文曰。手本作午。是其例也。說文午部。午牾也。五月陰氣。午逆。陽冒地而出。釋名釋天曰。午忤也。陰氣從下上。與陽相忤逆也。然則不午者。不逆也。此言聖人之德。與神龍異。龍以不制爲龍。聖人則以不午爲聖人。記曰。素富貴行乎富貴。素貧賤行乎貧賤。素夷狄行乎夷狄。素患難行乎患難。君子無入而不自得焉。此不午之義也。文王之囚於羑里。正所謂素患難行乎患難。何損于文王之聖乎。

惜乎書序之不如易也。

樾謹按書有序。易亦有序。今序卦傳是也。序卦傳。自盈天地之間者。唯萬物。故受之以屯。至物不可窮也。故受之以未濟終焉。皆以意義聯貫。其或闕失。可以推求。故上文曰。易損其一。雖憲知闕焉。至書序。則但云爲某事。作某篇。不相聯貫。故上文曰。至書之不備過半矣。而習者不知此。或人歎書序不如易之意也。自來說此者。皆未明曉。吳說略近之。宋以大衍虛一說上文。易損其一誤甚矣。

狄牙能喊。

樾謹按李注曰。喊。咂物聲也。然義不可通。吳曰。喊。聲也。直訓爲聲。更無義矣。喊者誠之異文。從口與從言同。詠咏詒吟。即其例也。說文言部。誠和也。廣雅釋詁。誠調也。狄牙能喊。謂狄牙能和調也。戰國魏策

曰易牙乃煎熬燔炙和調五味而進之所謂狄牙能喊矣又按狄牙卽易牙猶簡狄漢書古今人表作簡遏也溫公以狄爲儀狄牙爲易牙失之

面相之辭相適

樾謹按之字絕句相之相適對文成義溫公曰之亦適也宋注非

著古昔之嗁嗁傳千里之忞忞者莫如書

樾謹按忞忞與嗁嗁同義史記屈原傳受物之汶汶索隱曰汶汶猶昏暗不明也汶汶卽忞忞也李注曰嗁嗁目所不見忞忞心所不了得其義矣宋吳從本義訓爲勉非是

或問經之艱易曰存亡或人不諭曰其人存則易亡則艱

樾謹按光曰人當作文字之誤也今以下文證之頗以溫公之說爲是下文曰延陵季子之於樂也庶矣乎如樂弛雖札末如之何矣夫人如延陵季子而樂弛則無如何是所重者在其文不在其人也下文又曰如周之禮樂庶事之備也每可以爲不難矣如秦之禮樂庶事之不備也每可以爲難矣是難不難由於備不備益足見經之艱易存乎文矣溫公所改殆非無見

或曰君子病沒世而無名盍勢諸名卿可幾也

樾謹按李注曰勢親也名卿親執政者也言何不與之合勢以近名也祕曰言何不附勢於有名之卿

可以近名也。二注大略相同。以下文求之。則似皆失其義。且失其讀矣。此當以盍勢諸三字爲句。古勢力字止作執。種執字亦止作執。蓋本一字耳。盍勢諸卽盍執諸。執猶樹也。襄三十一年左傳。吾子盍與季孫言之。可以樹善。正與此言盍執諸同意。名卿可幾也。五字爲句。名可幾是一事。卿可幾又一事。下文梁齊趙楚之君。非不富且貴也。惡乎成名。是對名可幾而言。谷口鄭子真不屈其志。而耕乎巖石之下。名振於京師。豈其卿。豈其卿。是對卿可幾而言。

愆語君子不出諸口。

樾謹按李於愆下出注曰。欲聞其義。是愆一字爲句。或人問辭也。吳讀同。然義實未安。愆字當合下語字爲句。愆語者過愆之言也。過愆之言。君子不出諸口。咸曰。恥言之也。正得其義。或宋固以愆語連讀乎。

不聰實無耳也。不明實無目也。問明。

樾謹按兩實字皆當爲是。不聰是無耳也。不明是無目也。非實無耳無目也。是通作寔。故爾雅釋詁曰。寔是也。寔通作實。故詩韓奕篇鄭箋云。趙魏之東。實寔同聲。然則實亦可通作是矣。

如庸行翳路衝衝而滔。君子不貴也。

樾謹按咸曰。翳塞也。衝衝多也。祕曰。翳路言多也。然上文言明哲。此文宜與相應。但言其多。不相應矣。

漢書甘泉賦迺登夫鳳皇兮而翳華芝注引韋昭曰翳隱也如庸行翳路謂以庸愚之人而行翳隱之路也衝說文作衡本從童得聲此衡字卽上文童蒙之童因或人言童蒙則滔故楊子應之曰衡衡而滔君子不貴也字不作童而作衡者承上庸行翳路爲文故從行作衡也此古人屬辭之法後世解此者希矣

舉茲以旃不亦寶乎

樾謹按旃字義不可通咸曰旃之也言舉此諸德以議之莊亦寶也則增出議字矣旃疑稱字之誤禮記射義篇注曰稱猶言也

靈場之威宜夜矣乎

樾謹按李注曰靈場鬼神之壇祠也靈壇所以爲威可冥夜不可經白日偏謬之談可獨說不可核諸實此未得楊子之意也楊子因或問堯讓天下於許由而爲此說靈場者禪位之壇也鄭康成注尙書大傳曰古者天子命大事命諸侯則爲壇國之外堯聚諸侯命舜涉位居攝致天下之事使大錄之其後漢魏之事循用此義故魏公卿上尊號奏有曰遵大鹿之遺訓遂於繁昌築靈壇皇帝乃受天子之籍云云此靈場之義也楊子以爲帝者禪位其事至大其禮至嚴若如或說堯讓天下於許由則以天下之重輕相傳受靈場之威不必在白日而宜乎在冥夜矣豈其然乎故曰靈場之威宜夜矣乎說者

誤以靈場爲鬼神壇祠斯失其義且如李說靈場之威實宜於夜矣乎之文施之不當矣

或問韓非作說難之書而卒死乎說難

樾謹按下難字衍文也此本云韓非作說難之書而卒死乎說蓋傷其知說之難而終以說秦王爲李斯姚賈所毀害致死也太史公曰余獨悲韓子爲說難而不能自脫耳亦是此意今作死乎說難義不可通且如此則或人已知韓非之死由於說難矣何以楊子又應之曰說難蓋其所以死乎然則此文卒死乎說下不當有難字蓋涉上下文並言說難而衍

如賢人謀之美也詘人而從道如小人謀之不美也詘道以從人寡見

樾謹按如猶與也如賢人謀者與賢人謀也如小人謀者與小人謀也如與聲近故得通用說見王氏經傳釋詞

古者之學耕且養

樾謹按此本作古之學者耕且養傳寫誤倒耳古之學者與下文今之學也相對爲文上句用者字下句用也字亦猶論語陽貨篇惡紫之奪朱也惡鄭聲之亂邪樂也惡利口之覆邦家者孟子盡心篇孩提之童無不知愛其親者及其長也無不知敬其兄也並以者也互用是其例也

魯不用真儒故也

樾謹按祕曰齊人歸女樂季桓子使定公受之三日不朝孔子行言不聽孔子故也此恐非楊子之意上文曰昔在姬公用於周而四海皇皇奠枕於京孔子用於魯齊人章章歸其侵疆是楊子固以魯人爲能用孔子矣豈有甫言其能用而又言其不能用乎且如吳說但當曰魯不用儒足矣何以言不用真儒乎蓋或人所問魯用儒而削自指魯穆公時事鹽鐵論相刺章曰昔魯穆公之時公儀爲相子柳子原爲之卿然北削於齊以泗爲境南畏楚人西賓秦國或人此問意亦猶是楊子則以公儀諸人皆未足爲真儒必如周公孔子乃見用儒之效故曰魯不用真儒故也孟子告子篇魯穆公之時公儀子爲政子柳子思爲臣魯之削也滋甚是魯穆公以用儒而削自戰國時已有此說子思疑亦當作子原不然何以反列子柳之下且果用子思不得謂非真儒矣觀楊子不用真儒之說益見穆公之未能用子思也

奔壘之車

樾謹按光曰奔壘謂馬驚逸抵敵壘者此未解奔字也說文天部奔走也從天賁省聲故賁與奔古通用詩鶉之奔奔禮記表記引作鶉之賁賁是也奔壘當作賁壘射義賁軍之將鄭注曰賁讀爲僨僨猶覆敗也大學此謂一言賁事釋文曰賁本又作僨猶覆敗也然則賁壘之車謂車之覆於壘者下句沈流之航謂舟之沈於流者兩文正相對隱三年左傳鄭伯之車僨於濟車以僨言古語然也僨通作賁

又通作奔。而學者據本字說之，失其義矣。

此页空白

諸子平議卷三十五

楊子法言二

因往以推來雖千一不可知也五百

樾謹按千謂千歲一謂一歲從其極疏者言之或千歲而生一聖人從其極數者言之或一歲而生一聖人故曰雖千一不可知也李軌注曰千歲一人一歲千人不可知也夫聖人之生必無一歲千人之理疑李注本作一歲一人傳寫誤耳祕曰雖千年一聖亦未可知也則但從其疏者言於義爲不備矣若是則仲尼之開跡諸侯也非邪

樾謹按國語晉語夫樂以開山川之風呂氏春秋樂成篇夫開善豈易哉韋昭高誘注並曰開通也然則開跡者通跡也如魯兩生之不有行則絕跡於漢廷矣故以孔子之歷聘諸侯爲通跡也宋訓開爲開布於義未安吳分開跡爲二義則更失之

不聽正諫而不用噫者吾於觀庸邪無爲飽食安坐而厭觀也

樾謹按不聽正當從宋讀作不聽政溫公亦云正與政同也噫當作意意者吾於觀庸邪七字爲句邪乃語詞蓋託爲孔子之言若曰意者吾將於此觀彼庸庸者邪故又曰無爲飽食安坐而厭觀也楊子

書每以庸爲庸衆之稱。問明篇甚矣。聖道無益於庸也。又曰。如庸行翳路。宋吳並以庸愚釋之。此文庸字亦當與同。因悞噫爲意說者。遂不得其解。宋吳本又增雉字於噫字之上。於義益不可通矣。

世人之益者倉廩也。取之如單。

樾謹按。如讀爲而古字通用。故李注曰。有時而盡。

或問聖人占天乎。曰。占天地。

樾謹按。地疑也。字之誤。下文史以天占人。聖人以人占天。但言天不言地。可證地字之誤。

德隆則暑。星隆則暑德也。

樾謹按。暑者日景也。古人以土圭致日景。以定南北。易通卦驗所謂樹八尺之表。日中視其晷是也。故楊子卽借暑爲推測之義。言君德隆盛。則當暑之於星。以驗德之至與不至。星象隆盛。則當暑之以德。以驗星之應與不應也。吳訓暑爲規。本之釋名。意蓋近之。惜所說不了。咸曰。暑影也。猶影蔽之也。義殊未安。光曰。影從形者也。德崇則星從而祥。星崇則德從而壞。夫星崇何以壞德。此說甚不可通。且正文但言暑星暑德。亦不得強爲區別也。

月末望則載魄於西。

樾謹按。李注曰。載始也。魄光也。載魄於西者。光始生於西面。以漸東滿。此古義也。咸曰。按周書召誥。惟

丙午朏傳曰。朏明也。月三日明生之名。康誥曰。惟三月載生魄。傳曰。三月始生魄。月十六日明消而魄生。是則朏爲明。魄爲晦矣。夫月未望者。卽始生明之時也。正文宜曰。月未望則載朏於西。今未望亦言魄。蓋字之誤。溫公從其說。故曰魄當作朏。明也。明始於西。以漸變魄。今以古義求之。則宋說非也。康誥篇釋文引馬云。魄。朏也。謂月三日始生兆。朏名曰魄。是朏卽魄矣。說文月部。霸。月始生霸然也。承大月二日。承小月三日。從月。翬聲。周書曰。哉生霸。以是言之。魄者。霸之假字。璧中古文本作霸。後人因經傳相承作魂魄字。遂誤以魄爲月質。而有死霸朔生霸望之說。與禮記鄉飲酒義月三日則成魄。白虎通三日成魄。八日成光之說。皆不合矣。是故康誥之惟三月載生魄。實卽洛誥之越若來。惟三月丙午朏。說詳羣經平議。此文云。月未望則載魄於西。旣望則終魄於東。始終皆以魄言。足徵僞孔傳之誤。而宋咸輒生異說。溫公亦爲之惑。信古義之久湮矣。

聆聽前世。清視在下。

樾謹按聆聽疊用無義。故宋吳本改作聆德。溫公從之。然其注曰。前世不可見。故云聽臣民今在下。故云視。則雖從作德之本。而仍不及德字之義。若然。德字爲贅設矣。宋吳之本。殆不可從。今按聆當作泠。泠與清本雙聲字。文選風賦曰。清清泠泠。蓋聲近者義亦相同。泠聽前世。清視在下。泠亦清也。楊子正以泠聽與清視相對爲文。後人不達。因其與聽連文。改泠爲聆。又因聆聽不宜疊用。而改聽爲德。愈改

而愈失其真矣。

先甲一日易後甲一日難先知。

樾謹按管子四時篇曰春三月以甲乙之日發五政夏三月以丙丁之日發五政秋三月以庚辛之日發五政冬三月以壬癸之日發五政是以周易稱先甲三日後甲三日蓋以春三月言也又稱先庚三日後庚三日蓋以秋之日言也楊子此文獨稱先甲則專以春言耳其三日一日皆行事之節如冠禮前期三日筮賓此先三日之例也子生三日卜士負之此後三日之例也祭禮前期一日視濯視牲此先一日之例也鄉射禮明日有息司正之事此後一日之例也說互見羣經平議先甲一日易後甲一日難卽所謂靡不有初鮮克有終耳舊說皆未得。

死者逋

樾謹按既死矣又何逋之有祕曰見死者逋逃而不葬光曰逃棄不葬皆就生者言亦曲爲之說耳逋乃膊之假字膊從專聲專從甫聲逋亦從甫聲故得通用說文肉部膊薄脯膊之屋上也方言膊暴露之外郊朝鮮冽水之間凡暴肉發人之私披牛羊之五藏謂之膊然則死者膊猶言暴露也正與上文死者葬相對。

或問民所勤

樾謹按僖二年穀梁傳不雨者勤雨也。釋文曰：糜氏音覲，集韻去聲二十二稺，勤渠客切。憂也。春秋傳勤雨，糜氏說此文勤字當從彼讀，音義無音失之。

吾見玄駒之步

樾謹按襄二十六年左傳左師見夫人之步馬者杜注曰：步馬，習馬，字亦作駢。玉篇馬部駢，益故切。習馬此云玄駒之步，蓋因蠻有駒名，故借用步馬之義。正古人屬辭之密。吳注但曰：步行也。未得其旨。

雷不一風不再

樾謹按李解上句曰：三令五申。解下句曰：制無二也。甚得楊子之旨。惜其說下句未了耳。易通卦驗曰：立春調風至。春分明庶風至。立夏清明風至。夏至景風至。立秋涼風至。秋分閏閏風至。立冬不周風至。冬至廣莫風至。是一時有一時之風。風不再謂不並至也。王者法之。故號令亦無錯出矣。光曰：一再言其少。游雷隨風乃能動物。三令五申乃能齊衆。然則一與再何必異其文乎。

聖人樂陶成天下之化，使人有士君子之器者也。

樾謹按宋吳本樂下有天字。然於義殊不合。疑天乃夫字之誤。聖人樂夫陶成天下之化，使人有士君子之器者也。其旨亦與李本不殊。因夫字誤作天。宋吳遂依誤本爲說，鑿矣。宜溫公不之從也。爲國不迪其法，而望其效，譬諸算乎。

樾謹按李注曰夫算者不運籌策不能定其數然正文並無不運籌策之說光曰譬如無財而運算終無益於富然正文亦無無財之說是二說皆以意增益非楊子意也算疑篡字之誤方言曰凡取物而逆謂之篡爲國者必先迪其法而後望其效今不迪其法而卽望其效猶之乎逆而取之矣故曰譬諸篡乎論語陽貨篇譬諸小人其猶穿窬之盜也與亦以人事爲喻正與此同法言固擬論語而作也

蓋哉蓋哉應難未幾也重黎

樾謹按應難二字衍文也此本云蓋哉蓋哉未幾也李注曰再言蓋哉者應難以事未有近其理者是應難之文乃李氏解再言蓋哉之意猶言應之難也正文卽涉注而衍耳

迄始皇三載而咸

樾謹按始皇二十六年始并天下始稱皇帝而此言三載於義可疑祕曰蓋言稱皇帝後三年東行郡縣上鄒嶧山刻石頌秦功德封泰山禪梁父而天下咸一也此亦曲說矣今按重黎一篇多楊子之微言李注上文黃帝終始章曰深矣楊子之談也王莽置羲和之官故上章寄微言以發重黎之間而此句明言真偽之分也然則楊子之文固有深意矣夫始皇以二十六年并天下當時無不知之乃云始皇三載者故爲悠謬之辭以寓意也按漢書元始五年平帝崩莽稱攝皇帝改明年爲居攝元年至居攝三年十一月戊辰遂卽眞天子位以十二月癸酉朔爲始建國元年然則所謂始皇三載者其文則

指始皇其意則在新莽以居攝三年當始皇之二十六年使其文若謬誤者而其旨微其辭曲矣學者拘文牽義烏足以語此哉又按咸者戔之叚字說文戈部戔絕也讀若咸經傳卽以咸爲之尙書君奭篇咸劉厥敵周書世俘篇越五日甲子朝至接于商則咸劉商王紂咸皆戔之叚字也迄始皇三載而成謂至始皇三載而絕也李注云皆屬秦也訓咸爲皆失之

子弟且欲喪之況於民乎況於鬼神乎

樾謹按此論秦楚而秦楚初無子弟欲喪之事楊子是言豈虛設乎蓋爲王莽發也莽子字非莽隔絕衛氏恐帝長大後見怨與師吳章婦兄呂寬議其故使寬持血灑莽第門吏發覺之莽執宇送獄飲藥死其後皇孫功崇公宗坐自畫容貌被服天子衣冠自殺莽有宗屬爲皇孫爵爲上公不知厭足窺欲非望之語事在天鳳五年亦楊子所及見也然則所謂子弟且欲喪之殆以是而發乎至地皇二年太子臨與莽妻侍者通恐事泄謀其殺莽此則非楊子所及見然其言愈信而有徵矣重黎一篇雖論古人實寓時事上文或問趙世多神何也曰神怪茫茫若存若亡聖人曼云此刺莽之以符命自立也下文論韓信黥布云忠不終而躬逆焉攸令亦刺莽始以誅淳于長及徹去定陶太后坐獲忠直名而後乃躬爲大逆也孟子曰頌其詩讀其書不知其人可乎是以論其世也讀楊子書宜論其世矣

如矯世則葛溝尙矣

樾謹按葛溝未詳何義。李注曰：古者未知喪送之禮。死則裹尸以葛，投諸溝壑。然裹尸何必以葛？亦似曲說也。葛疑褐之叚字。周官蜡氏若有死于道路者，則令埋而置褐焉。褐溝言棄尸於溝而置褐其上，較之保葬爲更疏略矣。

攀龍鱗附鳳翼巽以揚之淵鑿

樾謹按光曰：宋吳本作巽以揚之。今從李本揚發揚也。是李本無巽字。盧氏弨弓云：李本巽作翼。不知翼者卽涉上句附鳳翼而誤衍。溫公但云揚發揚也。不及翼字之義。是其所據本無巽字，亦非別有他字也。今各本皆作巽以揚之。蓋據宋吳本加非李本之舊。

起臨洮擊遼水

樾謹按擊字無義。疑鑿字之誤。爾雅釋詁：鑿，盡也。言起臨洮而盡遼水也。史記作起臨洮至遼東。至卽有盡義。

力不足而死有餘

樾謹按力者功也。周官司勳治功曰力。是也。言蒙恬爲秦築長城，無救於秦之亡。以論功則不足以致死，則有餘矣。故曰力不足而死有餘。宋吳本死作屍。誤也。溫公從之。非是。

忠不足相也

樾謹按說文木部相省視也。從目從木易曰。地可觀者莫可觀於木。是相與觀義近。忠不足相也。猶曰忠不足觀也。不曰觀而曰朽。子雲好爲艱深之辭故耳。李注訓相爲助。將使誰助之乎。失楊旨矣。

實蜘蛛之靡也。

樾謹按李注曰。若蜘蛛之蟲小巧耳。然下文曰。實壯士之靡也。實刺客之靡也。豈亦小巧之謂乎。祕曰。靡披靡而死也。光曰。謂靡爛也。義皆未安。靡與爲古音相近。故廣雅釋詁曰。靡爲也。蜘蛛之靡卽蜘蛛之爲。猶曰。是乃蜘蛛之所爲耳。下文兩靡字義同。

曼面爲姊。

樾謹按曼當讀爲鏝爾雅釋宮鏝謂之朽。說文木部朽所以涂也。是鏝者所以塗之具。故塗即可謂之鏝。鏝面者塗面也。音義曰。曼謨官切。塗面此說得之。祕曰。曼無也。使他人無所識認則不可通矣。

折節周昌汲黯。

樾謹按以周昌汲黯而謂之折節。義不可通。祕曰。折節言其能降也。夫彊直之人降則爲亂。若二公者天姿彊直而乃能降。其折節可尚矣。斯亦曲爲之說。非楊子意也。折疑抗字之誤。言其能抗節而不撓也。隸書亢字或作亢。華山碑禮與岱亢是也。凡從亢之字亦或作亢。劉寬碑亢浮雲之志。亢卽亢字。穀阤神祠碑於是穀阤以爲之夤。阤卽阤字。並其證也。此文抗字從隸體作抗形與折似。因誤爲折。吳氏

曲爲之說謬矣。

滕灌樊酈曰俠介。

樾謹按俠與夾通。尙書多方篇。爾曷不夾介。又我周王此卽楊子所本。一切經音義十二引倉頡曰。夾輔也。爾雅釋詁曰。介助也。夾介猶言輔助。說詳羣經平議。李注曰。此四人前後輔夾高帝。得其義矣。吳說非。

叔孫通曰。繫人也。

樾謹按李注謂見事敏疾。未詳其義。據五百篇。楊子以魯兩生爲大臣。則其不滿於叔孫通也甚矣。不當如李氏說也。祕曰。叔孫通采古禮與秦儀襍著漢儀。簡牘之人也。繫猶牘也。此說亦殊未安。繫疑當爲斬。大元上初一挫厥斬斬。溫公解爲挫其銳。進躁急之志。叔孫通不知禮樂百年而後興。而急欲爲之。豈非所謂斬斬者乎。故楊子以爲斬人。斬字依說文本作鑿。茲作繫者。或亦如鑿之與繫古本一字耳。

曰。血國三千。使捋疏飲水。褐博沒齒無愁也。

樾謹按咸曰。昔禹會塗山。執玉帛者萬國。於商周之世已漸并之矣。故至漢世但可三千而已。此說殊謬。古之建國。蕩然無存。安得云可三千乎。祕曰。周一千八百國。而漢郡國一百三。縣邑千三百一十四。

云三千者蓋貨殖之人倍取於國且言其多此亦曲爲之說非楊意也今按漢書王莽傳始建國四年授諸侯茅土諸侯之員千有八百附城之數亦如之是合諸侯與附城凡三千六百國血國三千依莽制言之舉成數耳楊子此文蓋亦有譏焉是時以圖簿未定未授國邑且令受奉都內月錢數千諸侯皆困乏至有庸作者楊子因或問貨殖而應之曰蚊又復爲此言若謂彼貨殖者亦猶蚊之爲蟲食人之血以生耳今天下建國三千彼得國者亦將血之以自肥也乃使之擇疏飲水褐博沒齒無愁邪句末也字當讀爲邪楊子書多有此文法學行篇衆人所能諳也其樂可量也並以也爲邪說已見前矣上文已有曰字而此復有曰字乃更端之語溫公謂衍字非也說此文者皆不達血國三千之義故不得其解

陳平之無悟

樾謹按李注曰內明奇畫外無違悟疑其所據本作無悟說文午部悟逆也故注曰外無違悟若是悟字則違悟之文不相屬矣後人多見悟少見悟因改悟爲悟宋吳本又因悟字無義易以悞字而訓爲謬悞愈失其眞溫公反謂悞與忤同而從之其失甚矣

鼓之以道德征之以仁義

樾謹按征乃鉦字之誤詩采芑篇鉦人伐鼓傳曰鉦以靜之鼓以動之是鉦鼓相對爲文鼓之以道德

鉢之以仁義。猶言以道德動之。仁義靜之耳。今誤作征。殊失其義。

應諧似優。

穢謹按李注曰。似倡優也。下文不窮似哲。正諫似直。穢德似隱。哲也直也隱也。皆美名。不應首句言似倡優也。且似倡優矣。尙何名過其實之有。與問意亦不相應也。此優字乃優游之義。論語憲問篇皇侃疏曰。優猶寬閑也。左氏春秋序。優而柔之。正義曰。優柔俱訓爲安。寬舒之意也。皆可說。此優字之義。

或問航不漿衝不薺。有諸。

君子

穢謹按李注曰。樓航不挹漿。衝車不載薺。然薺有三說。文艸部。薺。蒺藜也。此一薺也。詩谷風篇。其甘如薺。釋文曰。薺菜也。又一薺也。禮記月令。靡草死。鄭注曰。靡草。薺亭歷之屬。又一薺也。此所謂薺。何薺乎。且草類亦多矣。何獨言薺乎。薺當爲蠶。周官醢人。以五薺七醢七菹三臠實之。鄭注曰。齊當爲蠶。凡醢醬所和細切爲蠶。然則航不漿衝不蠶。謂樓航不可挹酒漿。衝車不可盛薺醢也。漿與薺以類相從。作薺者段字耳。以本字讀之。則不倫矣。

玩而廉。

穢謹按上句柔而堅。堅與柔對。則此句必廉與玩對。祕曰。玩。猶珍也。廉。棟也。珍玩與廉棟。則不對矣。光

曰。玩當作刲。音完。謂廉而不劙如溫公說。則當改玩而廉謂廉而不玩矣。殆亦未得也。蓋溫公雖知玩爲刲之假字。而未得其義。凡物刲之則圜。楚辭懷沙篇。刲方以爲圜兮。是也。故史記酈生陸賈傳。刻印刲而不能授。集解引孟康曰。刲。刲斷無復廉鍔也。然則刲而廉。正與刲斷無廉鍔相反。漢書陳平傳。士之頑鈍。嗜利無恥者。如淳曰。頑鈍謂無廉隅也。孟子萬章篇曰。頑夫廉。頑與廉對。足證此文之義。以言之爲刲而廉。以人言之爲頑而廉矣。

隊乎其不可形也。

樾謹按宋訓隊爲衆。未知何據。祕曰。隊乎猶言垂之如隊。溫公從之。然玉之德多矣。何獨以下之如隊言之乎。說文心部。彖深也。隊疑彖之假字。或學者多見隊。少見彖。而改之也。惟其深故不可得而形矣。甚矣傳書之不果也。

樾謹按說文木部。果。木實也。木實謂之果。故果與實同義。淮南子道應篇高誘注曰。果誠也。誠卽實也。傳書之不果。言傳記之書多失實也。宋吳說果字皆未得其義。

如回之殘牛之賊也。焉德爾。

樾謹按焉德爾當作焉得爾。咸曰。言假令顏行之殘。冉行之賊。則安得不朽之壽如是哉。正釋焉得爾之義。因涉上文德故爾而誤耳。

天地裕於萬物乎。萬物裕於天地乎。孝至。

樾謹按世德堂本無兩乎字。然觀宋咸注曰。正文當云。萬物非裕於天地。疑脫其非字。裕饒裕也。天生萬物。非冀其報。故能饒裕於萬物。而萬物不能饒裕於天地也。是宋所據本亦無兩乎字。不然則豈不知其爲疑問之辭。而顧疑其脫非字乎。

是以祭不賓。

樾謹按以儀禮言之。則祭必有賓。楊子此言。非古制矣。祭疑齊字之誤。上文曰。夫能存亡形屬荒絕者。惟齊乎。故孝子之於齊。見父母之存也。此云是以齊不賓義。正相應。謂方齊之時。不接見賓客也。齊誤作祭。義不可通。宋吳之解。與禮不合。光曰。賓謂敬多而親少。如待賓客。則曲爲之說矣。

或曰。何以處僞。

樾謹按物居其所謂之處。使物各得其所。亦謂之處。魯語。夫仁者講功而知者處物。是其義也。故處即有審察之義。文十八年左傳。則以觀德。德以處事。大戴禮文王官人篇。以其聲處其氣。漢書谷永傳。臣愚不能處也。淮南子主術篇。援白黑而示之。則不處焉。其義並同。何以處僞。謂何以辨別其僞也。下文。楊子應之曰。有人則作之。無人則輒之。之謂僞。觀人者審其作輒而已矣。是告之以審察之道。故知此處字非居處之謂也。祕曰。何以居僞。失之矣。

知情地形不測。

樾謹按光曰知與智同是也咸曰知情天地者言知天地之情祕曰知天地之情其形不可測並誤讀知字矣知情地形不測與上文德諧頑嚚讓萬國相對爲文天地不能匿其情是謂情天地不測者無所隱其形是謂形不測舊說皆失之

不亦享乎

樾謹按享字無義乃厚字之誤隸書厚字或作厚婁壽碑高位厚祿是也亦或作厚度尙碑惠以厚下是也厚厚二形均與隸書享字作享者相似因誤爲享耳此言單于來臣禮之太厚也自來皆依誤本作注祕曰不亦施饗禮之盛乎增益其文殊非本義光印享當作亨亨猶泰也亦爲迂曲

周公以來未有如漢公之懿也勤勞則過於阿衡

樾謹按王莽居攝三年劉歆與博士諸儒議莽母功顯君服稱殷成湯既沒而太子蚤夭其子大甲幼少不明伊尹放諸桐宮而居攝以興殷道周武王既沒周道未成成王幼少周公屏成王而居攝以成周道是以殷有翼翼之化周有刑錯之功然則伊尹周公者莽居攝以前所以自比者也至始建國元年莽曰王氏虞帝之後也出自帝嚳劉氏堯之後也出自顓頊則不自以爲伊尹周公而以爲虞舜矣楊子仍以伊尹周公待之蓋不許其爲虞舜也楊子此言與阮嗣宗爲鄭沖勸晉王箋同意箋曰昔伊

尹有莘之媵臣耳。一佐成湯，遂荷阿衡之號。周公籍已成之勢，據旣安之業，光宅曲阜，奄有龜蒙，是亦以伊周比之也。末云：「令大魏之德，光於唐虞。」明公盛勳超於桓文，然後臨滄洲而謝支伯，登箕山以揖許由，豈不盛乎？是亦不許其爲虞舜也。此皆古人之微辭，後人鮮或能喻矣。或疑楊子旣不諂莽，何必爲此言？溫公釋之曰：晉袁宏作東征賦，不序桓彝陶侃，猶爲桓溫陶胡奴所刼。況楊子作法言，品藻漢興以來，將相名臣，而獨不及莽？莽能無恥且忿乎？溫公之論，亦屬膚淺。楊子特著此文，蓋有微意矣。法言一書，終以孝至。是篇論唐虞成周而終之，以漢上文。或問泰和曰：「其在唐虞成周乎？」又曰：「漢德其可謂允懷矣。」下文曰：「漢興二百一十載而中天，其庶矣乎？」終之曰：「唐矣！」夫蓋以漢德上媲唐堯也。中閒特著此文，以見漢祚中絕之由。且上言允懷，見民心之思漢也；下言中天，見漢祚之方半也。若無此文，則前後文之微意，皆不見矣。故依楊子之文觀之，自唐虞成周而漢漢，絕於新，新復爲漢，雁歷可數。至誠前知，楊子之謂矣。

辟廡以本之，校學以教之。

樾謹按：後漢書世祖建武五年初起太學，中元元年起辟廡。楊子之言，至是驗矣。上文漢興二百一十載而中天，柳宗元曰：「楊子極陰陽之數，此言知漢祚之方半耳，其信然乎。」

陳施于意序。

樾謹按意漢書作億李奇曰布陳於億萬事也溫公不言諸本有異同是其所據本皆作意然祕曰言陳施之動成萬法則吳司封本固作億也

幽宏橫廣

樾謹按宋吳及溫公本均作橫度當從之廣卽度字之誤耳惟橫度之義宋吳皆未得橫與光同書堯典光被四表後漢書馮異傳作橫被四表是也度與宅同堯典五流有宅史記五帝紀作五流有度禹貢三危旣宅夏本紀作三危旣度是也然則橫度卽光宅也書序昔在帝堯聰明文思光宅天下此卽

楊子所本

參差不齊一概諸聖

樾謹按舊讀皆於齊字絕句非也詩載駢篇毛傳曰進取一概之義正義曰一概者一端然則此云一概諸聖不可通也疑當於一字絕句淮南子脩務篇故立天子以齊一之是齊一連文之證惟其參差不齊一故必概諸聖也學行篇序曰訓諸理五百篇序曰經諸範此云概諸聖句法正同

中華民國二十四年四月初版

(00114)

國學基叢書諸子平議

每冊定價大

外埠酌加運費匯費

14.00

著作者俞樾

發行人王雲五

上海河南路五

印刷所

上海河南路五
商務印書館

發行所

上海及各埠
商務印書館

上海图书馆藏书



A541 212 0006 0766B

4654376



\$14.00